

**Naqqiut**

Siunnersuummut nassuiaatit 15. marts 2017 ullulerneqartut taarserpai  
(*Naqqiutit immikkoortuni ukunani aaqqinneqarnikuupput 1, 2, 4, 5, 6, aamma immikkoortoq  
8-mi aammalu immikkut ittumik paasissutissat attuumassuteqartut § ukununnga § 36, 65, 70,  
72, 73, 76, 79, 81, 82, 83, 89 aamma 91. Taakku saniatigut tulluarsaanermik  
tunngassuteqartunik aaqqiisoqarpoq*).

**Siunnersuummut nassuiaatit****Nassuiaatit nalinginnaasut****1. Aallaqqaasiut**

*Namminersorlutik Oqartussat sullivinni avatangiisinut suliassa qarfirmik tigusinissaat*  
Kalaallit Nunaanni Namminersorneq pillugu inatsit ulloq 19. maj 2009 Folketingimi  
akuerineqarpoq aammalu ulloq 21. juni 2009 atuutulerluni.

Kalaallit Nunaanni Namminersorneq pillugu inatsimmi aalajangersarneqarpoq  
Namminersorlutik Oqartussat sullivinni avatangiisinut suliassa qarfik tigusinnaagaat,  
taamaalillutillu Namminersorlutik Oqartussat sullivinni avatangiisinut suliassa qarfirmi  
inatsisiliornermik suliaqarnermillu pissaaneq tigussallugu.

Kalaallit Nunaanni Namminersorneq pillugu inatsimmi § 3, imm. 2 malillugu, suliassa qarfiit  
ilanngussami allattuiffik II-mi allassimasut, naalagaaffimmi oqartussaasut  
isumaqatiginninniaqatiginerisigut piffissami Namminersorlutik Oqartussanit  
aalajangersarneqartumi, Namminersorlutik Oqartussanit tiguneqassapput.  
Tunngavigineqarpoq suliassa qarfiit ilanngussami allattuiffik II-miittut qitiulluinnartumik  
pingaaruteqarmata annertuujullutillu, naalagaaffimmi oqartussaasut aamma Namminersorlutik  
Oqartussat akornanni sioqqutsisumik paasinarsisitsisoqarsimanissaa immikkut  
pingaaruteqartoq naliliisoqarluni, taamaalilluni suliassa qarfiit pineqartut tiguneqarnerat,  
pissutsit aaqqissuulluakkat atuutsillugit pisinnaassalluni.

Sullivinni avatangiisinut suliassa qarfik ilaannakortumik akisussaaffigilerlugu tiguneqassasoq,  
Kalaallit Nunaanni namminersorneq pillugu inatsimmi § 2, imm. 3-mi aalajangersagaq  
malillugu Kalaallit Nunaanni Namminersorlutik Oqartussat nammineerlutik  
aalajangersinnaapput, tassami sullivinni avatangiisit ilanngussami allattuiffik II nr. 27-imi  
allassimammat.

Suliassaqarfiup sullivinni avatangiisinut tunngasup ilaa, Kalaallit Nunaata imartaani aamma nunavittaanut ilaasumi imartami atortunut tunngassuteqartoq tiguneqassasoq, ulloq 23. oktober 2009 Inatsisartut aalajangerput. Sullivinni avatangiisinut suliassaqarfik imartaniittoq tamatuma kingorna 1. januar 2010 akisussaaffigilerlugu tiguneqarpoq.

Taamatuttaaq ataatsimiinnermi matumani nunami sullivinni avatangiisinut suliassaqarfiup akisussaaffigilerlugu tiguneqarnissaa pillugu aalajangiiffigisassatut siunnersuummik Naalakkersuisut Inatsisartunut saqqummiussiniarput.

Aalajangiiffigisassatut siunnersuummut nangissutigalugu, sullivinni avatangiisinut suliassaqarfiup maleruagassaqartinneqarnissaa siunertaralugu, sullivinni avatangiisit pillugit Inatsisartut inatsisaannut siunnersuut manna saqqummiunneqarpoq.

#### *Tunngaviusoq*

Kalaallit Nunaata nunami sullivinni avatangiisinut suliassaqarfik akisussaaffigilerlugu tigussagaat Namminersorlutik Oqartussat aalajangersinnaanissaannut tunngavissaqalersitsinissaq siunertaralugu, nassuiaammik suliqaarnissaq siunertaralugu, 2015-imi ukiaanerani Inuussutissarsiornermut, Suliffeqarnermut, Niuernermut Nunanullu allanut Naalakkersuisup aamma suliffissaqartitsiniarnermut ministerip atorfilinni ataatsimiititaliaq pilersippaat.

Ataatsimiititaliaq Namminersorlutik Oqartussanit Inuussutissarsiornermut, Suliffeqarnermut Niuernermullu Naalakkersuisoqarfimmeersunik ilaasortaqarpoq. Tamatuma saniatigut ataatsimiititaliaq Danmarkimi ministeriunerup ministereqarfianeersunik aamma suliffissaqartitsiniarnermut ministereqarfimmeersunik ilaasortaqarpoq. Suliap ingerlanerani Aningaasaqarnermut Naalakkersuisoqarfik aamma Aatsitassanut Ikummatissanullu Naalakkersuisoqarfik kiisalu Sulilluni ajoqusernertut aqutsisoqarfik, Nunanut allanut ministereqarfik, Aningaasaqarnermut ministereqarfiup aamma Inatsisunik atuutsitsinermut ministereqarfik ataatsimiititaliami ilanngutsinneqarput.

Nassuiaat suliakkiissutit allassimaffiannut naapertuuttumik ulloq 20. juni 2016 naammassineqarpoq aammalu Inatsisartuni Inuussutissarsiornermut Ataatsimiititaliamut, Folketingimi Suliffissaqartitsiniarnermut ataatsimiititaliami aamma Folketingimi Kalaallit Nunaannut Ataatsimiititaliami agguanneqareerluni.

Nassuiaammi sullivinni avatangiisinut suliassaqarfik nassuiarneqarpoq, ilanngullugit maannamut inatsisit aamma Sullivinnik Nakkutilliisoqarfiup sulinera suliassaalu, Sullivinnik Nakkutilliisoqarfiup missingersuutai, ingerlatai ilaalu ilanngullugit allanneqarlutik. Nassuiaat aningaasaqarnikkut aningaasartuutissanut, suliassaqarfiup akisussaaffigilerlugu

tiguneqarneranut atasunut kiisalu periarfissatut ilusilianut aamma aningaasartuutissat taakkua qanoq aningaasalersorneqarsinnaanerannut siunnersuutitut nassuiaatinik imaqarpoq. Nassuiaammi inassutigineqarpoq Kalaallit Nunaanni sullivinni avatangiisit pillugit inatsit, kingusinnerusukkut allannqortinneqartartoq, aallaavigalugu sullivinni avatangiisit pillugit Inatsisartut inatsisaannik suliaqartoqassasoq.

Kalaallit Nunaanni sullivinni avatangiisit pillugit inatsisip, sullivinni avatangiisit pillugit Inatsisartut inatsisaannut aallaavittut atornerqarnerani, maannamut sullivinni avatangiisinut suliassaqaqarfiup inissisimanerata attatiinnarneqarsinnaanissaa qulakkeerneqassaaq, tamatumalu akisussaaffigilerlugu tigusineq innuttaasunut suliffeqaqarfinnullu kalluarneqartunut oqinnerulersissavaa, taamatullu Sullivinnik Nakkutilliisoqarfiup nutaap maannamut suleriaasiusut ingerlatiinnarsinnaassallugit.

#### *Atuuffissai*

Siunnersuut Kalaallit Nunaanni nunami sullivinni avatangiisinut taamatullu imartani sullivinni avatangiisinut atuuppoq.

#### *Silaannakkut angalaneq*

Siunnersuut taamaallaat nunami sulinermut tunngatillugu silaannakkut angalanermut atuuppoq. Silaannakkut angalanermut suliassaqaqarfinni sullivinni avatangiisit, Kalaallit Nunaanni namminersorneq pillugu inatsimmi allattuiffik II, nr. 16-imi oqaatigineqartut, *Silaannakkut angalanermut suliassaqaqarfiup* ataaniippoq. Silaannakkut angalanermut suliassaqaqarfik suli Namminersorlutik Oqartussanit akisussaaffigilerlugu tiguneqanngilaq.

#### *Imarsiorneq aalisarnerlu*

Siunnersuut umiarsuit, ilanngullugit aalisariutit, usilersorneqarnerannut usingiarneqarnerannullu, umiarsuarimiilluni amutsivimmi sulinermut aamma sulinermut tamatumunnga sanilliunneqarsinnaasumut tunngatillugu taamaallaat imarsiornermut aalisarnermullu atuuppoq. Imarsiornerup isumannaatsuunissaa Kalaallit Nunaanni namminersorneq pillugu inatsimmi, allattuiffik II, nr. 20-mi suliassaqaqarfit immikkoortut allassimavoq. Imarsiornerup isumannaatsuunissaanut suliassaqaqarfik suli Namminersorlutik Oqartussanit akisussaaffigilerlugu tiguneqanngilaq.

#### *Imartani sulinermit avatangiisit pillugit immikkut*

Inatsisartut inatsisaat imartani atuuppoq, ilanngullugit imartani atortuni sullivinni avatangiisinut. Inatsisartut inatsisaanni kapitali 11-imi imartani atortut sullivinni avatangiisit pillugit immikkut ittunik aalajangersagaqarpoq. Tamatumunnga atatillugu aatsitassat pillugit ingerlatallu tamatumunnga pingaarutillit pillugit inatsisartut inatsisaanni (aatsitassanut

ikummatissanullu inatsit) § 79, maannamut imartani atortuni isumannaallisaanermut peqqinnissamullu maleruagassiiviusoq, atorunnaarsinneqarpoq.

Siunnersuummi kapitali 11-imi maleruagassat immikkut ittut aatsitassat pillugit ingerlatallu tamatumunnga pingaarutillit pillugit inatsisartut inatsisaanni (aatsitassanut ikummatissanullu inatsit) § 79-imi maannamut maleruagassaasut assigalugit killissaliussanut aalajangersagaapput, imartani atortuni isumannaallisaanikkut peqqinnissakkullu aarlerinaataasut nalilersorneqarsimanissaannut aamma suliaqarnikkut sapinngisamik annertunerpaamik annikillisinneqarsimanissaannut pisinnaatitsissummik pigisaqartup akisussaasuunera pillugu tunngaviusunik aalajangersaaviusut.

Aalajangersakkat aatsitassat pillugit ingerlatallu tamatumunnga pingaarutillit pillugit inatsisartut inatsisaanni (aatsitassanut ikummatissanullu inatsit) § 79-imut tunngatillugu maannamut paasinnittaatsimut suleriaatsimullu atuussimasunut, naapertuuttumik paasineqassapput. Imartani atortuni sullivinni avatangiisinut maleruagassiineq erseqqinnerusoq, taamaalilluni piiaanissamut akuersissutinut atugassarititaasuni pissaq aammalu nunani tamalaani malitassanut, naammassineqartussanut, innersuussinernik imaqarsinnaalluni.

Inatsisartut inatsisaanni matumani maleruagassat malinneqarnerannik nakkutiginninneq Sullivinnik Nakkutilliisoqarfiup isumagissavaa, ilanngullugit sullivinni avatangiisinut, imartani atortuni isumannaallisaanerp peqqinnissallu malinneqarnissaannut piunasaqaatit malinneqarnerannik nakkutiginninneq. Tamatumani aatsitassanut suliaasaqarfimmi imartani pisinnaatitsissummik tunniussisup aamma oqartussaasup nakkutiginnittuusup akornanni aaqqissuussaanikkut imminnut attuumassuteqannginnissaq qulakkeerneqarpoq, tamannalu aatsitassanut suliaasaqarfimmi aatsitassanut ikummatissanullu inatsimmi §§ 1-imi aamma 83-imi tunngavissaritinneqartutut, nunani tamalaani suleriaatsinut pitsaasunut akuerisaasunut naapertuuppoq. Aatsitassanut suliaasaqarfimmi pisinnaatitsissummik tunniussisup aamma oqartussaasup nakkutiginnittup akornanni aaqqissuussaanikkut imminnut attuumassuteqannginneq, tamatuma saniatigut Inatsisartut inatsisaata atuutilernerani aamma nunamiittunut atuutilissaaq.

*Qinngornerit ioninngortitsisartut pillugit immikkut*

Qinngornerit ioninngortitsisartut aamma qinngornernut illersuuteqarnissaq, qinngornerit ioninngortitsisartut pillugit aamma qinngornernut illersuuteqarnissaq pillugu Inatsisartut Inatsisaannut nr. 33, ulloq 9. december 2015-imeersumi (qinngornernut inatsit) maleruagassiivigineqarput. Qinngornernut inatsit qinngorfigitinnernut sunulluunniit atuuppoq, taamaattoq sulisartut Kalaallit Nunaanni sullivinni avatangiisit pillugit inatsimmi pineqartunut

ilaasut, qinngornernut inatsisip atuuffissaasa avataanniipput, takuuk qinngornernut inatsimmi § 1, imm. 4.

Siunnersuummi § 91-imi qinngornerit ioninngortitsisartut pillugit aamma qinngornernut illersuuteqarnissaq pillugu Inatsisartut Inatsisaat nr. 33, ulloq 9. december 2015-imeersup (qinngornernut inatsit) allannguutissaa ilanngunneqarpoq, taamaalilluni qinngornernut inatsimmi § 1, imm. 4 atorunnaarsinneqarluni.

Taamaalilluni qinngornernut inatsimmi pisut tamarmik pineqartunut ilaapput, ilanngullugit sulinermit pissutsit tamarmik.

Sullivinnik Nakkutilliisoqarfik Inatsisartut inatsisaata atuuffissaasa iluanni qinngornernut inatsisip malinneqarneranik nakkutilliisuvoq, takuuk § 68, nr. 8.

Qinngornernut illersuinissaq aamma qinngornerit ioninngortitsisartut pillugit piumasaqaatit maannamut pisartutut aatsitassanut suliaasaqarfiup iluani piiaanissamut akuersissutini ilaatinneqarsinnaapput, aammalu taamaattoqarpat piumasaqaatit taakkua Sullivinnik Nakkutilliisoqarfimmit nakkutigineqassapput.

Pisortani oqartussaasut allat suleqatigissagaat Naalakkersuisut Sullivinnik Nakkutilliisoqarfik peqqusinnaavaat, takuuk § 80, imm. 1. Assersuutigalugu § 68, imm. 8 malillugu pisussaaffiit saniatigut qinngornernut inatsimmi piumasaqaatit nakkutiginnissaannut peqqissutsimut oqartussaasunut ikiuunnissaq Naalakkersuisut Sullivinnik Nakkutilliisoqarfimmut peqqusissutigisinnaavaat. Tamatuma saniatigut, Sullivinnik Nakkutilliisoqarfiup § 68, nr. 8 malillugu nakkutilliinissamut pisussaaffeqarnerata saniatigut, qinngornernut inatsimmi piumasaqaatit nakkutigineqarnissaat pillugu suleqatigiinnissamut Peqqissutsimut oqartussaasut aamma Sullivinnik Nakkutilliisoqarfik isumaqatigiissuteqarsinnaapput, takuuk § 80, imm. 2. Aammattaaq § 80-imut nassuiaatit innersuussutigineqarput.

Siunnersuummi Sullivinnik Nakkutilliisoqarfik akuutissanut atortussanullu, navianartutut imaluunniit allatigut isumannaallisaanermik imaluunniit peqqissutsimik ajornerulersitsisussatut isigineqartunut, killissarititaasunik aalajangersaanissamut § 45, imm. 4-imi piginnaatinneqarpoq. Aalajangersakkami qinngornerit ioninngortitsisartut pineqartunut ilaangillat, tassami qinngornernut inatsimmi taakkua pineqartunut ilaammata.

#### *Nunani tamalaani pisussaaffiit*

Kalaallit Nunaata ILO-mut (nunani tamalaani sulinermit kattuffik) nunani tamalaani pisussaaffiisa naammassineqarsinnaanerit ingerlaannartussanngorlugu, siunnersuut ilusilersorneqarpoq.

### *Sullivinnik Nakkutilliisoqarfik*

Siunnersuutip atuutilernerani Sullivinnik Nakkutilliisoqarfik tiguneqassaaq aammalu Naalakkersut ataanni aqutsisoqarfiulissalluni.

Sullivinnik Nakkutilliisoqarfik siunnersuummi arlalinnik aalajangiisinnaatitaaffeqartinneqarpoq. Sullivinnik Nakkutilliisoqarfiup taamaalilluni sullivinni avatangiisinik nakkutiginninneq isumagissavaa, ilanngullugu imartani sullivinni avatangiisinik nakkutiginninneq.

Sullivini avatangiisit pillugit Inatsisartut inatsisaanni maleruagassat ataasiakkaatigut malinneqangitsut Sullivinnik Nakkutilliisoqarfik pasitsaassaqaruni, Sullivinnik Nakkutilliisoqarfik pisariaqarpat politiinut tunniussilluni nalunaarutiginnissinnaavoq.

Nakkutilliinermut aammalu imartani isumannaallisaaneq peqqinnissarlu pillugit aalajangersakkat malinneqarnerannik nakkutiginninneq, Sullivinnik Nakkutilliisoqarfiup ilaatigut suliassarilissavaa. Aaqqissuussinerup kingunerisaanik aatsitassanut suliassaqarfimmi pisinnaatitsissummik tunniussisoq aamma nakkutiginninnermut immikkoortortaq avissaartinneqassapput, taamaalillunilu aatsitassanut suliassaqarfimmi nunani tamalaani suleriaatsinut pitsaasunut naapertuutilissalluni, soorlu tamanna ilaatigut EU-imi sinerissap avataanut malittareqqusani oqaatigineqarsimasoq. Taamatutaaq avissaartitsineq aatsitassanut ikummatissanullu inatsimmi nunani tamalaani suleriaatsit pitsaasut akuerisaasut malinneqarnissaat pillugu siunertaasunut naapertuuppoq, takuuk aatsitassat pillugit ingerlatallu tamatumunnga pingaarutillit pillugit inatsisartut inatsisaanni (aatsitassanut ikummatissanullu inatsit) §§ 1, imm. 2, in fine aamma 83.

Nnunami sullivinni avatangiisinut suliassaqarfiup Kalaallit Nunaannit akisussaaffigilerlugu tiguneqarnissaa pillugu suleqatigiissitaliap nassuiaasiaanut ilanngussaq A-mi Naalakkersuisut aamma danskit Suliffissaqartitsiniarnermut ministereqarfiata akornanni suleqatigiinnissamut killissaliussat isumaqatigiissutigineqarput, taanna malillugu Sullivinnik Nakkutilliisoqarfik danskit Sullivinnik Nakkutilliisoqarfiannit inatsisilerinikkut isumasioqateqarsinnaalluni aammalu tekinnikkut sulianut siunnersorneqarsinnaalluni il.il.

### *Nassuiaanerit*

Siunnersuutip atuutilernerani sullivinni avatangiisinut suliassaqarfimmi suleriaaseq maannamut atuuttoq ingerlaannassasoq naatsorsuutigineqarpoq, sumiiffiit maannamut suleriaatsimik allannguinnissamik erseqqissumik kissaateqarfigineqartut ilaanatik. Nassuiaanikkut nalornisoqartillugu maleruagassat taamaalilluni suliassaqarfiup

akisussaaffigilerlugu tiguneqarnissaa tikillugu sullivinni avatangiisinut suliassaqarfimmi paasinnittaatsimut suleriaatsimullu naapertuuttumik sapinngisamik nassuiarneqassapput.

Maannamut suleriaatsip ingerlatiinnarnissaa ajornanngilaq, pissutigalugu sullivinni avatangiisit pillugit Inatsisartut inatsisaat siunnersuutigineqartoq Kalaallit Nunaanni sullivinni avatangiisit pillugit inatsimmut maannamut atuuttumut eqqaanarmat.

*Sulinermi avatangiisinut inatsimmi oqaluttuarisaanikkut tunngaviusut*

Sullivinni avatangiisinut inatsisip Kalaallit Nunaanni oqaluttuarisaanera suliassaqarfimmi inatsimmit siullermit aallartippoq, Kalaallit Nunaanni sulisartut illersorneqarnissaa pillugu inatsit nr. 225, 19. maj 1971-imeersoq, ulloq 1. april 1972 atuutilersoq. Inatsimmi siusinnerusukkut danskit sulisartunik illersuinissamut inatsisaat aallaavigineqarpoq.

Kalaallit Nunaanni sulisartut illersorneqarnissaat pillugu inatsit nr. 225, 19. maj 1971-imeersoq 1986-imi Kalaallit Nunaanni sullivinni avatangiisit pillugit inatsimmit nr. 295, 4. juni 1986-imeersumit, ulloq 1. juli 1986 atuutilersumit, taarserneqarpoq. 1986-imi inatsisip atuutilernerani Kalaallit Nunaanni sullivinni avatangiisinut siunnersuisooqatigiit pilersinneqarput aammalu sullivinni avatangiisinut inatsit, siusinnerusukkut sulisartunik illersuinissaaq pillugu inatsimmut sanilliullugu immikkoortuni arlalinnik annertusarneqarluni, taamatullu inatsit taamanikkut danskit sullivinni avatangiisit pillugit inatsisaannut atuuttumut assigulerluni.

Kalaallit Nunaanni sullivinni avatangiisit pillugit inatsit nr. 295, 4. juni 1986-imeersoq akuerineqarnerminiillu pingasoriarluni allanngortinneqarpoq. Allanngortitsineq siulleq inatsimmi nr. 193-imi, 26. marts 1991-imeersumi § 3-imi pivoq. Allanngortitsinerup tullia inatsimmi nr. 321-imi 18. maj 2005-imeersumi pivoq. Allanngortitsinerit pingajuat inatsimmi nr. 1382-imi 23. december 2012-imeersumi pivoq.

Sullivinni avatangiisinut suliassaqarfiup ilaa, Kalaallit Nunaata imartaani aamma nunavittaata ilaani imartani atortunut tunngassuteqartoq, akisussaaffigilerlugu tiguneqassasoq, ulloq 23. oktober 2009 Inatsisartut aalajangerput. Imartani sullivinni avatangiisinut suliassaqarfik tamatuma kingorna 1. januar 2010 akisussaaffigilerlugu tiguneqarpoq. Imartani sullivinni avatangiisit tamatumalu kingorna aatsitassat pillugit ingerlatallu tamatumunnga pingaarutillit pillugit inatsisartut inatsisaanni (aatsitassanut ikummatissanullu inatsit) § 79-imi maleruagassaqartinneqalerpoq.

Siusinnerusukkut danskit sullivinni avatangiisinut inatsisaanni inatsisitigut maleruagassaqartinneqartumik, Kalaallit Nunaanni sullivinni avatangiisinut suliassaqarfiup maleruagassiivigineqarneranut nalunaarutit 20-it, AT-mut ilitersuutit 12-it aamma

teknikkikkut peqqussutit 2-it aalajangersarneqarput. Taakkua nalunaarutininik, ilitsersuutininik peqqussutinillu nutaanik taarserneqarnissamik tungaanut atuutsiinnarneqassasut naatsorsuutigineqarpoq.

## **2. Siunnersuummi immikkoortut pingaarnertit**

Sullivinni avatangiisinut suliassaqarfimmi sullivinni avatangiisinik isumannaatsunik peqqinnartunillu, sukkulluunniit inuiaqatigiinni teknikkikkut inooqatigiinnikkullu ineriartornermut naapertuuttumik, pilersitsinissaq sammineqarpoq. Suliassaqarfiit ataanniippoq aamma suliffeqarnermi kattuffinnit ilitsersorneqarlutik aamma Sullivinnik Nakkutilliisoqarfimmit nakkutigineqarlutik suliffeqarfiit namminneerlutik isumannaallisaanermut peqqinnissamullu apeqqutinik iluarsisinnaanissaannut tunngavissaqartitsinissaq.

Siunertaavoq pitsaaliuinermik suliniuteqarnerni aamma maleruagassiinermi timikkut eqqarsartaatsikkullu peqqissutsip isumannaarnissaa. Ilaatigut sulilluni ajutuunnginnissaq inuussutissarsiornermilu nappaateqalinnginnissaq eqqarsaatigalugit illersuinissaq ileqquusumik paasineqassasut tassani pineqarpoq, ilaatigut tassangaannartumik pisut kingunerisaannik sunniinikkut, ilaatigut piffissami qaninnerusumi ungasinnerusumiluunniit sunniinikkut, timikkut eqqarsartaatsikkullu peqqissutsikkut ajoqusernermik malitseqartumik, ilanngullugit eqqarsartaatsimut tunngassutillit nappaatit kiisalu sunniinissanut allanut peqqissutsimik ajornerulersitsinnaasunut illersuineq.

Sullivinni avatangiisit pillugit Inatsisartut inatsisaat siunnersuutigineqartoq inatsisaavoq immersugassat aamma piginnaatitsisoq, tassani aalajangersakkat assersuutigalugu isumannaallisaanermut peqqinnissamullu najoqqutassatigut piumasaqaatinut tunngatillugu, pilersuisut, sanatitsisut, suliaqarnerup ingerlanneqarnera, sulliviup aaqqissugaanera, teknikkikkut atortorissaarutit, akuutissat atortussallu aamma navianartunik suliaqarnermi ukiussarititaasut minnerpaaffissaat pillugit isumannaatsuutitsinissamut aalajangersakkat ataatsimut isigalugu allassimallutik.

Inatsisartut inatsisaanni isumannaallisaanermik suliaqarnerup aaqqissuusaaanera, sullivinni avatangiisinut ilinniartitaaneq, sullivimmi nalilersuineq, sulisitsisup pisussaaffii, inuusuttut sulinerat, ullormut sapaatillu akunneranut piffissaq qasuersaarfiusussaq pillugu maleruagassat minnerpaaffissaat aamma nakorsamut misissortittarnerit pillugit killissaliussanut aalajangersakkat aalajangersarneqarput. Sullivinnik Nakkutilliisoqarfiup suliassai piginnaatitaanerilu pillugit aamma Sullivinni avatangiisinut suliassaqarfik, aallartitanik Naalackersuisunit kiisalu sulisartut sulisitsisullu kattuffiinit toqqarneqartunik ilaasortaartoq, pillugu maleruagassat aalajangersarneqarput.



Isumannaatsuutitsinissaq pillugu aalajangersakkat atituut taakkua nalunaarutini, inatsimmi piumasagaatinut erseqqinnerusumik nassuiaaviusuni, piviusunngortinneqarput. Nalunaarutit 20-it inatsimmi aalajangersakkanut qitiutinneqartunut tunngasut, AT-mut ilitsersuutit 10-it kiisalu Sullivimmi nalilersuinermit misissugassanut allattuiffiit (APV-mik misissugassanut allattuiffiit) 14-it aalajangersagaapput.

Imartani atortunut isumannaallissaaneq peqqinnissarlu pillugu maannamut maleruagassiineq ingerlateqqinneqarsimatillugu, imartani atortuni sullivinni avatangiisit pillugit immikkut ittunik maleruagassaqarpoq.

Naammagittaalliorsinnaaneq pillugu maleruagassaqarpoq, taanna malillugu Sullivinnik Nakkutilliisoqarfiup aalajangiineri Sullivinni avatangiisit pillugit naammagittaalliortarfimmut naammagittaalliuutigineqarsinnaallutik.

Inatsisartut inatsisaat pinerluttulerinermut inatsisitigut pineqaatissiisarneq pillugu maleruagassanik sukumiisunik imaqarpoq, ilanngullugit akileequisissutit pillugit maleruagassat immikkut ittut. Sullivinni avatangiisinut suliaasaqarfimmi nunani tamalaani maleruagassat atuuttut malinneqartussaapput, ilanngullugit ILO-mi nunani tamalaani isumaqatigiissutit atuuttut.

## 2.1 Siunnersuummi kapitalini ataasiakkaani immikkoortut pingaarnert

### Kapitali 1

Siunnersuummi *kapitali 1*-imi inatsisip siunertaa suliaasaqarfillu allassimapput.

Kapitalimi maleruagassani allassimavoq, sulitilluni ajutoornissamut aamma peqqinnissamut ajoqusiisumik sunnertinnissamut ingerlaannaq illersuutissarsiniartoqartassasoq. Taamaalilluni siunnersuummi isumannaatsumik peqqinnartumillu sullivinni avatangiiseqarnissamut sinaakkutissiisoqarpoq.

Inuiaqatigiinni teknikkikkut inooqatigiinnikkullu ineriartortoqartuaannarmat, sullivinni avatangiisit sukkulluunniit ineriartornermut tassunga naapertuuttuussasut, inatsimmi siunertanut aalajangersakkani ilaatinneqarpoq.

Kisianni suliffeqarfiit namminneerlutik siunnerfissalorsorpata aammalu tamanna anguniarlugu suliniuteqarpata aatsaat, isumannaatsumik peqqinnartumillu sullivinni avatangiiseqalertoqarsinnaavoq ineriartorteqqinneqarsinnaallunilu. Taamaattumik suliffeqarfiit namminneerlutik, suliffeqarnermi kattuffinnit aamma Sullivinnik Nakkutilliisoqarfimmit ilitsersorneqarlutik aammalu Sullivinnik Nakkutilliisoqarfimmit

nakkutigineqarlutik, isumannaallisaanermut peqqinnissamullu apeqquutit iluarsisinnaasariaqaraat, inatsisip siunertaanut ilaatillugu allassimavoq.

Kapitali silaannakkut angalanermut, imarsiornermut aalisarnermullu tunngasuni inatsimmi killissaliussat eseqqissarneqarnerannik imaqqarpoq.

## Kapitali 2

Siunnersuummi *Kapitali 2* Suliffeqarfiit isumannaallisaanermut peqqinnissamullu suliaqarnerannut tunngassuteqqarpoq. Inatsisip siunertaanut § 1-imut allassimasumut naapertuuttumik suliffeqarfiit isumannaallisaanermut peqqinnissamullu namminneerlutik suliniuteqarnerat, sullivinni avatangiisinik pitsaanagerusunik pilersitsiniarluni ilungersuuteqarnermi qitiusunut ilaavoq. Tamatuma kingorna suliffeqarfiit tamarmik inatsimmi suliaqarfiit nalinginnaasut iluanni arlaatigut isumannaallisaanermik suliaqassapput.

## Kapitali 3

Sullivinni avatangiisinut suliffeqarfiit namminneerlutik suliniuteqartussaanagerat qitiusumik inissinneqartoq eqqarsaatigalugu, *kapitali 3* malillugu pisussaaffinnut sulisitsisup, sulianut aqutsisup sulisullu pisussaaffigisaannut maleruagassaqaarnissaq pissusissamisoorpoq.

Tassunga ilaatigut suliffeqarfimmi aqutsisup, pilersuisuusut, sanatitsisup aamma pilersaarusiortup pisussaaffii pillugit maleruagassat atatinneqarput. Pilersuisuusunut aamma sanatitsisunut allanullu maleruagassat, sapinngisamik siusinnerpaamik sullivinni avatangiisinut tunngasut pitsaangitsut pitsaaliorneqarsinnaanissaat pillugu kissaateqarnermut, takussutissaapput.

## Kapitali 4-7

Pitsaaliuinissap eqqarsaatigineqarnissaa aamma *kapitali 4-7*-ip, sullivinni avatangiisit pillugit najoqqutassatigut aalajangersakkanik imaqqartup, ilusilersorneqarneranut tunngavigineqarpoq. Sullivinni avatangiisitigut eqqarsaatigisassat piffissamit suliaqarnerup pilersaarusiorneqarneranit aaqqissuunneqarneranillu, aammalu teknikkikkut atortorissaarutit aaqqissuunneqarneranni isiginiarneqaleriissapput. Suliniutit pilersaarutillu, taakkua aallartinneqarnissaat sioqqullugu Sullivinnik Nakkutilliisoqarfimmut oqaaseqarfigineqartussanngorlugit imaluunniit akuersissuteqarfigineqartussanngorlugit saqqummiunneqartassasut pillugu maleruagassiisoqarsinnaassaaq kiisalu akuutissat atortussallu sioqqutsisumik akuersissuteqarfigineqartarnerat nalunaarutigineqartarnerallu pillugu maleruagassiisoqarsinnaassalluni. Kapitalini taamaalilluni sulinerup

ingerlanneqarnera, sulliviup aaqqissuunneqarnera, teknikkikkut atortorissaarutit aamma akuutissat atortussallu pillugit aalajangersakkat nalinginnaasut aalajangersarneqarput.

#### Kapitali 8

Sulisut ullut unnuallu ataasiakkaat tamaasa minnerpaamik nalunaaquttap akunnerini 11-ini ataqatigiissuni qasuersaarfeqartinneqartassasut pillugu, piffissaq qasuersaarfissaq aamma ulloq unnuarlu sulinngiffeqarneq pillugit *kapitali 8*-mi maleruagassat pingaarnerit aalajangersarneqarput. Tamatuma saniatigut sulisut sapaatip akunneranut ulloq unnuarlu ataaseq sulinngiffeqartassasut aalajangersarneqarpoq. Ulloq unnuarlu sulinngiffeqarneq sapingisamik sapaatiniitinneqassaaq. Ulloq unnuarlu sulinngiffeqarneq aamma ullormut qasuersaarfissamut atatillugu inissinneqartassaaq (tassa imaappoq nalinginnaasumik nalunaaquttap akunnerini minnerpaamik 35-ni sivilisussuseqassalluni).

#### Kapitali 9

Meeqqat inuusuttullu 18-it inorlugit ukiullit pillugit *kapitali 9*-mi inuussutissarsiorluni sulinissamut 15-inik ukiulinnut ukiukinnerpaaffissaq aalajangersarneqarpoq. Taamaattoq meeqqat 15-it inorlugit ukiullit oqinnerusumik inuussutissarsiutigalugu sulisinnaasut pillugu maleruagassanik Naalakkersuisut aalajangersaasinnaapput.

#### Kapitali 10

*Kapitali 10* Naalakkersuisunut nakorsamit misissortittarneq ilaalu ilanngullugit pillugu maleruagassanik aalajangersaanissamut piginnaatitsissuteqarnermik imaqarpoq.

#### Kapitali 11

*Kapitali 11* imartani atortunut sullivinni avatangiisit pillugit maleruagassanik immikkut ittunik, aatsitassarsiorluni ingerlatanut atorneqartussanik, imaqarpoq. Imartani atortunut sullivinni avatangiisinut maleruagassat, nunami sullivinni avatangiisinut maleruagassatuulli, isumannaallisaanerup peqqinnissallu eqqarsaatigineqarnissaanik aallaaveqarput. Imartani maleruagassat sukumiinnginnerunerat, tamatumunngalu taarsiullugu imartani nunani tamalaani malitassanut innersuussisoqarnera, nunami sullivinni maleruagassanit allaanerussutaavoq. Tamanna maannamut imartani atortunut sullivinni avatangiisinut maleruagassiinermut naapertuuppoq aammalu sullivinni avatangiisit pillugit sukumiisumik maleruagassanik aalajangersaanermi annertuumik eqaassuseqartitsillutik.

#### Kapitali 12

Sullivinni avatangiisinut siunnersuisooqatigiit maannamut sulinertik ingerlatiinnarsinnaagaat *kapitali 12*-imi maleruagassani qulakkeerneqarpoq, tamatumanilu suliffeqarnermi illuatungeriit isumannaatsumik peqqinnartumillu sullivinni avatangiiseqarnissamut suliniuteqarnermi sunniuteqaqataanissaat siunertaavoq. Tamatumunnga naapertuuttumik

maleruagassanut siunnersuutit, Naalackersuisut siunnersuisooqatigiinnut saqqummiussa at aammalu Inatsisartut inatsisaanni piginnaatitsissuteqarneq naapertorlugu aalajangersarneqartut, pillugit siunnersuisooqatigiit oqaaseqaateqartassapput.

### Kapitali 13

Suliassat *kapitali 13*-imi Sullivinnik Nakkutilliisoqarfimmut inissinneqartut assigiinngitsunik ima qarput aammalu ilaatigut sulisartunik illersuinissap pitsaaliuinnermut tunngasortaa pingaartinneqarluni. Nakkutilliisut ilitersuinissaq aamma sullivinni avatangiisini ajornartorsiutit amerlasoorpassuit nakkutiginnissaat suliassaraat.

Sullivinnik Nakkutilliisoqarfiup sulisui, sullivinni avatangiisinut maleruagassat malinneqarnerat misissorniarlugu tamanna pisariaqarsimappat, eqqartuussivimmit aalajangiinertaqanngitsumik sukumiisumik kinaassutsimut uppersaammik takutitsillutik pisortat aamma namminersortut sulliviinut isersinnaapput. Pisariaqarpat Sullivinnik Nakkutilliisoqarfiup nakkutiginninneq ingerlassinnaanissaanut politiit ikiuussinnaapput. Taamaattoq Sullivinnik Nakkutilliisoqarfiup suliaqarnermik inuussutissarsiornermut tunnganngitsumik nakkutiginninnerani, taassuma nammineq angerlarsimaffiani, sunngiffimmi inigisaani, biiliini, sunngiffimmi angallataani imaluunniit pigisani allani inoqutigiinnit pigineqartuni inummit ataatsimit suliarineqartumi, Sullivinnik Nakkutilliisoqarfiup sulisuisa isersinnaanerat atuutissanngilaq.

### Kapitali 14

*Kapitali 14* naammagittaalliorsinnaanermut tunngasoq naammagittaalliortarneq pillugu maleruagassanik ima qarpoq.

Sullivinnik Nakkutilliisoqarfiup aalajangiinerisa naammagittaalliuutigineqarnerat Sullivinni avatangiisit pillugit naammagittaalliortarfimmut suliakkiunneqarsinnaavoq. Naammagittaalliuut Sullivinnik Nakkutilliisoqarfimmut nassiunneqassaaq, tasanilu aalajangiineq aalajangiusimaannarneqarpat, naammagittaalliuut Sullivinni avatangiisit pillugit naammagittaalliortarfimmut ingerlateqqissavaa. Naammagitaalliornissamut piffissamut killissaliussaq sapaatit akunnerinik 6-inik sivisussuseqarpoq aammalu naammagittaalliorneq kinguartitsinermik sunniuteqassaaq, pissutsit ingerlaannaq iluarsineqartussat naammagittaalliuutigineqarneri pineqartunut ilaanatik.

Suliffeqarnermi illuatungeriit suliassat naammagittaalliuutigineqartut aalajangiiffigineqarnerannut taamaalillutillu inatsisip aallaffissornikkut immersorneqarneranut sunniuteqarnerat, Sullivinni avatangiisinut siunnersuisooqatigiit Sullivinni avatangiisit pillugit naammagittaalliortarfiup katitigaaneranut sunniuteqartinneqarnerisigut qulakkeerneqassaaq. Sullivinni avatangiisit pillugit naammagittaalliortarfik aalajangiisartuussaaq

arlaannaannulluunniit attuumassuteqanngitsoq Atuisartoqarnermut Unammilleqatigiinnermullu Aqutsisoqarfimmut atasoq, tassani Sullivinnik Nakkutilliisoqarfik aamma siunnersuisooqatigiinnut allattoqarfittut atuutissalluni.

Nunami sullivinni avatangiisinut suliassa qarfiup akisussaaffigilerlugu tiguneqannginnerani Kalaallit Nunaanni Sullivinnik Nakkutilliisoqarfimmit aalajangiinernut naammagittaalliuutit ukiumut 3-it missaanniissimapput.

#### Kapitali 15

Pinerluttulerinermut inatsisitigut pineqaatissiisarneq pillugu *kapitali 15*-imi sulisitsisut kinaassusersiunngitsumik akisussaaffeqarnerat pillugu kiisalu pisinnaatitaallutillu pisussaataitasut (ingerlatseqatigiiffiit il.il.) akisussaaffeqarnerat pillugu aalajangersakkat ersarissut aalajangersarneqarput. Taamatuttaaq angajoqqaatut oqartussaaffimmik tigungminnittup akisussaaffeqarnera pillugu maleruagassaq erseqqissassallugu pingaaruteqarpoq.

#### Kapitali 16

*Kapitali 16* piffissamik atuutsitsiviulertussamik imaqarpoq aammalu aalajangersarneqarluni nalunaarutit suliassa qarfimmi inatsisit siusinnerusukkut atuuttut malillugit aalajangersarneqartut, maannamuugallartoq atuutsiinnarneqassasut aalajangersaaviulluni. § 1, imm. 4 qinngornerit ioninngortitsisartut pillugit aamma qinngornernut illersuuteqarnissaq pillugu Inatsisartut Inatsisaat (qinngornernut inatsit) atorunnaarsinneqarpoq. Kiisalu aatsitassat pillugit ingerlatallu tamatumunnga pingaarutillit pillugit inatsisartut inatsisaanni (aatsitassanut ikummatissanullu inatsit) § 79 atorunnaarsinneqarpoq, taamaalilluni marloqiusamik maleruagassasiisoqassanani.

### **3. Pisortanut aningaasaqarnikkut allaffissornikkullu sunniutaasussat**

#### 3.1 Allaffissornikkut sunniutaasussat.

##### Sullivinnik Nakkutilliisoqarfik

Sullivinni avatangiisinut suliassa qarfiup akisussaaffigilerlugu tiguneqarneranut atatillugu aqutsisoqarfik arlaannaannulluunniit attuumassuteqanngitsoq nutaaq pilersinneqassaaq – Sullivinnik Nakkutilliisoqarfittut arlaannaannulluunniit attuumassuteqanngitsutut iluseqartoq, taaguuteqartoq Sullivinnik Nakkutilliisoqarfik, takukkit siunnersuummi kapitali 13, §§ 67 aamma 68.

Sullivinnik Nakkutilliisoqarfik taamaalilluni suliassanik suliarinninnermi Naalakkersuisunut attuumassuteqanngitsumik atorsinnaassaaq, tamatumanilu ilaatigut aalajangiinerit qulakkeerneqassaaq suliamut tunngasutigut teknikkimullu tunngasutigut tunngavilersorluagaasumik tunngaveqartitsinissaq qulakkeerneqassaaq. Aningaasaqarnermut

tunngasunut aamma politikkimut suliassa qarfirmut pingaarnertigut akisussaaffik taamaattoq Naalakkersuisut ataaniissaaq.

Suliassa qarfiup akisussaaffigilerlugu tiguneqarneranut atatillugu Kalaallit Nunaanni danskit Sullivinnik Nakkutilliiso qarfiata immikkoortorta qarfia tiguneqassaaq. Immikkoortorta qarfirmi ullumikkut sulipput ullup affaanut pisortaq, nakkutilliisut tallimat aamma allaffissornermi sulisoq ataaseq. Ullup affaanut pisortamut atorfik tigusinermi ulloq tamaat pisortamut atorfirmut qaffatsinneqassaaq, aammalu allaffissornermi sulisut ataatsimik ilaneqassallutik. Immikkoortorta qarfik tamatuma kingorna Sullivinnik Nakkutilliiso qarfittut nutaatut ingerlateqqinneqassaaq.

Namminersorlutik Oqartussat tamatumunnga maleruagassanut naapertuuttumik sulisut akisussaaffigilissavaat, ilanngullugit Namminersorlutik Oqartussat suliassa qarfinnik akisussaaffigilerlugit tigusinerannut atatillugu sulisunut apeqqutit aalajangersimasut pillugit inatsimmi nr. 463-imi 12. juni 2009-meersumi aamma suliffe qarfinnik tunniussisoqartillugu sulisut inatsisitigut inissisimanerat pillugu Inatsisartut peqqussutaat nr. 7, 5. december 2008-meersumi maleruagassat. UPA2017-imi taamaalilluni siunnersuummik saqqummiisoqassaaq, taanna malillugu Namminersorlutik Oqartussat Namminersorneq pillugu inatsit malillugu sulia qarfirmik tunniussisoqartillugu suliassamik tunniussinermi sulisut inatsisitigut inissisimaneranni sulisut tjenestemanditut atorfeqanngitsut inissisimanerat atuutissalluni.

Sullivinni avatangiisinut siunnersuisooqatigiit.

Sullivinni avatangiisinut siunnersuisooqatigiinnik pilersitsisoqassaaq, takuuk siunnersuummi kapitali 12. Sullivinni avatangiisinut siunnersuisooqatigiit sulia qarneq atuuffiillu Kalaallit Nunaanni Sullivinni avatangiisinut siunnersuisooqatigiit maannamut isumagisarisimasaat ingerlatiinnartussaassavaat, taamatullu aallartitat Kalaallit Nunaanni Sullivinni avatangiisinut siunnersuisooqatigiinni maannamut ilaasortaasut taakkuuginnassallutik.

Sullivinni avatangiisinut siunnersuisooqatigiit maannamut Kalaallit Nunaanni Sullivinni avatangiisinut siunnersuisooqatigiinnut suleriaasissatut atuuttutut ittoq, suleriaasissarissavaat, takuuk Kalaallit Nunaanni Sullivinnik Nakkutilliiso qarfirmut suleriaasissaq pillugu Sullivinnik Nakkutilliiso qarfiup nalunaarutaa, nalunaarut nr. 1345, 15. december 2005-imeersoq kingusinnerusukkut allannguuteqartinneqartoq. Suleriaasissaq taanna Naalakkersuisunit taassuma nutaamik taarserneqarnissaata tungaanut, atuuppoq.

Sullivinnik Nakkutilliiso qarfiup Sullivinni avatangiisinut siunnersuisooqatigiinnut allattoqarfeqarneq isumagisarissavaa.

Sullivinni avatangiisit pillugit naammagittaalliortarfik .

Sullivinnik Nakkutilliisoqarfiup aalajangiinerinik naammagittaalliutininik suliarinninnissamut Sullivinni avatangiisit pillugit naammagittaalliortarfik pilersinneqassaaq, takuuk kapitali 14. naammagittaalliortarfik Naalakkersuisoqarfimmut suliassaqarfimmut akisussaasuusumut sulinermini attuumassuteqassanngilaq, taanna suli pingaarnertigut akisussaasuussalluni.

Naammagittaalliortarfiup allattoqarfeqarnera Atuisartoqarnermut Unammilleqatigiinnermullu Aqutsisoqarfimmit isumagineqassaaq.

### 3.2 Aningaasaqarnikkut sunniutaasussat

Sullivinni avatangiisinut suliassaqarfiup akisussaaffigilerlugu tiguneqarneranut atatillugu aningaasartuutissat 9,5 mio. koruuninik annertussuseqartussatut missingersorneqarput, taakkunanga pilersitsinermut atatillugu ataasiartumik aningaasartuutit (nuunnermut aningaasartuutit) ukioq siullem 300,000 koruuniullutik. Tamatuma kingorna aningaasartuutit ukiumut 9,2 mio. koruuniussasut naatsorsuutigineqarpoq. Ukioq siullem aningaasartuutit imatut agguarsimapput, (aningaasat ataaniittut affai atorineqassapput tigusineq 1. juli 2018 pissappat)

*Takussutissiaq 1: Sullivinni avatangiisinut suliassaqarfiup tiguneqarnerani aningaasartuutissat missingersorneqartut mio. koruuninngorlugu.*

Aningaasartuutissat missingersorneqartut	mio. kr.
Sullivinnik Nakkutilliisoqarfimmut aningaasartuutit, sullivinni avatangiisinut ilinniartitaanermut aamma Sullivinni avatangiisinut siunnersuisooqatigiinnut aningaasartuutit ilanngullugit.	6,7
Akisussaaffigilerlugu tigusinermi aningaasartuutissat allat, ilanngullugit atorfinnik annertusititsineq aamma suleqatigiinnissamut isumaqatigiissut naapertorlugu danskit AT-iannit ikiorneqarnermut aningaasartuutaanerusussat	1,6
Naalakkersuisoqarfimmi suliassaqarfimmut akisussaasuusumi annertusititsineq, sullivinni avatangiisinut inatsimmut ilisimasaqarnerulersitsinissamut AC-mut atorfik ½.	0,3
Sullivinni avatangiisit pillugit naammagittaalliortarfik	0,6
Sullivinni avatangiisinik nakkutilliinermut tunngatillugu teknikkimut nakkutilliinermullu immikkoortortaqarfimmut aningaasartuutit missingersorneqartut	0,1
Nuunnermut aningaasartuutit	0,3
Aningaasartuutit ataatsimut katillugit	9,6
Taakkunanga aningaasanut inatsit aqqutigalugu	0,1

immikkoortinneqartut	
Aningaasalersuinissamut pisariaqartitsineq tamarmiusoq	9,5

Takussutissiami akisussaaffigilerlugu tigusinermi aningaasartuutissat tamarmiusut takutinneqarput. Takussutissiami Kalaallit Nunaata nunami sullivinni avatangiisinut suliassaqarfimmik tigusinissaa pillugu suleqatigiissitaliamit nassuiaammi takussutissiaq 6, qupperneq 24-miittoq naleqqussarlugu issuarneqarpoq.

Piffissami qanittumi aningaasartuutissat tigusinermut atatillugu ingerlaannaq aningaasartuutaasussanut tunngassuteqarput. Sullivinnik Nakkutilliisoqarfik Kalaallit Nunaanniittoq inissisimaffimmini Nuummeereermat, Danmarkimit Kalaallit Nunaanut nuunnissat pisariaqartinneqartussaangillat. Sulisussanik atorfinitsitsioqassappat tassunga aningaasartuutit ataasiaarnarluni aningaasartuutissaapput. Allamut inissiinernut aamma Nuummi allaffinnik ininilla, aqutsisoqarfiup nutaap illusimatinnissaanut atorneqartussanik, nutaamik aaqjissuussinernut atatillugu aningaasartuuteqarsinnaavoq. Katillugit tamanna missiliuinerneq annerpaamik 300.000 koruunit missaanni aningaasartaqarsinnaassaaq.

Piffissamut ungasinnerusumut aningaasartuutissat ilaatigut ingerlatsinikkut ingerlaavartumik aningaasartuutitut tunngassuteqassapput.

Sullivinnik Nakkutilliisoqarfimmut aningaasartuutit

Sullivinnik Nakkutilliisoqarfimmut ukiumut aningaasartuutissat Takussutissiaq 1-imi matuma siulianiittumi 6,7 mio. koruuninut missingersorneqarput. Aningaasat taakkua pisortatut atorfirmut, nakkutilliisunut tallimanut, allaffissornermi sulisunut marlunnut aningaasarsianut aningaasartuutissat matussusissavaat, IT-mut aningaasartuutissat aamma Danmarkimi Sullivinnik Nakkutilliisoqarfimmit imaluunniit Namminersorlutik Oqartussanit ikiorneqarnerit 0,7 mio. koruuniupput.

Tassunga ilanngutissaaq, Sullivinnik Nakkutilliisoqarfimmi sulianut qaffasissumik ilisimasaqarnerup attatiinnarnissaa qulakkeerneqassappat, inatsisilerinikkut teknikkikkullu sulianut tapersersorneqarnissamik isumasioqateqarnissamillu pisariaqartumik annertunerusumik pisariaqartitsineq. Inatsisilerinikkut pingaartumillu teknikkimut suliassatigut siunnersuisarneq, siunnersuisarneq tapersersuisarnerlu danskit Sullivinnik Nakkutilliisoqarfiata aamma naalakkersuisoqarfiup suliffeqarnermut suliassaqarfimmut akisussaasuusup akornanni suleqatigiinnissamut isumaqatigiissutaanni erseqqinnerusumik nassuiarneqartoq naapertorlugu siunissami isumagineqassasoq naatsorsuutigineqarpoq. Tamatumunnga ukiumut aningaasartuutit annertussusaat, aningaasaqarnikkut killissaliussat 1,3 mio. koruunit, danskit sullivinni nakkutilliisoqarfiannut suleqatigiinnissamut isumaqatigiissummut killissaliussani aalajangersarneqartut iluanni, suliaqarnerit annertussusaat naapertorlugu nikerassasut naatsorsuutigineqarpoq.



Sullivinni avatangiisit pillugit naammagittaalliortarfik

Sullivinni avatangiisit pillugit naammagittaalliortarfimmut ukiumut aningaasartuutissat 0,6 mio. koruuninut missingersorneqarput, taakkualu ilaasortanut, angalanermut aningaasartuutinut, immikkut ilisimasallit oqaaseqaataannik piniarnermut, allattoqarfimmut akiliutissamut, allaffeqarfimmut ilaalu ilanngullugit aningaasartuutinut matussutaassapput.

Aningaasartuutit allat

Naalackersuisoqarfimmi suliassaqarfimmut akisussaasuusumi ukiumut ½ AC-mut naapertuuttumik, sullivinni avatangiisinut inatsimmut tunngatillugu Naalackersuisoqarfimmi isumalluutit amerlineqarnissaannut, annertusititsinissamut aningaasaliisoqarpoq.

Tamatuma saniatigut Sullivinni avatangiisinut siunnersuisooqatigiit ingerlatassaannik aningaasalersuinermit 0,3 mio. koruunit aamma sullivinni avatangiisinut ilinniartitaanerup, Kalaallit Nunaanni sulisilluni avatangiisinik ilinniartitaanerit tamanit peqataaffigisassat pillugit Nalunaarummi allassimasutut ingerlanneqarneranut 0,5 mio. koruunit naatsorsuutigineqarput.

Aningaasanut inatsimmi aningaasaliissutit ilai Aatsitassanut Ikummatissanullu

Aqutsisoqarfimmi sullivinni avatangiisinik nakkutilliinermut atorineqartussat, Kalaallit Nunaanni Sullivinnik Nakkutilliisoqarfimmut nutaamut nuunneqassapput (ukiumut 100.000 koruuninut naatsorsorneqartut).

Oqartussaasutut suliaqarnermut utertitsisarneq.

Siunnersuummi § 72-imi Sullivinnik Nakkutilliisoqarfiup aatsitassarsiornermut suliassaqarfiup kiisalu erngup nukinganut suliassaqarfiup iluanni nakkutilliinermut aningaasartuutaannut oqartussaasutut suliaqarnermut utertitsisarnissaq periarfissiissutigineqarpoq. Tamanna nunami sullivinni avatangiisinut suliassaqarfiup akisussaaffigilerlugu tiguneqarnissaa sioqqullugu inatsisini inissisimanermut assinguvoq. Pisortanut aningaasartuutit aatsitassarsiornermut suliassaqarfiup iluani ingerlataqarnerulernermut atatillugu, annertunerulinnginnissaat Maleruagassani qulakkeerneqarpoq, assersuutigalugu aatsitassarsiorfimmi suliassanik aallartitsinermut atatillugu.

§ 73-imi Sullivinnik Nakkutilliisoqarfiup imartani aatsitassanut suliassaqarfiup iluani nakkutilliineranut atatillugu oqartussaasutut suliaqarnermut utertitsisarnissaq periarfissiissutigineqarpoq. Tamanna inerissap avataani sullivinni avatangiisinut suliassaqarfiup iluani inatsisini inissisimanermut maannamut atuuttumut assinguvoq, takukkit aatsitassat pillugit ingerlatallu tamatumunnga pingaarutillit pillugit Inatsisartut inatsisaanni

(aatsitassanut ikummatissanullu inatsit) §§ 86, imm. 5 aamma 94. Aalajangersagaq maannamut ingerlatsineq naapertorlugu atorneqassapput.

Kiisalu Sullivinnik Nakkutilliisoqarfiup sullivinni avatangiisinut ilinniartitaanermik ingerlatsineranut aningaasartuutunik matussutissatut sulisitsisunit akiliutinik akiliisitsisarnissamut § 71-imi periarfissiisoqarpoq. Tamanna maleruagassanut maannamut atuuttunut assinguvoq.

Aningaasalersuineq.

Aningaasalersuinissamut pisariaqartitsineq ataatsimut katillugu Takussutissiaq 1-imi nassuiarneqartoq aningaasanut inatsimmi immikkoortinneqassaaq. Taamaattumik aningaasanut inatsimmi 2018-imut 4,9 mio. koruunit (1. juli 2018 susassaqarfiup tigunissaa naatsorsuutigalugu) aammalu ukiunut tamatuma kingulianiittunut 9,2 mio. koruunit ukiuni tulliuttuni immikkoortinneqassasut

2018-imut aningaasanut inatsimmut siunnersuutaat sipaarutissanut taarsiisussanut siunnersuummik imaqassaaq, sullivinni avatangiisinut suliassaqarfiup akisussaaffigilerlugu tiguneqarneranut ingerlanneqarneranullu tamakkiisumik aningaasalersuutaasussanik. Taamaalilluni sipaarutissanut taarsiisussanut siunnersuutit Aningaasanut inatsimmut isumaqatigiissutissaq pillugu Inatsisartuni partiinut isumaqatiginninniarnermi ilaatinneqassapput.

#### **4. Inuussutissarsiortunut aningaasaqarnikkut allaffissornikkullu sunniutaasussat**

##### **4.1 Allaffissornikkut sunniutaasussat**

Nunami sullivinni avatangiisinut suliassaqarfiup akisussaaffigilerlugu tiguneqarnerata kingunerisaanik, inuussutissarsiortut siunissami suliassaqarfimmi kalaallit oqartussaasuinut attaveqartassapput aammalu siusinnerusukkut pisartutut danskit oqartussaasuinut attaveqartarunnaassallutik.

Suliassaqarfimmi maleruagassat aamma oqartussaasup ilusiligaanera annertunerpaatigut maannamut inatsisini inissisimanermut assingussaaq, tamatumalu inuussutissarsiortut pissutsinut nutaanut naleqqussarnissamut periarfissaqartissavai.

##### **4.2 Aningaasaqarnikkut sunniutaasussat**

Aningaasaqarnikkut akisussaaffigilerlugu tigusineq inuussutissarsiortunut aningaasartuuteqarnerulernermik malitseqassanngilaq.

Suliassaqarfiup akisussaaffigilerlugu tiguneqarnerani, assersuutigalugu sulitilluni ajutoornerit amerlassusaat sunnerneqassanersoq, sioqqutsitsumik paasinarsinneqarsinnaanngilaq.

## **5. Avatangiisinut, pinngortitamut inuillu peqqissusaannut sunniutaasussat**

Sullivinni avatangiisit pillugit Inatsisartut inatsisaat avatangiisinut, pinngortitamut inuillu peqqissusaannut ingerlaannaq sunniuteqassanngilaq.

Inatsisartut inatsisaat, assersuutigalugu sulitilluni ajutoornerit amerlassusaannut sunniuteqassanersoq, sioqutsisumik paasinarsisinneqarsinnaanngilaq.

## **6. Innuttaasunut sunniutaasussat**

Siunnersuutip kingunerisaanik innuttaasut siunissami sullivinni avatangiisinut suliassaqarfimmi kalaallit oqartussaasuinut attaveqartalissapput aammalu siusinnerusukkut pisartutut danskit oqartussaasuinut attaveqartarunnaassallutik.

Suliassaqarfimmi maleruagassat aamma oqartussaasup aaqqissugaanera annertunerpaatigut maannamut inatsisitigut inissisimanermut assingussapput, tamannalu innuttaasut pissutsinut nutaanut naleqqussarnissaannut periarfissiissaaq.

Inatsisartut inatsisaat, assersuutigalugu sulitilluni ajutoornerit amerlassusaannut sunniuteqassanersoq, oqaatigineqarsinnaanngilaq.

Aningaasaqarnikkut akisussaaffigilerlugu tigusineq innuttaasunut aningaasartuuteqarnerulernermik malitseqassanngilaq.

## **7. Sunniutaasussat annertuut allat**

Siunnersuut allanik annertuunik sunniuteqassagatinneqanngilaq.

## **8. Oqartussaasunut kattuffinnullu il.il. tusarniaaneq**

Siunnersuut piffissami 27. december 2016-imit 27. januar 2017-imut Namminersorlutik Oqartussat tusarniaanermut nittartagaanniitineqarpoq.

Siunnersuut aamma oqartussani kattuffinnilu il.il. makkunani tusarniaassutigineqarpoq: Naalackersuisoqarfiit tamarmik, Qeqqata Kommunia, Qaasuitsup Kommunia, Kommune Kujalleq, Kommuneqarfik Sermersooq, KANUKOKA, NUSUKA, Sulisitsisut, SIK, perorsaasut peqatigiiffiat (PIP), Peqqissaasut kattuffiat (PK), Kalaallit Nunaanni ilinniartitsisut kattuffiat (IMAK), Atorfillit kattuffiat (AK), Kalaallit Nunaanni ilinniagartuut kattuffiat (ASG), Aalisartut Piniartullu Kattuffiat (KNAPK), Kalaallit Nunaanni Rigsombudsmandi, Kalaallit Nunaanni Sullivinni avatangiisinut siunnersuisooqatigiit aamma Politiit.

Makkunangga tusarniaanermut akissuteqaat tiguneqarpoq:

Namminiilivinnermut, Pinngortitamut, Avatangiisinut Nunalerinermullu Naalackersuisoqarfik, Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalackersuisoqarfik, Peqqissutsimut Naalackersuisoqarfik, Isumaginninnermut, Ilaqutariinnut, Naligiissitaanermut Inatsisinillu Atuutsitsinnermut Naalackersuisoqarfik, Aningaasaqarnermut Naalackersuisoqarfik, Aatsitassanut Ikummatissanullu Naalackersuisoqarfik, Kommuneqarfik Sermersooq, KANUKOKA, Kalaallit Nunaanni ilinniagartuut kattuffiat (ASG), Sulinermik Inuussutissarsiuteqartut Kattuffiat (SIK), Atorfillit Kattuffiat (AK), Peqqinnissaq pillugu Kattuffiat (PPK), Ilinniartitsisut kattuffiat (IMAK), Sulisitsisut, Kalaallit Nunaanni Politiit aamma Suliffissaqartitsinnermut ministereqarfik.

Tusarniaanerup nalaani aammalu tusarniaanermut nangissutigalugu Inuussutissarsiornermut, Suliffeqarnermut, Niuernermut Nukissiuuteqarnermullu Naalackersuisoqarfiup aamma Kalaallit Nunaanni Sullivinni avatangiisinut siunnersuisooqatigiit, suliffeqqarnermi susassaqaqatigiinnit atituumik aallartitaqarfiusup, akornanni siunnersuut pillugu marloriarluni ataatsimeeqatigiittoqarpoq.

Kiisalu tusarniaanermut atatillugu qinngornernut illersuuteqarnissap aamma qinngornerit ioninngortitsisartut passunneqarnissaat pillugu Peqqissutsimut Naalackersuisoqarfik ataatsimeeqatigineqarpoq.

Tusarniaanerup kingorna Sullivinni avatangiisit pillugit naammagittaalliortarfik pillugu § 82 ilanngunneqarpoq. Tamatuma kingunerisaanik aalajangersakkat tusarniaanermi § 82-imiittut aammalu qaffasinnermik normullit qaffasinnermik normoqalerput. Assersuutigalugu aalajangersagaq tusarniaanerup nalaani § 85-iusoq, maannakkut § 86-inngorpoq.

Tulliuttuni tusarniaanermut akissuteqaatit aamma allannguutissatut siunnersuutit, tusarniaanerup nalaani tiguneqartut, sammineqarput. Oqaatigineqassaaq, tusarniaanermut akissuteqaatit, uingasumik allassimasut, taamaallaat pingaaruteqarnerannik naliliineq tunngavigalugu pingaarnersiorlugit issuarneqarmata.

Namminiilivinnermut, Pinngortitamut, Avatangiisinut Nunalerinermullu Naalackersuisoqarfik siunnersuummut oqaaseqaatissaqarsimannilaq.

Peqqissutsimut Naalackersuisoqarfiup § 2-mut tunngatillugu oqaatigaa: *”Naalackersuisoqarfik isumaqarpoq § 2, imm. 3-mut nassuiaatit tamakkiisuunnigitsut, tassami atuuffissaasa annertussusaat ersarinngissorinarmat.”*

Aalajangersakkami suliassa qarfirmi inatsisitigut inissisimaneq ingerlateqqinneqarpoq, aammalu Kalaallit Nunaanni sullivinni avatangiisit pillugit inatsimmi § 2, imm. 3-mut atuuttumut naapertuulluni.

§ 2, imm. 3-mut nassuiaatit tusarniaaffigineqartut oqaaseqaataat tunngavigalugu itisilerniarneqarput. Nassuiaatini maannakkut pissutsit qinngornernut ioninngortitsisartunut tunngasut immikkuullarissut nassuiarneqarput.

Peqqissutsimut Naalackersuisoqarfiup qinngornernut ioninngortitsisartunut tunngatillugu oqaatigaa: "2015-imi qinngornerit ioninngortitsisartut pillugit aamma qinngornernut illersuuteqarnissaq pillugu Inatsisartut Inatsisaat nr. 33, 9. december 2015-imeersoq atuutilerpoq.

*Inatsit inatsisitut nalinginnaasutut, innuttaasunut tamaginnut tunngasutut, iluseqarpoq. Tamatuma kingunerisaanik, suliassa qarfik akisussaaffigilerlugu tigugaanni, annertussusissanut killissaliussanik aamma uuttortaasarfinnik ilaalu ilanngullugit qinngornernut inatsit malillugu pisussanik, Inatsisartut inatsisaat nutaaq imaqaassaaq.*

*Naalackersuisoqarfik isumaqarpoq qinngornerit ioninngortitsisartut aamma qinngornernut illersuuteqarnissaq pillugu inatsimmut nalinginnaasumik innersuussineq amigaataasoq. Aammattaaq Naalackersuisoqarfik isumaqarpoq sullivinni avatangiisit pillugit inatsisip aamma qinngornerit ioninngortitsisartut pillugit inatsisip akornanni killissaliinissaq amigaataasoq.*

*Naalackersuisoqarfiit akimorlugit inatsisinik ingiaqatigiisitsinissaq pinngitsoorneqassasoq namminersorneq pillugu inatsimmi pingaaruteqartoq, Naalackersuisoqarfiup uparuassavaa.*

*Tamanna tunngavigalugu inatsisissatut siunnersuutip 2017-imi upernaakkut ataatsimiinnermi saqqummiunneqarnissaa sioqqullugu erseqqinnerusumik killissalersuinissaq pillugu ataatsimeeqatigiinnissamut aggersarneqarnissaq Peqqissutsimut Naalackersuisoqarfiup naatsorsuutigaa."*

Tusarniaanermut nangissutigalugu, qinngornernut illersuuteqarnissamut suliassa qarfiup maleruagassiivigineqarnera paasiniallugu, ilanngullugu peqqissutsimut suliassa qarfiup aamma sullivinni avatangiisinut suliassa qarfiup akornanni killissat paasiniallugit, Peqqissutsimut Naalackersuisoqarfik ataatsimeeqatigineqarpoq.

Peqqissutsimut Naalackersuisoqarfiup ataatsimeeqatigineqarnera tunngavigalugu qinngornerit ioninngortitsisartut pillugit immikkoortoq nassuiaatini nalinginnaasuni immikkoortoq 1-imi ikkunneqarpoq. Tamatuma saniatigut § 91, imm. 3 nutaaq, qinngornerit ioninngortitsisartut pillugit aamma qinngornernut illersuuteqarnissaq pillugu Inatsisartut Inatsisaanni § 1, imm. 4-mik atorunnaarsitsisussaq, suliarineqarpoq.

Qinngornerit ioninngortitsisartut pillugit Inatsisartut inatsisaat § 1, imm. 4-mi sullivinni avatangiisinut inatsimmut killissaliinermik imaqarpoq: *"Inatsimmut ilaatinneqanngillat sulisut, sulinermi avatangiisit pillugit inatsimmi ilaatinneqartut"*. Killissaliineq maannamut pisariaqarsimavoq, tassami sullivinni avatangiisinut suliassaqaarfik danskit aalajangiisinnaatitaaffigisimammagu. § 1, imm. 4-p atorunnaarsinneqarnerata kingunerisaanik qinngornerit ioninngortitsisartut pillugit aamma qinngornernut illersuuteqarnissaq pillugu Inatsisartut Inatsisaat suliqaarnernut tamaginnut atuutissaaq.

§ 68, nr. 8-mi aalajangersarneqarpoq, sullivinni avatangiisit pillugit Inatsisartut inatsisaata atuuffissaasa iluanni qinngornerit ioninngortitsisartut pillugit aamma qinngornernut illersuuteqarnissaq pillugu Inatsisartut Inatsisaanni piumasaqaatit malinneqarnersut Sullivinnik Nakkutilliisoqarfik nakkutilliinissamut pisussaaffeqartoq.

Qinngornernut illersuuteqarnissaq aamma qinngornerit ioninngortitsisartut pillugit piumasaqaatit, aatsitassanut suliassaqaarfiup iluani pīaanissamut akuersissutini maannamut pisartutut ilaatinneqarsinnaapput, aammalu piumasaqaatit taakkua taamaattoqarpat Sullivinnik Nakkutilliisoqarfimmit nakkutigineqassapput. Qinngornernut illersuuteqarnissamut suliassaqaarfiup iluani piumasaqaatit, matuma siuliani oqaatigineqartutut, Sullivinnik Nakkutilliisoqarfiup missingersuutaasa iluanni naammassineqarsinnaapput.

Peqqissutsimut Naalackersuisoqarfiup § 60-imut aamma tassunga nassuiaatinut oqaatigaa: *"Suut nakorsamit misissortinnerit § 60-imi pineqartunut ilaanersut, aammalu misissortinnerit taakkua qanoq akulikitsigisumik pisassanersut, Peqqissutsimut Naalackersuisoqarfiup ersaritsinngilai. Nunatsinni peqqinnissaqarfiup misissortinnerit pineqartut suliarisassagai naatsorsuutigineqarnersoq, inatsimmi tassungalu nassuiaatini allassimannngilaq. Aamma tamatumunnga aningaasartuutit suussanersut aammalu aningasartuutit taakkua kia akilertassaneraī paasinarsisinneqanngissorinarpoq.*

*Nakorsamit misissortinnerit erseqqinnerusumik aalajangersarnissaanni aammalu taakkua qanoq aningaasalersorneqassanersut akuutinneqassalluni Peqqissutsimut Naalackersuisoqarfiup naatsorsuutigaa."*

Siunnersuummi § 60 Kalaallit Nunaanni sullivinni avatangiisit pillugit inatsimmi § 49-mut atuutereersumut assinguvoq. Aalajangersakkami inatsisitigut inissisimaneq maannamut atuuttoq ingerlateqqinneqarpoq, ilanngullugu nakorsamit misissortinnerit pillugit piumasagaatit maannamut atuuttut.

§ 60, imm. 3-mut nassuiaatini allassimavoq, akiliinissamut pisussaaffeqarneq pingaarnertigut sulisitsisumiittoq. Tamatuma saniatigut tamanna Naalakkersuisut pisariaqartippassuk, aningaasartuutit tamakkiisumik ilaannaasumilluunniit akilerneqartarnissaat pillugu maleruagassanik Naalakkersuisut aalajangersaasinnaapput.

§ 60-ip (Kalaallit Nunaanni sullivinni avatangiisit pillugit inatsimmi § 49) inatsisitigut tunngavissatut atorpeqarsimaneranut assersuutissaq, Kalaallit Nunaanni aatsitassanik piiaanissaq siunertaralugu piiaanermik aamma aatsitassarsiorluni misissuineramik suliaqarneq pillugu Sullivinnik Nakkutilliisoqarfiup Nalunaarutaani nr. 302, 26. marts 2015-imeersumi takuneqarsinnaavoq. Nalunaarummi kapitali 6-imi peqqissutsimik misissuisarneq pillugu aalajangersakkat takuneqarsinnaapput, ilanngullugu sulisut peqqissutsikkut ajoqusiisumik sunnertissimasinnaasut, suliaqarnerup aallartinginnerani aammalu pisuni aalajangersimasuni tamatuma kingorna akuttunngitsumik aammalu minnerpaamik ukiut pingasukkaarlugit peqqissutsikkut misissortissinnaasasut, Sulisitsisup qulakkiissagaa. Pisussaaffeqarneq sulisitsisumiippoq, taamaalillunilu misissortinnermi aningaasaqarnikkut aningaasartuutit akilertussaallugit.

Tusarniaanermut nangissutigalugu Peqqissutsimut Naalakkersuisoqarfik ataatsimeeqatigineqarpoq, tassani apeqqutit oqallisigineqarlutik.

Peqqissutsimut Naalakkersuisoqarfiup ataatsimut isigalugu inatsimmut aamma nassuiaatinut oqaatigaa: ””Peqqissutsikkut isumannaatsumik”, ”isumannaallisaaneq peqqinnissarlu eqqarsaatigalugit” aamma ”napparsimalernissap navianaateqarnera” inatsimmi nassuiaatinilu erseqqissarneqarnissaat aammalu tamatuma suut kingunerissanerai, amigaatigineqarpoq. Taakkua ilaatigut § 1-imi, § 5-imi, § 6, imm. 3-mi, § 7, imm. 4-mi, § 9, imm. 4-mi, § 12-imi, § 13, imm. 1-imi, § 14-imi, § 15, imm. 1-imi, § 17-imi, § 18, imm. 1-imi, § 20-mi, § 24, imm. 1-imi, § 25-mi, § 26-mi, § 27-mi, § 28, imm. 2-mi, § 29, imm. 1-imi, § 32-mi, § 33-mi, § 34-mi, § 37-mi, § 38-mi, § 39-mi, § 40-mi. § 42-mi, § 44-mi, § 45, imm. 5-imi aamma 6-imi, § 56, imm. 1-4-mi, aamma 7-imi, § 60-imi, § 64, imm. 1-imi, § 68-imi, § 77, imm. 2-mi aamma 3-mi allassimapput.”

Inatsisitigut inissisimaneq Kalaallit Nunaanni sullivinni avatangiisit pillugit inatsimmi sullivinni avatangiisinut suliassaqarfimmi atuuttoq, aallaaviatigut sullivinni avatangiisit pillugit Inatsisartut inatsisaanni ingerlateqqinneqarpoq. Tamatuma kingunerisaanik

aalajangersakkat maannamut inatsisitigut inissisimanermut naapertuuttumik nassuiarneqassapput, taamatullu taaguutit inatsimmi atorneqartut maannamut pisartutut nassuiarneqassallutik.

Inatsisartut inatsisaat inatsisaavoq sinaakktissatut inatsisaavoq. Taaguutit atorneqartut sinaakktissiipput, ileqquusumik, allaffissornikkut aalajangersakkat, nalunaarutit, ilitersuutit aamma inatsisini suleriaasiusartut, pisuni ataasiakkaani immersorneqartassallutik.

Inatsisartut inatsisaanni taaguutit, ilanngullugit tusarniaaffigineqartumit taaneqartut, Inatsisartut inatsisaanni tamakkiisumik nassuiarneqarsinnaanngillat. Pisut ataasiakkaat amerlasoorpassuupput (naassaannigitsut), taaguutit, assersuutigalugu taaguut ”peqqissutsikkut illersorneqarsinnaasumik” atorneqarluni. Taaguutit suliaqarnermi immersorneqartarput nassuiarneqartarlutillu, ilaatigut suliffeqarfiit ataasiakkaat isumannaallisaanermik peqqissutsimillu suliaqarnerannut atatillugu, tassani isumannaallisaanermi suleqatigiit aamma isumannaallisaanermut ataatsimiititaliat, sullivinni avatangiisit pillugit Inatsisartut inatsisaanni piunasaqaatit malinneqarnerisa qulakkeernissaanut peqataallutik.

Isumaginninnermut, Ilaqutariinnut, Naligiissitaanermut Inatsisinillu Atuutsitsinnermut Naalackersuisoqarfiup kap. 15-imut tunngatillugu oqaatigaa: ” *Taaguut pillaaneq nassuiaatini arlaleriarluni allassimavoq, kisianni taaguut pillaaneq nalinginnaasumik atorneqartanngilaq. Tamatumunnga taarsiullugu iliuusissat imaluunniit pineqaatissiineq atorneqartarput.* ”

Nassuiaatit iluarsineqarput.

Peqqissaasut Kattuffiata (PK) aamma Peqqinnissaq pillugu Kattuffiit (PPK) oqaatigaa: ” *Inatsisissatut siunnersuummut tunngatillugu oqaatigineqassaaq, Danmarkimi pisartut akerlianik Kalaallit Nunaanni aalajangiisinnaatitaaneq Naalackersuisumut ataatsimut pinnani Naalackersuisunut tamarmiusunut suliakkiunneqarmat, Peqqinnissaq pillugu Kattuffiit eqqumiigigaat – tamanna pisariusorujusoorpasippoq, aammalu taamaalilluni maleruagassanik tapiliussassanik aalajangersaanissaq pillugu aalajangiisoqarsinnaalluni, Naalackersuisut tamarmiusut suliassaqarfimmi tamarmi naammattumik paasisimasaqassasut inatsisiliortut anguniarniarmassuk, Peqqinnissaq pillugu Kattuffiit eqqumiigaat. Peqqinnissaq pillugu Kattuffiit siunnersuutigaat, inatsimmi Suliffeqarnermut Inuussutissarsiornermullu Naalackersuisumut suliakkiussisoqassasoq, taamaalilluni Naalackersuisut tamarmik maleruagassanik tapertaasussanik aalajangersaanermut akisussaatinneqassanatik.* ”

Oqaasertaliineq, Inatsisilioriaatsimut malittarisassat, Namminersorlutik Oqartussani maleruagassanik suliaqarnermut malittarisassat, pingajussaannik iluarsisat 2011-meersut,



imm. 5.1.1.8 naapertorlugu piginnaatitsissuteqarnermut aalajangersakkanik ilusiliisarnermut suleriaatsinut nalinginnaasunut, naapertuuppoq.

Peqqissaasut Kattuffiata (PK) aamma Peqqinnissaq pillugu Kattuffiit (PPK) ingerlaqqillutik oqaatigaat: ” *Sullivinni avatangiisinut siunnersuisooqatigiinnut ilaasortanut tunngatillugu inatsisissatut siunnersuummi § 65-imut tunngatillugu oqaatigineqassaaq, ilaasortassaq PK kisiat pinnagu, Peqqinnissaq pillugu Kattuffinnit toqqarneqarpat naleqqunnerusinnaasoq.* ”

Tusarniaaffigineqartup oqaaseqaataa malinneqarpoq. Siunnersuummi § 65, imm. 1, nr. 2 allanngortinneqarpoq, Peqqissaasut Kattuffiannut (PK) taarsiullugu Peqqinnissaq pillugu Kattuffiit (PPK) ilaasortamik toqqaanermi peqataasussanngorlugit. Allanngortitsineq PK-mit taamatullu PKK-mit kissaateqarneq tunngavigalugu pivoq, taamatullu peqqissaasuinnaanngitsut, kisiannili Peqqinnissaq pillugu Kattuffiit tamarmik Sullivinni avatangiisinut siunnersuisooqatigiit katitigaanerannut sunniuteqassallutik.

Aningaasaqarnermut Akileraartarnermullu Naalakkersuisoqarfiup oqaatigaa: ” *Siunnersuummut nassuiaatini Pisortanut aningaasaqarnikkut allaffissornikkullu sunniutaasussat ataanni immikkoortoq 3.2-mi imatut allassimasoqarpoq:*

*Sullivinni avatangiisinut suliassaqaqarfiup akisussaaffigilerlugu tiguneqarneranut atatillugu aningaasartuutissat 8,6 mio. koruuninik annertussuseqartussatut missingersorneqarput, taakkunangga pilersitsinermut atatillugu ataasiartumik aningaasartuutit (nuunnermut aningaasartuutit) ukioq siulleq 300.000 koruuniullutik. Tamatuma kingorna aningaasartuutit ukiumut 8,3 mio. koruuniussasut naatsorsuutigineqarpoq.*

*Tamatuma kingorna allassimalluni:*

*Aningaasalersuineq.*

*Aningaasalersuinissamut pisariaqartitsineq ataatsimut katillugu Takussutissiaq 1-imi nassuiarneqartooq aningaasanut inatsimmi konto xxx xxx-imi immikkoortinneqassaaq. Taamaattumik aningaasanut inatsimmi konto nr. xxx xxx-imi 2018-imut 8,6 mio. koruunit aammalu ukiumut tamatuma kingulianiittunut 8,3 mio. koruunit immikkoortinneqassasut siumut takorloorneqarpoq.*

Pisortanut aningaasaqarnikkut allaffissornikkullu sunniutaasussat pillugit immikkoortoq 3 innersuussutigineqarpoq. Suliassaqaqarfiup akisussaaffigilerlugu tiguneqarneranut atatillugu aningaasartuutit, nalinginnaasumik pisartutut, aningaasanut inatsisissatut ukiumoortumik siunnersuutini ilanngunniarneqassapput aammalu ukiumoortumik aningaasanut inatsisit akuerineqarnissaat sioqqullugu politikikkut pingaarnersiuinerni nalinginnaasuni ilaassallutik.

Kommuneqarfik Sermersuup oqaatigaa: ” *Kommunip siunnersuut qujaruppa.* ”

*Tamatuma saniatigut inatsisissatut siunnersuummi nassiunneqartumi § 70, imm. 3-mut tunngatillugu ersarinnerutitsinissaq pisariaqartinneqartoq, kommunip tusarniaanermut akissuteqaammini uparuarpa.*

*” Imm. 3. Akiliuteqartarneq pillugu maleruagassanik Naalackersuisut aalajangersaasinnaapput, misissuinernut il.il. Sullivinnik Nakkutilliisoqarfimmit ingerlanneqartunut imaluunniit aallartinneqartunut akitsuutitut akigititatigut aalajangersagaasutut iluseqartuusinnaalluni. ”*

Aalajangersagaq Kalaallit Nunaanni sullivinni avatangiisit pillugit inatsisaanni maannamut atuuttumi § 57, imm. 3-mut assinguvoq, tassani aningaasartuutit taamaaqataannik aammalu akitsuutinik misissuinernut il.il. Sullivinnik Nakkutilliisoqarfimmik ingerlanneqartunut imaluunniit aallartinneqartunut tunngasunik akiliisarneq pillugu maleruagassat pineqartunut ilaapput.

§ 70, imm. 3-mut nassuiaatit, aalajangersagaq qanoq atuutissanersoq assersuutit aalajangersimasut pingasut taaneqarlutik, annertusarneqarput. Teknikkikkut aaqqissuussinermik misiliineq tassani pineqarpoq, isumannaallisaaneq eqqarsaatigalugu Sullivinnik Nakkutilliisoqarfimmit ingerlaavartumik misissuisarnissaq pisariaqarluni, tassani aaqqissuussaana teknikkikkut nalilersorneqartassalluni. Nassuiaatini misissugassat misissuinerillu suussusaannut assersuutit ilanngunneqarput: soorlu igaasarsuit aalaliortut nunamiittut, nunami gassinut naqitsineq atorlugu arrortitanut poorineqartut aamma naqitsineqartunut poorineqartut il.il. angallattakkat.

Siunertaavoq aningaasartuutit matussuserneqarnissaasa qulakkeerneqarnissaa, taamaalilluni nakkutilliineq misiliisarnerlu pisariaqartut, maannamut inatsisit malillugit suleriaatsinut naapertuuttumik, isumannaallisaanikkut isumannaatsumik ingerlanneqarsinnaassallutik.

Suliffissaqartitsiniarnermut ministereqarfiup oqaatigaa: ” *Inatsisartut inatsisissaannut siunnersuut aalajangersakkamik imaqarpoq (§75), taanna malillugu Kalaallit Nunaanni Sullivinnik Nakkutilliisoqarfik ilaatigut Arbejdsmarkedets Erhvervssikringip sulitilluni ajutoornerit aamma inuussutissarsiortut nappaataat pillugit sullivinni avatangiisit pillugit paasissutissanut tunngavissanit pigisaannit paasissutissanik katersinissamut ataatsimoortitsinissamullu inatsimmi tunngavissaqalissalluni.*

*Suliffissaqartitsiniarnermut ministereqarfik naliliivoq, Kalaallit Nunaanni Sullivinnik Nakkutilliisoqarfiulersussap Arbejdsmarkedets Erhvervssikringimit paasisutissanik piniarsinnaanissaanut inatsisissatut siunnersuummi § 75 kisimiitillugu inatsisini tunngavissaasinnaangitsoq. Taamaalilluni naliliisoqarpoq Kalaallit Nunaanni sulitilluni ajoqusersinnaanermut isumannaarineq pillugu inatsimmi tamatumunnga tunngavissaliinissaq pisariaqartussaasoq.*

*Suliffissaqartitsiniarnermut ministereqarfik, Kalaallit Nunaata sullivinni avatangiisinut suliassaqarfik akisussaaffigilerlugu tiguneranut peqatigitillugu imaluunniit tamatuma kingorna sapinngisamik piaartumik, tamatumunnga aaqqiissutissarsinissamut piareersimavoq.”*

Siunnersuummi Arbejdsmarkedets Erhvervssikringip (Sulitilluni ajoqusernerit pillugit sullissivik) aamma Sullivinnik Nakkutilliisoqarfiup nutaap, maannamut suleqatigiinnerup pisarneratuulli, paasisutissanik ataatsimoortitsisinnaanissaanut aammalu nalunaarutiginneriaaseq ataatsimoorussa q pillugu suleqatigiissinnaanissaannut Kalaallit Nunaanni Inatsisartut inatsisaanni tunngavissaq pisariaqartoq pilersinneqarpoq.

Tusarniaanermut akissuteqaateqareernerup kingorna, Sulitilluni Ajoqusernerit pillugit Sullissiviup aamma Sullivinnik Nakkutilliisoqarfiup suleqatigiinnerisigut katersisarnerup ataatsimoortitsisarnerullu maannamut pisartutut ingerlanneqaannarnissaa qulakkeernialugu, suliffissaqartitsiniarnermut ministereqarfiup danskit inatsisaanni ilanngunnissaanik suliaqarneq aallartippaa.

Aaqqissuussaq taamaattoq naapertuuppoq, tassami suliffeqarfiit aamma innuttaasut nalunaarutiginninniarlutik sumiiffimmut ataasiinnarmut saaffiginnittussaassammata. Peqatigisaanik suliassaqarfiit sorliit immikkut eqqorneqartarnersut pillugu ilisimasaqalernissamut tamanna periarfissiivoq, taamaalilluni suliassaqarfinni eqqorneqarnerpaasartuni isumannaallisaanerup peqqinnissallu pitsanngorsarnissaannut siunnerfilimmik sunniuteqarluartumillu suliniuteqartoqarsinnaassalluni.

*Suliffissaqartitsiniarnermut ministereqarfiup ingerlaqqilluni oqaatigaa: ” Inatsisissatut siunnersuummut nassuiaatini aallarniutaasuni, ilaatigut siunissami Sullivinnik Nakkutilliisoqarfiup suleqatiginissaanut tunngasumi, qupperneq 2-imi oqaatigineqarpoq, sullivinni avatangiisinut suliassaqarfiup Kalaallit Nunaannit akisussaaffigilerlugu tiguneqarnissaa pillugu nassuiaat Folketingip Suliffissaqartitsiniarnermut ataatsimiititaliaanut aamma Kalaallit Nunaannut ataatsimiititaliaanut nassiunneqartoq, kisianni Inuussutissarsiornermut ataatsimiititaliamut nassiunneqanngitsoq.”*

Nassuiaatit aallarniutaasut suliffissaqartitsiniarnermut ministereqarfiup oqaaseqaataannut naapertuuttumik iluarsineqarput, taamaalilluni maannakkut allassimalerluni, nassuiaat Folketingip Suliffissaqartitsiniarnermut ataatsimiititaliaanut aamma Folketingip Kalaallit Nunaannut ataatsimiititaliaanut nassiuqqartoq.

*Suliffissaqartitsiniarnermut ministereqarfiup naggataatigut oqaatigaa: ” Ileqqorissaarnissaq eqqarsaatigalugu qupperneq 4-mut oqaatigineqassaaq, maannakkorpiaq danskit Sullivinnik Nakkutilliisoqarfianut suleqatigiinnissaq pillugu isumaqatigiissuteqartoqarsimangitsaq. Sullivinni avatangiisinut suliassaqarfik Kalaallit Nunaannit akisussaaffigilerlugu tiguneqassappat, Sullivinnik Nakkutilliisoqarfik sullivinni avatangiisinut tunngasunut siunnersuisarnissaq pillugu suleqatigiinnissamut isumaqatigiissuteqassaaq, ilanngullugu danskit sullivinni avatangiisinut maleruagassiaat pillugit inatsisilerinikkut siunnersuineq. Suleqatigiinnissamut isumaqatigiissummut killissaliussat, nunami sullivinni avatangiisinut suliassaqarfiup Kalaallit Nunaanni akisussaaffigilerlugu tiguneqarnissaa pillugu suleqatigiissitaliamit nassuiaammi ilanngussaq A-imi nassuiarneqarput. ”*

Tamanna malillugu qupperneq 4-mi nassuiaatit iluarsineqarput. Suliffissaqartitsiniarnermut ministereqarfiup oqaatigisaatut, suleqatigiinnissamut isumaqatigiissummut killissaliussat, nunami sullivinni avatangiisinut suliassaqarfiup Kalaallit Nunaanni akisussaaffigilerlugu tiguneqarnissaa pillugu suleqatigiissitaliamit nassuiaammi ilanngussaq A-mi nassuiarneqarput. Tamanna maannakkut nassuiaatini nalinginnaasuni allassimalerpoq.

*Sulisitsisut oqaatigaa: ” Sullivinni avatangiisinut suliassaqarfik suliassaqarfiuvoq teknikkikkut inatsisilerinikkullu pisariusoq, nunatsinni maani pigineqanngitsunik sulianut annertoorujussuarmik ilisimasaqarfigineqartariaqartoq. Tamatuma kingunerisaanik immikkut ilisimasaqartunik pisisartussaavugut, aammalu 1,3 mio. koruunit inatsisissatut siunnersuummi tamatumunnga immikkoortinneqartut, naammannersut qularnartorujussuusooq GE isumaqarpoq.*

*Kalaallit Nunaata inuiaqatigiit ineriartornerannut aammalu teknologiikkut ineriartornermut inatsisitigut malinnaasinnaanginnera annertuumik aarlerinartussaavoq. Tamanna ingerlatsivinni suliassaqarfiit allat iluanni siusinnerusukkat arlaleriarluni takuneqartareerpoq. ”*

Tusarniaaffigineqartup oqaatigisaatut, teknikkikkut sulianut siunnersuineranut, nakkutilliinerimi periaatsinik ikiorneqarnissaq aammalu inatsisilerinikkut isumasioqateqartarnissaq pillugit Danmarkimi Sullivinnik Nakkutilliisoqarfimmut suleqatigiinnissamut isumaqatigiissummut 1,3 mio. koruuninik atugassaqarnissaq aalajangerneqarpoq.

1,3 mio. koruuninik atugassaqaqarnissami, aningaasartat taakkua Nunami sullivinni avatangiisinut suliassaqaqarfiup Kalaallit Nunaanni akisussaaffigilerlugu tiguneqaqarnissaa pillugu suleqatigiissitaliamit nassuiaammi pisariaqartinneqartutut missiliorneqartut.

Aningaasartat 1,3 mio. koruunit, Sullivinnik Nakkutilliisoqaqarfimmut nutaamut aningaasarsianut aningaasartuutissat tamarmiusut ukiumut 3,3 mio. koruuniusussatut nalilerneqartunut sanilliukkaanni, annertupput. Taamaalilluni suleqatigiinnissamut isumaqatigiissummut aningaasatigut killissaliussat Sullivinnik Nakkutilliisoqaqarfimmi aningaasarsianut aningaasartat immikkoortinneqartut 39 %-iinut naapertuuttut, aalajangersarneqarput.

Siunnersuummi suleqatigiinnissamut isumaqatigiissummut aningaasassat saniatigut Sullivinnik Nakkutilliisoqaqarfiup missingersuutaanni inatsisinik suliaqarnissamut 200.000 koruunit kiisalu inatsisilerinikkut annertunerusumik taperserneqarnissamut aamma suliani isumasioqateqarnissamut, assersuutigalugu Naalakkersuisoqaqarfimmit suliassaqaqarfimmut akisussaasuusumit, 500.000 koruunit immikkoortinneqarput. Tamanna Sullivinnik Nakkutilliisoqaqarfimmi Kalaallit Nunaannut missingersuutini maannamut immikkoortinneqartartunut assinguvoq.

Siunnersuut tamatuma kingorna iluarsineqarpoq. Naalakkersuisoqaqarfiup suliassaqaqarfimmut akisussaasuusup, sullivinni avatangiisinut inatsimmut tunngatillugu, suliassanut sullivinni avatangiisinut tunngasunut piginnaasaqarfiinik nukittorsaanissamut AC-fuldmægtigimut ullup affaani atorfimmut aningaasassanik annertunerusunik immikkoortitsisoqarluni. AC-mut atorfik ½ siunnersuummi ukiumut 300.000 koruuninut naatsorsorneqarpoq.

Inuiaqatigiit ineriartornerannut aammalu teknologiikkut ineriartornermut malinnaasoqarsinnaanngitsoq, ingerlatsivinni suliassaqaqarfiit allat iluanni siusinnerusukkat arlaleriarluni takuneqarsimannngilaq. Aallaaviatigut Kalaallit Nunaat nammineq soqutigisaminut isumaginninnissamut, nunanit allanit ajornerunngilaq.

Suliassaqaqarfinnik siusinnerusukkat naalagaaffimmit akisussaaffigilerlugit tiguisarnerit misilittagaqarfigineqarluarput. Assersuutitut taaneqarsinnaavoq aatsitassanut suliassaqaqarfik, tassani aatsitassarsiorluni ingerlataqarnerit suliassaqaqarfiup tiguneqareernerata kingorna malunnaatilimmik amerlillutik, taamatullu suliassaqaqarfik iluatsitsiviulluurtumik annertusarneqarluni. Aammattaaq imartani sullivinni avatangiisinut suliassaqaqarfik, 2010-imi aatsitassanut suliassaqaqarfimmut peqatigitillugu akisussaaffigilerlugu tiguneqartoq, taaneqarsinnaavoq. Ukiuni 2010-imi aamma 2011-imi aatsitassarsiorluni misissuineri qillerinerit annertoorejussuit, annertuunik sulitilluni ajutoornertaqanngitsumik,

ingerlanneqarput. Imartani sullivinni avatangiisinut suliassaqarfimmi isumannaallisaanermut peqqinnissamullu nakkutilliineq, nunani tamalaani suleriaatsit pitsaanerpaat malillugit ingerlanneqarpoq. Suliassaqarfinit allanit iluatsitsiviusumik akisussaaffigilerlugit tiguneqarsimasunit, nukissiuuteqarnermut suliassaqarfik assersuutitut taaneqarsinnaavoq, tassani akisussaaffigilerlugu tigusinerup kingorna nukissiamik ataavartumik annertuumik atuilersitsinissaq anguneqarsimalluni. Assersuutissaq alla tassaavoq Kalaallit Nunaanni Aalisakkanik misissuisarfik, tassani akisussaaffigilerlugu tiguneqarnerata kingorna iluatsitsiviusumik nunani tamalaanitut pitsaassuseqartumik ilisimatusarnermik aallaaveqartumik sullissivimmik Pinngortitaleriffik ineriartortinneqarsimammat.

Piffissap ingerlanerani maannamut pisartunit annertunerusumik ilisimasaqalerluni suliata qanitat nammineq suliarineqartarnerini inerisaaneq, qanittumiinnermut tunngaviusup malitsigisinnaavaa. Akisussaaffigilerlugu tigusinermi iluaqutissartaasoq alla tassaasinnaavoq, sinerissami suliffeqarfiit misissuiffigineqartut attaveqaqatigiuminarnerulernerat. Sullivinni avatangiisinut siunnersuisooqatigiit taamaalillutik paasissutissiipput, amerlanertigut nakkutilliisut kalaallisut oqalussinnaanngitsuusartut imaluunniit ataasiakkaaginaat kalaallisut oqalussinnaasarlutik. Nakkutilliisut piffissap ingerlanerani kalaallit oqaasiinik ilikkariartorneranni, tamanna imminermini maannamut pisartunit pitsanngoriaataasussaavoq.

Siunnersuummi maannamut suliassaqarfiup ingerlanneqarneranut sanilliullugu, isumalluutit annertusineqassasut siunnerfigineqarpoq, taamatullu suliassaqarfimmi ilinniagaralugu sulisarnissap, ataavartumik Kalaallit Nunaannut atasussap, inerisarnissaanut periarfissaqalissalluni, taamaalillunilu maannamut pisartunit annertunerusumik Kalaallit Nunaannut najukkami ilisimasaqartoqarnerulissalluni.

*Sulisitsisut ingerlaqqillutik oqaatigaat: ” Taamaattumik annertuumik aningaasartuuteqarfiusumik aammalu piginnaasaqarnertigut unammilligassartaqartumik, suliassaqarfiup ullumikkut ajunngilluinnartumik ingerlasup, sullivinni avatangiisinut suliassaqarfiup akisussaaffigilerlugu tiguneqarnissaa pillugu inatsisissatut siunnersuummik saqqummiussinissaq Sulisitsisut sakkortunerpaamik Naalakkersuisunut nangaasaarutigissavaat. GE naliliivoq aningaasartuutissat unammilligassallu annertoorujussuarmik annikinnaagaasut, aammalu akisussaaffigilerlugu tigusineq, akileraarutit tatisimaneqarnerisa annertunerulernerata saniatigut, ajornerusumik ingerlatsivimmi aqunneqarneranik, taamaalillunilu suliffeqarfinnut ajornerusumik sullissinermik, malitseqassasoq aarleqqutigaarput. ”*

Matuma siuliani oqaaseqaatip akissuteqarfineqarnerata ataani allaaserineqartut, Sulisitsisut qularuteqarnerat isumaqatigineqanngilaq. Soorunami suliassaqarfiup ingerlatsivimmi aqunneqarnerani unammilligassaqartussaavoq. Suliassaqarfinnut

ingerlatsivimmi aqunneqartunut tamaginni taamaattoqarpoq. Namminiilivinnerup annertunerulernissaanut sulissuteqarnissaq kissaatigigaanni, tamanna unammilligassaavoq inuiaqatigiit anigorniagassaat. Soorlu inuiaqatigiit tamarmik unammilligassaminnik aniguiniartariaqartartut.

Aammattaaq oqaatigineqassaaq Suliffissaqartitsiniarnermut ministereqarfup ataani sullivinni avatangiisinut suliaasaqarfiup maannakkut ingerlatsivimmi aqunneqarnera suliaasaqarfinni qitiusuni unammilligassaqarmat. Tassani pineqarpoq aalajaatsunik sulisoqarniarnermi aammalu Kalaallit Nunaannut aalajangersimasumik attaveqartunik sulisussarsiniarnermi ajornartorsiuteqarnek. Sullivinnik Nakkutilliisoqarfiup pingaartumik suliffeqarfiit aamma innuttaasut Nuup avataaniittut eqqarsaatigalugit, kalaallisut oqalussinnaasunik sulisoqarnissaa, annertuumik pingaaruteqarpoq. Maannakkut pisartuni nakkutilliisoqarnerani oqalutsit pinngitsoorneqarsinnaasannngillat, pissutigalugu Sullivinnik Nakkutilliisoqarfimmi sulisut pisariaqartumik kalaallisut paasisinnaasannngimmata.

Akisussaaffigilerlugu tigusinermi aningaasaqarnikkut aningaasartuutissat, naalagaaffimmi oqartussaasut suleqatigalugit naatsorsorneqarput. Akisussaaffigilerlugu tigusinissap tungaanut suliaasaqarfimmut immikkoortinneqartartunit, aningaasassat amerlanerusut siunnersuummi immikkoortinneqarput.

*Sulisitsisut oqaatigaat: ” Inatsisissatut siunnersuutip sullivinni avatangiisinut inatsit tunngaviatigut annertuumik assigaa. Taamaattoq kalaallit inuussutissarsiortut siunissami aningaasartuuteqartinneqarnerutinnginnissaat qulakkeerniarlugu, aalajangersagaq pingaaruteqartoq ataaseq iluarsineqariaqarpoq.*

*Taamaalilluni ersarissumik allassimasariaqarpoq § 73 taamaallaat imartani suliffeqarfimmut atuutissasoq, tamannami inatsisissatut siunnersuummut nassuiaatini allassimavoq, kisianni aalajangersakkap oqaasertaanni allassimanani.*

*Nassuiaatini allassimavoq, suliffeqarnermi siunnersuut tusarniaassutigeqqaarnagu, nunami inuussutissarsiortunit akiliutinik akileeqqusisoqartassannngitsoq. Tamanna Sulisitsisut isumaat malillugu naammannngilaq. Suliffeqarnermi illuatungeriit tusarniaaffigereerlugit Inatsisartut taamatut aalajangiisuusariaqaraluarput.*

Tusarniaanermut akissuteqaat tusaatissatut tiguneqarpoq taamaattumillu § 73 allanngortinneqarpoq, taamaalilluni § 73 imartani suliffeqarfimmut taamaallaat atuuttoq, § 73, imm. 1-ip oqaasertaanni erseqqissumik allassimalerluni.

Sulisitsisut naggataatigut oqaatigaa: ” Naalakkersuisut siulittaasumut Naalakkersuisunit toqqarneqartumut aningaasarsianut taarsiissutitut akiliissasut § 65-imi allassimasariaqaralarpoq. ”

Tusarniaanermut akissuteqaat tusaatissatut tiguneqarpoq aammalu § 65-imut nassuiaatini ersarissarneqarpoq, Sullivinni avatangiisinut siunnersuisooqatigiinni siulittaasoq, Inatsisartunut ilaasortaannigitsut ataatsimiititaliani, aalajangiisartuni sinniisoqarfinnilu assigisaannilu peqataaneq pillugu Inatsisartuni Naalakkersuisunilu il. il. ilaasortat aningaasarsiaqartitaanerat il. il. pillugit Inatsisartut inatsisaat nr. 22, 18. december 2003-meersumi § 18, imm. 1, uniffik siullermi pineqartunut ilaasoq.

Kalaallit Nunaanni Politimesterip oqaatigaa: ”Tigusereernerup kingornatigut Naalagaaffimmi qullersaasut – ilaallutik Kalaallit Nunaanni Politiit – Inatsisartut inatsisaanni ilaasussaassanerannik, taamaalillunilu Sullivinni Nakkutilliisoqarfik pillugu Namminersorlutik Oqartussat Suliffissaqartitsiniarnermut Ministereqarfillu isumaqatiginninniarnernik aallartitaqarsimanersut ilisimasaqarfiginngikkiga aallarniutigalugu oqaatigineqassaaq. ”

Politiini suliaqartitaasartut atorfeqartunit pisuni navianartortalinni politiinut tunngasunik suliassanik isumagisaqarnermit pisup qanoq ittuuneratigut malitsigineqartunik sanioqqutitsinerit ilaatillugit Kalaallit Nunaanni Politiit sullivinni avatangiisit pillugit inatsisit atuuttut malillugit annertoqataanik sullivimmi avatangiisit pillugit Inatsisartut inatsisissaanni ilaatitaassapput. § 16-imi aalajangersakkanut nassuiaatit tamatuma nassatarisaatigut itisilerneqarput.

Kalaallit Nunaanni Politimesterip oqaatigaa: ”Taamaattumik tassunga atatillugu inatsisissatut siunnersuummi § 16-imut tunngatillugu taamaallaat taamaakkallartussatut oqaatigineqassaaq Kalaallit Nunaanni Politiit eqqartuussisaatsimut inatsimmi § 61 malillugu pisunik navianartortaqaartunik isumaginninnissaminnut pisussaaffeqarmata, ilanngullugit pinerluttunik navianartunik aallaasersornermik imaluunniit qunusaarinninnikkut anguniagaqarnerni tigusarinninnerni, kiisalu toqutsisunik aamma inuit tarnimikkut nappaatilinnik il.il. isumaginninnerni. Politiini suliaqartitaasartut atorfeqartitanut atortussaasut nalinginnaasuunnginnerat pillugu siunertamik paasinninnineq/isiginninneq aallaavigalugu aalajangersakkap atorneqarsinnaannginnera Kalaallit Nunaanni Politiit isumaqarfigaat. ”

Suliassat navianartut suliassatut naatsorsuutigisaaffianni suliassanik isumaginninnissamut aalajangersakkap politiit pisortaqaarfiillu allat killilersunngilaat. § 16-imut nassuiaat tassunga tunngatillugu itisiliiffigineqarpoq.



Kalaallit Nunaanni Politimesterip oqaatigaa: *”Inatsisissatut siunnersuummi oqaasertaliussat timitalittut soorlusooq tarnikkut atukkani sullivinni avatangiisit ilaasuunerat paatsuugassaanngitsumik isummerfiginngilaat, taamaattorli tamanna nassuiaatini tunngavigineqarluni. Inatsisit oqaasertaanni oqariaatsip ”sullivinni avatangiisit” nassuiaaviginissaat tulluartsuunnaavoq.”*

§ 1, imm. 2 nutaaq inissineqarpoq, tassanilu Inatsisartut inatsiserpiaanni tamanna aamma tarnikkut atukkani sullivinni avatangiisit ilaatinneqarnerat erseqqissaavigineqarpoq.

Oqariaaseq sullivinni avatangiisit taamatut manna tikillugu paasineqartarneratut paasineqassaaq. Sullivinni avatangiisit ilaatigut nassuiarneqarput suliamik isumaginnittoqartillugu isumannaallisaanermut peqqissutsimullu pingaarutilittut pissutsit. Taamaalillutik sullivinni avatangiisit isumannaallutillu peqqinnartut isumaqarput suliaq isumannaatsumik isumagineqartoq, suleriaatsinik isumannaatsunik atugaqartoqartoq, suliffigisaq isumannaatsumik iluarsaanneqarsimasoq, suliffissatut piffissanut aamma ukiukinnerpaaffissanut piunasaqaataasut naapertuutsinneqartut, isumannaatsumik atortussanik akuutissanillu atuisoqartoq il.il. Inatsisartut inatsisaanni pissutsinik taakkuninnga tamanik sullivinni avatangiisit ilaqarput; suillertut pingaarnertullu isumannaallisaaneq aamma peqqissuseq, aammalu Inatsisartut inatsisaanni piunasaqaataasut annikitsortalersugaanerusumik qanoq ililluni isumannaallisaaneq peqqissuserlu qulakkeerneqassanersut, ilanngullugit suliap isumaginera, suliffigisap iluarsaassimanagera, teknikkikkut atortorissaarutit, akuutissat atortussiallu, aamma suliani navianartuni ukiukinnerpaaffissaq.

Kalaallit Nunaanni Politimesterip oqaatigaa: *”Inatsimmi oqaasertani nammineq kajumissuseq malillugu sulineq ilaatinneqassanerannut isummertoqanngilaq.”*

Aamma nammineq kajumissuseq malillugu sulinermut tunngatillugu Inatsisartut inatsisaata manna tikillugu inatsisinik atuutsitsineq ingerlateqqippaa.

Inatsisartut inatsisaaniipput sulisitsisumut suliassat isumagineqartut tamarmik. Peqatigiiffimmut nammineq kajumissuseq malillugu sulineq pineqartillugu tassaavoq peqatigiiffik “nalinginnartut” sulisitsisutut akisussaaffeqarsinnaasoq.

Aammattaaq Inatsisartut inatsisaanni aalajangersakkat ilaat sulinermut, ilanngullugulu kajumissuseq malillugu sulinermut tunngapput, naak sulisitsisumut suliamik isumaginnittoqanngikkaluartoq, takuuk § 2, imm. 3. Ilaatigut suliap isumagineranut,

teknikkikkut atortorissaarutitut, akuutissanut atortussanullu, aamma suliani navianartuni ukiukinnerpaaffissat pillugit malittarisassianut tamakku tunngapput.

Kalaallit Nunaanni Politimesterip oqaatigaa: ”Kapitali 4 – suliap isumaginera pillugu tunngasunut sularisanut, sulianik ingerlatsisarnernut aamma periutsinut tunngatillugu Naalackersuisut isumannaallisaanermut peqqissutsimullu tunngasutut iliuuserisat pillugit malittarisassianik aalajangersaasinnaanissaannut tunngavissaqartitaanngitsoqarpassippoq, assersuutigalugit uppikaanerit, nakkaanerit, sisoornerit, sajukulaarnerit, qinngortinnerit, nipiliornerit pinaveersaarniarlugit, imaluunniit silaannaap akuini, aalarnerni, pujoralanni putsunilu, kissarnermi, nillernermit imaluunniit tippattuni qaartoornermut, ikuallattoornermut imaluunniit peqqissutsimut aarlerinartortat pinaveersaarniarlugit, imaluunniit suliffimmi inissisimanerit, aalanerit artukkiinerilluunniit kukkusut pinaveersaarniarlugit (assigalugu Danmarkimi sullivinni avatangiisinut inatsimmi § 39).”

**Siunnersuummi § 39**-mi suliap isumagineqarnissaa pillugu erseqqinnerusunik malittarisassiat aalajangersaaviginissaannut tunngaveqarpoq, ilanngullugit tusarniaavigineqartup taasaatut pissutsit pillugit. Taamaalilluni Kalaallit Nunaanni sullivinni avatangiisit pillugit inatsimmi § 33-mut manna tikillugu atuuttumut siunnersuummi § 39 assinguvoq.

Manna tikillugu atuuttumi Kalaallit Nunaanni sullivinni avatangiisit pillugit inatsimmi § 33 (siunnersuummi § 39-mut assingusoq) suliaqarnerup isumaginera pillugu Kalaallit Nunaannut nalunaarummi atuutsinneqarpoq. Tigusinerup kingornatigut nalunaarut atuuttuassaaq, namminersorlutik oqartussat nalunaarutaannit taarserneqarnissami tungaanut. Nalunaarummi tusarniaavigineqartup taasaanik, sularisat isumagineranik, aamma suliamik ingerlatsisarnermut periutsinullu pissutsit taakku pillugit erseqqinnerusunik malittarisassiat aalajangersagaapput, ilanngullugit uppikaanerit, nakkaanerit, sisoornerit sajukulaarnerillu pinaveernissaat pillugit (nalunaarummi § 1, nr. 1), pisariaqanngitsumik qinngortinnernit nipiliornermillu sunnerneqarnissat pinaveersaarnissaat (nalunaarummi § 6), pisariaqanngitsumik qaartoornissamut ikuallattoornissamullu ulorianartorsiornerit (nalunaarummi § 1, nr. 2 aamma § 7), pujoralammit, putsumit, aalarmit gassimillu (nalunaarummi § 1, nr. 3), kissarnermit nillernermillu (nalunaarummi § 1, nr. 5), tipiliornermit (nalunaarummi § 1, nr. 3), nappaatinit tunillattuuttunit (nalunaarummi § 1, nr. 4). Nalunaarummiippat aamma naleqqutinngitsunik sulinermit inissisimanernut imaluunniit aalanernut illersornissaq pillugu, aammalu pisariaqanngitsumik timikkut artukkernissaq pillugu aalajangersakkat (nalunaarummi § 6, imm. 2).

Manna tikillugu atuuttumi Kalaallit Nunaanni sullivinni avatangiisit pillugit inatsimmi § 33 aamma akuutissat atortussiallu pillugit Kalaallit Nunaannut nalunaarummi aamma Kalaallit Nunaanni teknikkikkut atortorissaarutit iluarsaannerat pillugu nalunaarummi

atuutsinneqarpoq. Namminersorlutik Oqartussat nalunaarutaannit nutaanit taarserneqarnissamik tungaannut maannakkut atuuttutut nalunaarutit tiguserup kingorna atuuttuassapput. Taakku siunnersuummi § 39-mik tunngaveqartumik atuutsinneqarsinnaapput.

Kalaallit Nunaanni Politimesterip oqaatigaa: ”Assingusumik Kapitali 6 – suliffigisap iluarsaannerani init suliffigisat pillugit Naalackersuisut malittarisassianik aalajangersaasinnaannissannut tunngavissisoqanngilaq, assersuutigalugit qilaap portussusissaa, silaannartaq, naqqit, iikkat, qilaat, qullilersuineq, kissassuseq, silaannaap nutarsartarnera aamma nipiliorneq, atugarissaarinissamut iliuutsit il.il., assersuutigalugit init najuiffissat nerisarfissallu, atisaasiviit, atisalersortarfiit, perusersartarfiit, errortarfiit uffartarfiillu, kiisalu sinittarfiit aamma issiaviit, aneqqusaanngittarnerit, assersuutigalugit aqquutit angallaviit, tummeqqat isertarfiillu (assigalugu Danmarkimi sullivinni avatangiisinut inatsimmi § 43).”

Oqaaseqaat siulianut assinguvoq. Inatsisartut inatsisissaattut siunnersuut tassaavoq inatsit toqqammaviliillunilu pisussaaffiliisoq, taamaattumillu pissutsit annikitsortalersorerukkat Inatsisartut inatsisaanni tullerriaarisooqanngilaq. Siunnersuummi § 41-mi suliffigisap iluarsaannera pillugu malittarisassianik, ilanngullugillu pissutsinik tusarniaavigineqartup taasaanik Naalackersuisut aalajangersaasinnaannissamut tunngavissinneqarput.

Maannakkut Kalaallit Nunaanni sullivinni avatangiisit pillugit inatsimmi § 35-mi (siunnersuummi § 41-mik taarserneqartumit) tunngavissaqartitsilluni suliffigisap iluarsaannera pillugu Kalaallit Nunaannut nalunaarut atuutsinneqarpoq.

Tusarniaavigineqartup taasaanik init suliffigisanut tunngasuni pissutsinik nalunaarut malittarisassianik aalajangersaavoq: qilaap portussusissaa, silaannartaq, naqqit, iikkat, qilaat aamma qullilersuineq pillugit (nalunaarummi § 4, nr. 1-5), kissassuseq aamma silaannaap nutarsartarnera (nalunaarummi § 4, nr. 12), nipiliorneq (nalunaarummi § 1), init najuiffissat nerisarfissallu (nalunaarummi § 4, nr. 7), atisaasiviit aamma atisalersortarfiit (nalunaarummi § 4, nr. 8), perusersartarfiit (nalunaarummi § 4, nr. 10), errortorfiit uffarfiillu (nalunaarummi § 4, nr. 9), sinittarfiit (nalunaarummi § 4, nr. 11), aqquutit angallaviit qimaasarfissallu (nalunaarummi § 2). Taamaalilluni init suliffigisat pillugit malittarisassiornissamut siunnersuummi § 41-mi tunngavissaqarpoq, ilanngullugit suliffigisap iluarsaanneranut tusarniaavigineqartup eqqorluinnartumik taasaatut pissutsit piviusuulluinnartunut pingaarutillit pillugit.

Kalaallit Nunaanni sullivinni avatangiisit pillugit inatsimmi § 35-mi (siunnersuummi § 41-mik taarserneqartumit) tunngavissaqartitsilluni makku aamma atuutsinneqarput: Kalaallit Nunaanni atortussiassanik paaanissaq siunertaralugu paaanermik ujaasinermillu suliaqarneq pillugu Sullivinnik Nakkutilliisoqarfiup nalunaarutaa nr. 302, 26. marts 2015-imeersoq,

aamma Kalaallit Nunaanni sanaartorfinnik assingusutullu suliffinnik iluarsaassineq pillugu Sullivinnik Nakkutilliisoqarfiup nalunaarutaa nr. 1348, 15. december 2005-imeersoq.

Namminersorlutik Oqartussanit nalunaarutinik nutaanik taarserneqarnissamik tungaannut suliassa qarfimmik tiguserup kingornatigut nalunaarutit atuuttuassapput, takuuk siunnersuummi § 41-mi aalajangersagaq.

Kalaallit Nunaanni Politimesterip oqaatigaa: *”Siunnersuummi § 39, imm. 1, nr. 3-mi suliat navianartut inunnit aalajangersimasumik ukioqalertunit taamaallaat isumagineqartarnissaat pillugit malittarisassianik aalajangersaanissamik tunngavissiisoqarsimangitsoq oqaatigineqassaaq.”*

Siunnersuummi § 56, imm. 3 tunngavigalugu suliaq ajutoornissamut imaluunniit nappaateqalernissamut, ilanngullugit qaartiterinermik suliaqarnermi annertuumik aarleqqutaasumik nassataqarsinnaassappat aalajangersimasumik ukioqalersimatinnani suliat isumagineqarnissaannut inerteqqutit aalajangersarneqarsinnaapput.

Kalaallit Nunaanni inuusuttut sulisarnerat pillugit Kalaallit Nunaanni sullivinni avatangiisit pillugit inatsimmi § 46, imm. 3-mik (siunnersuummi § 56, imm. 3-mut assingusumi), aamma Kalaallit Nunaanni sullivinni avatangiisit pillugit inatsimmi § 33-mik (siunnersuummi § 39-mut assingusumi) tunngaveqartumik nalunaarut atuutsitaalersimavoq. Nalunaarummi tassani kapitali 3 malillugu inuusuttunit 18-it inorlugit ukiulinnit suliat ilusaat arlallit sularineqaqqusaanngillat. Suliat ilusaat taakku, inuusuttunit sularineqaqqusaanngitsut ilaatigut nalunaarummi kapitali 3-mit aamma nalunaarummut ilanngussani nassuiarneqarput. Suliaqarfinni aarleqquteqarfimmik imaqartuni inuusuttut tamatigoortumik suliaqaqqusaasannngillat.

Taamaalilluni sullivinni avatangiisit pillugit Inatsisartut inatsisaanni inuusuttut sulinerannut tunngatillugu manna tikillugu isumannaallisaanissamut inissisimaffiup attannissaanut tunngavissaqarpoq.

Manna tikillugu sullivinni avatangiisinik suliassa qarfimmi inatsisitigut atuuffigisat sullivinni avatangiisit pillugit Inatsisartut inatsisaanni nanginneqartoq suut tamaasa ilanngullugit erseqqissartariaqarpoq, taamaattorli pisoqarfiit ataasiakkaat, manna tikillugu atuuttut Kalaallit Nunaanni sullivinni avatangiisit pillugit inatsimmit allaassuseqartut pinnagit.

Kalaallit Nunaanni Politimesterip oqaatigaa: *”Kapitali 6 – teknikkikkut atortorissaarutit pillugit tunngasunut kingornatigut inatsisinik atortitsisinnaanermut tunngatillugu inatsisit oqaasertaanni teknikkikkut atortorissaarutini suut paasineqassaneri nassuiarneqarpata*

*iluaqutaassaaq. Danmarkimi sullivinni avatangiisinut inatsimmi § 45 matuminnga oqaasertaqartoq qissiminneqarsinnaavoq: "Maskiinat. Maskiinat atortui, puut, sanaartugassat ikkussoriaannaat, atortorissaarutit, sakkut, illuliornermut atortut, teknikkikkut atortorissaarutit allat aamma inunnut illersuutit imatut ilusilersugaallutillu atorpeqassapput sillimaniarnermut peqqissutsimullu tunngatillugit tamakkiisumik aarlerinartortaqaassanatik."*

Teknikkikkut atortorissaarutit pillugit siunnersuummi § 43 Naalackersuisunut siamasissumik pisussaaffiliivoq, ilanngullugit tusarniaanermut akissummi pissutsit immikkut ittut eqqartorneqartut pillugit.

Kalaallit Nunaanni sullivinni avatangiisit pillugit inatsimmi § 37, imm. 1-imi tunngaveqartillugu (siunnersuummi § 43, imm. 1-imut assingusoq) Kalaallit Nunaanni teknikkikkut atortorissaarutit iluarsaannissaat pillugit Sullivinnik Nakkutilliisoqarfiup Nalunaarutaa nr. 655, 12. maj 2015-imeersoq atuutsinneqarpoq. Nalunaarummi § 2-miippoq nalunaarummi paasineqartutut teknikkikkut atortorissaarutinik nassuiaat.

Pineqartoq tassaammat sinaakkutissatut inatsit Inatsisartut inatsiserpiaanni pinnagit inatsimmut toqqammavigisat annikitsortalersugaanerusunik sinaakkusernissaat nalunaarutini aalajangersaaviginissaat tulluarnepaasutut isigineqarpoq.

Kalaallit Nunaanni Politimesterip oqaatigaa: "*Naak § 82, imm. 1-imi (maannakkut § 83) oqaasertaqarualuartoq § 82-imi (maannakkut § 83) unioqqutitsinermut – Danmarkimi sullivinni avatangiisinut inatsimmi periarfissarisaaqaluartumut aammalu imm. 1-imi oqaaserititat malillugit isertitsivimmut inissiisoqarani – **akiliisitsissutissat** naatsorsorneqartassanerat nassuiaatini takuneqarsinnaasoq maluginiarpara.*"

Manna tikillugu Kalaallit Nunaanni sullivinni avatangiisit pillugit inatsimmi § 65-imi saqqummiunneqartutuulli § 82-ip (maannakkut § 83) inatsisinik atuutsitsineq nangippaa. § 82-imut nassuiaatit pinerluuteqarsimasunut inatsisitigut pineqaatissiissutip isertitsivimmut inissiisoqarnertut iluseqarsinnaanissaanik pinaveersitsinngillat.

Kalaallit Nunaanni Politimesterip oqaatigaa: "*§ 82-imi (maannakkut § 83) oqariaatsit pisunut "sakkortunerusutut ittunut", "pisunut annertuunut" aamma "immikkut sakkortunerusunut" atugaapput. Annertuumik aamma immikkut ittumik sakkortusisatut pisut akornanni piviusumik assigiinngissitsisoqarnissaa anguniarneqarnersoq erseqqissuunngilaq. Tamanna tunngavigalugu taamaallaat "sakkortunerusutut pisut" aamma "immikkut sakkortunerusutut pisut" atorpeqassasut inassutigineqarpoq.*"

Oqaaseqaat malinneqassaaq. § 82 (maannakkut § 83) imatut allanngortinneqarpoq taamaallaat oqariaatsit "sakkortunerusutut pisut" aamma "immikkut sakkortunerusutut pisut" atorneqalerlutik. Taamaalilluni § 82, imm. 2-mi "pisutut immikkut sakkortunerusutut" atorneqarpoq, unioqqutitsisoqarnerani inuit ilungersunartumik ajoquserlutik imaluunniit toqumik kinguneqarluni ajutoormik malitseqarsimatillugu, kiisalu § 82, imm. 5-imi, inuusuttunut 18-it inorlugit ukiulinnut inuunermi imaluunniit peqqissutsimi ajoqusiisoqarsimasumi imaluunniit tamatumunnga navianartorsiortitsisoqarsimasumi oqariaaseq "pisutut immikkut sukannersutut" atorneqarluni.

Kalaallit Nunaanni Politimesterip oqaatigaa: *"Imm. 1, nr. 1-imi kinguneritalittut aalajangersakkanik tulleriarinermi ilaatigut takuneqarsinnaavoq §§ 24-37 pineqaatissiissutinik nassataqarsinnaasut. § 35, imm. 1 aamma § 36 ilanngunneqassappata kukkunerorpassipooq, tassani pineqartut tassaammata pisussaaffiliinerit."*

§ 82 (maannakkut § 83), imm. 1, nr. 1 oqaaseqaammut naapertuutsilerlugu iluarsineqarpoq. Taamaalillutik §§ 35 aamma 36 inatsisitigut eqqartuussisoqarnikkut pineqaatissiissutinik kinguneqartitaanngillat.

Kalaallit Nunaanni Politimesterip oqaatigaa: *"Paarlattuanik kinguneritalittut aalajangersakkami imartani atortunut tunngatillugu § 63-imut innersuussissut amigaataavoq. Maannakkut oqaasertaliussat atorlugit imartani sullivimmi avatangiisinut tunngasunik unioqqutitsinerit kinguneritaqarnissaannut periarfissaqassanngilaq. Tamatuma puigorsimanissaa naatsorsuutigaara."*

Oqaaseqaat tusaatissatut tiguneqarpoq. § 82 (maannakkut § 83), imm. 1, nr. 1-imi § 63-imut innersuussissut ilanngunneqarpoq, taamaalilluni aalajangersakkap unioqqutitaanerani kinguneqartitsisoqalersinnaalluni, soorlu manna tikillugu Aatsitassat pillugit ingerlatallu tamatumunnga pingaarutillit pillugit Inatsisartut inatsisaat nr. 7, 7. december 2009-meersumi (aatsitassanut ikummatissanullu inatsimmi) § 79-imik assingusumik unioqqutitsinernut kingunititaqarsinnaasimasooq.

Kalaallit Nunaanni Politimesterip § 82 (maannakkut § 83) pillugu imatut oqaaseqaqqippooq: *"Imm. 1, nr. 4-mi § 21, imm. 2-mut innersuussissutip saniatigut § 29, imm. 4-mut innersuussisoqarsinnaavoq, soorlusooq imatut ilassuteqartoqarsinnaalluni: "imaluunniit § 29, imm. 4 malillugu Sullivinnik Nakkutilliisoqarfiup piumasaqaataatigut misissuinernik isumaginninnermik, misissugassanik imaluunniit takusaanernik il.il. suliaqanngippat."*

§ 82 (maannakkut § 83), imm. 1, nr. 1-imi §§ 24-35-nut innersuussuteqarpoq. Taamaattumik tusarniaavigineqartup ugartugaatulli § 29, imm. 4-mut kinguneqartitsisinnaanermik § 82 (maannakkut § 83), imm. 1 tunisivoq.

Kalaallit Nunaanni Politimesterip § 82 (maannakkut § 83) pillugu imatut oqaaseqaaqqippoq: *”Imm. 5-imi pisut immikkut sukannersut tullerriiarlugit eqqartornerini inunni arlalinni ajoqusertoqarsimalluniluunniit tamatumunnga aarlerinartoqarsimanerata immikkut sukannersuuneranik allassimanagera takuneqarsinnaanngilaq, soorlusooq uteqqiinerup immikkut sukannersutut pisuunera innersuussutaasimanani. Akiliisitsissutissap annertussusaanik aalajangiinissamut tunngatillugu tamanna iluaqutaasinnaassaaq, tassalu pissutsit taamatut ittut immikkut sukannersutut isigineqassanerannik Namminersorlutik Oqartussat isumaqassappata.”*

§ 82 (maannakkut § 83), imm. 5 inuusuttunut immikkut isumannaallisaanissamik erseqqissaaniarluni ilanngunneqarpoq. § 82 (maannakkut § 83), imm. 4-mi uteqqiinerup (§ 82, imm. 4, nr. 3) sukannersutut pisuunera aalajangerneqarpoq. Taamatut inissisimaffiup attannissaata tulluernerpaanera isigineqarpoq.

Kalaallit Nunaanni Politimesterip § 82 (maannakkut § 83) pillugu imatut oqaaseqaaqqippoq: *”Imm. 8-mi pisoqalineq eqqartorneqarpoq. Oqaaseq taanna pinerluttulerinermut inatsimmi kapitali 6-imi atorneqanngilaq, pissutigalugu pinerluttulerinermut inatsisip uparuaanissamut killiliussat eqqartormagit. Pinerluttulerinermut inatsimmi oqaatsinut naapertuutsilerlugu imm. 8-mik allatut oqaasertalersuinissaq inassutigineqarpoq.*

*Tassungaa atatillugu uparuaanissamut killiliussaq suliame piviusermi qaangerneqarnera (imm. 8-mi pilersuisutut akisussaaffiup inatsisilersugaasup saniatigut) pinerluttulerinermut inatsimmi tamatigoortutut malittarisassiat tunngavigalugit aalajangerneqarnissaa pillugu apeqqut sianigeqquneqarpoq. Tamatuma kingornatigut akiliissuteqarnermut akisussaaffimmu uparuaanissamut killiliussaq aallaaviatigut ukiut marluussapput, inatsisit malillugit pisinnaatitaasut, uparuaanissamut killiliussanut nalinginnarmik malittarisassiat atuuffigisaat pineqanngippata.”*

Oqaaseqaat tusaatissatut tiguneqarpoq. Maannakkut pinerluttulerinermut inatsimmi oqaatsit atorneqartut naapertorlugit ”pisoqalinermit killiliussaq”-mut taarsiullugu § 82 (maannakkut § 83), imm. 8-mi oqariaaseq ”uparuarneqarnissaanut killiliussaq” atorneqalerpoq. § 82 (maannakkut § 83), imm. 8 maannakkut imatut oqaasertaqalerpoq: ” §§ 29-34-mik aammalu maleruagassanik § 35 naapertorlugu aalajangersarneqartunik unioqqutitsinermi pinerluttulerinermut inatsisitigut akisussaaffeqarnerup uparuarneqarnissaanut killissaliussaq ukiut tallimaapput.”

Siunnersuuteqartup oqaatigisaatut Kalaallit Nunaannut Pinerluttulerinermut Inatsimmi ilassutitut uparuaanermut killiliussanik peqarpoq.

Kalaallit Nunaanni Politimesterip oqaatigaa: *”Soorlu Danmarkimi sullivinni avatangiisinut inatsimmi § 82 a-p periarfissiineratulli Sullivinnik Nakkutilliisoqarfik suliani unioqqutitsinermik paasisaqarfiusuni allaffissornikkut akiliisitsissutissanik najoqqutassanik akileeqqusinissamik periarfissanik tunniussaqaarnianninneq aamma maluginiarpara.”*

Kalaallit Nunaannut naleqqiulluni Danmarkimi sullivinni avatangiisinut inatsit alla atuuttuuvoq. Siunnersuutip suliivinni avatangiisinik suliassaqarfimmi manna tikillugu Kalaallit Nunaanni eqqartuussisariaaseq atuuttoq attatiinnarpaa.

Kalaallit Nunaanni Politimesterip oqaatigaa: *” § 89 (maannakkut § 90) pillugu. Aalajangersakkamut atuutereersumut assingusumik suliaq Eqqartuussivimmi siullertut suliarinnittussani suliarineqartussanngortissasut siunnersuummi takuneqarsinnaavoq. Eqqartuussisaatsip iluani inatsisiliorneq, Inatsisinik atuutsitsinermik Ministereqarfiup suliassarisaasa ataanniittoq pineqarmat torersuunissaa pillugu oqaatigineqassaaq.”*

Suliassaqarfiup tigungeranit aalajangersagaq nalinginnartut kingunerisaavoq, eqqartuussisaareersumillu takussutissiilluni.

Kommuninut, Nunaqarfinnut, Isorliunerusunut, Attaveqaatigiinnermut Ineqarnermullu Naalakkersuisoqarfiup (KNIAIN-ip) oqaatigaa: *”§ 2, imm. 2, nr. 3 pillugu: Aalajangersakkami imatut allassimasoqarnera allannerliugaassagunarpoq/naqinnerliugaassagunarpoq: ”sulineq sakkutooqarfimmit suliarineqartoq [...]”, sullivinnili avatangiisinut inatsimmi atuuttumi aalajangersakkami atuuttumi ima allassimasoqarluni: ”sulineq sakkutuunit suliarineqartoq [...]”.*

*Oqaatiginiakkat taakku marluk isumaat annertuumik assigiinngissuseqarput, pissutigalugu ”sakkutooqarfik” sakkutooqarfiup suliffeqarfiuneranik isumaqarmat, ”sakkutuulli” tassaallutik sulisut sakkutuut. Sullivinnik Nakkutilliisoqarfiup AT-mik ilitsersuutaa F.0.3 Egentlig militærtjeneste, juuni 2003 innersuussutaavoq, taanna ”sulineq sakkutuunit suliarineqartoq, aammalu sakkutuutut sulivinnut naatsorsuutaasinnaasoq” qanoq paasinnittoqassaneranik nassuiaammat.”*

§ 2, imm. 2, nr. 3-p oqaasertai tusarniaavigineqartup oqaaseqaataanut naapertuutsilerlugu allannngortinneqarpoq, taamaalilluni oqaaseq ”sakkutuunit” atorneqalerluni.



Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoqarfiup (KNIAIN-ip) § 16 pillugu oqaatigaa: *”Aalajangersagaq nutaaq sulisitsisumut malittarisassialimmut immikkoortumut inissinneqarsimammat oqaasertalersuineq erseqqissuusariaqarpoq, taamaalilluni aalajangersakkap naapertuutsinnissaanut sulisitsisup pingaarnertut akisussaaffimmik tigummiaraqnera qularutissaassanani. Aalajangersagaq assersuutigalugu imatut oqaasertalerneqarsinnaavoq:” § 16. Ilungersunartumik maannakkorpiarlu ingalassinnaanngisamik navianartoqartillugu, sulisup sullivimmi imaluunniit sumiiffiup navianartumiittoq qimannissaanut pisinnaatitaaffimminik atuinissaanut sulisitsisoq pinngitsuusitsiniarsinnaangilaq.*

*Imm. 2. Imm. 1 malillugu sulisup sullivimmi imaluunniit sumiiffiup navianartumiittup qimannera pissutigalugu sulisitsisoq sulisup atugaanik ajorseriartitsissangilaq.*

*Imm. 3. Imm. 1 aamma 2 malillugit pisinnaatitaaffiit innarlerneqarsimappata, sulisut taarsiivigineqartussaapput.””*

§ 16-imik maannakkut oqaasertalersuinerup siunertaraa navianartoqartillugu suliffimmik qimatsinissamut pisinnaatitaaffiup aalajangersarnissaa, kiisalu taama pisoqartillugu sulisut suliffimminnik qimatsiniarnerannik sulisitsisoq pinngitsuusitsiniaqqusaassanngitsaq. Kiffaangissutsimik arsaarinnittarneq pillugu Kalaallit Nunaanni pinerluttulerinnermut inatsimmi § 92-imut aalajangersagaq assersuunneqarsinnaavoq.

Maannakkut oqaasertaliussat attatiinnarneqassapput, pissutigalugu ilungersunartumik maannakkorpiarlu ingalassinnaanngisamik navianartoqartillugu sulisup sullivimminik qimatsinissamik pisinnaatitaaffianik erseqqissuliormat.

Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoqarfiup (KNIAIN-ip) oqaatigaa: *” § 25 pillugu: § 25-mi aalajangersagaq malillugu sulianik aqutsisoq isumannaallisaaneq peqqinnissarlu pillugit suleqatigiinnermi peqataassaaq, kapitali 2, § 18 aamma § 37-mi aalajangersakkat innersuussissutaanerit pissutigalugit. KNIAIN-ip oqaatigaa § 37-mi aalajangersakkat sanatitsisup pisussaaffimmut tunngasunik imatut ittumik ”suleqatigiinnermi”, soorlusooq ”sulianik aqutsisoq” toqqaannartumik innersuussissutinik imaqanngitsut.”*

Siunnersuummi § 25 manna tikillugu atuuttumi Kalaallit Nunaanni sullivinni avatangiisit pillugit inatsimmi § 20-mi oqaasertaliussat ingerlateqqippai. Taamaalilluni eqqartuussisaatsip atuuffia aalajangersagaq atorlugu ingerlateqqinneqarpoq, tassuuna suliamik aqutsisut isumannaallisaanermi peqqinnissamilu suleqatigiinnermi peqataanissaminnut pisussaaffeqarlutik.

§ 37 illuliorlunilu sanaartornermut tunngavoq, tassani sulisitsisut arlallit suliaqarfigisami tassani peqatigiillutik peqataasarlutik.

Illuliornerni sanaartornernilu suleqatigiinnissamik qularnaarinissamut sanatitsisup pisussaaffii pillugit annikitsortalersukkatut malittarisassiat aamma sulianik aqutsisunut atuunnerannik § 25-mi § 37-mut innersuussissut isumaqarpoq. Taamaalilluni isumannaallisaanermut peqqinnissamullu suleqatigiinnerni peqataanissaminut sulianik aqutsisoq pisussaaffeqarpoq, ilanngullugu illuliorneq sanaartornerlu pillugit § 37-p nassatarisaanik malittarisassiat aalajangersagaasinnaasut malittarinissaannut pisussaaffik. Kalaallit Nunaanni sullivinni avatangiisit pillugit inatsimmi § 31, imm. 3 aamma 4 (Inatsisartut inatsisaanni § 37, imm. 3-mut aamma 4-mut assingusut) tunngavigalugit Kalaallit Nunaanni sanatitsisup pisussaaffii, aamma suliffigisami ataatsimi sulisitsisut arlallit suliaqarfigisaanni illuliornerni sanaartornermilu suleqatigiinnissamik isumannaarinissamut sanatitsisut pisussaaffii pillugit nalunaarummi peqqissaagaanusunik malittarisassiat aalajangersarneqarput.

Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalackersuisoqarfiup (KNIAIN-ip) oqaatigaa: ”§§ 26, 27 aamma 28 pillugit: §§ 26-28-mi aalajangersakkat (taamaallaat § 26, imm. 1 pinnagu) malittarisassiat kattussatut ”sulisunut” tunngasuutitatus oqaasertalersugaapput.

*Toqqaannarnerusumik ”sulisoq”-mik oqaasertaliinerup atornissaa KNIAIN-ip paarlattuanik siunnersuutigaa, taamaalilluni aalajangersakkamut tunngatitaasumi imaluunniit tunngatitaasuni naligiinngitsumik akisussaaffimmik qimatsiniarneq pinaveersaarneqassammat.”*

Oqaasiliaq ”sulisut” taamaallaat §§ 26-28-ni atorneqanngilaq, Inatsisartulli inatsisaanni tamani paragraffini tamani atorneqarluni. Pineqartoq tassaavoq Kalaallit Nunaanni sullivinni avatangiisit pillugit inatsimmi manna tikillugu oqaasertaliussanik atugaqaqqinneq. Oqaasiliaq ”sulisut” aamma sullivinni avatangiisinik suliassaqarfimmi nalunaarutini atuuttuni aamma Sullivinnik Nakkutilliisoqarfiup AT-mik ilitersuusuaanni tamakkiisumik atorneqarpoq.

Oqaasiliani ataqatigiissoqarneq qularnaarniarlugu §§ 26-28-ni oqaasiliaq ”sulisut” atorneqaannarpoq, taamaalilluni aalajangersakkanut allanut, oqaasiliamik ”sulisut”-nik atuisoqarfinnut naleqqiullugu aalajangersakkani taakkunani inuit allat ilatinnerinut tunngatillugu paatsiveerunnermik pinngortoqassanngimmat.

Oqaasiliani maani oqaluuserineqartuni sorliup atorneqarnera apeqqutaatinnagu sulisumut akisussaaffimmik atuuttoqarnera oqaatigineqassaaq. Manna tikillugu Kalaallit Nunaanni

sullivinni avatangiisit pillugit inatsimmi §§ 21-23-miittuni pisinnaatitaaffik atuuttoq §§ 26-28-t ingerlateqqippaat.

Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalackersuisoqarfiup (KNIAIN-ip) oqaatigaa: *”Ad 28, imm. 1: ”Suliffeqarfiit suleqatigiinnerat” pillugu aalajangersakkami §§ 18 aamma 37 innersuussutaapput. § 37-mi aalajangersakkat sanatitsisup pisussaaffiinnut tunngasut taamatut innermikkut ”suliffeqarfiit suleqatigiinnerannut” toqqaannartumik innersuussissutinik imaqanngitsut KNIAIN-ip oqaatigaa.”*

Oqaaseqaat siunnersuummi § 25-p § 18-imut aamma § 37-mut innersuussutaanut tunngatillugu tusarniaavigineqartup oqaaseqaataanut assinguvoq.

Manna tikillugu Kalaallit Nunaanni sullivinni avatangiisit pillugit inatsimmi § 23, imm. 1-imi oqaasiliat atuuttut siunnersuummi § 28, imm. 1-ip ingerlateqqippaa. Taamaalilluni manna tikillugu eqqartuussisaaseq aalajangersagaq aqcutigalugu ingerlateqqinneqarpoq.

§ 37-mik tunngaveqarluni suliffeqarfiit suleqatigiinnerat pillugu malittarisassianik aalajangersaasoqarsinnaavoq. Tamanna ilaatigut Kalaallit Nunaanni sullivinni avatangiisit pillugit inatsimmi § 31-mik tunngaveqartutut atuutsinneqartumi (siunnersuummi § 37-mut assingusumi). Sanatitsisut pisussaaffii pillugit Sullivinnik Nakkutilliisoqarfiup nalunaarutaat nr. 1344, 15. december 2005-imeersumi piviusorpiatut pisimavoq. Nalunaarutip suliffeqarfiit suleqatigiinnerat pillugu aalajangersakkat arlalippassuit imarai. Tamanna tassaavoq suliffeqarfiit suleqatigiinnerannut tunngatillugu § 37-mut § 28, imm. 1-imi innersuussissutikkut atuuffeqarnermut assersuut.

Taamaalilluni § 28, imm. 1 § 37-mut innersuummik imaqassaaq, taamaalilluni taanna sanatitsisup malittarisassiat aalajangersagai aamma sulianik aqutsisunit naapertuutsinneqassanerannik qulakkeerinnimmat.

Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalackersuisoqarfiup (KNIAIN-ip) oqaatigaa: *”Pineqartoq § 45, imm. 4:*

*Sullivinni avatangiisinut inatsimmit atuuttumi ”Sullivinnik Nakkutilliisoqarfik killissarititaasunut (...) aalajangersaasinnaapput”-mit siunnersuummi ”Naalackersuisut killissarititaasunut (...) aalajangersaasinnaapput”-mut aalajangersakkamik allannguuteqarnermut suna tunngavigineqarpa? Siunnersuummut nassuiaatini ilaatigut aalajangersagaq pineqartoq pillugu imatut allassimasoqarpoq: ”Naalackersuisut aamma (...) aalajangersaasinnaapput, aammalu Sullivinnik Nakkutilliisoqarfik*

*eqqiluutsuutitsinissamut killissarititaasunik aalajangersaasinnaavoq, kiisalu akuutissat atortussallu suut isumannaallisaanermut peqqinnissamullu navianartutut isigineqassanersut aalajangersinnaallugu.”*

*Taamaattorli aalajangersagaq sullivinni avatangiisinut inatsit atuuttoq malillugu akuutissanut atortussanullu i.il. killissarititaasunik aalajangersaasinnaanissaannut piviusumik pisussaaffimmik imaqarpassinngilaq. Allannguut Sullivinnik Nakkutilliisoqarfiup pisussaaffeqarfiisa sanngiillisitaaneratul isigineqarsinnaavoq.*

*KNIAIN-ip allannguut pingaaruteqartippaa, taamaattumillu allannguut inatsisissat siunnersuummi inaarutaasumi attatiinnarneqassappat aalajangersakkamik nassuiaatini allannguut qaammarsaavigineqartariaqartutut isigalugu.”*

KNIAIN-ip oqaaseqaatai akuerineqarput, § 45, imm. 4-lu allanngortinneqarpoq taamaalilluni Sullivinnik Nakkutilliisoqarfik aalajangersagaq malillugu pisussaaffiligaalluni. Taamaalilluni Sullivinnik Nakkutilliisoqarfik akuutissanut atortussanullu killiussanut aalajangersaasalissaaq, aammalu peqqinnissamut navianartutut imaluunniit ajoqusiisutut isigineqartunut akuutissanut atortussanullu allattuiffiliortassalluni.

Kommuninut, Nunaqarfinnut, Isorliunerusunut, Attaveqatigiinnermut Ineqarnermullu Naalackersuisoqarfiup (KNIAIN-ip) oqaatigaa: ”Pineqartut § 64, imm. 1, nr. 4 aamma § 81, imm. 5:

*Maalaarutininik suliaqarnerni Sullivinni avatangiisinut siunnersuisooqatigiit tusarniaaviginissaat pillugit aalajangersakkat siunnersuummi sullivinni avatangiisit pillugit inatsimmi atuuttumi aalajangersakkanut assingusussanut, takukkit § 50, imm. 1, nr. 4 aamma § 64, imm. 5 naleqqiullugu allanngortinneqarput. Taamaalilluni ullumikkut maalaarutip aalajangiiffiginera sioqqullugu Sullivinni avatangiisinut siunnersuisooqatigiit oqaaseqaataata pissarsiarinissaa pinngitsuugassaannngilaq, siunnersuulli malillugu maalaarummik suliami aalajangiineq sioqqullugu Sullivinni avatangiisinut siunnersuisooqatigiinnit oqaaseqaat pissarsiarineqarsinnaasoq atuuttuulersinneqarluni.*

*Inatsisissatut siunnersuummut nassuiaatini § 81, imm. 5-imi aalajangersagaq pillugu ilaatigut allassimavoq: “Aalajangersagaq qularnaarissaaq siunnersuisooqatigiit suleqataasarnissaannik naammagittaalliutit aalajangiiffigineqartarneranni, taamalu inatsisip allaffissornikkut eqqortinneqarnissaanut.”*

*”Pisinnaaninngortitsisutut aalajangersakkamut” allannguuteqarneq – aamma tunngavilersugaasutut takuneqarsinnaanngitsoq – aalajangersakkamut siunertamik*

*annertuumik sanngiillisaasoq, aammalu Sullivinni avatangiisinut siunnersuisooqatigiit sunniuteqarsinnaanerata sanngiillisinneqarnera oqaatigisariaqarpoq.*

*Allannguut pingaaruteqartoq KNIAIN isumaqarpoq, taamaattumillu siunnersuummi inaarutaasumi allannguut attatiinnarneqassappat aalajangersakkamut nassuiaatini allannguut qaammarsaavigineqartariaqarpoq.”*

Sullivinnik Nakkutilliisoqarfiup aalajangiinerannik maalaarutit kiffaanngissuseqartutut Sullivinni avatangiisit pillugit naammagittaalliortarfimmit suliarineqartarnissaat siunnersuutip tusarniaaffioreernerata kingornatigut Inatsisartut inatsisaannut ilassutaavoq. Taamaattumik siunnersuummi maalaarutitik suliani Naalakkersuisut aalajangiisarnissaat pillugu aalajangersagaq peerneqarpoq.

Siunnersuummi aalajangersakkat ataasiakkaat piviusutut ilusilersugaaneranut oqaaseqaatit saniatigut Kommunit, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoqarfik (KNIAIN) siunnersuummut tamatigoornerusunik oqaaseqaateqarpoq.

Kommunit, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoqarfik (KNIAIN) ilaatigut immikkoortoq 3.2 Aningaasaqarnikkut sunniutaasussat-nut tunngatillugu oqaaseqaateqarpoq: *”Siunnersuummut nassuiaatini sullivinni avatangiisinik suliassaqarfik inatsisissatut siunnersuutip atuutsilernerani Namminersorlutik Oqartussanit tiguneqarpat Arbejdsmarkedets Erhvervssygdomssikringimit (AES-imit) (Suliffeqarfimmi inuutissarsiummit nappaateqarnermut sillimmasiinnermit) Kalaallit Nunaannit akiliutit qanoq isumagineqartassanerannik isumaliutigineqarnerannut nassuiaammik amigaateqartoqartoq KNIAIN isumaqarpoq.”*

Sullivinnik avatangiisinik suliassaqarfimmik namminersorlutik oqartussat tigusaqarnerisa kingornatigut Kalaallit Nunaanni sulitilluni ajoqusernermut sillimmasiisarneq pillugu inatsit nr. 1528, 21. december 2010-meersuklut Arbejdsmarkedets Erhvervssygdomssikringip inatsilersugaanera allanngortinnagu ingerlanneqaannassaaq. Tigusinerup kingornatigut Sullivinni avatangiisinut siunnersuisooqatigiinnut nutaanut Kalaallit Nunaanni sulisitsisut Arbejdsmarkedets Erhvervssygdomssikringimut akiliuteqartarnerat ikaarsaariartinneqarnissaata qanoq qulakkeerneqarsinnaanera pillugu Naalakkersuisut Suliffissaqartitsiniarnermut ministereqarfimmik oqaloqateqarput. Kommunit, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoqarfik (KNIAIN) inuussutissarsiorfimmu/innuttaasunut aningaasaqarnikkut sunniutaasussat pillugit immikkoortut 4.2 aamma 6 pillugit oqaaseqarpoq: *”Sullivinnik Nakkutilliisoqarfiup nakkutilliineranut il.il. aningaasartuutaasa matussusernissaannut*

*ilaatigut nukissiornermik tunisassiornissamut erngup nukinganik atuineq pillugu Inatsisartut inatsisaat malillugu pisinnaatitsissummik pigisallit inatsisissatut siunnersuummi §§ 72-73-ini toqqammavissatut aalajangersakkat ajornanngippat atuutsilernissaasigut inuussutissarsiorfiusumut annertusisanik akitsuutinik akilersuinertut iluseqartunik, aammalu inuussutissarsiorfimmu soorlusooq innuttaasunut nukissamik atuinermut annertusisunik akiliutaasunik aningaasatigut sunniuteqarsinnaanerat KNIAIN-ip oqaatigaa.”*

Imartani aamma nunami aatsitassarsiornermik immikkoortoqarfiup iluani, kiisalu erngup nukissiornermik suliani suliarisanut akitsuutinik akileeqqusinissamik aalajangersakkat periarfissiipput. Tamatuma assingaa ullumikkut imartani aatsitassarsiornermik suliassaqarfimmi inatsisaasut atuuttut (takuuk aatsitassat pillugit ingerlatallu tamatumunnga pingaarutillit pillugit Inatsisartut inatsisaat (aatsitassanut ikummatissanullu inatsit) §§ 86, imm. 5 aamma 94) aammalu Inatsisartut 2016-imi ukiakkut ataatsimiinnerminni imm. 115-imik akuersissutigisaanni Kalaallit Nunaanni sullivinni avatangiisit pillugit inatsimmi takkuttussami § 57b assigalugu. Sulianik isumaginninnermut akitsuutinik akileeqqusisinnaaneq pillugu aalajangersakkat ilaatigut siunertaat tassaavoq Sullivinnik Nakkutilliisoqarfik suliffeqarfinnik mikinerusunik ikiorsiinissaminut isumalluuteqartuarnissaata qulakkeernissaa, naak assersuutigalugit aatsitassarsiornermik suliniutit isumannaallisaaanermi peqqinnissamilu annertuunik nakkutilliisarnissamik pisariaqartitsigaluartut.

Maannakkut imartani periusaasunut aalajangersakkat assigummata, aammalu Inatsisartut inatsisimmi allannguutissamik akuersereersimammata suliffeqarfiup tiguneqanngiffianut naleqqiullugu innuttaasunut imaluunniit suliffeqarfinnut Inatsisartut inatsisaat annertusisanik aningaasartuutinik nassataqartitsissanngilaq.

Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalackersuisoqarfik (KNIAIN) kalaallisoortaa pillugu oqaaseqarpoq: ”(...) maannakkut sullivinni avatangiisinut inatsimmi aalajangersakkat amerlanersaat siunnersuummi allanngortinnagit atoqqinneqarput. Taamaattorli inatsisissatut siunnersuutip kalaallisoortaanut tamanna oqaatigineqarsinnaanngilaq, taanna maannakkut sullivinni avatangiisinut inatsisip atuuttup (kalaallisoortaanik) tamakkiisumik allanngortillugu allanqarsimasutut saqqumerpasimmat. Nassuiaatini tamatumunnga patsisaasoq – ajornanngippallu tamatumunnga sunniutaassutaasinnaasut – qaammasaavigineqassasut KNIAIN isumaqarpoq.”

Kalaallit Nunaanni sullivinni avatangiisit pillugit inatsip 1986-imeersup kalaallisoortaanut Naalagaaffiup Sinniisoqarfia, taamaalillunilu Danmarkimi qullersaasut akisussaasuusimapput. Kalaallisoortaa Naalagaaffimmi qullersaasunit pinnani Namminersorlutik Oqartussanit

suliarineqarsimanera qulakkeerniarlugu nutaamik suliarinnittoqarpoq. Tamatuma aamma kalaallit oqaasiisa allanngoriartornerannik malinnaanissaq periarfissippaa. Kiisalu tamatigut 1986-imit Kalaallit Nunaanni sullivinni avatangiisit pillugit inatsisip kalaallisoortaviata kingusinnerusukkullu Naalagaaffimmi qullersaasut allagarisaannik inatsimmik allannguutit akornanni ataqatigiinngitsortaqtartoq oqaatigineqassaaq, tamatumunnga ilaatigut ukiut ingerlanni oqaatsit allanngoriartornerat patsisaalluni.

Kommuninut, Nunaqarfinnut, Isorliunerusunut, Attaveqatigiinnermut Ineqarnernullu Naalackersuisoqarfik nalinginnarmik tigusinissaq pillugu oqaaseqarpoq: *”Inatsisissatut siunnersuummut nassuiaatini nalinginnaasut aallarniutaasuni sullivinni avatangiisinik suliassaqarfimmut akisussaaffimmik Namminersorlutik Oqartussat tigusinissaat pillugu siunertap, tunngavigisat aamma kissaatigisaasumut pissutaasut nassuiaaviginerat KNIAIN-ip amigaatigai, takuuk suliassaqarfimmik sullivinnik avatangiisinik Namminersorlutik Oqartussat tigusinerrannut immikkoortoq.*

*Inatsisissamat siunnersuummi inuussutissarsiorfimmut, avatangiisinut, pinngortitamut innuttaasullu peqqissusaannut aningaasaqarnikkut allaffissornikkullu sunniutaasussanut, kiisalu innuttaasunut sunniutaasussanut nassuiaatini ilaatigut allassimavoq:*

*”assersuutigalugu sulinermi ajutoornerit amerlassusaannik suliassaqarfiup tiguenerata sunniuteqarfigissanera oqaatigineqarsinnaanngilaq.”*

*Taamaalilluni sullivinni avatangiisinik suliassaqarfimmut akisussaaffimmik Namminersorlutik Oqartussat tigusinerrata qanoq annertutigisumik sunniuteqassanera pillugu inatsisiliortup tungaanit nalornisoqarnera paasinarpoq. Isumaqartoqassagaluarporli suliassaqarfimmik tigusinissaq pillugu aalajangiussineq assersuutigalugu najukkami annertunerusumik pimoorussinerup anguneqarnissaanik, ilanngullugit najukkamit misilittagarisat annertunerusumik ilanngunnissaannik pissutissartaqartoq, tamarmik sullivimmi avatangiisini suliassaqarfimmi nukittorsakkamik iliuuseqarnermut iluaqutaassasunik, taamaalillunilu sulitilluni ajutoornerit pinaveersinnissaannut periarfissanik pitsanngorsaasunik.”*

Nunami sullivinni avatangiisinut tunngatillugu sullivinni avatangiisinik suliassaqarfiup ilaanik tigusaqarnissaq pillugu aalajangiiffigisassatut siunnersuummiippoq sullivinni avatangiisinik suliassaqarfiup tiguneqarnerani sunniutaasussanik erseqqinnerusumik nassuiaat. Aalajangiiffigisassatut siunnersuummi ilaatigut iluaqutissartat, aamma tusarniaavigineqartup erseqqissaavigisai eqqartorneqarput, tassalu najukkami pimoorussaqaqarq aamma najukkami misilittagaasunik annertusisamik ilanngussorneri aqqutigalugit suliassaqarfimmik sunniiffiginissaannut tigusaqarnerup pissarsiarititai.

Siulianit Sulisitsisunit tusarniaanermut akissummut oqaaseqaat innersuussutaavoq.

Siunnersuutip innuttaasunut inuussutissarsiorfimmullu aningaasaqarnikkut allaffissornikkullu sunniutissartaannik nassuiaanermi sulitilluni ajutoornerit amerlassusaat pillugit oqaasertaliussamut tunngavigisaq tassaavoq sulitilluni ajutoornerit amerlassusaat inuiaqatigiinnut tunngatillugu annertuumik pingaaruteqarsinnaanerat. Taamaattumik suliassa qarfirmi sammisaqarfigisatut najukkami iliuuserisassaq pisariaqarpoq. Ukiut ingerlaneranni Kalaallit Nunaanni sulitilluni ajutoornerit amerleriarsimanerat paasineqarpoq, tamatumunngali tunngaviusoq erseqqivissuunngilaq. Taamaattumik amerlassutsit qanoq annikillineqarsinnaassusaat pillugu nalornissuteqartoqarpoq.

IMAK oqaaseqarpoq: *”Aallarniutigalugu nunatami sullivinni avatangiisinik suliassa qarfiup tiguneqarneranut tunngatillugu ingerlassami, imaluunniit inatsisiliornerup piareersarneranut suliaqarnermi kattuffiit arlaatigulluunniit ilanngunneqarsimannginnerannik IMAK-mi siulersuisut annertuumik tupigusuutigisaqarnertik oqaatigissavaat.*

*Namminersulivinnerup tungaanut ingerlassami – ilanngullugillu suliassa qarfinnik assigiinngitsunik tigusaqarnerni – innuttaasut ilanngunneqarnerisa pingaaruteqartuunera Naalackersuisut erseqqissaavigiuarpaat. Sulisartut kattuffii innuttaasut ilarujussuinik sinnisoqarfiupput. Taamaalillutilli Naalackersuisut namminneq tunngavigisaminnik naapertuutsitserpasinngillat.*

*Tupigusunnerlu minnerulinngisaq tusarniaanermut allakkami nassiussami erseqqissumik oqaatsinik ima ittunik atuortoqarsinnaammat: ”Suliassa qarfiup ataaniupput aamma suliffeqarfuit namminneq isumannaallisaanermut peqqinnissamullu apeqqutinik, suliffeqarfirmi kattuffinnit ilitsersuinertalinnik iluarsiiyiginissaannut tunngavigisassamik pilersitsineq ...”.*

*Kattuffiit annertuumik peqataatitaanerat takuneqarsinnaavoq – taamaattorli tigusinermut tunngatillugu ingerlassaq piinnarnagu inatsisiliornerup piareersarneranik suliaqarnermissaaq kattuffinnik ilaatitaqanngilluinnarnissartik Naalackersuisut toqqarsimavaat. Kattuffiit taamaallaat inatsisissatut siunnersuummik tusarniaavigineqarput – kikkullu tamarmik nalunngilaat inatsisissatut siunnersuut suliarineqareerpat pineqartut tassaalissapput iluarsaaqqinneqqat kisimik.”*

Suliassa qarfirmik tigusinissamik ingerlassaq Namminersorlutik Oqartussat aamma naalagaaffimmi qullersaqarfiit akornanni isumaqatiginninniarnertaqartumik Namminersorlutik Oqartussat pillugu inatsimmi § 3, imm. 2 naapertorlugu pivoq.



Tamatuma kingornatigut inatsisiliornerup piareersarneranik suliaqarnerup ilaatut siunnersuut Namminersorlutik Oqartussat tusarniaassutitut nittartakkami inissinneqarpoq, aammalu suliffeqarfimmi illuatungerisanut nassiusorneqarluni. Tamatuma saniatigut tusarniaanermut atatitatus suliffeqarfimmi susassaqaqatigiit sinniisoqarfigisaanni Kalaallit Nunaanni Sullivinni avatangiisinut siunnersuisooqatigiillu ataatsimiittoqartarsimavoq. Ataatsimiinerit tunngavigalugit siunnersuummi arlalinnik allannguuteqartoqarpoq.

Taamaalilluni pineqartoq tassaavoq inatsisiliornermik ingerlassaq nalinginnaasuulluinnartoq, suliaqartut attuumassuteqartut, soorlu inatsisiliortartut aaqqissuussivimmi tunngavigineqartut tusarniaasoqarnermut aamma ingerlateqqitatut ingerlassamut ilanngunneqartarlutik. Aamma tigusinissaq pillugu aalajangiinerpamut tunngatillugu tamanna aamma atuuppoq, tassani suliassaqarfiup tiguneqarnissaa pillugu aalajangiussinissamut immikkoortitamik siunnersuusiortoqarsimalluni. Inatsisartut aalajangiiffigisassaattut siunnersuut taama aamma suliffeqarfimmi susassaqaqatigisanut tusarniaassutitut nassiuuneqarsimavoq, taakkulu oqaaseqaatinik, pitsanngorsaattissatut siunnersuutinik il.il. saqqummiussaqaarsinnaapput.

IMAK oqaaseqarpoq: *"Aamma nunami sullivinni avatangiisinik suliassaqarfippiap maannakkut tiguneqarnera IMAK-p assut tupigusuutigaa. Suliassaqarfiit Naalakkersuisut ukiuni arlalinni kingullerni assut pingaarnerutinngisaat. Taamaalillutik Naalakkersuisut kalaallit Sullivinni avatangiisinut siunnersuisooqatigianni sinniisuutitassaminnik toqqaaniarnerminnut ukiut 1,5 atorpaat, aammalu siunnersuisooqatigiit siulittaasuannik toqqaanissaminnut ukiut marluk missaat atorlugit. Aammattaaq ukiorpassuarngorput siunnersuisooqatigiit suliaannut suliffeqarfimmik suliassaqarfimmut Naalakkersuisoq soqutiginninnermik takutitaqarsimammat. Kiisalu suliassaqarfik taama ittuunermigut atuuttuuvoq, taamaattumillu Kalaallit Nunaanni inuiaqatigiinni pissutsinut nukinginnarluinnartortalinnut allanut naleqqiulluni utaqqisinneqarsinnaavoq. Ukiorpassuannortut kingulliit ingerlaneranni suliitilluni ajutoornerit amerlassusaat ikeriarsimanginnerat pillugu tunngavissiissut, aammalu suliassaqarfik tiguneqassappat tamatuma pitsaanerulersussatut naatsorsuutigineqarnera aamma tunngavilersorneqanngillat. Ajutoornerit amerliartuaarnerannut patsisaasoq tassaassagunarneruvoq kattuffinnit, soorlusooq Sullivinnik Nakkutilliisoqarfimmit aamma suliitilluni ajutoornermut aqutsisoqarfimmit annertusisamik iliuuserisaqarnerit, tassalu assersuutigalugu kattussamik nalunaaruteqarfik aqqutigalugu ajutoornernik nalunaarutigisarnerannit. Iliuuserisaq maannakkut ajalusoortitaanissaanik aarleqquteqarfigineqalersoq (...)."*

Sullivinni avatangiisinut siunnersuisooqatigiinni siulittaasumik toqqaanermut atatillugu Kalaallit Nunaanni Sullivinni avatangiisinut siunnersuisooqatigiit aamma Naalakkersuisut akornanni ataqatigiissaarisooqassaaq, taamaalillutik Naalakkersuisut aamma Naalakkersuisut

toqqammavigisaasa innersuutarisinnaasaannik siunnersuisooqatigiit inuttariligassamik innersuussissallutik. Inuttariligassamik kikkut tamarmik akuerisinnaasaannik innersuussiniarneq ajornakusuussappat tamanna ingerlassamik sivitsorsaataasinnaavoq. Suliami aalajangersimasumi tusarniaaffigineqartup innersuussutigisaa ilaatigut sivitsortoorsinnaavoq, tassa tusarniaaffigineqartup aamma sullivinni avatangiisit pillugit siunnersuisooqatigiinni ilaasortat allat ataatsimoorlutik qinigassanngortitassaminnik isumaqatigiissinnaanngimmata. Januarimi 2014-imi Kalaallit Nunaanni Sulivinni Avatangiisit pillugit Siunnersuisooqatigiit siulittaasussatut qinigassamik tusarniaaffigineqartup allallu isumaqatiginngisaannik inassuteqaateqarput. Innersuussinerup kingorna ukiup affaata missaa qaangiuttoq tusarniaaffigineqartoq allamik qinigassaasinnaasumik inassuteqaateqarpoq (junimi 2014-imi). 2014-imi aasakkut taamaalilluni sullivinni avatangiisit pillugit siunnersuisooqatigiit unammillerlutik marlunnik inassuteqaateqarput. Aasap kingorna isumaqatigiilluni aaqqiissummik nassaartoqartussaavoq. Suliamilli ingerlatsineq Inatsisartunut qinersinissap nalunaarutigineqannginnerani naammassineqanngilaq. Naalakkersuisut nutaat ukiup naanerani inissipput. Siulittaasussamik nassaarniarneq ukiortaap kingorna nangingeqarpoq, siulittaasorlu nutaaq martsip qaammataani qinerneqarluni. Taamaalilluni kinguaattoornermut pissusituaavoq sullivinni avatangiisit pillugit siunnersuisooqatigiit akornanni isumaqatigiingineq.

Manna tikillugu Kalaallit Nunaanni Sulivinni avatangiisinut siunnersuisooqatigiit tassaasimapput Danmarkimi aaqqiissuusaaq, Danmarkimi inatsisaasunik inatsiseqartitaasut, Danmarkimit aningaasalersugaasut, aammalu Danmarkimi allaffeqartuusut.

Suliassaqarfimmik tigusinikkut suliassaqarfiup aqunneqarnera inatsisilersugaaneralu pillugit annertunerusumik najukkami tunngavissiillunilu ilanngullugu Sullivinnik Nakkutilliisoqarfimmik aamma Sulivinni avatangiisinut siunnersuisooqatigiinnik nutaanik qanimut pitsaasumillu suleqateqarnissamik Naalakkersuisut naatsorsuutigaa.

Sulitilluni ajutoornerit amerlassusaat pillugit tusarniaavigineqartup oqaaseqaataanut tunngatillugu ukiuni kingulliunerusuni amerlassutsit amerliartuaaginnarsimanerat eqqortuuvoq, tamannalu arlalinnik nassuiaatissaqarsinnaavoq. Taamaattumik tigusisoqarnikkut ajutoornerit amerlassusaasa ikilisinneqarsinnaanerit qularutigisassaannngitsumik oqaatigineqarsinnaanngilaq. Tigusinerli siusinnerusumut naleqqiullugu suliassaqarfimmik annertunerusumik sammisaqarnermik annertunerusumillu pingaarnersiuiernerik periarfissiivoq, soorlusooq Kalaallit Nunaanni inuiaqatigiinnut annertunerusumik qanissuseqartoqalerneratigut iluanaarutissat amerlanerusinnaasut. Taamatut ilorraap tungaanut sunniutit aamma siuliani, suliassaqarfiit tiguneqarnerini takuneqartarsimapput. Siuliani pineqartup assingata sammineqarfigisaani KNIAIN-imit tusarniaanermut akissutaasumut oqaaseqaat innersuutigineqarpoq.

Aammattaaq siuliani Sulisitsisunit tusarniaanermut akissummut oqaaseqaat, aamma pineqartup assinganik sammisaqarfiusoq innersuussutaavoq.

IMAK oqarpoq: *”Suliassa qarfiup tiguneqarnerani aningaasartuutit ikippallaartut inissinneqarsimasut IMAK-p siulersuisui isumaqarput. Aamma Naalakkersuisut aamma Danmarkimi naalagaaffiup nalunaarussiaanni aningaasaqarnikkut naatsorsuutit, aamma inatsisissatut siunnersuummi nassuiaatini takuneqarsinnaasutut naatsorsuinerit/missiliuutit akornanni naapertuuttoqanngilaq. Nassuiaat kattuffiit aamma namminneq pissarsiariniarsaralugu takusinnaasimasaat.”*

Nassuiaammi aningaasaqarnermik naatsorsuutit siunnersuummi matumani aningaasaqarnermut tunngatillugu naatsorsuutaasunut naapertuupput.

Taamaattorli allaassutaasoq tassaavoq Sullivinnik Nakkutilliisoqarfiup nakkutilliisarnerani aningaasartuutininik matussusiisillugit suliffeqarfinnut tamanut akitsuusersuinermik siunnersuummi atuisoqannginnera. Tamatuma nassuiaammi aningaasat akitsuummik aaqqissuussivimmik aqutsisoqarnissamat immikkoortinneqartut siunnersuummut naleqqiullugu peerneqarnerat nassataraa.

IMAK oqarpoq: *”Sullivinni avatangiisinik suliassa qarfippiami malittarisassiorluni suliaqarnerit maannakkut Namminersorlutik Oqartussani pigineqartuunerannik siulersuisut qularutigisaannik immikkut annertuumik ilisimasaqarnissamik piunasaqartitsipput. Taamaattumik inatsisissatut siunnersuummut nassuiaatini takuneqarsinnaasut saniatigut namminersorlutik oqartussanut isumalluutininik nutaanik ilaartuinissamik tigusinissaq pisariaqartitsissaaq.”*

Suliassa qarfinni allanisulli Namminersorlutik Oqartussat suliassa qarfik inatsisiliorfigisinnaassavaat. Ilaatigut inatsisiliornermut teknikkikkullu suleqatigiinnerit pillugit siunnersuummiippat Suliffeqartitsinermit ministereqarfillu suleqatigiinnissamat isumaqatigiisummut aningaasat. Tamatuma saniatigut sullivinni avatangiisinut inatsisaasunut ilisimasaniq nutarsaasussamat suliassaniq akisussaaffeqartumi naalakkersuisoqarfimmi A/C-tut atorfimmuut affarmut ilassutaasussamat aningaasat ilassutit immikkoortinneqarput. Taamaattumik kissaatigisamik tassannga naapertuuttumik siunnersuut iluarsineqarsimavoq.

IMAK oqarpoq: *”Aningaasatigut naatsorsuutaasuni maannakkut nalunaaruteqartarnermik aaqqissuussaasoq Sullivinnik Nakkutilliisoqarfimmit pinnani suliffimmi ajutoornernut aqutsisoqarfimmit pigineqarnera naatsorsuutigineqarsimangilaq. Nutaarluinnarmik nalunaaruteqartarnermik aaqqissuussamik suliaqartoqassaneranik tamanna nassataqarsinnaavoq.”*

Maannakkut nalunaaruteqartarnermik aaqissuussamik attassisoqassasoq kissaatigineqarpoq, tassani Sullivinnik Nakkutilliisoqarfimmut aamma Center for Arbejdsskaderimut (Sulitilluni ajutoornernik Ingerlatsivimmut) ataatsikkut sulinerimi ajutoornerit, sulitilluni ajutoornerit, inuussutissarsiummit nappaatit nalunaarutigineqarsinnaassallutik.

Qulaani Suliffissaqartitsiniarnermut ministereqarfiup tusarniaanermut akissummini ataatsimoorussatut nalunaaruteqarnermut aaqissuussamik atuisarnermut iluarsiinissamut, pisariaqassappallu Danmarkip tungaanit inatsisaasunik allannguuteqarnikkut piunassuseqarnini oqaatigisimavaa. Tamanna Namminersorlutik Oqartussanut aningaasaqarnikkut aningaasartuuteqarfiusinnaanersoq nalilersorneqarsimanngilaq.

IMAK oqarpoq: ”Aalajangersakkat amerlanersaat maannakkut inatsisaasumiittutulli ipput, taakkulu IMAK-p siulersuisuisa taamaatsillugit oqaaseqaateqarfiginngilaat. Ajutoornerilli nalunaarutigineqartarnerannut aamma sulinermik tunngaveqartunik nappaatinut tunngatillugu appariartoqassanera pillugu IMAK-p siulersuisui assut ernumassuteqarput. Sullivinnik Nakkutilliisoqarfik nalunaaruteqartarfimmit paasisutissanillu katersillunilu ataatsikkut ingerlassaqarsinnaasoq § 75-imi takuneqarsinnavoq. Siuliani oqaatigineqartut sulinerimi ajutoornermut aqutsisoqarfiup nalunaaruteqartarfik pigalugulu isumagisarivaa. Taamaattumik Danmarkip aamma Kalaallit Nunaata akornanni inunnut paasisutissat isertuussariallit nuuttarnissaat inunnut paasisutissanut inatsimmut naapertuunnera IMAK-p siulersuisuisa qaammarsaavigineqassasoq kissaatigaat. Tamanna minnerunngitsumik Danmarkimi sulinerimi ajutoornernut suliaasaqarfik ministereqarfiup ataani aqutsisoqarfiujunnaarneranik paasisanut naleqqiullugu isigineqassaaq.

Kiisalu suliaasaqarfimmik tigusaqarneq ajutoornerit sulinerlu tunngavigalugu nappaatit tamarmik qullersaqarfimmut assigiinngitsunut marlunnut nalunaarutigeqqittalernissaannik nassataqartitsissanersoq IMAK-p qaammarsaaviginissaa kissaatigaa. Tamanna annertuumik kinguariarnermik nassataqassaaq, aammalu ajutoortunut ataasiakkaanut killup tungaanut imaaliillaannaq kinguneqarsinnaassalluni.

Kiisalu assersuutigalugit sulitilluni ajutoornerni pinaveersaarisitsisutut sullivinni avatangiisini suliaqarnermut atugassanik eqqortumik takutitsisunik naatsorsueqqissaarisinnaanermut siunissami periarfissaasut IMAK-p siulersuisuisa assorsuaq aarleqqutigaat, tassalu Sullivinnik Nakkutilliisoqarfik Kalaallit Nunaannit ingerlanneqalerpat, sulinerimi ajutoornermut suliaasaqarfik suli Danmarkimit tigummineqartoq.”

Siuliani taaneqartut § 75-imi tunngavissiuutaasutut paasissutissanik paarlaateqatigiittoqarsinnaanera pillugu Suliffissaqartitsinermut ministereqarfillu isumaqatigiittoqarpoq, tamanna nakkutilliinerit angusassaqaletinnissaannut ilapittuutaasinnaammat, aammalu sumi amerlanerpaanik ajutoornernik, ajoqusernernik nappaatinillu pisoqartarneranut tamanik takussutissamik pissarsisitsilluni. Danmarkimi inatsisaasunik allannguutinik ataasiakkaanik ilassuteqarnikkut tamatuma pisinnaanera Suliffissaqartitsinermut ministereqarfik isumaqarpoq. Taamaalilluni paarlaateqatigiinnermik aaqjissuussamik ingerlatsinerup nanginnissaanut, aammalu Center for Arbejdsskaderilu paasissutissanik ataatsikkut ingerlatsinissamut, ilanngullugulu ataatsimoorussatut nalunaaruteqartarfimmik atuinerup ingerlateqqinnissaanut inunnut paasissutissat pillugit malittarisassanik aporfissaqassaneranik isumaqartoqanngilaq.

Nalunaaruteqartarfimmik piviusumik aqutsinermi, aammalu Center for Arbejdsskaderilu paasissutissanik ataatsikkut ingerlatsinissami tamanna pillugu inatsisaasunut atuuttunut naapertuuttumik inunnut paasissutissat mianersuuttariaqartut eqqortumik suliarinissaannik qulakkeerinnittoqassanera sianigineqarpoq.

Qullersaqarfinnut taakkununga marlunnut sumiiffimmi ataatsimi nalunaaruteqartoqassanera kikkut tamarmik soqutigisarigaat tusarniaavigineqartut oqaatigivaa, aammalu assersuutigalugu sulitilluni ajutoornernik pinaveersaariniitutit sulianut atugassanik eqqortumik takutitsisunik naatsorsueqqissaarisooqarsinnaanera kikkut tamarmik soqutigisaraat.

Kalaallit Nunaanni ilinniagartuut kattuffiat (ASG) oqarpoq: ”*Siunnersuummut qulaaniittumut tunngatillugu Kalaallit Nunaanni ilinniagartuut kattuffiat tusarniaavigineqarsimanertik qujassutigissavaat. Inatsisissatut siunnersuut Kalaallit Nunaanni aamma Danmarkimi ASG-p ataani sulisartut kattuffiitut nassiunneqarsimavoq. (...).*

*Inatsisissatut siunnersuummut tamarmiusumut tunngatillugu aallarniutigalugu oqaatigineqassaaq Danmarkimi pisartunut paarlattuanik Kalaallit Nunaanni Naalackersuisooq ataasiinnaq pinnagu Naalackersuisunut tamarmiusunut pisussaaffimmik tunniusisoqarnera ASG tupigusuutigaa – tamanna assut pizarissersornerorpasippoq. Suliassaqarfimmi tamarmiusumi Naalackersuisut tamarmiusut naammattumik ilisimasaqassaneranik inatsisiliortup anguniagaqarnera ASG-p tupigusuutigaa, taamaalilluni ilassutitut malittarisassiat atuutsilernissaat pillugit aalajangiisinnaasoqassalluni. Inatsimmi Suliffeqarnermut Inuussutissarsiornermullu Naalackersuisumut tunniussisoqassasoq ASG-p siunnersuutigaa, taamaalillutik Naalackersuisut tamarmiusut ilassutitut malittarisassiat atuutsinnisaannut akisussaaffilerneqassanngimmata.”*

Sammissamik tassannga tunngasumik Peqqinnissaq Pillugu Kattuffiit (PPK) tusarniaanermut akissutaannut oqaaseqaat innersuussutigineqarpoq.

Kalaallit Nunaanni ilinniagartuut kattuffiat (ASG) oqarput: *”Inatsisissatut siunnersuummi nassuiaatinilu timitalittut sullivinni avatangiisit pingaarnerutillugit samminittoqarpassittoq ASG-ip ilanngullugu oqaatigaa. Inatsisartut inatsisaanni tamatigoortumik tarnikkut sullivinni avatangiisinik annertunerusumik sammisaqartoqassasoq ujartorneqarpoq. Taamaattumik inatsisit oqaasertaanni tamanna nassuiarneqassasoq siunnersuutigineqarpoq. Assersuutigalugu § 1, imm. 2-mi ilanngussaqaarnikkut tamanna pisinnaavoq:*

*”Sullivinni avatangiisit isumannaatsut peqqinnartullu timikkut tarnikkullu sullivinni avatangiisitigut nassuiarneqarput.”*

*Ingammik Kalaallit Nunaanni Ilagiinnut aamma palasinut atorfinitsitanut tarnikkut sullivinni avatangiisit tassaapput pingaarutilittut sammisassaqaarfusoq. Ilaatigut kisimiittut sulisarneq pineqarpoq, tarnikkut artukkiisuusinnaasoq killissaqanngitsorlu.”*

Siunnersuummiipput timikkut soorlusooq tarnikkut sullivinni avatangiisit, tamanna § 1-imut siunnersuummi nassuiaatini takuneqarsinnaalluni. Tarnikkut sullivinni avatangiisit aamma qulakkeerneqassanerat erseqqissarneruniarlugu siunnersuummi tusarniaavigineqartup siunnersuutigisaata assinganik oqaasertalimmik nutaamik § 1, imm. 2 ilanngunneqassaaq. Taamaalilluni Kalaallit Nunaanni ilagiinnut tunngatillugu ASG-mit pisariaqartitatut takussutissiarineqartoq naapinneqarpoq.

Kalaallit Nunaanni ilinniagartuut kattuffiat (ASG) oqarpoq: *”Ilanngullugu Kalaallit Nunaanni ilagiinnut tunngasoq tassaavoq suliaqarfeeraanera, immikkoortukkuutaanik arlalinnik, taamaallaat ikittuaqqanik atorfeqartunik, imaluunniit atorfilinnit ataatsinik immikkoortitertunik inuttaqartoq.*

*Taamaattumik sullivinni avatangiisinut inatsimmi paasisatut ilagiit tamakkerlugit suliffeqarfittut ataasiinnartut isigineqarnissaa pingaartuuvoq, taamaalilluni § 6, imm. 1 malillugu isumannaallisaanermik peqqinnissamillu suliaqarneq aaqqissuunneqarsinnaalluni. Inatsisissatut siunnersuummi suliffeqarfiup qanoq nassuiarneqartarnera erseqqissuliuutaarpasinngilaq. Tamanna erseqqissaavigineqartariaqarpoq.”*

Manna tikillugu atuuttumi Kalaallit Nunaanni sullivinni avatangiisit pillugit inatsimmi § 5, imm. 1.-ip oqaasertaanik § 6, imm. 1 nangitseqqippoq. Siunnersuutikkut manna tikillugu eqqartuusseriaatsip allanngortinnagu ingerlateqqinnissaa kissaatigineqarpoq. Manna tikillugu

pisartutut isumannaallisaanermik peqqinnissamillu suliaqarneq aaqqissuunneqassaaq, immikkoortoqarfinni ataasiakkaani isumannaallisaasoqatigiilersorlugu.

Manna tikillugu ilagiit suliffeqarfittut tamakkiisutut isigineqarsimaneratut ilagiit siunnersuutip matuma kingornatigut aamma suliffeqarfittut tamakkiisutut isigineqassaaq.

Kalaallit Nunaanni ilinniagartuut kattuffiat (ASG) § 9, imm. 2-mut tunngatillugu oqarpoq: *”Siunnersuut imatut ippoq: ”Isumannaallisaanermut suleqatigiinni aamma isumannaallisaanermut ataatsimiititaliami ilaasortat, isumannaallisaanermik suliaqarnermi pisussaaffimminnik isumaginninnissamut, pissutsit malillugit piffissamik naleqquttumik atugassaqaarnissaat, sulisitsisup isumagissavaa.” Oqaasiliorneq assupilussuaq sanngiissuseqarpoq, tamannalu aamma nassuiaatini taamaappoq. Taamaalilluni “piffissamik naleqquttumik malillugit” sunut tunngasuunerinut sulisitsisup nammineq nassuiaanissaanut imaaliallaannaq annertoorujussuarmik periarfissiisoqarpoq. Tamanna annertunerusumik erseqqissarneqarsinnaanersoq, imaluunniit isumannaallisaanermik suliaqarnermut minnerpaamik piffissaliussap atugassiarinissaa aalajangerneqarsinnaanersoq inatsisiliortup isumaliutigisariaqarpaa.”*

Siunnersuut tassaavoq suliffeqarfinnut tamanut atuuttut toqqammavissatut aalajangersagaq. Suliffeqarfiit ataasiakkaat qanoq aaqqissuussaanagerat, aammalu sunik unammillerfissaqarnerat assut assigiinnigittarmata inatsimmi tamanna aalajangersarneqanngilaq, tunuliaqutitulli annikitsortalersukkatut inatsisiliaasuni imaluunniit aalajangiinerni ataasiakkaani pisuni ataasiakkaani ”pissutsit malillugit naammaginartutut piffissarititaq” qanoq paasineqassanersoq aalajangerneqassaaq.

Kalaallit Nunaanni ilinniagartuut kattuffiat (ASG) § 19, imm. 1-imut tunngatillugu oqarpoq: *”Sulisut isumannaallisaanermut sulinermullu sinniisui peqqussutinik taama ittunik atuutsitaasunik sulisitsisup ilisimatitsinissamik pisussaaffeqarneranik aalajangersagaq tunngavoq. Aalajangersakkami naggatip aappaani allassimavoq: ”Isumannaallisaanermut sinniisunut aamma sulisut sinniisaannut allanut peqqussummik ilisimasaqartitaanissamik qinnuteqartunut sulisitsisoq assingusumik pisussaaffeqarpoq.” Matumani suliffeqarfinnit/kattuffinnit allanit isumannaallisaanermut sulinermullu sinniisut pineqarnerisut erseqqissuliuutaanngilaq. Taamaattoqassappat suliffeqarfimmi ataatsimit sulisut sinniisaat nunami suliffimmut sumulluunniit allanut Sullivinnik Nakkutilliisoqarfimmit peqqussummit ilisimatinneqarnissaminut qinnuteqartarnissaa imaaliallaannaq eqqumiippasippoq. Aalajangersakkap taassuma qanoq isumaqarneranik erseqqissaavigineqarnissanik inatsisiliortoq qinnuigineqarpoq, ajornanngippat nassuiaatini.”*

Siunnersuummi § 19, imm. 1 manna tikillugu atuuttumi Kalaallit Nunaanni sullivinni avatangiisit pillugit inatsimmi § 16-ip oqaasertai ingerlateqqippai. Siunnersuutikkut manna tikillugu eqqartuussisaatsip allanngortinnagu ingerlateqqinnissaa kissaatigineqarpoq.

Suliassa qarfiup pineqartup iluani isumannaallisaanermut sulinernullu sinniisut peqqussummik ilisimatitsinissamut sulisitsisumut pisussaaffigisamik § 19, imm. 1, naggat siulleg aalajangersaavoq. Siunnersuummi § 6, imm. 2-mi nassuiarneqartut immikkoortoqarfinni imaluunniit suliamik ingerlassaqarfinni ataasiakkaani isumannaallisaanermut suleqatigiissitaliortoqartassaaq. Taamaalilluni suliffeqarfik ataaseq suliamik ingerlassaqarfinnik assigiinngitsunik, assigiinngitsunik isumannaallisaanermik suleqatigiinnik aamma isumannaallisaanermut sinniisunik peqarsinnaavoq. Taamaalilluni peqqussut pillugu suliassa qarfiup pineqartup iluani isumannaallisaanermut sinniisut ilisimatinnissaannut sulisitsisoq pisussaaffeqarpoq. Suliffeqarfiup iluani isumannaallisaanermut sinniisut allat, suliassa qarfiulli allat iluanniittut § 19, imm. 1, naggatip aappaani peqqussummik ilisimatitaanissamik qinnuiginnissappata peqqussummik ilisimatitaanissaminnut pisinnaatitaaffeqarput. Taamaalilluni peqqussuteqarfigisaasumut, suliffeqarfiulli taassuma iluaniittumut naleqqiullugu suliassa qarfiit allat iluanni isumannaallisaanermut sinniisuutanut § 19, imm. 1, naggatip aappaa tunngavoq.

Kalaallit Nunaanni ilinniagartuut kattuffiat (ASG) § 21, imm. 2, nr. 1-imut tunngatillugu oqarpoq: *”Oqariaaseq ”peqqinnissamut tunngasut” sumik matussusiinerat erseqqissuliuutaanngilaq. Assersuutigalugu suliffeqarfimmi ataatsimi tamakkiisumik ullut napparsimmaviusut amerlassusaat pineqarpat, imaluunniit sulisunut ataasiakkaanut tamanut inunnut namminnertut tunngasuuppat? Kingulleq pineqassappat inunnut pissutsit pillugit paasissutissanik illersuisunik inatsisaasunik allanik, ilanngullugu inunnut paasissutissanut inatsimmut takkuttussamut sianiginninnissaminik inatsisiliortoq qanoq qulakkeeritigisimanersoq ASG-p paaserusuppa?”.*

Napparsimatilluni takkutinnitsoornerit aamma allatut peqqissutsimut tunngasut pillugit paasissutissat, inuit ataasiakkaat innarligassaannngissusaat sianigalugu inunnut ataasiakkaanut atugarisaannut tunngasooqqusaanngillat. Pineqartut tassaapput suliffeqarfimmi peqqinnissamut tunngasut pillugit paasissutissat, inuit ataasiakkaat namminneq atugarisaat ilaanatik.

Aalajangersakkamut nassuiaatit erseqqissaavigineqarput, taamaalilluni tamanna maannakkut aalajangersakkamut immikkut ittutut nassuiaatini erseqqissumik takuneqarsinnaalerluni.



Kalaallit Nunaanni ilinniagartuut kattuffiat (ASG) § 50-imut tunngatillugu oqarpoq: *”Oqariaatsit ”sinniisissat aamma tuniniaasartut” sunut tunngasuunerannik inatsisiliortoq erseqqinnerusumik nassuiaaqquneqarpoq.”*

Kalaallit Nunaanni sullivinni avatangiisit pillugit inatsimmi § 44-p oqaasertaanik § 50 ingerlatitseqqippoq. Siunnersuutikkut manna tikillugu eqqartuussisaatsip allanngortinnagu ingerlateqqinnissaa kissaatigineqarpoq. Sinniisut aamma tuniniaasartut assersuutigalugit tassaasinnaapput suliffeqarfiup niuffaffinnut niuerfigisanullu akunnermiliuttut attaveqartitsivii. § 50 malillugu sinniisut tuniniaasartullu suliffeqarfiup aalajangersimasumik suliffigisaata avataani suliaqartuupput.

Kalaallit Nunaanni ilinniagartuut kattuffiat (ASG) § 55-imut tunngatillugu oqarpoq: *”Sulisitsisoq sullillugu suliaqartunut” qanoq isumaqartoqarnera inatsisiliortoq erseqqissaaqquneqarpoq. Matumani taamaallaat akissarsiaqartitaalluni suliaqarneq pineqarpa? Assersuutigalugu akissarsiaqaratik suliffimmi sungiusartut qanoq inissisimaffeqarpat? Tamanna immikkut ittutut inatsisip oqaasertaani takuneqarsinnaasariaqarpoq.”*

Sullivinni avatangiisinut inatsimmiupput sulisitsisumut suliat tamarmik ingerlanneqartut. Peqatigiiffimmut piumassuseq malillugu sulisoqartillugu tassaavoq peqatigiiffik “nalinginnartut” sulisitsisutut akisussaaffeqartoq.

Peqatigiiffinni piumassuseq malillugu suliaqarneq sulianut allannut tamanut sullivinni avatangiisinut malittarisassianut taakkununga tamatigoortumik ilaatinneqarnerannik tamanna isumaqarpoq. Taamaalilluni ilaatigut suliffigisap iluarsaannerannut, suliarisap isumagineranut, teknikkikkut atortorissaarutinik atuinernut, akuutissanik atortussianillu suliaqarnermut, kiisalu inuusuttut 18-it inorlugit suliffeqartinnerannut piumasaqaatinut piumassuseq malillugu suliaqarneq atugassaqartitaavoq.

Aamma Sullivinnik Nakkutilliisoqarfiup AT-mik ilitsersuutaa 1.1.1-1 August 2016-imeersoq, november 2016-imi nutarsarneqartoq innersuussissutaavoq: Piumassuseq malillugu suliaqarfiullutik peqatigiiffinni nalinginnarmik iluaqutaaffinni sullivinni avatangiisini suliaqarneq pillugu AT-mik ilitsersuut, kiisalu suliffeqarfiit isumannaallisaanermik peqqinnissamillu suliaqarnerat pillugu Sullivinnik Nakkutilliisoqarfiup AT-mik ilitsersuutaa G1.6.1, september 2006-imeersoq.

Siulitaniittunit assersuutigalugu peqatigiiffinni akissarsiaqartitaanatik suliffimmi sungiusartunut tunngatillugu suliarisap taanna sullivinni avatangiisinut inatsisip malittarisassiaanut nalinginnaasunut aamma ilaatinneqassanera malitsigisaavoq.

Tamatuma saniatigut inuusuttut suliffeqartitaanerat pillugu malittarisassianik aalajangersaanissamut § 55, imm. 2-mi Naalakkersuisut tamatigoortumik pisussaaffeqartitaapput. Malittarisassiat taakku sutigut tamatigut inunnu inuusuttuusunut atuupput, aamma taakkununga sulisitsisumut suliamik ingerlassaqartuunngitsumut, takuuk siunnersuummi § 2, imm. 3, nr. 6.

Kalaallit Nunaanni ilinniagartuut kattuffiat (ASG) § 63, imm. 1-imut tunngatillugu oqarpoq: *”Oqaaseqatigiinni kingullermiittoq ”naleqquttumik ajornanngitsumut annertunerpaamik” innersuussutaavoq. Inatsisissatut siunnersuummut nassuiaatini ALARP-imik tunngavigisaq nassuiarneqarpoq, maannakkulli aalajangersakkami oqaatsini atukkani oqaaseq ”naleqquttumik” peerneqartariaqarpoq. Allatut qinigassaralugu aalajangersakkamut ilannguttariaqarpoq ”takuuk nunat tamalaani akuerisaasutut ALARP-imik tunngavigisaq.”*

Oqaasertaliineq suliassaqarfimmi manna tikillugu periusaasumik malittarinninnissaq pillugu kissaatigisaq aallaavigalugu toqqarneqarpoq, takuuk aatsitassanut ikummatissanullu sulianullu tamatumunnga pingaarutilinnut inatsimmi manna tikillugu atuuttut § 79. ALARP-imik tunngavigisami ”naleqquttoq”-p assigaa ”reasonably”: ”as low as reasonably practicable”. Imartani aatsitassarsiornermik suliassaqarfimmi manna tikillugu periusaasartup atuuttuunera imaluunniit atuuttunnginnera pillugu nalornisoqarnermik pilersitsinierani aalajangersakkami allannguuteqarnissaq pinngitsoorneqarpoq.

Kalaallit Nunaanni ilinniagartuut kattuffiat (ASG) § 81, imm. 5-imut oqarpoq: *”Aalajangersakkami allassimavoq ”Maalaarutigisami Naalakkersuisut aalajangiitinnagit Sullivinni avatangiisinut siunnersuisooqatigiinnit oqaaseqaammik pissarsisoqarsinnaavoq.” Maannakkut kingusinnerusukkut allannguutit ilanngullugit Kalaallit Nunaanni sullivinni avatangiisit pillugit inatsimmi (Inatsisunik nalunaarut nr. 1048, 26. oktober 2005-imeersoq, aamma Inatsit nr. 1382, 23. december 2012-imeersoq) assingusut § 64, imm. 5-imi nalunaarneqarpoq: ”Suliffeqartitsinermut ministeri maalaarutigisami aalajangiisinnagu Sullivinni avatangiisinut siunnersuisooqatigiit oqaaseqaataat pissarsiarineqaaqaaq”.*

Siunnersuutip tusarniaaffioreerneratigut Sullivinnik Nakkutilliisoqarfimmik maalaarutaasut kiffaangissuseqartumit Sullivinni avatangiisit pillugit naammagittaalliortarfimmit suliarineqartassanerat Inatsisartut inatsisaannut ilanngunneqarpoq. Taamaattumik siunnersuummit maalaarutinik sulianit Naalakkersuisut aalajangiisarnerat pillugu aalajangersagaq peerneqarpoq.

Kalaallit Nunaanni ilinniagartuut kattuffiat (ASG) kapitali 8, qupp. 7-imut tunngatillugu oqarpoq: *”Immikkoortumi siullermi oqaaseqatigiinni kingullerni allassimavoq: ”Ulloq unnuarlu ataaseq sulinnigiffeqartik ullut tamaasa qasuersaarfiusussamut ilanngunneqassaaq (Pineqarluni nal. akunnerinik 35-nik sivisussusilik)”. Matumani oqaaseq ”minnerpaamik” ”nal. akunneri 35”-t sioqqullugu inissittariaqarpoq.”*

Tusarniaavigineqartup oqaaseqaata akuerineqarpoq, siunnersuummullu nassuiaat imatut erseqqissaavigineqarpoq tassani allassimalerluni ” nalunaaquttap akunnerini minnerpaamik 35-ni.

Kalaallit Nunaanni ilinniagartuut kattuffiat (ASG) ilanngullugu kapitali 8, qupp. 7-imut tunngatillugu oqarpoq: *”Ilanngullugu nalunaarneqarpoq ”nunami nunap pissusaanik angallannermilu pissutsit tunngavigalugit angalanermi piffissaq atugaq qasuersaarfittut isigineqassaaq”. Tamanna taamaallaat nassuiaani nalunaarneqarpoq, inatsimmi oqaasertaliussarpiani pinnani. Sulinermut atatillugu angalanerit sulinermi piffissatut isigineqartarnerat pillugu atuutsitatut periusaasumik inatsisiliortup allannguuteqarniarneranik tamanna isumaqarnerpa – taamaalilluni sulinermut atatillugu angalanerit, inatsisissatut siunnersuutikkut qasuersaarfittut/sunngiffittut isigineqalissallutik? Aalajangersakkamut § 46, imm. 1-imi qupperneq 49-miittumut nalunaarsugaasumtu matumani oqaaseqaat akerliuvoq. Oqaaseqatigiinni allani imatut allassimasoqarmat: ”Angalanermi piffissaq sulinermi piffissatut isigineqarpoq”. Oqaaseqaatit taakku marluk akornanni naapertuutsisisoqalersillugu nassuiaatini allannguuteqarnissamik inatsisiliortoq qinnuigineqarpoq.”*

Oqaaseqaat akuerineqarpoq. Kapitali 8, qupperneq 7-imi allassimasoq allanngortinneqarpoq, taamaalilluni periuseq atuuttoq nangingneqartoq takuneqarsinnaalluni, soorlu aamma Kalaallit Nunaanni piffissaq qasuersaarfik aamma ulloq unnuarlu sulinnigiffik pillugu Sullivinnik Nakkutilliisoqarfiup nalunaarutaa nr. 32, 23. januar 2006-imeersumi § 13-imi erseqqinnerusumik nassuiarneqartut: *”Aalajangersimasumik suliffigisamut naleqqiullugu suliffigisamut allamut tassanngaanniillu angalanermut piffissaq atorneqartoq sulisut suliffigisaminnut nalinginnaasumik piffissamut angalaffigisaannut annertunerunerani piffissatut qasuersaarfittut imaluunniit ulloq unnuarlu sulinnigiffeqarfittut isigineqassanngilaq.”*

Aammattaq tamatumunnga naapertuutsilerlugit nassuiaatini immikkut ittuni § 46, imm. 1-imi nassuiaat itisilerneqarpoq.

Kiisalu Kalaallit Nunaanni ilinniagartuut kattuffiat (ASG) oqaatigaat:

”Kalaallit Nunaanni sulinermi ajutoornermut sillimmasiisarneq pillugu inatsimmut (Inatsit nr. 1528, 21. dec. 2010-meersumut) naleqqiullugu Inatsisissatut siunnersuut

*Kalaallit Nunaanni sulinermi ajutoornermut sillimmasiisarneq pillugu inatsimmi § 1, imm. 1 malillugu sulinermi ajutoornerup sullivinni avatangiisinik aaqqissuussiviup pinaveersaartitsinera taarsigassarsianut il.il. sulisitsisut aningaasalersuinerat aqutigalugu tapersorsorneqarpoq.*

*Tamanna Danmarkimi sullivinni avatangiisinut inatsimmi erseqqissarneqaqqippoq (Inatsisinut nalunaarut nr. 1072, 7. september 2010-meersoq), tassani kapitali 12 a-mi aalajangersakkani Illua tungeriit sullivinni avatangiisini iliuuserisaannik aningaasaliinerit il.il. allassimalluni ilaatigut Sullivinni avatangiisinut siunnersuisooqatigiit suliarisaasa piviusunngortinnissaannut aningaasat ilaatigut Arbejdsmarkedets Erhvervssikring aqutigalugu akiliutinit pissarsiarineqassasut (§ 68, imm. 1).*

*Taamaalilluni AES-imi akiliutit ilaat Danmarkimi Sullivinni avatangiisinut siunnersuisooqatigiit suliaasa aningaasaliiffiginissaat inatsisikkut aalajangerneqarpoq. Arbejdsmarkedets Erhvervssygdomsikringimut nunatsinni sulisitsisunit akiliutit akiliutigineqartut nunatsinni Sullivinni avatangiisinut siunnersuisooqatigiit suliarisaannik tapersiinnissaat inatsisiliortup qanoq ililluni qulakkiissavai?”*

Arbejdsmarkedets Erhvervssygdomsikringimut Kalaallit Nunaannit akiliutit tigusereernerup kingornatigut Sullivinni avatangiisinut siunnersuisooqatigiinnut nutaanut qanoq ikaarsaariartinnissaasa qulakkeernissaat pillugu Naalakkersuisut Suliffissaqartitsineranut ministereqarfillu oqaloqatigiipput.

Atorfillit Kattuffiat (AK) aamma Sulinermik Inuussutissarsiuteqartut Kattuffiat (SIK) assigiinnik tusarniaanermut akissutinik tunniussaqaarsimapput. Taamaattumik tulliani AK/SIK issuarneqassapput, tusarniaanermut akissummi allassimasassalluni AK, aamma SIK. AK aamma SIK oqarput: ”Sullivinni avatangiisnik suliaasaqarfup tiguqarnissaanut AK/SIK iluarinnipput, taamaalilluni suliaasaqarfimmi assut pingaarulimmi tassani inatsisiliornermik inatsisinillu atuutsitsinikkut pissaaneqarfimmik Kalaallit Nunaat tigusinnissammat, tunngavigalugit pisariaqartitatut suliatigut sammisaqaarsinnaassutsip qulakkeernissaa, aammalu suliaasaqarfimmut aningaasaliissutit amerlisinnissaat, taamaalilluni assersuutigalugu suliffeqarfigisatsinni sullivinni avatangiisinik nakkutilliinneq nukittorsarneqarsinnaassammat.

*Sullivinni avatangiisit pillugit inatsimmut atuuttumut inatsisissatut siunnersuut annertuumik assigiissuusoq AK/SIK-p paasivaat. Inatsisaasunut atuuttunut toqqammavissatut inatsisip*

*taassuma annertuumik assigiissuussanera susassaqaqatigiinnut tamanut tamatuma imaaliallaannartumik iluaqutaassanera AK/SIK-p isumaqatigivaat, tamatuma suliffinnut taakkulu sulisuinut sullivinni avatangiisinik suliassa qarfiup tiguneqarnera oqilisassammagu, soorlusooq Sullivinnik Nakkutilliisoqarfik nutaaq siamasissumik annertussuseqartumik manna tikillugu periutsiminik ingerlateqqitaqarsinnaammat. Taamaattorli suliffinni avatangiisinik suliassa qarfiup maannakkut tiguneqarnissaata eqqarsaatiginerani suliffeqarfitsinnut annertunerusumik naleqqussagaasunik iluaqutaasumik aalajangersakkanik pissutsinut aalajangersimasunut aalajangersaasoqarsinnaasoq AK/SIK isumaqarpoq. Ilaatigut isumannaallisaasoqarfimmik, qasuersaartarnermut aalajangersakkanik, kiisalu inuusuttut 18-it inorlugit ukiullit suliffeqarnissamut periarfissaasa aqqissuussaanerannut, taamaalillutik taakku aalisakkanik tunisassiorfissuarmi aamma illuliorlunilu sanaartortoqarfimmi tulluurtumik sulisinnaalersinnissaannut tamanna tunngavoq. Taamaattumik pissutsinut atukkatsinnut inatsisaasumik naleqqussaanerup qanoq pisinnaanissaanik Naalakkersuisut sukumiisumik nalilersuinissaat AK-p siunnersuutigissavaa.”*

Atorfillit Kattuffiat (AK) aamma Sulinermik Inuusutissarsiuqartut Kattuffiat (SIK) nangillugu oqarput: *”Sullivinni avatangiisinik suliassa qarfiup tiguneqarnerata kingornatigut Danmarkimi Sullivinnik Nakkutilliisoqarfimmit inatsisitigut teknikkikkullu ikiorsiisoqarsinnaanera pillugu Danmarkimi qullersaasullu suleqatigiinnissamik isumaqatigiissummik atsiuisoqarsimanera AK/SIK-p iluarisimaarlugu paasivaat. Taamaalilluni suliassa qarfimmik tigusineq tulluurtutut iluseqartumik pissaneranut tamanna qulakkeerinneqataassaaq.”*

Suliffissaqartitsineranut ministereqarfiup tusarniaanermut akissummini oqaatigisaatut suleqatigiinnissamut isumaqatigiissummumut toqqammavissaq pillugu isumaqatigiittoqarpoq, tamanna Nunami sullivinni avatangiisinut sulissa qarfiup Kalaallit Nunaanni akisussaaffigilerlugu tiguneqarnissaa pillugu suleqatigiissitaliamit nassuiaammi ilanngussaq A-mi takuneqarsinnaalluni.

Atorfillit Kattuffiat (AK) aamma Sulinermik Inuusutissarsiuqartut Kattuffiat (SIK) oqarput: *”Inatsisissatut siunnersuut tassungalu ilaasutut nassuiaatit atuarnissaat artornangaatsiarput. Taamaattumik inatsisip atuutisilerneranut atatillugu inatsit pillugu paasisitsiniutinik Naalakkersuisut suliaqassasut AK-p siunnersuutigissavaa, taakku sullivinni avatangiisinut inatsisip nutaap imarisaanik siunertaasunillu ilinniartitsisutut atuaruminartutullu nassuiaassallutik.”*

Oqaaseqaat akuerineqarpoq. Suliassa qarfiup tiguneranut atatillugu Naalakkersuisut paasisitsiniutinik paasiuminartunik suliaqarnissaq pilersaarutigaa, ilanngullugu sullivinni avatangiisit pillugit Inatsisartut inatsisaasa imarisai pillugit.

Atorfillit Kattuffiat (AK) aamma Sulineramik Inuusutissarsiuqartut Kattuffiat (SIK) oqarput: *"Inatsisissatut siunnersuummut nassuiaatini allassimavoq pinaveersaarinerup assut pingaartuutinnissaa inatsisissatut siunnersuummut siunertaasoq, tamannalu AK/SIK-ip isumaqatigilluinnarpaat. Taamaattorli pinaveersaartitsinerup taassuma piviusutigut qanoq atuutsinneqalissaneranut inatsisissatut siunnersuut killeqartumik akissuteqarfignittoq takuneqarsinnaalluni."*

Inatsisartut inatsisaanut siunertaq tassarpiarpoq pinaveersaartitsineq aqputigalugu sullivinni avatangiisinik isumannaatsunik peqqinnartunilu qulakkeerinissaq. Pinaveersaartitsineq Inatsisartut inatsisaanni aalajangersakkat assigiinngitsut aqputigalugit pivoq, assersuutigalugu suliffiusuni isumannaallisaarnermik peqqinnissamillu suliaqarnerup aaqquissuusaanissaanik, suliffeqarfimmik nalilersuutinik suliaqarnissaanik, isumannaallisaanermut sinniisunik tapersiinnissaanik il.il. suliffeqarfiit peqquneqassallutik. Taamatuttaaq suliap isumaginera, suliffigisaq, teknikkikkut atortorissaarutit, aamma akuutissat atortussallu pillugit kapitali 4-7-imi malittarisassiat isumannaallisaanerup aarlerinartorsiortitaanissaanut pinaveersaaripput, assersuutigalugit suliat isumannaatsuunngitsumik suliarineri, suliffigisat isumannaanngitsumik pisatalersukkat, isumannaanngitsumik iluarsaassineq, aamma teknikkikkut atortorissaarutinik atuinerit, imaluunniit navianarsinnaasunik akuutissanik atortussanillu atuineq pissutigalugit, sulisuusut navianartortanut tamakkununga sunniuteqarluartumik isumannaallisaaviginagit. Piffissaq qasuersaartarfik aamma ulloq unnuarlu sulinnigiffik, inuusuttut sulisitaanerit, aamma nakorsamit misissortittarnerit pillugit malittarisassiat aamma sullivinni avatangiisit isumannaatsuunngitsut navianartortallillu assigiinngitsumik ilusilimmik pinaveersaartitsipput. Sullivinni avatangiisinut inatsit pillugu suliffeqarfinnik ilitersuinissamik Sullivinnik Nakkutilliisoqarfik suliassa qarpoq, tamatumalu naapertuutsinneranik nakkutilliisuussalluni, taamaalillutik sullivinni avatangiisit isumannaatsuunngitsut navianartortallillu pinaveersaartinneqassallutik.

Siunnersuummi malittarisassiat Naalakkersuisunit aamma Sullivinnik Nakkutilliisoqarfimmit malittarisassianik annikitsortalersugaasunik itisilerneqarlutillu immersorneqassapput, assersuutigalugit nalunaarutit ilitersuutillu aqputigalugit.

Atorfillit Kattuffiat (AK) aamma Sulineramik Inuusutissarsiuqartut Kattuffiat (SIK) oqarput: *"Aammattaaq suliffeqarfimmi sullivinni avatangiisit qanoq ittuussanerannut pingaarnertut politikkerisamik suliffeqarfiup suliaqarnissaanik peqqusisumik inatsisissatut siunnersuummi aalajangersagaq AK/SIK-p amigaatigaat. Taamatut pingaarnertutit"*

*politikkerisaaq suliffeqarfimmi APV-mik suliarisassamut nutarsartagassamullu ataqatigiissillugu pissusissamisoortumik isigineqartussaassaaq.*”

Kalaallit Nunaanni suliffinnik nalilersuisarneq pillugu Sullivinnik Nakkutilliisoqarfiup nalunaarutaa nr. 1168, 8. oktober 2007-imeersoq innersuussutigineqarsinnaavoq. Taassuma sullivinni avatangiisinik suliassaqaqarfiup tiguneqarnerata kingornatigut atuutsitaanera nanginneqassaaq.

Atorfillit Kattuffiat (AK) aamma Sulineramik Inuussutissarsiuteqartut Kattuffiat (SIK) oqarput: *”Inatsisissatut siunnersuummi ilaasut amerlasuut assut tapersorsornartuusut AK/SIK-p isigaat. Taakkunaniippat ilaatigut suliffimmik nalilersuummik sulisitsisup suliqaqarnissamut pisussaaffigisaanut tunngatillugu aalajangersakkat, sulisut sinniisaattulli isumannaallisaasoqarfimmi ilaasortat soraarsitaanissamut, aammalu sulinerminni atugaannik allatut ajortisaanissamut illersorneqarnerat, suliarisaaq isumannaallisaanermut peqqinnissamullu tunngatillugu isumannaatsumik suliarineqarneranik sulisitsisup sunniuteqarluartumik nakkutilliinissaa, kiisalu sulisartorisat tulluurtunik sulinerminnik atugassaqaqartitaanerannik qulakkeerisunik piffissat qasuersaarfissat aamma ulloq unnuarlu sulinnigiffeqarnerit pillugit aalajangersakkanik aalajangersaasoqarnissaaq, aammalu inuusuttunut 18-it inorlugit ukiulinnut tulluurtumik atuarnerminnik paasisaqaqartitseqataasunik immikkut ittumik piffissat qasuersaarfissat aamma ulloq unnuarlu sulinnigiffeqarnerit pillugit aalajangersakkanik aalajangersaasoqassasoq. Aammattaaq suliffiusuni isumannaallisaasoqarfimmik najoqqutassalimmik aaqqissuussinissaaq pillugu inatsisissatut siunnersuutit aalajangersakkanik imaqaqarnera, kiisalu sullivinni avatangiisinik isumannaatsunik peqqinnartunillu iliuuseqarnermut suliffeqarnermi susassaqaqatigiit sunniuteqaqataasinnaanissaannik ilaatigut siunertaqartumik Sullivinni avatangiisinut siunnersuisooqatigiit pillugit aalajangersakkat AK/SIK-p iluarisimaaralugit isumaqaqarfigaat.*

*Immikkoortoqarfimmut pineqartumut, imaluunniit suliassaqaqarfiusumut pineqartumut isumannaallisaanermik suleqatigiissitaliortoqassanera, kiisalu immikkoortoqarfinnut ataasiakkaanut tamanut isumannaallisaanermut sinniisussamik toqqaasoqassanera, imaluunniit isumannaallisaanermik suleqatigiissitani sulianik aqutsisoqarfittut suliqaqarfiusut ataasiakkaat tamarmik ilanngunnissaannik inatsisissatut siunnersuummi § 6-imi takuneqarsinnaavoq. Tamatumunnga atatillugu ”immikkoortortaqaqarfik”, ”suliassaqaqarfik”, kiisalu ”sulianut aqutsisoq” qanoq isumaqarneri inatsisaasumut nassuiaatini erseqqissaavigineqassasut AK siunnersuuteqassaaq, taamaalilluni inatsisaasut piviusuni malittarineqarsinnaassammata.”*

Siunnersuummi § 6-ip manna tikillugu atuuttumi Kalaallit Nunaanni sullivinni avatangiisit pillugit inatsimmi § 5-ip oqaasertai ingerlateqqippai. Siunnersuutikkut manna tikillugu

eqqartuussisaaseq periuserlu taamaakkallartussamik allannortinnagit ingerlateqqinneqarnissaat kissaatigineqarput. Taamaalillutik tigusinissap tungaanut isumannaallisaasoqarfimmut tunngatillugu malittarisassiat atuuttut, ukiorpassuit ingerlaneranni tamatumunnga tunngasutut ineriartortitaasimasut suliassa qarfiup tiguneqarnerata kingornatigut atuuttuuneri nanginneqassapput.

Tamakku saniatigut manna tikillugu periutsimut naapertuuttuusutut aalajangersakkap paasineqassanera oqaatigineqarsinnaavoq, taamaattumillu tamatumunnga tunngaveqarluni suliffeqarfimmut ataasiakkaanut naleqqiullugu ”suliassa qarfik” ilaalu ilanngullugit qanoq paasinnittoqassaneranut suliffeqarfiit ataasiakkaat paasisaqarluarsinnaasariaqarlutik.

Kiisalu pineqartup toqqammavissatut aalajangersagaanera eqqaasineqassaaq, taanna Naalackersuisunit atuutsinneqartutut malittarisassiat itisiliiffigineqartut tunngavigalugit, aammalu Sullivinnik Nakkutilliisoqarfimmit ilitersuineq tunngavigalugu immersorniarneqartoq. Suliffeqarfiit ilusaat ima amerlatigaat inatsisaasuni ”suliassa qarfik” ilaalu ilanngullugit qanoq isigineqassanerat tamakkiisumik aalajangersaasoqarsinnaanani.

Oqaatigisaq akuerineqarpoq, taamaalilluni § 6-imut nassuiaatini ”immikkoortorta qarfik”, ”suliassa qarfik”, kiisalu ”sulianut aqutsisoq” nalinginnarmik nassuiarneqarnerat ilassuteqarfigalugu itisilerniarneqarsimalluni.

Kingusinnerusukkut allannuutilinni Sullivinnik Nakkutilliisoqarfiup nalunaarutaa nr. 1346, 15. december 2005-imeersumi – Kalaallit Nunaanni suliffeqarfimmi isumannaallisaanermik peqqinnissamillu suliaraqneq pillugu nalunaarummi ilaatigut qaqugukkut isumannaallisaanermik suleqatigiissitaliortoqassanera pillugu erseqqinnerusunik malittarisassiat aalajangersarneqarput. Aamma Isumannaallisaanermik suleqatigiit aamma isumannaallisaanermut sinniisut pillugit AT-mik ilitersuut GL.6.2-mi, september 2006-imeersumi qaqugukkut isumannaallisaanermik suleqatigiit pilersinneqassanerat erseqqinnerusumik nassuiarneqarpoq. AT-mik ilitersuummi immikkoortoq 9-mi ilaatigut ”immikkoortorta qarfik”, ”suliassa qarfik”, kiisalu ”sulianut aqutsisoq” qanoq paasineqassanerat itisilernearput. AT-mik ilitersuummi immikkoortoq 2-mi ”sulianut aqutsisoq” nassuiarneqarpoq. Illumi tassani allaffimmi imaluunnit aqutsinermik suliaqarnertut immikkut ittunik malittarisassa qarpoq, allaffeqarfigisami tassani aqutsinermik suliaraqneq pissappat isumannaallisaanermik suleqatigiit inuit 100-t tikillugit sinniisuuffiginissaat Sullivinnik Nakkutilliisoqarfik nalinginnarmik akuerisussaasaraluarlugit.

Nalornisoqarnerni suliffeqarfiit manna tikillugu pisartutulli ilitersorneqarnissaminnut Sullivinnik Nakkutilliisoqarfik saaffigisinnaavaat.



Atorfillit Kattuffiat (AK) aamma Sulineramik Inuussutissarsiuteqartut Kattuffiat (SIK) oqarput: *”Siunnersuummi § 8 imm. 3-mi allassimavoq “Isumannaallisaanermut sulisut suliassai, suliffeqarfiup sulisullu akornanni isumaqatigiissuteqarneq malillugu avatangiisinut apeqqutit suliffeqarfimmut toqqaannartumik attuumassuteqartut ilaatilerlugit, annertusitinneqarsinnaapput”. Paasinarnersullugu aalajangersakkap taassuma allatut oqaasertalernissaa “ AK/SIK-p siunnersuutigissavaat, imatut oqaasertalersuineq atorneqarsinnaalluni: “Suliffeqarfiup sulisullu akornanni isumaqatigiissuteqarneq malillugu isumannaallisaanermut sulisut suliassai avatangiisinut apeqqutinut, suliffeqarfimmi isumannaallisaanermi aamma peqqinnissamut pissutsinut toqqaannartumik sunniuteqartunut imaluunniit toqqaannartumik sunniuteqarsinnaasunut annertusisinneqarsinnaapput.”*

Suliffeqarfiit ilaanni isumannaallisaasoqarfimmi sulisuusut sullivinni avatangiisinik suliaraqneq avatangiisinut apeqqutinik suliqarnermik kattussuisinnaanissaat pillugu kissaateqartoqartoq takuneqarsimavoq. Suliffeqarfimmi sullivinni avatangiisinik apeqqutinik isumannaallisaasoqarfik iluarsinissaminut periarfissaqartillugu tamatuma isumannaallisaasoqarfiup suliassai pillugit tunngavigisanik naapertuuttuunera aalajangersakkap aalajangersaavigaa, taamaalillutik naggatit aappaanni Naalakkersuisut pisariaqartitaalissappat qulakkeerinninnissamut erseqqinnerusunik malittarisassianik aalajangersaanissamut pisussaaffilerneqassallutik. Avatangiisinik illersuineq pillugu apeqqutit suliffeqarfimmut toqqaannartumik pingaaruteqassapput, taamaattorli isumannaallisaanermut peqqinnissamullu apeqqutinut toqqaannartumik sunniuteqartariaqaratik.

Atorfillit Kattuffiat (AK) aamma Sulineramik Inuussutissarsiuteqartut Kattuffiat (SIK) oqarput: *”Siunnersuummi § 46, imm. 2-mi allassimavoq piffissaq qasuersaarfiusussaq nalunaaquttap akunnerinut 8-nut sivikillisinneqarsinnaasoq ”suliffeqarfimmi eqimattakkaartumik ingerlatsiviusumik suliffiusuni eqimattat nikinneranni, eqimattat siullit sulinerisa naammassinerata aammalu eqimattat aappaasa sulinerisa aallartinnerisa akornanni ulluinnarni imaluunniit sapaatit akunnikkaartumik qasuersaarfiusussaq naammassineqarsinnaasimangippat”. Inatsisissatut siunnersuummut nassuiaatini “eqimattat nikinnerat” aamma “eqimattakkaartumik ingerlatsiviusoq” qanoq isumaqarnerisa nassuiarnissaat AK/SIK-p siunnersuutigissavaa, nalunaaquttap akunnerini 24-ni piffissap iluani minnerpaamik nalunaaquttap akunnerinik tulleriissunik 11-nik qasuersaarfeqartassaneranut aallaaviusumut naleqqiullugu tamanna pingaaruteqarnera pissutigalugu.”*

§ 46, imm. 2 Kalaallit Nunaanni sullivinni avatangiisit pillugit inatsimmi § 40, imm. 2-mi oqaasertaasunik nangitsivoq. Siunnersuutikkut manna tikillugu eqqartuussisaatsip allannortinnagu nanginneqarnissaa kissaatigineqarpoq. Taamaalilluni manna tikillugu eqqartuussisaatsimik aalajangersagaq aqputigalugu ingerlatitseqqittoqarpoq.

Kalaallit Nunaanni piffissaq qasuersarfissaq aamma ulloq unnuarlu sulinngiffeqarneq pillugu Sullivinnik Nakkutilliisoqarfiup nalunaarutaa nr. 32, 23. januar 2006-imeersumi, ilanngussaq 1-imi aalajangersakkami suut ilaasinnaanerat itisilerneqarput.

Atorfillit Kattuffiat (AK) aamma Sulinermik Inuussutissarsiuteqartut Kattuffiat (SIK) oqarput: *”Usilersuineq aamma usingiaaneq, aalajangersimasuunngitsumik sulisunit pingaartumik ingerlanneqartoq nalunaaquttap akunnerini 11-nik malittarisassiamut ilaanngitsoq siunnersuummi § 46, imm. 3-mi takuneqarsinnaavoq. Taamatulli sulisartut nalunaaquttap akunnerini 11-nik malittarisassiamut ilaasuunnginneri AK/SIK-p naammaginaruutinnigilaat, taamaattumillu aalajangersakkap taassuma inatsisissatut siunnersuummit peerneqarnissaa siunnersuutigissallugu. Taamaattorli aalajangersakkap attanneqarnissaa Naalackersuisut aamma Inatsisartut kissaatigissappassuk AK/SIK-p siunnersuutigissavaa siunnersuummi § 46, imm. 3, naggatit aappaat allatut oqaasertalersorneqassasoq, taamaalilluni aalajangersimasuunngitsumik sulisuusunut taakkununga minnerpaamik piffissamik qasuersarfissaq pillugu Naalackersuisut erseqqinnerusunik malittarisassianik aalajangersaassanerat takuneqarsinnaassalluni. Tamannalu sulisuusut taakku soorunami naammaginarumik piffissamik qasuersarfissamik piunasaqarnissaat isigalugu.”*

Apeqqutip suliffeqarnermi susassaqaqatigiinnit iluarsiviginissaanut periarfissaqassamat aalajangersagaq tassaassanngilaq “pisussaqaarfik”, tassaassallunilu aalajangersagaq “pisinnaasaqaarfik”. Manna tikillugu piffissaq qasuersarfissaq pillugu periusaasup nanginneqarnissaanik Naalackersuisut siunnersuutikkut kissateqarput.

Aalajangersagaq Kalaallit Nunaanni piffissaq qasuersarfissaq aamma ulloq unnuarlu sulinngiffeqarneq pillugu Sullivinnik Nakkutilliisoqarfiup nalunaarutaa nr. 32, 23. januar 2006-imeersumi itisilerneqarpoq. Nalunaarummi § 9-mi usilersuinerni usingiaanernillu aalajangersimasuunngitsumik sulisoqarnermut taamatut sulinerni qaangiuttoortoqartillugu sulisartut pineqartut suliffeqarteqqilerneris sioqqullugit qaangiuttoornerup naanerani minnerpaamik nalunaaquttap akunnerini qulingiluani ataatsimoortumik qasuersartoqassasoq allassimavoq.

Atorfillit Kattuffiat (AK) aamma Sulinermik Inuussutissarsiuteqartut Kattuffiat (SIK) oqarput: *”Siunnersuummi § 67 iluaquteqartumik allatut oqaasertalerneqarsinnaasoq AK/SIK isumaqarput, taamaalilluni Naalackersuisut ataanni taaguutilimmik Sullivinnik Nakkutilliisoqarfimmik kiffaannngissuseqartumik aqutsisoqarfimmik pilersitsisoqassanera toqqaannartumik takuneqarsinnaassalluni, ingammik inatsit manna Naalackersuisut ataanni aqutsisoqarfittut ittumik kiffaannngissuseqartitamik Sullivinnik Nakkutilliisoqarfimmik*

*tassunga ilaatitatut pilersitsinertalimmik sullivinni avatangiisinik suliassa qarfiup tiguneqarneranik kinguneqartuunera isigalugu. Taamatut aalajangersagaliap oqaasertalernera imatut issinnaavoq: "Naalackersuisut Kalaallit Nunaanni sullivinni avatangiisinut apeqqutinut tunngatillugu allaffissornikkut oqartussaasuni qullersaapput. Imm. 2: Naalackersuisut ataanni aqutsisoqarfik taaguuteqartoq, Sullivinnik Nakkutilliisoqarfik, pilersinneqassaaq. Imm. 3. Sullivinnik Nakkutilliisoqarfiup Kalaallit nunaanni najukkani immikkoortorta qarfiit amerlassusissaat aamma suliassat immikkoortorta qarfiit akornanni agguagaanerat, aalajangersassavai."*

Oqaaseqaat akuerineqarpoq, siunnersuutigisatullu oqaaseqaammut naapertuutsilerlugu § 67 allanngortinneqarpoq. Tamanna aamma Nunataasumi sullivinni avatangiisinik suliassa qarfimmik Kalaallit Nunaata tigusinera pillugu suleqatigiissitanit Nalunaarusiami inassutaasunut naapertuuppoq.

Atorfillit Kattuffiat (AK) aamma Sulinerimik Inuussutissarsiuteqartut Kattuffiat (SIK) oqarput: *"Siunnersuummi § 70-imi takuneqarsinnaavoq Sullivinnik Nakkutilliisoqarfiup suliassai erseqqinnerusumik allanneqartumik annertussusilimmik pisortani oqartussaasumut allamut imaluunniit sullissivimmumt namminersortumut inissinneqassanerat Naalackersuisut aalajangersinnaagaat. Sullivinnik Nakkutilliisoqarfiup suliassai sullissivinnumt namminersortumut inissinneqarsinnaanerat AK/SIK-p assut nangaanartoqartippai, taamaattumillu periarfissap taassuma inatsisissatut siunnersuummit peerneqarnissaa siunnersuutigineqarpoq."*

Siunnersuummi § 70 manna tikillugu atuuttut Kalaallit Nunaanni sullivinni avatangiisit pillugit inatsimmi § 57-ip oqaasertanik nangitsivoq. Manna tikillugu eqqartuussisaatsip allanngortinnagu ingerlateqqinnissaa siunnersuutikkut kissaatigineqarpoq.

Pisortani oqartussaasumut allamut imaluunniit sullissivimmumt namminersortumut suliassanik inissiisoqarsinnaanerup siunertaa tassaavoq teknikkikkut misissuinerup oqilisaavigalugulu eqaallisarnissaa, tassaasinnaasunik teknikkikkut atortorissaarutinik imaluunniit maskiinanik teknikkimut tunngatillugu nakkutilliinerit. Aalajangersakkamut iluaqutissartaq tassaavoq suliassa qarfimmi immikkut illuinnartuni suliassanut immikkut sulianik sammisaqassutsimik atugaqarsinnaaneq.

Suliassanik inissiisarnerup tunngavigisaa tassaavoq suliarisat naammaginatummik iluseqartummik iluarsiiviginissaannut Sullivinnik Nakkutilliisoqarfiup suli akisussaasutut oqartussaasuunera.

Atorfillit Kattuffiat (AK) aamma Sulinermik Inuussutissarsiuqartut Kattuffiat (SIK) oqarput: ”Siunnersuummi § 81-imi takuneqarsinnaavoq Sullivinnik Nakkutilliisoqarfimmit aalajangiussa Naalakkersuisunut maalaarutigineqarsinnaasoq. Inatsisissatut siunnersuummut nassuiaatit malillugit piviusutigut tamanna tassaassaaq Inuussutissarsiornermut Suliffeqarnermullu Naalakkersuisoqarfik, Naalakkersuisulli isumaliutigisimanerlugu Atuisartoqarnermut Unammilleqatigiinnermullu Aqutsisoqarfimmut maalaaruteqartarfiit inissinnissaasa tulluartuussanerat, tassani naalakkersuisoqarfiup aamma Sullivinnik Nakkutilliisoqarfiup akornanni kiffaanngissuseqarneq malunnarsarniarlugu?”

Tusarniaavigineqartup oqaaseqaataa siunnersuummi malittarineqarpoq. Sullivinnik Nakkutilliisoqarfik pillugu maalaarutit kiffaanngissuseqartumit Sullivinni avatangiisit pillugit naammagittaalliortarfimmit suliarineqartassanerat siunnersuutip tusarniaassutaaneraniilli Inatsisartut inatsisaannut ilassutaasimavoq. Taamaattumik maalaarutinik suliassani Naalakkersuisut aalajangiisarnerat pillugu aalajangersagaq siunnersuummit peerneqarpoq.

KANUKOKA-p oqaatigaa: ”Sullivimmi avatangiisinut suliassaqaarfiup angerlaannissaanut kissaateqarneq KANUKOKA-mit tapersorsorneqarpoq, tamatumali kingunerissanngilaa kommunit aningaasaqarnikkut qaavatigut artukkerneqassasut, minnerunngitsumik KANUKOKA-mit ataani allaqqasut isumaliutigineqarput.

Isumannaallisaanermut kattuffik, sullivimmi avatangiisinut ilinniartitaaneq, suliffimmik naliliineq, sulisitsisup pisussaaffii, inuusuttup sulinera, ullormukkaartumik aammalu sapaatip akunnikkaartumik qasuersaarnernut minnerpaamik malittarisassat nakorsamillu misissortittarnerit sullivimmi avatangiisinut inatsit malillugu malittarisassatut aalajangersakkat aalajangersarneqartarput.

Inatsisissatut piumasaqaatit nutaat aningaasaqarnikkut nassaqaartitsissasut naatsorsuutigineqarput. Kommunini Sulisoqarnermut Immikkoortortat nukittorsarneqassapput imaluunniit kommunimi suliassaqaarfimmik tamatuminnga immikkoortortaq akisussaasoq nukittorsarneqassaaq. Matumani pineqarput sulisunik amerliliineq imaluunniit suliassaqaarfimmi tassani kommunip sulisui paasisimasanik katersinissaminnik pisariaqaartitsisussaasut, ilaatigut pikkorissarnikkut imaluunniit ingerlariaqqiffiusumik ilinniagaqarnikkut. Taamaaliortoqassaarlugu sullivimmi avatangiisinut inatsit malillugu piumasaqaataasoq isumannaallisaanermut ataatsimiititaliortoqarnissaanut isumannaallisaanermullu suleqatigiissitaliortoqarnissaanut sulisitsisut sakkussaqartinneqarniassammata.”

Sullivinni avatangiisit pillugit Inatsisartut inatsisaata siunnersuutigineqartup kingunerisaanik sulisitsisunut piumasagaatit maannamut atuuttut, annertunerpaatigut allannguuteqaratik atuutiinnassapput. Taamaalilluni tusarniaaffigineqartup allanneratut, piumasagaatit nutaat tassani pineqanngillat, kisianni maannamut inatsisitigut inissisimanerup ingerlaannarnissaa tassani pineqarpoq. Tamanna aamma assersuutitut tusarniaaffigineqartup isumannaallisaanerup aaqqissuussaaneranut, sullivinni avatangiisinut ilinniartitaanermut, sullivimmi nalilersuisarnermut, sulisitsisup pisussaaffiitut, inuusuttunik sulisoqarnermut, ullormut aamma sapaatip akunnikkaartumik piffissanut qasuersaarfiusussanut tunngatillugu maleruagassani minnerpaaffissanut aamma nakorsamit misissortittarnermut piumasagaatit pillugit erseqqissagaannut, tunngatillugu atuuppoq. Suliassa qarfinni taakkunani tamaginni inatsisitigut inissisimaneq, akisussaaffigilerlugu tiguserup kingorna, akisussaaffigilerlugu tiguserup siornatigutuulli, iinnassaaq.

Taamaalilluni akisussaaffigilerlugu tiguserup sioqqullugu isumannaallisaanerup suleqatigiit aamma isumannaallisaanerup ataatsimiititaliat inerisarneqarnissaat pillugu piumasagaateqartoqarpoq.

*KANUKOKA-p oqaatigaa: "Nuna tamakkerlugu kommunit kattuffianit uppernarsarneqarpoq Kalaallit Nunaanni sullivimmi avatangiisit pillugit Folketingimi inatsit atuuttoq annerusumik maliinnarlugu suliaasoq. Suliassa qarfiup angerlaanneqarnissaani qulartoqalernissaa pinngitsoortinniarlugu allaffissornerujussuarmillu aamma pinngitsoortinniarlugu tamanna KANUKOKA-mit isumatusaartutut isigineqarpoq. Taamaattorli KANUKOKA-p kissaatigissagaluarpa, maannakkut malittarisassat Inatsisartut inatsisissaatigut ilusilersorlugit ingerlateqqinniarneqarneri inatsisissatut siunnersuummi ersarinnerusumik oqaaseqaasiorfigineqarsimassagaluartut."*

Inatsisitigut inissisimanerup maannamut atuuttup ingerlateqqinnissaanut aallaaviusooq, tusarniaaffigineqartup oqaatigisaatut, tassaavoq, ikaarsaernerup sulisitsisunut, innuttaasunut allaffissornermullu kalluarneqartussanut, oqinnerutinnissaa. Maleruagassanik maannamut atuuttunik ingerlatitseqqittoqartoq, nassuiaatini nalinginnaasuni arlaleriarluni nassuiarneqarpoq, ilaatigut immikkoortoq 1. Aallaqqaasiut, Tunngaviusut pillugit aamma immikkoortoq 1. Aallaqqaasiut, Nassuiaassutit pillugit. Tusarniaaffigineqartup oqaaseqaatai tunngavigalugit nassuiaassutit immikkoortoq 1. Aallaqqaasiut, Tunngaviusut pillugit, erseqqissarniarneqarput.

*KANUKOKA-p oqaatigaa: "Tamatum kingorna KANUKOKA-mit oqaatigineqassaaq suliassa qarfik namminersulernerup inatsit naapertorlugu aatsaat tiguneqassasoq, aammalu tiguserup ullua danskit ministeriat susassaartoq isumaqatigiinniaqatigineqassasoq. Tamatumunnga atatillugu angerlaassinissamut sulinissaaq pillugu danskit tungaanniit*

*piumasaqaateqartoqarsinnaavoq, suliassa qarfillu pillugu kalaallit inatsisaannut pisariaqartumik pingaartitsisumik. Taamaattumik KANUKOKA-mit isumaqartoqarpoq tigusinissamut piffissap tigusinissallu ingerlanneqarnissaanut piunasaqaataasutut attuumassuteqartut danskit naalagaaffianit isumaqatigiinniutigineqareerpata inatsisissatut siunnersuutip aatsaat saqqummiunneqarnissaa pissusissamisoornerpaassagaluartoq.”*

Isumaqatiginninniarnert namminersornermut inatsimmi taaneqartut aallartinneqareerput, tamannalu akisussaaffigilerlugu tigusinissaq pillugu nassuiaammik inerineqarpoq, taanna kalaallit aamma danskit oqartussaasuinit ataatsimoorullugu suliarineqarluni: Nunami sullivinni avatangiisinut suliassa qarfiup Kalaallit Nunaanni akisussaaffigilerlugu tiguneqarnissaa pillugu suleqatigiissitaliamit nassuiaat. Nassuiaammi ilaatigut allassimavoq alloriarneq tulleg tassassasoq Kalaallit Nunaanni sullivinni avatangiisit pillugit inatsit aallaavigalugu sullivinni avatangiisit pillugit Inatsisartut inatsisaannik Inatsisartunut saqqummiussinissaq kiisalu akuersinissaq pillugu aalajangiiffigisassatut siunnersuummik saqqummiussinissaq. Tusarniaaffigineqartup eqqortumik oqaatigisaatut, piareersarluni suliaqarneq namminersornermut inatsimmut naapertuuttumik ingerlanneqartussaavoq. Piareersaalluni suliaqarneq taanna matuma siuliani nassuiarneqartutut ingerlanneqarpoq, aammalu siunnersuutip matuma saqqummiunneqarnera, akisussaaffigilerlugu tigusinissamut pilersaarummut, Namminersorlutik Oqartussat aamma naalagaaffimi oqartussaasut akornanni isumaqatiginninniarnert malillugit suliarineqartumut, naapertuulluinnarpoq.

*KANUKOKA-p § 1-imut tunngatillugu oqaatigaa: ”§ 1-imi allaqqavoq ”Inatsisartut inatsisaanni pilersinniarneqarput, sullivinni avatangiisit isumannaatsut peqqinnartullu, sukkulluunniit inuiaqatigiinni teknikkikkut inooqatigiinnikkullu ineriartornermut naapertuuttut”.*

*Tamatumunnga atatillugu kommunit aningaasatigut assigiinngitsorujussuarmik inissisimanagerat erseqqissartikkusunnarpoq. Tamanna ima paasisassaanerpa, kommunimi missingersuutinik pisussaaffeqarnikkut procentit naapertorlugit sulliviup avatangiisaasa ineriartortinnissaanut aalajangerneqareersinnaasut/aalajangereerseqassasut?”*

Inatsisartut inatsisaanni maannamut inatsisitigut inissisimaneq ingerlateqqinneqarpoq. Inatsisartut inatsisaanni § 1-imi taamaalilluni maannamut inatsisitigut inissisimaneq, Kalaallit Nunaanni sullivinni avatangiisit pillugit inatsimmi § 1-imi oqariartuutigineqartoq, ingerlateqqinneqarpoq. Taamaalilluni inatsisitigut inissisimaneq maannamut pisartutut ippoq.

§ 1 procentinngorlugu missingersuusiornissamut pisussaaffeqarneq pillugu piunasaqaammik imaqaanngilaq.

KANUKOKA-p § 2, imm. 4-mut oqaatigaa: ”Aalajangersakkamuttaaq oqaaseqaatini takuneqarsinnaavoq sullivimmi avatangiisinut inatsimmi atuuttumi aalajangersakkanut assingusut ingerlateqqinneqarneri. Maannamut illersornissamut suliassa qarfik Namminersorlutik Oqartussanut tunniunneqarsinnaanngikkallarpoq, taamaattumik Kalaallit Nunaanni sakkutooqarnermut tunngasuni sullivimmi avatangiisit pillugit Naalakkersuisut aalajangiisinaanerat tunniunneqassanersoq KANUKOKA-mit nalornissutigineqarpoq.”

Aalajangersagaq sulisunut toqqaannartumik sakkutuut ataanniingitsunut, taamaakkaluartorli sakkutuut suliassa qarfiisa sanaartugaataasalu iluanni sulisunut, taamaattumillu Inatsisartut inatsisaanni pineqartunut ilaatinneqartariaqanngitsunut, maleruagassat eqqarsaatigalugit, pisariaqarsinnaapput. § 2, imm. 4-mut nassuiaatit tusarniaaffigineqartup oqaaseqaataa tunngavigalugu itisilerneqarput.

KANUKOKA-p § 7, imm. 2-mut oqaatigaa: ”Isumannaallisaanermut ataatsimiititaliaq pilersaarusiortuussaaq, aqutsisuussaaq, siunersuissaaq ilisimatitsisartuussallunilu kiisalu nakkutigissallugit ...

*Sullivimmi avatangiisinut inatsimmut nutaamut atatillugu sumut killeqartoqarsinnaanersoq siunnersuisoqarnissaanik kissaateqartoqarpoq. Matumani § 8-mut tunngatitsisoqarsinnaavoq.*

*Isumannaallisaanermut ataatsimiititaliami sulinermi ”aqutsineq misissuinerlu” aaqqiagiinngisitsinermik kinguneqarsinnaavoq. Assersuut: Isumannaallisaanermut tunngasunik amigaateqartoq paasineqarpat. Isumannaallisaanermut ataatsimiititaliaq qanoq piumasagaateqarsinnaava? Imaassinnaasoq missingersuusiortoqarsimanngitsoq imaluunniit suliassa qarfik pingaarneq allaanerusumik tulleriissarneqartoq, kingunerisaanillu isumannaallisaanermut ataatsimiititaliap piumasagaatai akuerineqarsinnaanatik (ingerlaannaq). Assinganik suliffeqarfimmi peqqinnartumik sullivimmi avatangiiseqarneq eqqarsaatigalugu tamakkiisumik iluarsaanneqarsimanngitsoq eqqarsaatigalugu aamma taamatut pisoqarsinnaavoq.”*

Inatsisartut inatsisaanni maannamut inatsisitigut inissisimaneq ingerlatiinnarneqarpoq. Taamaalilluni maannamut inatsisitigut inissisimaneq, Kalaallit Nunaanni sullivinni avatangiisit pillugit inatsimmi § 6, imm. 2-imi oqariartuutigineqartoq, Inatsisartut inatsisaanni § 7, imm. 2-imi ingerlatiinnarneqarpoq. Inatsisitigut inissisimaneq taamaalilluni maannamut pisartut assigaat, aammalu isumannaallisaanermut ataatsimiititaliap aaqqissuussaana suliassaalu maannamut pisartut assigaat.

Isumannaallisaanermut ataatsimiititaliaq isumaqarpat pissutsit sullivinni avatangiisit pillugit Inatsisartut inatsisaanni piumasagaatinut akerliusut, isumannaallisaanermut ataatsimiititaliaq tamanna pillugu sulisitsisumut saaffiginnissinnaavoq. Taamatuttaaqaq ataatsimiititaliap suliassaannut tunngatillugu aamma isumannaallisaaffigineqanngitsunut paasineqartunut tunngatillugu nalorninermi, isumannaallisaanermut ataatsimiititaliaq Sullivinnik Nakkutilliisoqarfimmut saaffiginnissinnaavoq. Sullivinnik Nakkutilliisoqarfiup susassaqaqatigiit ilitersorsinnaavai, nakkutilliisinnaalluni aammalu pisariaqarpat peqqussuteqarsinnaalluni.

KANUKOKA-p § 8, imm. 4-mut tunngatillugu oqaatigaa: *”Aalajangersagaq assut paasiuminaappoq.”*

Inatsisartut inatsisaanni maannamut inatsisitigut inissisimaneq ingerlatiinnarneqarpoq. Taamaalilluni maannamut inatsisitigut inissisimaneq, Kalaallit Nunaanni sullivinni avatangiisit pillugit inatsimmi § 7, imm. 4-imi oqariartuutigineqartoq, Inatsisartut inatsisaanni § 8, imm. 4-imi ingerlatiinnarneqarpoq. Inatsisitigut inissisimaneq taamaalilluni maannamut pisartutut allannguuteqanngilaq.

Atugassarititaasut aalajangersimasut atuutsillugit isumannaallisaanermut aaqqissuussaaneermut §§ 6-imi aamma 7-imi piumasagaatit saneqqunnissaannut, § 8, imm. 4 periarfissiivoq. Piumasagaatit saneqqunneqarpata, tamanna sulisitsisut, sulisartut kattuffii, sulisitsisut kattuffii akuutillugit kiisalu atugassarititaasut Naalakkersuisunit aalajangersarneqartut malillugit, pissasoq, § 8, imm. 4-imi qulakkeerneqarpoq.

KANUKOKA-p § 9-mut tunngatillugu oqaatigaa: *”§ 9-tut siunnersuutigineqartoq KANUKOKA-mit assut naammagisimaarneqarpoq. Sinnisussat naligalugit piffissamik pisariaqartinneqartumik tunniussisoqarnissaa kissaatiginarpoq. Taamaattorli isumannaallisaanermut ataatsimiititaliami il. il. ilaasortat toqqakkanut tapiissuteqartitsisoqartassanngitsoq pillugu tunngavioersutut atuuttut KANUKOKA-mit attanneqarumapput.”*

Inatsisartut inatsisaanni maannamut inatsisitigut inissisimaneq ingerlatiinnarneqarpoq. Taamaalilluni maannamut inatsisitigut inissisimaneq Kalaallit Nunaanni sullivinni avatangiisit pillugit inatsimmi § 8-imi oqariartuutigineqartoq, Inatsisartut inatsisaanni § 9-mi ingerlatiinnarneqarpoq. Inatsisitigut inissisimaneq taamaalilluni maannamut pisartutut allannguuteqanngilaq. Tapit pillugit maleruagassanik nutaanik imaluunniit tunngaviusussanik, siunnersuuteqartoqanngilaq.



KANUKOKA-p § 10-mut tunngatillugu oqaatigaa: ” *Pisariaqanngitsumik allaffissorneq pinngitsoortinneqartassasoq kissaatiginarpoq. Isumannaallisaanermut sinniisuusup suliassaraa pingaarnertut atorfitsik iluaqutigissallugu. Isumannaallisaaneq pillugu pikkorissaqataagunik nalinginnaasumik suliffimmi pissasoq kissaatiginarpoq. Pikkorissarneq suliffeqarfiginngisaminni illoqarfimmi allami ingerlanneqassappat kommuni sulisitsisutut aningaasartuuteqassanngitsoq kissaatigineqarpoq. Matumani § 10-mi imm. 2-mut innersuussisoqarpoq.* ”

Maannamut inatsisitigut inissisimaneq, Kalaallit Nunaanni sullivinni avatangiisit pillugit inatsimmi § 9-imi oqariartuutigineqartoq, Inatsisartut inatsisaanni § 10-imi ingerlatiinnarneqarpoq.

Sulisitsisut maannamut pisartutut, isumannaallisaanermut aaqjissuussami ilaasortat ilinniartitaanerannut aningaasartuutit matussuserittassavaat, takuuk § 10, imm. 2. Taamaalilluni siunnersuummi sullivinni avatangiisinut ilinniartitaanerup matussusernissaanut tapiissutinut ukiumut 0,5 mio. koruunit immikkoortinneqarput.

KANUKOKA-p § 13-imut tunngatillugu oqaatigaa: ” *APV-t allaganngorlugit suliarisarnissaannut tunngatillugu KANUKOKA-mit oqaatigineqassaaq: APV-t elektronikkikkut, abonementikkut assigisaatigullu assigiinngitsunik suliarineqannginnissaat anguniarlugu APV-nik assigiikannersunik misissuinissaq kissaatiginarpoq, soorlu kommunini assigiinngitsuni meeqqat atuarfiini, meeqquerivinni, utoqqaat illuini. Imaanngilaq pisussaaffimmik kissaateqartoqartoq, taamaattorli kommunit assigiimmik systemeqarnissaat periarfissaasariaqarmat. Soorlu ERP-mik suliniummut assingulaartut eqqarsaatigineqarput, ataatsimut aningaasartuutit minnerpaaffianiitinniarlugit, taamaaginnanngitsorli aammali oqartussat akornanni sulisutigit, sulisut amerlassusaatigit assigisaatigullu pitsaasumik inissisimalernissaq anguniarlugu.* ”

Maannamut inatsisitigut inissisimaneq, Kalaallit Nunaanni sullivinni avatangiisit pillugit inatsimmi § 11 a-imi oqaatigineqartoq, Inatsisartut inatsisaanni § 13-imi ingerlatiinnarneqarpoq.

Aalajangersagaq Sullivinnik Nakkutilliisoqarfiup ilitersuutaani GL.4.1, december 2007-imeersumi itisilerneqarpoq. Periaaseq APV-ip ingerlanneqarnerani malinneqartussaq, suliffeqarfiup nammineerluni toqqarsinnaavaa. Kiffaanngissuseqartumik toqqaasinnaanermi, periaaseq suliffeqarfiup aaqjissuussaananeranut, kulturianut suleqatigiinnermullu ileqqinut naleqqussagaasoq, nassaarineqarsinnaalissaaq.

Tamatuma saniatigut sullivinni avatangiisini aqutissiuussisunik suliassa qarfinnut assigiinngitsunut tunngatinneqartunik suliaqartoqarpoq, taakkunani sullivimmi nalilersuinerup ilusilersorneqarnissaannut ilitersuutit nassaarineqarsinnaallutik. Kiisalu sullivimmi nalilersuineq pisuni ataasiakkaani qanoq ilusilerneqarsinnaanersoq pillugu ilitersortinniarlutik, suliffeqarfiit Sullivinnik Nakkutilliisoqarfimmut saaffiginnaapput.

*KANUKOKA-p § 16-imut tunngatillugu oqaatigaa: "Sullivimmi avatangiisit pillugit inatsimmi aalajangersakkat atuuttumiinngillat, malittarisassatullu § 77, imm. 2-tut siunnersuutigineqartup saniatigut aalajangersagaq taama ittoq qanoq pisariaqartiginersoq KANUKOKA-mit nalornissutigineqarpoq. KANUKOKA-mittaaq pingaartinneqarpoq nalinginnaasumik inatsisitigut qulakkiigaasumik immikkullu pisoqartillugu tunngaviit malillugit maleruagassallu aalajangersimasoqartinnagu, § 16, imm. 1-imi nassuiaatigineqartutut inissinnermi sulisup suliffini qimassinnaavaa. Sullissisup taarsiinissamut akisussaaffia taarsiinnermi malittarisassat nalinginnaasut malillugit tunniunneqarsinnaapput."*

Kalaallit Nunaanni sullivinni avatangiisit pillugit inatsisip allanngortinneqarnissaa pillugu aamma Kalaallit Nunaanni sulitilluni ajoqusernernerut isumannaarineq pillugu inatsisip allanngortinneqarnissaa pillugu inatsisissatut siunnersuummut oqaaseqaateqarnissaaq pillugu aalajangiiffigisassatut siunnersuut, Inatsisartut UKA2016-imi imm. 115-imut tunngatillugu akuerat. Inatsisissatut siunnersuuteqarnermi aalajangersagaq siunnersuummi § 16 imm. 1-imut naapertuuttoq, Kalaallit Nunaanni sullivinni avatangiisit pillugit inatsimmi atuuttumi ilanngunneqassaaq.

Aalajangersagaq sulisartut inatsisitigut inissisimanerisa, aammalu sulisitsisut pisunut navianartunut atatillugu pisussaaffiisa erseqqissarnissaannut iluaqutaassaaq.

*KANUKOKA-p § 21-mut tunngatillugu oqaatigaa: "Matumani § 16-imut oqaaseqaatit innersuussutigineqarput § 21-mi systemit assigiikannersumik suliarineqarnissaannut tunngasut. Ullumikkut atorfillit amerlassusaat, angutaaneri arnaaneri lu peqqissusaalu naapertorlugit kisitsisaateqanngilagut (akissarsiatigulli missiliuisinnaavugut). Immikkut ittut akissarsiatigut suliarineqartut aningaasartuutaangaatsiartarput."*

Maannamut inatsisitigut inissisimaneq, Kalaallit Nunaanni sullivinni avatangiisit pillugit inatsisaanni § 17 a-imi oqariartuutigineqartoq, Inatsisartut inatsisaanni § 21-imi ingerlatiinnarneqarpoq. Aalajangersagaq Sullivinnik Nakkutilliisoqarfiup sunniuteqarluartumik siunnerfilimmillu suliassa qarfinnut nakkutilliisinnaanissaanut, iluaqutaassaaq. Aalajangersakkami akisussaaffigilerlugu tigusinnginnermut sanilliullugu, sulisitsisut annertunerusumik aningaasartuuteqartinneqassanngillat imaluunniit nammakkersorneqassanatik.

KANUKOKA-p § 45, imm. 4-mut tunngatillugu oqaatigaa: ”*Danskit inatsisaannit atuuttumi malittarisassat assingusut malillugit Kalaallit Nunaanni Sullivinnik Nakkutilliisoqarfiup killissatut naleqartitai aalajangersarneqassapput. Matumani iluarsiiisutissaq tekniskiusorujussuaq pineqarmat, immaqalu iluarsiiisutit ataavartuusinnaallutik imaluunniit iluarsineqakkajuttariaqarsinnaallutik, killissarititaasut Sullivinnik Nakkutilliisoqarfimmit aalajangersarneqartarnissaat KANUKOKA-mit siunnersuutigineqassaaq. Inatsisissatut siunnersuummi aalajangersakkanut oqaaseqaatini ilanngunneqarpoq killissarititaasut peqqissaarussat Sullivinnik Nakkutilliisoqarfimmit aalajangersarneqarsinnaasut. Inatsisissatut aalajangersagassatut siunnersuutigineqartoq naapertorlugu piginnaasaq una atuutsinneqarsinnaanngilaq.*”

Siunnersuummi § 45, imm. 4 tusarniaaffigineqartup oqaaseqaataanut naapertuuttumik allanngortinneqarpoq. Taamaalilluni maannakkut § 45, imm. 4-imi allassimalerpoq killissarititit Sullivinnik Nakkutilliisoqarfimmit aalajangersarneqassasut.

KANUKOKA-p § 45, imm. 5-imut aamma 6-imut tunngatillugu oqaatigaa: ”*Matumani malittarisassat nutaat sullivimmi avatangiisit pillugit inatsimmit atuuttumi KANUKOKA-mit takuneqarsinnaanngitsut pineqarput, inatsisissatullu siunnersuummut oqaaseqaatini aalajangersakkat sukumiisumik nassuiaasiarineqanngillat. Malittarisassat nutaarluinnaat inatsisissatut siunnersuummut oqaaseqaatitigut naammattumik nassuiaatigineqartariaqartut KANUKOKA-mit isumaqarfigineqarpoq.*”

Aalajangersagaq inatsisissatut siunnersuummi Kalaallit Nunaanni sullivinni avatangiisit pillugit inatsisip allanngortinneqarnissaa pillugu Folketingip akuerisussannugaaani, imaritinneqarpoq. Inatsisartut UKA2016-imi imm. 115-imi inatsisip allanngortinneqarnissaa taperserlugu oqaaseqarput. Aalajangersagaq taamaalilluni suliassaqarfik akisussaaffigilerlugu tiguneqanngippat atuuttussatut, inatsisitigut inissisimanermit assinguvoq.

Tusarniaaffigineqartup oqaaseqaataa tunngavigalugu aalajangersakkamut nassuiaatit itisilerneqarput.

KANUKOKA-p §§ 46-mut aamma 47-imut tunngatillugu oqaatigaa: ”*Piffissaq aasuersaarfissamut aammalu ulloq unnuarlu sulinnigiffeqarnermut tunngatillugu siunertarisaq malillugu ingerlanneqassaaq piviusorsioritariaqarlunilu, tamakkiinerusumillu kinguartitsisinnaaneq piusinnaasariaqarluni, ilaatigut sapaatip akunnerani sulinnigikkallarnerit nuunneqarsinnaallutik. Inunnik paaqqinninnermi kommunit sulisitsisutut ulloq unnuarlu paaqqinniffinni utoqqaat illuinisut inunnik innarluutilinnik paaqqinnittarnermik unamminartoqartarput, kommunimi ilaatigut sulisut (ilinniarsimasut)*

*suliassaqarfimmik illersorsinnaalluartumik isumaginnissinnaasut amigaatigineqartarmata. Tamatuma kingunerikkajuttarpaa sulisut ikittunnguit sulianik amerlavallaanik nammataqartalernerinik.”*

Maannamut inatsisitigut inissisimaneq Kalaallit Nunaanni sullivinni avatangiisit pillugit inatsimmi §§ 40-imi aamma 41-imi oqariartuutigineqartutut §§ 46-imi aamma 47-imi ingerlaannassaaq. Suliassaqarfiup akisussaaffigilerlugu tiguneqarneranut atatillugu piffissaq qasuersaarfissaq pillugu aalajangersakkat 2-t taakkua allanngortinneqarnissaat naapertuussorineqanngilaq.

KANUKOKA-p § 57-imut tunngatillugu oqaatigaa:” *Ullumikkut inuusuttut ilaasa suleriaaseqartarnerata allannguuteqarfiginissaa piumasarineqarpoq.*

*§ 57-itut inuusuttut 18-it inorlugit ukiullit sulisarnerat sapaatip akunneranut 40 tiimit qaangissanngilaat. § 57 imm. 2. F. Inuusuttut 15-it inorlugit ukiullit atuartinneqartussaataapput, ulluni atuarfiusuni il. il. amerlanerpaamik 2 tiimit. Kiisalu § 57 imm. 3:”inuusuttut atuartinneqartussaataanermi pineqartunut ilaasut, atuanngiffeqarnerup ingerlanerani piffissami sulinnngiffearluinnassasut.”*

Aalajangersakkat taaneqartut taakkua maannamut inatsisitigut inissisimaneq allanngortissanngilaat. Kalaallit Nunaanni sullivinni avatangiisit pillugit inatsimmi § 47-imi oqariartuutigineqartutut § 57-imi aalajangersakkat maannamut inatsisitigut inissisimaneq allanngortinnagu ingerlatiinnassavaat. Kalaallit Nunaanni inuusuttut sulisinneqartarnerat pillugu maleruagassat, ilanngullugit § 57-imi maleruagassat, Kalaallit Nunaanni inuusuttut sulisinneqartarnerat pillugu Sullivinnik Nakkutilliisoqarfiup Nalunaarutaani nr. 1347, 15. december 2005-imeersumi itisilerneqaqqippoq.

KANUKOKA-p kapitali 11-mut aamma § 90 (maannakkut § 91), imm. 2-mut tunngatillugu oqaatigaa:” *KANUKOKA-mit uppersarsineqarpoq aatsitassanut inatsimmi § 79-imi aalajangersakkat naapertorlugit sullivimmi avatangiisit pillugit inatsimmut nuunneqarnissaat isumaliutigineqartoq. Tamanna oqaaseqaateqartitsinermik kinguneqartitsinnngilaq, KANUKOKA-lli naliliinera naapertorlugu imaani uuliasiortut atortorissaarutaannut sullivimmi avatangiisinut suliassaqarfiup 2010-mili Namminersorlutik Oqartussanit tigungmineqalereermat § 79-imi sullivimmi avatangiisit pillugit malittarisassatut taakkartorneqarnera ersarinnerusumik aatsitassanut inatsimmit oqaasertalersorneqarsinnaasimagaluarnera pissusissamisoornerugualuarpoq.*

*Tamatuma saniatigut § 90 (maannakkut § 91), imm. 2-mut oqaaseqaatini naqinnerlutaqarpoq - kalaallisoortaani aamma danskisoortaani - ”kapitel 1 a”-mut innersuussisoqarmat.*

§ 91, imm. 2-mut nassuiaatit allanngortinneqarput, taamaalilluni kapitalimut innersuussineq eqqortuulluni.

KANUKOKA-p § 65-imut tunngatillugu oqaatigaa: ”Imm. 1-imi, nr. 6-imi ”KANUKOKA” kalaallit kommuniinit taarserneqarsimavoq. Kommunit oqartussaapput namminersortut ataatsimut pingaarnertut aqutsisoqaratik, kommunillu sisamaasut akornanni ilaasortamik toqqaanissamut isumaqatigiittoqarnissaanut anguneqassasoq ajornakusoorsinnaavoq. Akerlianik KANUKOKA-p ilaasortaaginnarneratigut ilaasortamik toqqaanissamut kommunit sunniuteqarluarsinnaanerata qulakkeerneqarsinnaavoq. Kommunit ataasiakkaat KANUKOKA-mut ilaasortaanninnerat ima kinguneqartariaqanngilaq kommuni sinniisoqarnissaanik toqqaanissamut aporfearluni, nunami kommunit amerlanerussuteqartut sinniisuutitassaanik. Tamatuma kingorna kattuffinnik ingerlatseqatigiiffinnillu tunngaveqarnermi toqqaanissamik kommunit isumaqatigiissasut piunasaqarfigissallugit naapertuilluannngilaq. KANUKOKA-p toqqaanissamut pisinnaatitaanngitsoq attanneqassagaluarpata kommunit amerlanerussuteqartut pisinnaatitaanerattut paasineqassaaq.

KANUKOKA kommuninut tamaginnut sinniisuunngimmat, § 65, imm. 1, nr. 6-imi oqaasertaliineq tassaavoq, ilaasortaq kommuninut toqqaarneqassasoq. Tusarniaaffigineqartup oqaaseqaataa tunngavigalugu, kommunit amerlanerussuteqarnikkut aalajangiissasut, § 65, imm. 1, nr. 6-imut nassuiaatini maannakkut erseqqissarneqarpoq. Sinniisussat siunnersuutigineqartut ilai amerlaqqatigiinnik taaneqarpata, toqqaaneq makitsinikkut pissaaq.

KANUKOKA-p § 65-imut tunngatillugu oqaatigaa: ”Imm. 1, nr. 7-imi allanneqarsimavoq ”Naalackersuisut” ilaasortamik toqqaassasoq. Naalackersuisut ataatsimut taaguutaannaanerata innersuussutiginera Sullivimmi avatangiisinut siunnersuisooqatigiinni Naalackersuisunut ilaasortaq sorleq ilaasortamik toqqaassanersoq nassuiaatiginerusariaqarpoq.”

Aalajangersakkami maannamut inatsisitigut inissisimaneq ingerlaannarpoq. Maannamut pisartutut Naalackersuisut tamarmiusut sinniisussamik toqqaasarput.

KANUKOKA-p § 67, imm. 3-mut tunngatillugu oqaatigaa: ”KANUKOKA-mit maluginiarneqarpoq nuna tamakkerlugu kattuffimmi ilisimaneqartutut Nuup avataani illoqarfinni sumiiffinni immikkoortortanik suli pilersitsisoqarsimannngitsoq. Tamatuma allanngortinnissaa Naalackersuisut pilersaarutigippassuk inatsimmi nassuiaatigineqartussatut allaqqasariaqarpoq.”

Maannamut pisutut Nuup avataani najukkami immikkoortortamik pilersitsisoqanngilaq. Maannakkorpiaq aamma tamanna pillugu pilersaaruteqartoqanngilaq.

KANUKOKA-p § 69-imut 67, imm. 1-imut ataqatigiissillugu oqaatigaa:” § 69  
*paasiuminartuussappat pingaaruteqarluinnarpoq siunnersuutigissallugu Sullivinnik  
nakkutilliisut ingerlatsisussaatitaanikkut aqutsisoqarfiummata imaluunniit  
Naalackersuisoqarfiup ataani immikkoortortaqaqarfiuinnarlutik.*”

Sullivinnik Nakkutilliisoqarfik aqutsisoqarfiuvoq arlaannaannulluunniit  
attuumassuteqanngitsoq. Siunnersuummi § 67-imi tusarniaanerup kingorna immikkoortoq  
ilanngunneqarpoq, taamaalilluni Sullivinnik Nakkutilliisoqarfiup arlaannaannulluunniit  
attuumassuteqannginnera maannakkut Inatsisartut inatsisaata oqaasertaanni erseqqissumik  
allassimalerluni.

KANUKOKA-p § 73-imut tunngatillugu oqaatigaa:” *Aalajangersakkamut oqaaseqaatinut  
tunngatillugu aalajangersagaq ajornartorsiutitut inissisimalerpoq, pissutigalugu inatsimmi  
allaqqasut naapertorlugit aatsitassarsiornermut attuumassuteqartunik piginnaatitsinissamut  
aalajangersakkat pineqartut ersarissarneqanngimmata. Maannamut atuuffiusup avataatigut  
sulianut aningaasartuutit utertittarnissaannut malittarisassat aalajangersarnerannut  
oqaaseqaatit tusarniaassutigeqqaartariaqarput, inatsimmi allaqqanissaat pisariaqarpoq.*”

Tusarniaaffigineqartup oqaaseqaataa tusaatissatut tiguneqarpoq, aammalu § 73 tamatumunnga  
naapertuuttumik allangortinneqarpoq, taamaalilluni maannakkut § 73-ip oqaasertaanni  
erseqqissumik allassimalerluni, taanna taamaallaat imartani aatsitassarsiorluni ingerlatanut  
atuuttoq.

KANUKOKA-p § 75-imut tunngatillugu oqaatigaa:” *Oqaaseqatigiinni  
takuneqarsinnaasariaqarpoq inuk pillugu paasissutissanit aalajangersakkap qanoq  
angitigisumik nikinganera.*”

Aalajangersagaq inuit pillugit paasissutissanut inatsimmi maleruagassanut naapertuuppoq.

KANUKOKA-p § 81-imut tunngatillugu oqaatigaa:” *Aalajangersagaq naapertorlugu  
Sullivinnik nakkutilliisut oqartussatut namminersortuusariaqartut (aqutsisoqarfik)  
Naalackersuisoqarfiup ataaniillutik, pissutigalugu immikkoortortaqaqarfimmit  
Naalackersuisoqarfimmut maalaaruteqartarneq isumaqannginnami.*”

Aalajangersagaq maannamut inatsisinut atuuttunut assinguvoq. Sullivinnik  
Nakkutilliisoqarfik taamaalilluni suli aqutsisoqarfiussaaq immikkoortoq.

Tusarniaanermut nangissutigalugu Inatsisartut inatsisaat allanngortinneqarpoq, taamaalilluni Sullivinnik Nakkutilliisoqarfiup aalajangiinerisa naammagittaalliutigineqarneri maannakkut Sullivinni avatangiisit pillugit naammagittaalliortarfimmit arlaannaannulluunniit attuumassuteqanngitsumit suliarineqartassallutik.

KANUKOKA-p § 90-imut (maannakkut § 91) tunngatillugu oqaatigaa: ” *KANUKOKA-mit eqqaasitsissutigineqassaaq suliaasaqarfimmik tigusinissap nalaani naalagaaffimmik isumaqatigiinniartoqareernerata kingorna aalajangersagaq una iluarseqqinneqaratarsinnaasoq.* ”

Oqaaseqaat tusaatissatut tiguneqarpoq.

Aatsitassanut Ikummatissanullu Naalackersuisoqarfiup oqaatigaa: ” *Aatsitassanut Ikummatissanullu Naalackersuisoqarfiup aallarniutigalugu oqaatigissavaa, nunami sullivinni avatangiisinut suliaasaqarfiup akisussaaffigilerlugu tiguneqarnissaanut Naalackersuisoqarfik akuersaartumik isummermat.* ”

Aatsitassanut Ikummatissanullu Naalackersuisoqarfiup ingerlaqqilluni oqaatigaa: ” ***Sullivinnik Nakkutilliisoqarfimmut oqartussaasup aamma Aatsitassanut Ikummatissanullu Aqutsisoqarfiup akornanni suleqatigiinneq.*** Ulloq 18. april 2007 Sullivinnik *Nakkutilliisoqarfiup aamma taamanikkut Aatsitassanut Ikummatissanullu Pisortaqaqfiusup (maannakkut Aatsitassanut Ikummatissanullu Aqutsisoqarfik) akornanni suleqatigiinnissamut isumaqatigiissuteqartoqarpoq. Suleqatigiinnissamut isumaqatigiissut ilanngussatut ilanngunneqarpoq.*

*Suleqatigiinnissamut isumaqatigiissummi siunertaavoq, nakkutilliinermut tunngatillugu suliniuteqarnerup kiisalu Sullivinnik Nakkutilliisoqarfiup aamma Aatsitassanut Ikummatissanullu Aqutsisoqarfiup akornanni suleqatigiinnerup ataqatigiissaarneqarnissaat, sunniuteqarluarnerulersinnissaat nukittorsarnissaallu. Suleqatigiinnissamut isumaqatigiissummi erseqqissumik allassimavoq, sullivinni avatangiisini nakkutilliineq sullivinni avatangiisinut inatsimmi tunngaveqartumik Sullivinnik Nakkutilliisoqarfimmit ingerlanneqassasoq, aatsitassanut ikummatissanullu inatsimmi nakkutilliineq aatsitassanut ikummatissanullu inatsimmi tunngaveqartumik Aatsitassanut Ikummatissanullu Aqutsisoqarfimmit ingerlanneqassalluni. Aammattaaq suleqatigiinnissamut isumaqatigiissut malillugu Sullivinnik Nakkutilliisoqarfik piumasaqaatinut Aatsitassanut Ikummatissanullu Aqutsisoqarfimmit piumasaqaatigineqartunut nakkutilliisussaannilaq.*

*Aatsitassanut Ikummatissanullu Naalackersuisoqarfiup oqaatigissavaa, Sullivinnik Nakkutilliisoqarfimmut oqartussaasup aamma Aatsitassanut Ikummatissanullu Aqutsisoqarfiup maannakkut qanimut suleqatigiinnerisa ingerlaannarnissaanut, sullivinni avatangiisinut suliassaqarfiup akisussaaffigilerlugu tigusinnaanera akornutaanngitsoq. Aatsitassanut Ikummatissanullu Naalackersuisoqarfik isumaqarpoq oqartussaasup maannakkut qanimut suleqatigiinnerit, pitsaasumik sunniivigeqatigiisitsinermik kiisalu oqartussaasunut aamma pisinnaatitsissummik pigisaqartunut isumalluutinin sipaaruteqartitsinermik, malitseqartoq. Maannakkut suleqatigiinneq pingaartumik ataatsimoorluni nakkutilliiartortarnermi atorineqartarpoq, tassani Sullivinnik Nakkutilliisoqarfimmut oqartussaasooq aamma aatsitassanut suliassaqarfimmi nakkutilliinermut oqartussaasooq nakkutilliiartortarnermi ataatsimoorlutik peqataasarlutik. Sullivinni avatangiisinut suliassaqarfik akisussaaffigilerlugu tiguneqassappat, Aatsitassanut Ikummatissanullu Naalackersuisoqarfiup tamanna akuersaartumik isummerfigaa.”*

Oqartussaasup pisinnaatitsissutinik tunniussisartup aamma oqartussaasup nakkutiginnittup avissaartisimanissaat eqqarsaatigalugu Sullivinnik Nakkutilliisoqarfik arlaannaannulluunniit attuumassuteqanngitsoq, isumannaallisaanermut peqqinnissamullu piumasaqaatit aatsitassanut ikummatissanullu inatsit malillugu pianaanissamut akuersissummi aalajangersagaasut malinneqarnerannut siunissami nakkutilliisuusaaq. Taamaattumik danskit Sullivinnik Nakkutilliisoqarfiannut maannamut suleqatigiinnissamut isumaqatigiissutaasup atuutsinnarneqarnissaa pisariaqartinneqarunnaassaaq.

Aatsitassanut Ikummatissanullu Naalackersuisoqarfiup oqaatigaa: ” **Teknikkimut Nakkutilliinermullu Immikkoortortaqarfik.** Siunnersuummut nassuiaatini nalinginnaasuni qupperneq 4-mi aamma 12-imi allassimavoq, siunnersuutip malitsigisaanik Aatsitassanut Ikummatissanullu Aqutsisoqarfiup Teknikkimut Nakkutilliinermullu Immikkoortortaqarfia tamakkiilluni Kalaallit Nunaanni Sullivinnik Nakkutilliisoqarfimmut pilersinneqaqqammersumut nuutinneqassasoq.

*Aatsitassanut Ikummatissanullu Naalackersuisoqarfik isumaqarpoq Teknikkimut Nakkutilliinermullu Immikkoortortaqarfik sullivinni avatangiisinut aamma tamatuminnga nakkutilliinermut tunngasuinnarnik suliaqartartoq, nassuiaammi tunngavigineqartoq. Tamanna ilumuunngilaq. Teknikkimut Nakkutilliinermullu Immikkoortortaqarfik nunami aatsitassarsiornermi ingerlatani sullivinni avatangiisinut nakkutilliinermut oqartussaasuunngilaq, tassami oqartussaasooq taanna sullivinni avatangiisinut inatsimmi tunngaveqartumik Sullivinnik Nakkutilliisoqarfimmi inissisimavoq.*

*Nakkutilliinermi suliassat, Aatsitassanut Ikummatissanullu Aqutsisoqarfimmi Teknikkimut Nakkutilliinermullu Immikkoortortaqarfimmit suliarineqartartut aatsitassanut*



*ikummatissanullu inatsimmi inatsisitigut tunngaveqarput, ilanngullugu aatsitassanut ikummatissanullu inatsimmi § 86, imm. 2. Tassani toqqaannartumik allassimavoq, "Inatsisartut inatsisaat manna malillugu piginnaatitsissummik pigisaqartut allallu ingerlataat suliaallu pillugit Naalackersuisut nakkutilliisuupput, ilaallutik inatsisartut inatsisaannik malittarisassaannillu piumasaqaataannillu ...".*

*Aammattaaq nassuiaatini erseqqissarneqarpoq: "Aalajangersagaq malillugu piginnaatitsissummik pigisaqartup ingerlatai suliaalu allat kiisalu sammisai allat siunnersuummut ilaasut Naalackersuisut nakkutigissavaat. Taamattaaq aalajangersagaq pisinnaatitsissummik tunngaviliivoq, nakkutilliinermik suliaqartut qaqugukkulluunniit kinaassutsiminnik uppernarsaateqarlutik sulianut ingerlatanullu tamanut isersinnaatitaapput. Tamanna atuuppoq sulisut nakkutilliinermik suliallit pisariaqartillugu suliaminnik isumaginninnissaminnut pisariaqartitsigunik. Oqariaaseq "nakkutilliinermik oqartussaasut sulisui" "Naalackersuisut"-nut taarsiullugu toqqarneqarpoq, tassani ersersinniarneqarmat, sulisut killeqartumik amerlassusillit taamaallaat nakkutilliinermik suliaqartut kinaassutsiminnik uppernarsaaserlutik aalajangersagaq manna malillugu ingerlataqarfimmu isernissaminnik piumasaqarsinnaammata. Suliaqarfitsigut nakkutilliinermik oqartussaaffik Aatsitassanut Pisortaqarfimmi inissisimassaaq ...".*

*Taamaalilluni oqartussaasutut atuuffissaq toqqaannartumik sullivinni avatangiisinut tunngassuteqartutuaq Aatsitassanut Ikummatissanullu Aqutsisoqarfiup Teknikkimut Nakkutilliinermullu Immikkoortortaqarfiata isumagisassaa tassaavoq, imartani atortut Kalaallit Nunaata imartaata iluaniittut imaluunniit immap naqqani nunavissuit killeqarfiisa iluani sullivinni avatangiisinut nakkutilliineq, takuuk aatsitassanut ikummatissanullu inatsimmi § 79."*

Nassuiaatit quppernermi 4-miittut aamma 12-imiittut tusarniaaffigineqartup oqaaseqaataanut naapertuuttumik allanngortinneqarput, taamaalilluni maannakkut allassimalerluni Teknikkimut Nakkutilliinermullu Immikkoortortaqarfiup attuumassuteqartortaa Sullivinnik Nakkutilliisoqarfimmu arlaannaannulluunniit attuumassuteqanngitsumut nutaamut nuunneqassasoq.

Teknikkimut Nakkutilliinermullu Immikkoortortaqarfik imartani atortuni avatangiisinut nakkutilliisuusoq, tusarniaaffigineqartup oqaaseqaataa, eqqorpoq. Siunissami ilusiliineq, aqutsisoqarfik arlaannaannulluunniit attuumassuteqanngitsoq imartani paaanissamut akuersissutini isumannaallisaaneq peqqinnissarlu pillugit aalajangersakkanut nakkutilliisuulluni (aamma nunami) aatsitassanut ikummatissanullu inatsimmi § 86, imm. 2-mut naapertuuppoq.

Imartani atortuni aatsitassarsiorluni ingerlataqarnerulertoqassappat, Sullivinnik Nakkutilliisoqarfik tamatuminnga nakkutilliisinnaassaaq, aammalu aningaasassat akiliuteqartitsisarnikkut aamma oqartussaasut suliarinninnerannut aningaasartuutitik utertitsisarnikkut matussuserneqarsinnaapput.

*Aatsitassanut Ikummatissanullu Naalackersuisoqarfiup oqaatigaa: ” Aammattaaq Siunnersuummut nassuiaatini qupperneq 12-imi allassimavoq, aningaasaliissutit Aatsitassanut Ikummatissanullu Aqutsisoqarfimmi imartani avatangiisinut nakkutilliinermut ator neqartartut, Kalaallit Nunaanni Sullivinnik Nakkutilliisoqarfimmut pilersinneqaaqqammersumut nuunneqassasut. Aningaasaliissutit siunnersuummi 150.000 koruuninut naatsorsorneqarput.*

*Aatsitassanut Ikummatissanullu Naalackersuisoqarfik naliliivoq aningaasaliissutit matuma siuliani taaneqartut 100.000 koruuninut missingersorneqarsinnaanerusut, tamannalu oqaloqatigiinnernut Aatsitassanut Ikummatissanullu Naalackersuisoqarfiup aamma Inuussutissarsiornermut, Suliffeqarnermut, Niuernermut Nukissiuuteqarnermullu Naalackersuisoqarfiup akornanni 2016-imi juunimi ingerlanneqartunut, naapertuuppoq. Tamanna nakkutilliinermut atatillugu aningaasartuutit pisinnaatitsissummik pigisaqartumit utertillugit akileqquneqarsinnaanerat inatsisissatut siunnersuummi siunnerfigineqarneranut ataqatigiissillugu isigineqassaaq.*

Tusarniaanermut akissuteqaat tunngavigalugu missingersuutit missingersorneqartut ukiumut 150.000-koruuninut missingersorneqaraluartut 100.000-koruuninut annikillisinneqarput.

*Aatsitassanut Ikummatissanullu Naalackersuisoqarfiup oqaatigaa: ” Taamaattumik Aatsitassanut Ikummatissanullu Naalackersuisoqarfik naliliivoq, Teknikkimut Nakkutilliinermullu Immikkoortortaarfik ataatsimoortoq Aatsitassanut Ikummatissanullu Aqutsisoqarfimmit Kalaallit Nunaanni Sullivinnik Nakkutilliisoqarfimmut pilersinneqaaqqammersumut nuutinneqarsinnaanngitsoq imaluunniit nuutinneqassanngitsoq. Tamatumunnga pissutsit arlallit pissutaapput, taakkua ilai pingaarnert matuma kinguliani naatsumik allaaserineqarlutik.*

*Siullermik Aatsitassanut Ikummatissanullu Naalackersuisoqarfik naliliivoq sullivinni avatangiisinut suliassaqarfiup aamma Aatsitassanut Ikummatissanullu Aqutsisoqarfiup, ilanngullugu Teknikkimut Nakkutilliinermullu Immikkoortortaqarfiup, maannakkut suliassaqarfii annikitsumik qalleraattut. Maannakkorpiaq Aatsitassanut Ikummatissanullu Aqutsisoqarfik sullivinni avatangiisinut suliassaqarfimmi taamaallaat imartani atortuni sullivinni avatangiisinut tunngatillugu oqartussaasuvoq. Ukiuni kingullerni Kalaallit Nunaanni imartani atortunik sanaartugaqarsimannngilaq, tamannalu ukiuni aggersuni*

*pissasoq aamma naatsorsuutigineqanngilaq, taamaalilluni oqartussaasut suliaasaqarfianni "imartani atortuni sullivinni avatangiisit" maannakkorpiaq ingerlataqartoqarani. Taamaalilluni suliaqarnermi piviusumik imartani atortuni sullivinni avatangiisinut tunngatillugu oqartussaasut suliaqaqanngilaq suliaasaqarfeqaranilu, taamaattumik sulisussanik amerlassusiliisoqarsimannngilaq imaluunniit sulisussanut amerlassusiliinerit ilaannik nuunneqarsinnaasunik imaluunniit nuunneqartussanik soqarani.*

*Aappaattut Aatsitassanut Ikummatissanullu Naalackersuisoqarfik naliliivoq, nunani tamalaani suleriaatsit akuerisaasut innersuussutigalugu Siunnersuummi pisinnaatitsissummik tunniussisartup aamma oqartussaasup nakkutiginnittuusup avissaartisimanissaannut innersuussineq, ajuusaarutigineqarsinnaasumik paatsoornermik pissuteqartoq. Aatsitassanut ikummatissanullu inatsimmi § 1-imi allassimavoq:*

*"Ingerlatanik inatsimmut ilaasunik suliarinninnermi isumannaallisaaneq[...] pisuussutinik atorluaaneq kiisalu inuiaqatigiinnut akornutaanngitsumik ingerlatat suliarineqarnissaat kiisalu pissutsini assigiinngitsuni taamaaqataanni nunat tamat pitsaasumik ileqqorissaartarnerat akuerisaasut qulakkeerneqarnissaat Inatsisartut inatsisaatigut anguniarneqarpoq." (matumani erseqqissarneqarpoq)*

*Aatsitassanut Ikummatissanullu Naalackersuisoqarfiup isumaa malillugu nunani tamalaami suleriaatsinut pitsaasunut akuerisaasunut innersuussinerup Kalaallit Nunaanni pissutsinut akuliutsinneqarnissaa, aalajangiisuulluinnartumik pingaaruteqarpoq, takuuk aatsitassanut ikummatissanullu inatsimmi § 1-imi oqaasertaliineq "pissutsini taamaaqataanni".*

*Aatsitassanut Ikummatissanullu Aqutsisoqarfiup Teknikkimut Nakkutilliinermullu Immikkoortortaqarfiata avissaartinnissaanut atatillugu Siunnersuummi EU-mit malitassiaq innersuussutigineqarpoq. Aatsitassanut Ikummatissanullu Naalackersuisoqarfik naliliivoq EU-mit malitassiaq pisuni tamaginni toqqaannartumik Kalaallit Nunaanni pissutsinut atorneqarsinnaasannngitsoq. EU-mit malitassiani EU-mi nunani ilaasortaasuni pissutsit aallaavigineqartarput, taakkualu innuttaasunut aamma allaffissornikkut pisinnaasaqarnernut tunngatillugu allarujussuarmik angissuseqarlutik. Aatsitassanut Ikummatissanullu Naalackersuisoqarfik naliliivoq, EU-mit malitassiamik toqqaannartumik nuussinnermi, Kalaallit Nunaanni pissutsit immikkut ittut naammattumik sillimaffigineqassannngitsut, ilanngullugu EU-imi Kalaallit Nunaanni allaffissornikkut pisinnaasaqarneq annikitsuinnaq.*

*Aatsitassanut Ikummatissanullu Naalackersuisoqarfiup naliliinera malillugu EU-mit malitassiap toqqaannartumik Kalaallit Nunaanni pissutsinut nuutinnissaanut aatsitassanut ikummatissanullu inatsimmi tunngavissaqanngilaq. Aammattaaq Aatsitassanut Ikummatissanullu Naalackersuisoqarfiup naliliinera malillugu, immikkoortortaq annikitsoq immikkoortortanut arlalinnut aggulunnissaa naapertuutinngilaq siunertaqaraniluunniit.*

*Tamanna Aatsitassanut Ikummatissanullu Naalackersuisoqarfiup isumaa malillugu ilaatigut marloriaammik sulinermik malitseqassaaq, tassani immikkoortortat marluusut tamarmik ilaannakortumik suliassaq ataaseq sularisassallugu, ilaatigut immikkoortortat tamarmik immikkut angissutsimikkut annikitsuaraanerannik malitseqarluni, immikkoortortaqaarfiit arlaannaalluunniit suliassaminik tamakkiisumik isumaginninnissamut naammattumik pisinnaasaqassanani.”*

Qupperneq 4-imi aamma qupperneq 12-imi oqaaseqaatit iluarsineqarput, taamaalilluni allassimalerluni Teknikkimut Nakkutilliinermullu Immikkoortortaqaarfiup ilaa attuumassuteqartoq kisimi Sullivinnik Nakkutilliisoqarfimmut arlaannaannulluunniit attuumassuteqanngitsumut nutaamut nuunneqassalluni. Sammisat sullivinni avatangiisinut attuumassuteqanngitsut Sullivinnik Nakkutilliisoqarfimmut arlaannaannulluunniit attuumassuteqanngitsumut nuunneqassanngillat.

Aatsitassarsiorluni ingerlatanut atatillugu siunissami ajutoorsinnaanerup aarlerinaateqarnissaa pinngitsoortinniarlugu, pisinnaatitsissummik tunniussisartup aamma oqartussaasup nakkutiginnittup immikkoortissimanissaannut innersuussineq pisariaqarpoq. Oqartussaasut immikkoortissimanissaat nunani tamalaani suleriaatsinut pitsaasunut naapertuuppoq, aammalu nunani tamalaani atituumik akuerisaalluni, ilanngullugit EU-mi nunat ilaasortaasut. Ingerlatsinermi immikkoortitsinissamik nunat tamalaat akornanni isiginninniarnermut pissutaavoq, sullivinni avatangiisit pillugit oqartussat allanik isiginninniarnatik taamaallaat isumannaallisaanermik peqqissusermillu isiginninniarnarit nalornissutigineqassanngitsoq. Aatsitassarsiornermi tamanna immikkut pingaaruteqarpoq, tassani ajutoornerit inuit inuunerannut, avatangiisinut nalilinnullu allanut annertoorujussuarmik sunniuteqarsinnaammata Immikkoortitsinissaq tunngavilersorluagaavoq, tassami aatsitassarsiornermik suliassanut annertuunut atatillugu isumannaallisaanerup peqqinnissallu nakkutigineqarnissaat aallunneqarnerulertussaammat. Sullivinnik Nakkutilliisoqarfik nutaaq arlaannaannulluunniit attuumassuteqanngitsoq taamaalilluni aqutsisoqarfiussaaq immikkut ilisimasaqartoq, sullivinni avatangiisinuunnaq aammalu sullivinni isumannaallisaanermut peqqinnissamullu, ilaatigut nakkutiginninnikkut ilitersuisarnikkullu ikuiunissamik, aallussisoq. Peqatigisaanik Teknikkimut Nakkutilliinermullu Immikkoortortaqaarfiup aamma Sullivinnik Nakkutilliisoqarfiup akornanni suleqatigiinnissamut isumaqatigiissut pisariaqartinneqarunnaassaaq, tassami Sullivinnik Nakkutilliisoqarfik nutaaq aqutsisoqarfinngussaaq, isumannaallisaanermut peqqinnissamullu tunngasunut apeqqutinut saaffiusartussaq.

*Aatsitassanut Ikummatissanullu Naalackersuisoqarfiup oqaatigaa ” Aammattaaq Aatsitassanut Ikummatissanullu Naalackersuisoqarfiup oqaatigissavaa, Naalackersuisuni pisinnaatitsissummik tunniussisartup aamma oqartussaasup nakkutiginnittuusup akornanni*

*aaqqissuussaanikkut arlaannaannulluunniit attuumassuteqanngitsumik ataatsimut isigalugu pilersitsinissaq siunertaasimappat, sullivinni avatangiisinut suliassa qarfiup akisussaaffigilerlugu tiguneqarnissaata Inuussutissarsiornermut, Suliffeqarnermut, Niuernermut Nukissiuuteqarnermullu Naalackersuisoqarfiup ataaniitinneqarnera, Aatsitassanut Ikummatissanullu Naalackersuisoqarfimmit eqqumiigineqarpoq, tassami pisinnaatitsissummik tunniussisartup aamma nakkutiginninnermut oqartussaasup akornanni aaqqissuussaanikkut arlaannaannulluunniit attuumassuteqannginnermut tunngatillugu tamanna annertumik nalornilersitsisinnaammat. Tamatumunnga pissutaavoq Inuussutissarsiornermut, Suliffeqarnermut, Niuernermut Nukissiuuteqarnermullu Naalackersuisoqarfik ilaatigut suliniutinut angisuunut, erngup nukinganit suliniutinut, sermimut imermullu suliniutinut, takornariartitsisarnermut suliniutinut (ingerlatsinissamut akuersissutit) aamma uumassusilinnit isumalluutinik atuinermut pisinnaatitsissummik tunniussinermut oqartussaasuummat. Aammattaaq Inuussutissarsiornermut, Suliffeqarnermut, Niuernermut Nukissiuuteqarnermullu Naalackersuisoqarfik aatsitassanut oqartussaasup ataatsimoortup ilagaa, tassami aatsitassarsiornermut suliassanut atatillugu inuiaqatigiit aningaasaqarnerannut tunngasut, ilanngullugit IBA-mi isumaqatiginninniarnert, Inuussutissarsiornermut, Suliffeqarnermut, Niuernermut Nukissiuuteqarnermullu Naalackersuisoqarfiup ataaniippat.*

Oqartussaasup nakkutiginnittuusup aqutsisoqarfimmi arlaannaannulluunniit attuumassuteqanngitsumi, Sullivinnik Nakkutilliisoqarfimmi, ataatsimoortinneratigut, aaqqissuussaanikkut arlaannaannulluunniit attuumassuteqannginneq. Aqutsisoqarfik Naalackersuisoqarfimmut suliassa qarfimmu akisussaasuusumut attuumassuteqanngilaq, soorlu assersuutigalugu. Atuisartoqarnermut Unammilleqatigiinnermullu Aqutsisoqarfik taamaattoq. Sullivinnik Nakkutilliisoqarfiup arlaannaannulluunniit attuumassuteqannginnera, siunnersuummi § 67-imi erseqqissarneqarpoq.

Sullivinnik Nakkutilliisoqarfik, Atuisartoqarnermut Unammilleqatigiinnermullu Aqutsisoqarfittuulli, aqutsisoqarfiuvoq arlaannaannulluunniit attuumassuteqanngitsuq, attuumassuteqanngitsumik aalajangiisartoq.

Atuisartoqarnermut Unammilleqatigiinnermullu Aqutsisoqarfittuulli Sullivinnik Nakkutilliisoqarfik Naalackersuisoqarfiup ataaniippoq, imatut paasillugu suliassa qarfimmu pingaarnertigut politikki, ilanngullugit inatsisinut allannguutissanik suliagarneq aammalu maleruagassanik immersuisussanik suliagarneq, Naalackersuisoqarfimmit piareersarneqartarluni.

Naalackersuisoqarfiit suliassaannik agguaaneq erseqqinnerusoq, Naalackersuisut Siulittaasuannit aalajangersarneqassaaq.

Aatsitassanut Ikummatissanullu Naalackersuisoqarfiup oqaatigaa: ” *Matuma siuliani allassimasut tunngavigalugit Aatsitassanut Ikummatissanullu Aqutsisoqarfiup Teknikkimut Nakkutilliinermullu Immikkoortortaqarfiata tamakkiisuutillugu Kalaallit Nunaanni Sullivinnik Nakkutilliisoqarfimmut pilersinneqaqqammersumut nuutinneqarnissaa, Aatsitassanut Ikummatissanullu Naalackersuisoqarfiup sakkortuumik nangaasaarutigissavaa. Kisiannili Aatsitassanut Ikummatissanullu Aqutsisoqarfimmut aningaasaliissutit ilai, sullivinni avatangiisinut tunngatillugu suliassanut ilaatinneqarsinnaasut, Sullivinnik Nakkutilliisoqarfimmut pilersinneqaqqammersumut nuunneqarnissaa, Aatsitassanut Ikummatissanullu Naalackersuisoqarfiup akuersaartumik isummerfigaa. Aatsitassanut Ikummatissanullu Naalackersuisoqarfik isumaqarpoq aningaasaliissutit taakkua annertussusaat annerpaamik 100.000 koruuninut naatsorsorneqarsinnaasoq.* ”

Nassuiaatit iluarsineqarput taamaalilluni Teknikkimut Nakkutilliinermullu Immikkoortortaqarfiup ilaa, sullivinni avatangiisinut tunngasunik suliassanik sularinnittartoq kisimi, Sullivinnik Nakkutilliisoqarfimmut nutaamut nuunneqassasoq takorloorneqarpoq.

Takorloorneqarpoq tamatumunnga aningaasaliissutit tusarniaaffigineqartup oqaaseqaataannut naapertuuttumik annikillisinneqassasut.

Aatsitassanut Ikummatissanullu Naalackersuisoqarfiup oqaatigaa: ” ***Kapitali 11 pillugu immikkut.***

*Siunnersuummi kapitali 11 imartani atortuni sullivinni avatangiisinut tunngasunik aalajangersakkanik imaqarpoq.*

*Aatsitassanut Ikummatissanullu Naalackersuisoqarfiup inassutigaa Siunnersuummi kapitali 11-mut nassuiaatit, nunani tamalaani suleriaatsinut pitsaasunut akuerisaasunut innersuussinermut tunngatillugu, peerneqassasut. Annertunertigut matuma siuliani 1-ip eqqartorneqarnera innersuussutigineqarpoq.*

*Aatsitassanut Ikummatissanullu Naalackersuisoqarfikup inassutigaa Siunnersuummi kapitali 11 naleqqussarneqassasoq, taamaalilluni erseqqissumik allassimalissalluni, kapitali pissutsinut sullivinni avatangiisinut tunngasunut taamaallaat tunngassuteqartoq, taamaalillunilu suliassanut allanut, sullivinni avatangiisinut oqartussaasup suliassaasa avataanniittunut, tunngassuteqanngitsoq, ilanngullugu pisinnaatitsissummik pigisaqartup suliaqarneranik allanillu suliaqarnermik ingerlataqarnermillu aatsitassanut ikummatissanullu inatsimmi pineqartunut ilaasumik, Aatsitassanut Ikummatissanullu Aqutsisoqarfimmit isumagineqartunik, nakkutilliineq.*

*Matuma siuliani taaneqartutut, ullumikkut Sullivinnik Nakkutilliisoqarfimmut oqartussaasup aamma Aatsitassanut Ikummatissanullu Aqutsisoqarfiup akornaanni qanimut suleqatigiittoqareerpoq, tamatumalu ilaatigut ataatsimoorluni nakkutilliilluni takusaasarneq ajornarunnaarsippaa. Sullivinni avatangiisinut suliassaqarfik akisussaaffigilerlugu tiguneqassappat, suleqatigiinnerup taassuma ingerlaannarsinnaaneranut Aatsitassanut Ikummatissanullu Naalackersuisoqarfik akuersaartumik isummerpoq.”*

Sullivinni avatangiisinut suliassaqarfik akisussaaffigilerlugu tiguneqassappat, aammalu Sullivinnik Nakkutilliisoqarfik arlaannaannulluunniit attuumassuteqanngitsoq nutaaq imartani taamatullu nunami sullivinni avatangiisinut nakkutilliisuussappat, suleqatigiinnissamut isumaqatigiissutip danskit Sullivinnik Nakkutilliisoqarfiannut isumaqatigiissutaasup atuutsiinnarneqarnissaa pissutissaqanngilaq. Sullivinnik Nakkutilliisoqarfiup imartani atortuni isumannaallisaaneq peqqinnissarlu nakkutigissavaa, taamatullu suliassaqarfinni allani suliffeqarfinni isumannaallisaanermut peqqinnissamullu piunasaqaatit malinneqarnerat nakkutigissallugu. Nunani tamalaani suleriaatsit pitsaasut pillugit kapitali 11-mut nassuiaatini innersuussineq attatiinnarneqarpoq, tassami imartani atortuni isumannaallisaaneq peqqinnissarlu pillugit aalajangersakkat tamatuma malinneqarnissaanik siunertaqarmata, taamatullu nunani tamalaani suleriaatsit pitsaasut malinneqarnissaat siunertarineqartuaannarsimalluni, tamannalu ilaatigut aatsitassanut ikummatissanullu inatsimmi § 1-imut aamma naapertuuppoq.

*Aatsitassanut Ikummatissanullu Naalackersuisoqarfiup oqaatigaa: ” **Aatsitassarsiornermi ingerlatanut tunngatillugu aalajangersakkat immikkut ittut** Aatsitassanut Ikummatissanullu Naalackersuisoqarfiup oqaatigissavaa siunnersuummi arlaleriarluni aatsitassarsiornermut ingerlatanut innersuussisoqarmat.*

*Ataatsimut isigalugu Aatsitassanut Ikummatissanullu Naalackersuisoqarfik isumaqarpoq, aatsitassarsiornermik suliassat, sullivinni avatangiisinut tunngasunut tunngatillugu, suliassanit allanit annertumik allaassuteqanngitsut. Tamanna tunngavigalugu Aatsitassanut Ikummatissanullu Naalackersuisoqarfiup isumaa malillugu aatsitassarsiornermut suliassat sullivinni avatangiisinut tunngatillugu suliassanit allanit allaanerusumik maleruagassiivigineqarnissaat tunngavissaqanngilaq.*

*Aatsitassanut Ikummatissanullu Naalackersuisoqarfiup isumaa malillugu, aatsitassanut suliassaqarfimmi immikkut maleruagassiisoqassappat, tamanna siullermik pingaarnertullu aatsitassanut ikummatissanullu inatsimmi pisariaqarpoq. Aatsitassanut Ikummatissanullu Naalackersuisoqarfiup isumaa malillugu, assersuutigalugu, kisianni taannaannaanngitsoq, Siunnersuummi §§ 41-imi aamma 68-imi sullivinni avatangiisit pillugit inatsimmi*

*aatsitassanut suliaasaqarfimmut inatsimmi tunngavissatut aalajangersakkanik immikkuullarissunik aalajangersaanissaq tunngavissaqanngilaq.*

*Taamaattumik Aatsitassanut Ikummatissanullu Naalackersuisoqarfiup inassutigaa, Siunnersuummi aatsitassanut suliaasaqarfimmut immikkut innersuussinerit tamarmik peerneqassasut.”*

Oqartussaasut suliarinninnerannut matussutissatut akiliummik akiliisitsisarnissaq pillugu siunnersuummi aalajangersakkat imartani aatsitassarsiornermik suliaqarnermut taamatullu nunami suliaqarnermut atuupput. Tamanna maannamut inatsisinut atuuttunut naapertuuppoq. Innersuussinerit tamanna pissutigalugu peerneqartariaqanngillat. Nunami aatsitassarsiornermut suliaasanik aamma erngup nukinganut suliaasanik oqartussaasut suliarinninnerannut akiliummik akiliisitsisarnissamut periarfissaqarnermut, ilaatigut aatsitassarsiornermut suliaasat nakkutilliinerup oqartussaasunut artukkersuissannginnerat, taamaalillunilu suliaasaqarfini allani nakkutilliinerup ilitersuisarnerullu pitsaassusaata pilliutigineqassannginnera, tunngavilersuutaavoq.

Aatsitassanut Ikummatissanullu Naalackersuisoqarfiup oqaatigaa: ” **Oqartussaasunut utertitsilluni akiliisarneq.**

*Aatsitassanut Ikummatissanullu Naalackersuisoqarfiup oqaatigissavaa, Siunnersuummi oqartussaasut suliarinninnerannut akiliisitsiniartarnissamut periarfissamik atuutsitsisoqalersoq. Aatsitassanut Ikummatissanullu Naalackersuisoqarfik aallaaviatigut oqartussaasut suliarinnittarnerannut nalinginnaasumut oqaaseqaatissaqanngilaq, kisianni Aatsitassanut Ikummatissanullu Naalackersuisoqarfiup inassutigaa, oqartussaasut suliarinnittarnerata pillugu aalajangersakkat, tamanna pillugu aalajangersakkanik erseqqinnerusunik aalajangersaasoqarsimappat, sullivinni avatangiisinut suliaasaqarfimmi tamarmi assigiimmik oqaasertaqartillugit aalajangersarneqassasut.*

*Aatsitassanut Ikummatissanullu Naalackersuisoqarfiup isumaa malillugu, aatsitassanut suliaasaqarfimmi aamma erngup nukinganut suliaasaqarfimmi oqartussaasut suliarinnittarnerannut tunngatillugu inatsimmi immikkut tunngavissamik atuutsitsisoqalernissaa naapertuutinngilaq. Aalajangersagaq naligiimmik pinninnissaq pillugu tunngaviusoq aallaavigalugu, aammalu matuma siuliani Siunnersuummi kapitali 11-mut tunngatillugu oqaaseqaatinut nangissutigalugu, inuussutissarsiornermi suliaasaqarfinnut tamaginnut nalinginnaasumik oqartussaasut suliarinnittarnerannut tunngassuteqartariaqarluarpoq.*

*Taamaattumik Aatsitassanut Ikummatissanullu Naalackersuisoqarfiup inassutigaa Siunnersuummi § 72 tamakkiitillugu peerneqassasoq. Taamaassanngippat Alternativt*



*indstiller Aatsitassanut Ikummatissanullu Naalackersuisoqarfiup inassutigaa Siunnersuummi §§ 72 aamma 73 ataatsimoortillugit allanneqassasut, taamaalilluni aatsitassarsiorluni aamma erngup nukinganut ingerlataqarnernut innersuussineq peerneqassalluni.*

*§ 73-imut nassuiaatini allassimavoq, namminersornermut inatsimmi § 7, imm. 2, nr. 1. naapertorlugu nakkutilliinermut il.il. atatillugu isertitat, isertitanut nassuiaassut naapertorlugu aatsitassarsiornermi isertitaanngitsut. Aatsitassanut Ikummatissanullu Naalackersuisoqarfiup inassutigaa, tamanna danskit Aningaasaqarnermut ministereqarfianut paasinierneqassasoq, taanna isumaqataanersoq imaluunniit isertitat aningaasartuutillu naatsorsorneqarlutik, taamatullu oqartussaasut suliarinninneranni piffissamik atuinermik nalunaarsuisoqarluni aammalu nalunaaquttap akunneranut akigititassaq naatsorsorneqarluni, naatsorsuutit ukiumoortumik aatsitassarsiornermit isertitat pillugit naalagaaffimmut suliarineqartartut assigalugit, naatsorsuutinik kissaateqarnersut.”*

Imartani aamma nunami aatsitassanut suliassaqarfimmi kiisalu erngup nukinganut ingerlatanut oqartussaasut suliarinninnerannut matussutissatut akiliummik akiliisitsisarnissamut immikkut inatsimmi tunngavissaq, suliassaqarfik akisussaaffigilerlugu tiguneqanngitsuuppat, atuuttussamut inatsisitigut inissisimanermut assinguvoq.

Siunnersuummi oqartussat suliarinninnerannut matussutissatut akiliummik akiliisitsisarnissaq pillugu aalajangersakkat, imartani taamatullu nunami aatsitassarsiornermik suliqaarnermut atuupput. Tamanna maannamut inatsisinut atuuttunut naapertuuppoq. Tamanna pissutigalugu innersuussinerit peerneqartariaqanngillat. Nunami aatsitassarsiornermut suliassanik aamma erngup nukinganut suliassanik oqartussaasut suliarinninnerannut akiliummik akiliisitsisarnissamut periarfissaqarnermut, ilaatigut aatsitassarsiornermut suliassat nakkutilliinermut oqartussaasunut artukkersuissannginnerat, taamaalillunilu suliassaqarfini allani nakkutilliinerup ilitsersuisarnerullu pitsaassusaata pilliutigineqassannginnera, tunngavilersuutaavoq.

Taamaalilluni maannakkut akiliutinut aalajangersakkat suliassaqarfinnut tamaginnut atuutsilerlugit annertusineqarnissaat siunnersuummi kissaatigineqanngilaq.

§ 73-imut nassuiaatit tusarniaaffigineqartup oqaaseqaataanut naapertuuttumik iluarsineqarput.

## Siunnersuummi aalajangersakkanut ataasiakkaanut nassuiaatit

### § 1-imut

#### Imm. 1-imut

Aalajangersagaq inatsisip atuuffissaannut aammalu inatsit naapertorlugu allaffissornikkut peqqussutit ilusilersorneqarnerannut malittarisassatut atuutissaaq. Tamanna kap. 4-7-imi aalajangersakkat qitiutinneqartut annertussusissaannut immikkut pingaaruteqassaaq.

Paragraffi ilaatigut peqqinnissamut oqaatsip annertusisamik atorneqartup ilaatigullu isumannaallisaanermut peqqinnissamullu suliffeqarfiup sulineranut siunnersuummi matumani pingaartinneqartumut ataqatigiissillugu isigineqassaaq.

#### Nr. 1-imut

Oqaatsimi “teknikkikkut inooqatigiinnikkullu ineriartornermut naapertuuttumik” aalajangersarneqarpoq sullivinni avatangiisit periarfissat ineriartorerup periarfissarititai ilutingalugit pitsanngorsarneqassasut. Taamaalilluni sullivinni avatangiisit, assersuutigalugit isumannaallisaanermut peqqinnissamullu tunngatillugu, suliaqarnermut pitsaanerpaanut nallersuuttuunissaa anguniarneqassaaq.

Oqaatsimi “teknikkikkut inooqatigiinnikkullu ineriartorneq “ aningaasaqarnermut tunngasunut mianerinninnissaq ilaatinneqarpoq.

Isumannaatsumik peqqinnartumillu sullivinni avatangiiseqarnermi ilaatigut ilaatinneqarput:

1. Nalinginnaasumik pisartut sulitilluni ajutoornissamut aamma inuussutissarsiornermi nappaatinut illersuinissaq, tassa imaappoq ilaatigut tassanngaannaq pisunit sunniinerit, ilaatigut piffissami qanittumi imaluunniit ungasinnerusumi sunniinerit, timikkut eqqarsartaatsikkullu peqqissutsimi ajoqusiinermik malitseqartartut.

2. Sunniinernut allanut peqqissutsimik ajorseriartitsisunut illersuinissaq. Ilanngullugu ilaatigut sunniinerit nappaatinut ersiutit nalinginnaasut saqqummertinnagit timikkut eqqarsartaatsinullu peqqissuseq qaangiuteqqittartoq imaluunniit ataavartussat.

Assersuutigalugu taaneqarsinnaavoq akuutissanik toqunartulinnik imaluunniit timimut tunngasunik annikitsumik, kisianni sivisuumik sunnertinneq, ingerlaannaq nalinginnaasunik ersiuteqartangitsoq, ilanngullugit sulinermi naleqqutinngitsumik imaluunniit nuanninngitsumik timip inissisimanagera aamma nukersorerit.

Sullivinni avatangiisini ilaasut ataasiakkaat, soorlu tipi, pujoralaat, nipiliorneq, kissarneq, qaamanernut tunngasut, kusanaatsumik isikkulinnut tunngasut aamma ataasiinnarmik sammiveqarneq, tamarmik immikkut sulisunut nuanninngitsumik misigineqartut aammalu allatigut uuttortaanerit assigisaalluunniit tunngavigalugit, annikitsuaraannarmik sunniuttartutut isigineqartut, apeqqutaatinnagit sunniinerit tamarmiusut ataatsimut katillugit, ilanngullugu akornusiisut ataasiakkaat sakkortussusaat, akulikissusaat sivilissusaallu, taamaakkaluartoq peqqissutsimut ajorseriartitsisinnaapput.

Sunniineq aallaqqaammut taamaallaat ilorrisimaarnermik ajorseriartitsisoq (qiimassuseq, neriumassuseq, suleqatigiinnermi pissutsit il.il.), piffissap ingerlanerani toqqaannartumik peqqissutsimut ajoqusiisumik sunniuteqaleriartorsinnaavoq, assersuutigalugu eqqarsartaatsikkut nappaatit assigiiartumik tuaviuussamillu sulinermi pilersut aamma tappissutsimi akornusersuinerit naleqqutinngitsumik qaammaqquteqarnermi pilersinnaasut. Taamatuttaaq timi atorlugu sulerulunnermi nungullariartorneq piffissap sivilissuup ingerlanerani akiuussinnaassuseqarunnaarsitsisinnaavoq.

Peqqissuseq eqqaarsaatigalugu sullivinni avatangiisit nalilersorneqarneranni, sullivinni avatangiisini ilaasut ataasiakkaat kiisalu sullivinni avatangiisini ilaasut ataasiakkaat sivilissumik sunniuteqartarnerat, isiginiarneqassapput.

3. Sulitilluni atortunik timimut naleqqussagaasunik aqqissuussinernik atuineq, tassa imaappoq sulinerup ingerlanerani, sullivimmik, teknikkikkut atortorissaarutini aamma akuutissanik atortussanillu sulisunut naleqquttunngorlugit naleqqussaaneq. Utoqqaat innarluutillillu immikkut eqqarsaatigineqassapput.

Nr. 2-mut

Aalajangersakkami sullivinni avatangiisini ajornartorsiutit sapinngisamik suliffeqarfinni suleqataasunit (sulisut, sulianut aqutsisut aamma pisortat il.il.) nammineerluni iluarsiniarneqartarnissaasa aalajangersarnissaa siunertarineqarpoq.

Suliffeqarfiit suliaqarnermi tassani nuna tamakkerlugu suliffeqarnermi kattuffinnit ikiorneqartassapput, takuuk Sullivinni avatangiisinut siunnersuisooqatigiit il.il pillugit kap. 12.

Inissisimaffinni tamaginni suleqataasut suliniarnerat Sullivinnik Nakkutilliisoqarfiup siunnersuut malillugu siuarsarniartassavaa aammalu tapersersussallugit ilitsersortassallugillu, takuuk § 68, nr. 1 aamma 5. Aammattaaq Inatsisartut inatsisaat aamma maleruagassat Inatsisartut inatsisaat naapertorlugu aalajangersarneqartut malinneqartut, Sullivinnik Nakkutilliisoqarfiup misissortassavaa, takuuk § 68, nr. 6-8.

Imm. 2-mut

Imm. 1-imut nassuiaatini nassuiarneqartut, oqaaseq sullivinni avatangiisit isumannaatsut peqqinnartullu, timikkut taamatullu tarnikkut peqqissuunissap isumannaatsuunissallu eqqarsaatigineqarnissaanik imaqarpoq.

Imm. 2-mi erseqqissarneqarpoq, tarnikkut sullivinni avatangiisit, timikkut sullivinni avatangiisinut naligiissinneqartut, aammalu sulisitsisup sulisuminut taakkua tamaasa atuutsillugit iliuseqarnissamut pisussaaffeqartoq.

Tarnikkut sullivinni avatangiisit sulinermi pisunut arlalinnut, sulisup isumannaatsuuneranik peqqissusaanillu aarlerinartorsiortitsisinnaasunut, tunngassuteqarput. Pisut taakkua asersuutigalugu tassaasinnaapput sulinerup imarisaa, aammalu sulinerup aaqqissugaanera, aaqqissuussaannermut tunngasut ataasiakkaat sulinerannut pingaaruteqartut kiisalu sulinermi inooqatigiinnermi attaveqatigiinnerit.

Sulisitsisup sulisuminut tarnikkut sullivinni avatangiisit isumannaatsuutissavai, taamatullu sulisitsisup timikkut sullivinni avatangiisit isumannaatsuutissallugit.

Taamaalilluni Inatsisartut inatsisaanni timikkut tarnikkullu sullivinni avatangiisit pineqartunut ilaasut, Inatsisartut inatsisaata oqaasertaani ersarissumik allassimappat naleqquttuutinneqarpoq, taamaalillutik sulisitsisut qanoq naatsorsuutigisaqartoqarnersut ilisimassallugu. Taamaalilluni tarnikkut sullivinni avatangiisit timikkut sullivinni avatangiisit assigalugit illersugaasimatillugu, maannamut inatsisini inissisimanermut tunngatillugu alajangersagaq allangortitsinngilaq. Kisianni tamatuma maannakkut Inatsisartut inatsisaata oqaasertaani erseqqissumik allassimalernera aalajangersakkami qulakkeerneqarpoq.

## *§ 2-mut*

Imm. 1-imut

Inatsimmi suliassa qarfik aallaaviatigut tassaavoq sulineq tamarmi sulisitsisumit ingerlanneqartoq. Taamaalilluni siunertaavoq sullivinni avatangiisit pillugit Inatsisartut inatsisaanni tunngaviusumi sulisitsisoq sullillugu suliarneq sunaluunniit pineqartunut ilaassaaq.

Inuussutissarsiutit allat assigalugit inuussutissarsiutigalugu aallaaniarneq piniarnerlu inatsimmi suliassa qarfiup ataaniippoq.

Imm. 2-mut

Aalajangersakkami, sulinermut sulisitsisup nammineerluni angerlarsimaffiani aammalu inoqutigiinni ilaasunit ingerlanneqartumut tunngatillugu, inatsisip atuuffissai killilerneqarput. Taamaattoq sulineranut taakkununga sullivinni avatangiisit pillugit tunngaviusunik maleruagassarpoq atuuttussanik, takuuk imm. 3-mi aalajangersagaq.

Inatsisip atuuffissaa sakkutuutut kiffartuussivinnermut atuuttussaajunnaarlugu killilerneqarpoq.

Imm. 3-mut

Aalajangersakkami Inatsisartut inatsisaata atuuffissai pingaarnert annertusitinneqarput, taamaalilluni aalajangersimasumik annertussusilinnik navianartoqartuni sulineq pillugu aalajangersakkat nalinginnaasumik atuutissallutik, tassa imaappoq aamma suliffeqarfinnut, sulisitsisoq sullillugu sulisoqartoq oqartoqarsinnaanani, aammalu sulinermut tunngasunut siunnersuummi imm. 2-mi ilaatinneqanngikkaluartunut.

Imm. 3-mi nr. 1-4 taamaalillutik isumaqarput, isumannaallisaanermut peqqinnissamullu tunngatillugu isumannaatsuutitsinissaq pillugu maleruagassat nalinginnaasut, nalinginnaasumik atuuttut. Taamaalilluni sulisitsisut arlallit akornanni suleqatigiinnermut atatillugu, pilersuisuusunut sanatitsisuusunullu il.il. (nr. 1), sulinerup ingerlanneqarneranut atatillugu (nr. 2), teknikkikkut atortunik atuinermut il.il. tunngatillugu (nr. 3) aammalu atortussianik atortussanillu atuinermut il.il. tunngatillugu (nr. 4).

Aalajangersakkami qinngornerit ioninngortitsisartut pillugit aamma qinngornernut illersuuteqarnissaq pillugu Inatsisartut Inatsisaata atuuffissai allanngortinneqanngillat.

Imm. 3-mi nr. 5-imi assersuutigalugu bussinik, biilinnik lastilinnik, taxanik aamma qamutinnik motoorilinnik aputaajaanermut atornerqartartunik ingerlaartarneq siunnerfigineqarpoq.

Inuusuttut navianartunik suliaqartarnerat pillugu maleruagassat sulinermut sulisitsisoqarani ingerlanneqartumut aamma atuupput. Imm. 3-mi nr. 6-imi ilaatigut inuusuttut aamma ilinniarnerminni, assersuutigalugu inuussutissarsiornermi sungiusarnerminni, illersorneqarsinnaanerat qulakkeerneqarpoq.

Imm. 4-mut

USA Pituffimmi amerikamiunut sulisunut inatsiseqartitsimmat, inatsimmi aalajangersakkat amerikamiut sullivinni avatangiisinut maleruagassaannit tunullunneqarnissaat ilaatigut pisariaqartinneqarpoq. Taamaattumik aalajangersakkamik § 2, imm. 4-mut assingusumik ilanngussinissaq pisariaqarpoq, taanna malillugu Naalackersuisut aalajangiisinnaasut

sakkutooqarfinnut sanaartukkanullu avatangiisit pillugit malittarisassat allat atuutissasut taarserlugu imaluunniit inatsimmi aalajangersakkat saniatigut.

Piginnaatitsissuteqarnek, sulisunut toqqaannartumik sakkutooqarnerup ataaniinngitsunut, kisianni taamaakkaluartoq sakkutooqarfiit sumiiffiisa iluani sulisunut, maleruagassat eqqarsaatigalugit, pisariaqarsinnaavoq.

### *§ 3-mut*

Imm. 1-imut

Silaannakkut angallassineq.

Siunnersuut silaannakkut angallassinermut nunami sulinermut tunngatillugu taamaallaat atuuppoq. Silaannakkut angallassinermut suliaasaqarfimmi sullivinni avatangiisit Kalaallit Nunaanni Namminersorneq pillugu inatsimmi, allattuiffik II, nr. 16-imi taaneqartutut *Silaannakkut angallassinermut suliaasaqarfiup* ataaniippoq. Silaannakkut angallassinermut suliaasaqarfik Namminersorlutik Oqartussanit suli tiguneqarnikuunngilaq.

Timmisartunut inissiivinni, sannavinni, allaffinni kiisalu sulinerni allani nunami sulisunit ingerlanneqartuni sulineq, inatsimmi pineqartunut ilaasoq, erseqqissarneqarnissaa, aalajangersakkami siunertarineqarpoq.

Imm. 2-mut.

Imarsiorneq aamma aalisarneq.

Siunnersuut umiarsuarnik, ilanngullugit aalisariutit, usilersornermut usingiarnermullu tunngatillugu taamaallaat imarsiornermut aalisarnermullu, amutsivimmi umiarsuarmi sulinermut aamma sulinermut tamatumunnga sanilliunneqarsinnaasumut, atuuppoq. Imarsiornerup isumannaatsuunissaa Kalaallit Nunaanni Namminersorneq pillugu inatsimmi, allattuiffik II, nr. 20-mi suliaasaqarfittut immikkoortutut allassimavoq. Imarsiornerup isumannaatsuunissaanut suliaasaqarfik suli Namminersorlutik Oqartussanit akisussaaffigilerlugu tiguneqanngilaq.

### *§ 4-mut*

Aalajangersakkami aalajangersarneqarpoq angerlarsimaffimmi sulineq inatsimmi pineqartunut ilaasoq, kisianni tamatumunnga killilersuinerit aalajangersarnissaannut Naalakkersuisut piginnaatinneqarlutik. Assersuutigalugu sulliviup aaqqissuunneqarnera pillugu, ullormut qasuersarfeqartarneq pillugu aamma sapaatip akunneranut ulloq unnuarlu sulinngiffeqartarneq pillugu maleruagassanut tunngatillugu pisariaqarsinnaavoq.

Aalajangersagaq nalunaarutini Naalakkersuisunit maannamut nalunaarutit atuuttut taartissaattut aalajangersaanermi atorreqassasoq naatsorsuutigineqarpoq.

Nalunaarutininik nutaanik aalajangersaasoqarnissaata tungaanut, aalajangersagaq Sullivinnik Nakkutilliisoqarfiup nalunaarutaani nr. 1346, 15. december 2005-imeersumi, Kalaallit Nunaanni Isumannaallisaanermik peqqinnissamillu suliaqarneq pillugu nalunaarummi, kingusinnerusukkut allannguuteqartumi, atorreqassaaq. Aalajangersagaq taamatuttaaq Kalaallit Nunaanni piffissaq qasuersaarfiusussaq aamma ulloq unnuarlu sulinngiffeqarfissaq pillugit Sullivinnik Nakkutilliisoqarfiup nalunaarutaani nr. 32, 23. januar 2006-imeersumi atorreqarpoq.

#### *§ 5-imut*

Aamma suliffeqarfiit mikisut isumannaallisaanermik peqqinnissamillu nammineerlutik suliaqarnissamut pisussaaffeqarput.

Aamma suliffeqarfiit isumannaallisaanermut peqqinnissamullu aqqissuussaasumik suliaqarsinnaanissamik mikivallaartut, ajornartorsiutit eqqumaffigissavaat aammalu suliffiup iluani suleqatigiinnikkut aaqqiiviginissaat ilungersuutigissallugu.

Nunatta nunami sumiiffitsigut isorartunerujussua aammalu Sullivinnik Nakkutilliisoqarfiup sumiiffimmut sullivinni najuunnissaasa ajornakusoornera eqqarsaatigalugu, suliffeqarfiit namminneerlutik isumannaallisaanermi peqqinnissamilu ajornartorsiutiminnut piginnaasaqarnissaat pingaaruteqartorujussuuvoq. Taamaattumik siunnersuutigineqarpoq, immikkut ittunik pissuteqartumik pisariaqartoq naliliisoqartillugu, suliffeqarfinni 10-t inorlugit sulisoqartuni isumannaallisaanermik suliaqarnerup aqqissuusaaneramik pilersitsinissaq pillugu Naalakkersuisut maleruagassanik aalajangersaasinnaassasut. Tamanna assersuutigalugu illuliortiternermut sanaartornermullu suliassaqarfimmi pisariaqartinneqarsinnaavoq.

Paarlattuanik tamanna naleqqussorineqarpat, suliffeqarfinni 10-nik amerlanernilluunniit sulisoqartuni isumannaallisaanermik suliaqarnermut aqqissuussaaneq pillugu piumasagaat Naalakkersuisut § 8, imm. 7 malillugu atuutsinngissinnaavaat.

#### *§ 6-imut*

Imm. 1-imut

Imm. 1-imi aalajangersarneqarpoq suliffeqarfinni 10-nik imaluunniit amerlanerusunik sulisoqartuni isumannaallisaanermik peqqinnissamillu suliaqarneq nalinginnaasumik aaqqissuussaasumik ingerlanneqartassasoq.

Imm. 2-mut aamma 3-mut

Imm. 2 aamma 3 malillugit sulisut aallaqqaammut isumannaallisaanermut sinniisussamik toqqaassapput, tamatumalu kingorna suleqatigiit pilersinneqassallutik.

Immikkoortortaqarfimmi imaluunniit suliassaqarfimmi sulianut aqutsisoq isumannaallisaanermut sinniisuutitaq pineqartoq peqatigalugu suleqatigiinneq pilersitsissasoq naatsorsuutigineqarpoq.

Isumannaallisaanermut sinniisussamik tamatigut toqqaasoqartassaaq, aammalu isumannaallisaanermut suleqatigiit suliassaqarfiaata iluani sulisut tamarmik isumannaallisaanermut sinniisussatut sulinissamut qinersisinnaatitaapput aammalu qinigaasinnaallutik.

Aalajangersakkat Sullivinnik Nakkutilliisoqarfiup nalunaarutaani nr. 1346, 15. december 2005-imeersumi kingusinnerusukkut allannguuteqartumi, itisilerneqarput – Suliffeqarfinni isumannaallisaanermik peqqinnissamillu suliaqarneq pillugu nalunaarummi kiisalu Isumannaallisaanermi suleqatigiit aamma Isumannaallisaanermi sinniisussat pillugu AT-mi ilitersuut GL.6.2 september 2006-imeersumi aalajangersagaq itisilerneqarpoq.

#### *§ 7-imut*

Imm. 1-imut

Suliffeqarfimmi aqutsisumut sinniisussaq akisussaassuseqartoq paasineqassaaq tassaasoq inuk sulisitsisoq sinnerlugu isumannaallisaanermut peqqinnissamullu tunngasut, isumannaallisaanermut ataatsimiititaliami suliarineqartussat, pillugit iliuuseqarsinnaasoq.

Imm. 2-mut

Sullivinnik Nakkutilliisoqarfiup § 7, imm. 2-mi inuit taaneqartut attaveqarfiginissaannut pisussaaffeqarnera, aalajangersakkami uniffik siullermi aalajangersarneqarpoq. Pisussaaffiup taassuma pinngitsoorani pisussaanninneranut pissutaavoq, elevatorinik, igaasarsuit aalaliortut allanillu teknikkikkut ikkussukkanik akuttoqqatigiimmik takusaanermi, nakkutilliisup tamatigut suliffeqarfimmi aqutsisumut aamma isumannaallisaanermut aaqqissuussaasumut attaveqartarnissaa pisariaqanngitsoq naliliisoqarnera.



Oqaatigineqassaaq sulisut allat, ilanngullugit sulisut sinniisai, taamatuttaa apeqputinik sunilluunniit isumannaallisaanermut peqqinnissamullu pingaaruteqartunik saqqummiussinissamut periarfissaqarnissamut taamatuttaa nalinginnaasumik pisinnaatitaaffeqarmata.

### *§ 8-mut*

#### **Imm. 1-imut**

Isumannaallisaanermut ataatsimiititaliap suliassaasa sunniuteqarluartumik sularineqartarnissaannut, isumannaallisaanermik suliaqarnermut ulluinnarni aqutsisumik, ataatsimiititaliaq sinnerlugu iliuuseqarsinnaasumik toqqaasoqarnissaata ataatsimiititaliamit isumagineqarnissaa, pisariaqarpoq.

Suliffeqarfinni suliaqarnermut tassunga immikkut isumannaallisaanermut aqutsisoqartitsiviunngitsuni, isumannaallisaanermut ataatsimiititaliap ilaasortaasa akornanni aqutsisussamik toqqaasoqartariaqarpoq, piffissamik pisariaqartumik atugassinneqartumik.

Tamanna pillugu maleruagassat Kalaallit Nunaanni suliffeqarfinni isumannaallisaanermik peqqinnissamillu suliaqarneq pillugu nalunaarummi nr. 1346 af 15. december 2005-imeersumi, kingusinnerusukkut allannguuteqartumi, aalajangersarneqarput.

#### **Imm. 2-mut**

Inummik ataqatigiissaarisussamik, akuerisaasumik ilinniagaqarsimasumik, toqqaanissaq sanatitsisup isumannaassavaa.

Imm. 2-mi Naalakkersuisut, sullivinni avatangiisinut ilinniartitaaneq aamma illuliortiternermut sanaartormullu suliassaqarfiup iluani isumannaallisaanermik peqqinnissamillu suliaqarnermut ataqatigiissarisut sullivinni avatangiisinut ilinniartitaanerat pillugit maleruagassanik aalajangersaanissamut, piginnaatinneqarput.

Ataqatigiissaarisup isumannaallisaanermut peqqinnissamullu tunngatillugu suliassai, isumannaallisaanermut suleqatigiinni ilaasortatut suliassanit allaanerummata, immikkut ataqatigiissaarisunut ilinniartitaanermik ingerlatsinissaq naleqqussorineqarpoq. Ilinniartitaanerup taassuma sullivinni avatangiisinut ilinniartitaaneq nalinginnaasoq taarserpaa.

Illuliortiternermik sanaartornermillu suliassanik suliaqarnerup nalaani isumannaallisaanikkut peqqinnissakkullu iliuuseqarnerit ataqatigiissaarneqarnissaasa isumagineqarnissaannut, ataqatigiissaarisooq isumannaallisaanermut peqqinnissamullu apeqquutit iluanni pisariaqartunik ilisimasaqassasoq ilinniarsimasuussasorlu imaluunniit pisariaqartunik piukkunnassuseqassasoq pillugu maleruagassanik Naalakkersuisut aalajangersaasinnaapput.

Sullivinni avatangiisinut ilinniartitaaneq aamma illuliortiternermik sanaartornermillu suliaqarnerup iluanni isumannaallisaanermut peqqinnissamullu suliaqarnermik ataqatigiissaarisunut sullivinni avatangiisinut ilinniartitaaneq pillugit maleruagassat erseqqinnerusut, Kalaallit Nunaanni sullivinni avatangiisinut ilinniartitaaneq pinngitsoorani ingerlanneqartussaq pillugu nalunaarummi nr. 914, 26. juni 2013-meersumi kingusinnerusukkut allannguuteqartumi, atuutsinneqarput. Tassani ilaatigut maleruagassat aalajangersarneqarput pillugit:

- Atuartitsinermut perorsaanikkut tunngaviusut.
- Ilinniartitaanermut pilersaarut.
- Sullivinnik Nakkutilliisoqarfik ataqatigiissaarisunut ilinniartitaanermik neqerooruteqartunut akuersisartuusooq, ilanngullugit neqerooruteqartut ilisimasaannut piukkunnassuseqarnerinullu piumasaqaatit erseqqinnerusut.
- Ataqatigiissaarisunut sullivinni avatangiisinut ilinniartitaanermik neqerooruteqartoq, Sullivinnik Nakkutilliisoqarfimmit akuerisaasooq, ilinniartitaanermik neqerooruteqarsinnaassasooq. Neqerooruteqartut allat piumasaqaatit taamaaqataat naammassisimasussaavaat. Ataqatigiissaarisunut ilinniartitaaneq naammassineqartoq, sullivinni avatangiisinut ilinniartitaanermut naammassineqartumut sanillunneqassaaq aammalu suliassaqarfinni tamaginni sullivinni avatangiisinut ilinniartitaaneq assigalugu atorineqarsinnaassalluni.

Tamatuma saniatigut pikkorissaanermut uppernarsaammik tunniussisoqarsinnaaneranut piumasaqaatit suut naammassineqarsimassanersut nalunaarummi aalajangersarneqarput.

### Imm. 3-mut

Aalajangersakkami sullivinni avatangiisinut inatsit malillugu isumannaallisaanermik suliaqarnerup aaqqissuussaanerani suliassat nalinginnaasut aamma suliaqartussat, avatangiisinik illersuinermi ajornartorsiutinik suliffeqarfiup ingerlataasa malitsigisaanik avatangiisini qanittumiittuni pilersunik tapertaqartinneqarsinnaanerit, inatsisitigut tunngavissaqalersinneqarpoq. Annertusititsinermut taamaattumut suliffeqarfiup taassumalu sulisuisa akornanni isumaqatigiissuteqarnissaq pisariaqarpoq.

Tamanna pisariaqartinneqalissappat, suliffeqarfiup isumannaallisaanermik suliaqarneranut aaqqissuussaanagerup ajornerulersinneqarnissaata pinngitsoortinnissaa siunertaralugu, assersuutigalugu suliffeqarfimmi isumannaallisaanermik suliaqarnerup aaqqissuussaanagerani sullivinni avatangiisini suliassanut pisariaqartumik piffissaqartitsinissaq qulakkeerniarlugu, maleruagassanik erseqqinnerusunik aalajangersaanissamut Naalakkersuisut piginnaatinneqarput.

Imm. 4-mut

Aalajangersagaq malillugu sullivinni avatangiisinut inatsimmi § 6 aamma § 7, imm. 1, imm. 5 malillugu atugassarititaasut Naalakkersuisunit aalajangersarneqartut atuutsillugit, isumaqatigiissuteqarnermi saneqqunneqarsinnaavoq.

§ 6-imi aamma § 7, imm. 1-imi piunasaqaatit nalinginnaasut saneqqunneqarnissaannut siunertaasoq tassaassaaq, suliffeqarfiup isumannaallisaanermik peqqinnissamillu suliaqarnerata nukittorsarneqarnissaa sunniuteqarluarnerulersinneqarnissaalu.

Marlunni isumaqatigiissuteqartoqarsimassaaq:

Siullermik sulisartut kattuffiisa ataatsip arlallilluunniit aamma sulisitsisut kattuffiata illuatungiusup imaluunniit kattuffiisa illuatungiusut, imaluunniit suleqataasut taakkua tamatumunnga piginnaatitaasa akornanni isumaqatigiissut.

Aappaattut – isumaqatigiissummut siulliullugu taaneqartumut killissaliussat iluanni – sulisitsisup taassumalu sulisuisa, ilanngullugit aqutsisuusinnaasut, akornanni suliffeqarfimmi isumaqatigiissut. Isumaqatigiissut suliffeqarfimmut tamarmut imaluunniit taassuma ilaanut tunngasuusinnaavoq. »Suliffeqarfiup ilaa« ilaatigut tassaasinnaavoq immikkoortortaarfik imaluunniit suliassaarfik, takuuk Inatsisartut inatsisaanni § 6, imm. 2. Isumaqatigiissut suliffeqarfiup ilaani isumaqatigiissummut tunngassuteqartumi sulisitsisup taassumalu sulisuisa akornanni taamaallaat isumaqatigiissutigineqassasoq naatsorsuutigineqarpoq.

Aalajangersakkat sulisartut isumaqatigiissutaannut atuuttunut assigisaannulluunniit najukkami isumaqatigiissuteqarnermut tunngassuteqartut, isumaqatigiissutinut taamaattunut aallaavigineqarsinnaapput.

Suliffeqarfiup isumannaallisaanermik peqqinnissamillu suliaqarnerat suliffeqarfiup ilusaanut naapertuuttuunissaa, aammalu aaqqissuussaanagerup taassuma suliffeqarfiup tamatumunnga suliaqarneranik nukittorsaasuunissaa sunniuteqarluarnerulersitsinissaalu, suliffeqarfimmi isumaqatigiissummi qulakkeerneqassaaq. Kalaallit Nunaanni suliffeqarfimmi isumannaallisaanermik peqqinnissamillu suliaqarneq pillugu nalunaarummi nr. 1346, 15.

december 2005-imeersumi, kingusinnerusukkut allannguuteqartumi, tamanna pillugu maleruagassat aalajangersarneqarput, ilaatigut isumaqatigiissut allaganngorneqarsimassasoq kiisalu suliffeqarfimmiissasoq aammalu suliffeqarfimmi sulisunit pissarsiarineqarsinnaatinneqassasoq. Aammattaaq isumannaallisaanermik peqqinnissamillu suliaqarnerup aaqqissuussaanerata allanngortinneqartup suliassanik isumaginninnermik nukittorsaanissaa sunniuteqarluarnerulersitsinissaalu isumaqatigiissummi minnerpaamik qulakkeerneqassasoq, aammalu isumaqatigiissut ingerlatassat/periaasissat siunertaasup angunissaanut atorneqarsinnaasut nassuiarneqarnerannik imaqartariaqartoq, pillugit maleruagassat aalajangersarneqarput, taamatullu isumaqatigiissummi suliffeqarfimmi piviusunngortitsinissamut malinnaanissamullu suleriaasissaq allassimasariaqarluni.

#### Imm. 5-imut

Aalajangersagaq malillugu inatsimmi § 6 aamma 7, imm. 1 atugassarititaasut suut atuutsillugit isumaqatigiissuteqarnikkut saneqqunneqarsinnaanersut, takuuk § 8, imm. 4, pillugu maleruagassanik aalajangersaanissamut Naalakkersuisut piginnaatinneqarput.

Tamanna pillugu Kalaallit Nunaanni suliffeqarfimmi isumannaallisaanermik peqqinnissamillu suliaqarneq pillugu nalunaarummi nr. 1346, 15. december 2005-imeersumi, kingusinnerusukkut allannguuteqartumi, kapitali 5-imi maleruagassat aalajangersarneqarput.

Ilaatigut allaffissornikkut maleruagassani allassimavoq, suliffeqarfimmi sulisut aqutsisutut piginnaatitaaffeqanngitsut tamarmik, isumannaallisaanermut sinniisussanik qinersinermi qinersinnaatitaanerisa aammalu isumannaallisaanermut sinniisutut suliaqarnissamut qinerneqarsinnaanerisa qulakkeerneqarnera ingerlaannassasoq.

Siunnersuut malillugu aamma imm. 4 malillugu isumaqatigiissutit qanoq isumaqatigiissutigineqartassanersut pillugu maleruagassanik Naalakkersuisut aalajangersaanissaat periarfissaqarpoq. Illuatungeriit – killissaliussat inatsimmi aalajangersarneqartut aammalu atugassarititaasut Naalakkersuisut aalajangersagaasa iluanni – isumaqatigiissutit ataasiakkaatigut qanoq isumaqatigiissutigineqassanersut paasinarsisittassagaat, naatsorsuutigineqarpoq.

#### Imm. 6-imut

Imm. 4 malillugu isumaqatigiissutit isumaqatigiissutigineqartut ataatsimoortunut isumaqatigiissutit iluseqarput. Taamaattumik isumaqatigiissutinut tunngatillugu isumaqatigiinnigissuteqarnerit, ataatsimoortunut isumaqatigiissutit nassuiarneqartarnerat aamma unioqutinneqartarnerat pillugu sulianut inatsisini maleruagassat malillugit suliarineqartassapput. Imm. 4 malillugu isumaqatigiissutit (suliffeqarfimmi isumaqatigiissutit)

unioqqutinneqassappata, siunnersuut malillugu suliaqarfinnut isumaqatigiissitsiniarnikkut aalajangiiffigineqassapput.

Imm. 7-imut

§ 10, imm. 3 isumannaallisaanermut sinniisut soraarsitaanissamut allatullu sulinermi atukkanik ajornerulersitsivigineqarnissamut illersugaanerannut tunngasoq, taaneqanngilaq, tassami aalajangersagaq taanna saneqqunneqarsinnaanngimmat.

Imm. 8-mut

Ataqatigiissaarisut ilinniartitaanerannik neqerooruteqartoqartanngippat, sullivinni avatangiisinut ilinniartitaaneq nalinginnaasoq ataqatigiissaarisut ilinniartitaanerannut taarsiullugu atorneqassasoq Sullivinnik Nakkutilliisoqarfik akuersissuteqarsinnaassaaq.

#### *§ 9-mut*

Imm. 1-imut

Aalajangersakkami sulisitsisup isumannaallisaanermik peqqinnissamillu suliaqarnermut atatillugu pisussaaffiisa pingaaruteqarnerat erseqqissarneqarpoq.

Imm. 2-mut

„Pissutsit malillugit piffissaq naleqquttoq “ paasineqassaaq tassaasoq piffissaq suliffeqarfiup pineqartup suussusaanut tassanilu isumannaallisaanikkut peqqinnissakkullu pitsaassuseqartitsinernut tunngatillugu, piffissaq naleqquttoq.

Imm. 3-mut

§ 9, imm. 3 malillugu piumasaqaat suliffeqarfiit ilaannut aningaasaqarnikkut nanertuisutut sunniussinnaammat, § 10, imm. 2-mi tapiissutit pillugit maleruagassanik aalajangersaanissamut Naalakkersuisunut piginnaatitsinermik imaqarpoq

Imm. 4-mut

Naatsorsuutigineqarpoq isumannaallisaanermik suliaqarnermut aaqqissuussaq, suliffeqarfiup isummernissaa sioqqullugu pilersaarusionerme peqataanissamut periarfissinneqassasoq.

Imm. 5-imut

Aalajangersakkami isumannaallisaanermut ataatsimiititaliap suliassaasa, soorlu pilersaarusionermeq ilaalu ilanngullugit, suliffeqarfinni minnerusuni isumannaallisaanermik suliaqarnerup ilaatut ilaatinneqarnissaasa, pingaaruteqarnera erseqqissarneqarpoq.

#### *§ 10-mut*

Imm. 1-imut

Imm. 1-imi oqaasertaliinermi, sulisitsisup isumannaallisaanermut aallartitaa, ilaatigut pikkorissarnerni il.il. pisariaqartumik peqataanermut atatillugu, taakkua suliffeqarfiup iluani imaluunniit avataani ingerlanneqaraluarpataluunniit, aningaasartuutitut isertitassanillu annaasaqartinneqassanngitsoq siunertarineqarpoq. Tamatumuuna isumannaallisaanermut sinniisut ilinniartitaanerannut aningaasartuutit aningaasalersorneqarnerat pillugu apeqqut inaarutaasumik aalajangiiffigineqarpoq. Aalajangersagaq taanna malillugu sulisitsisup pisussaaffii, ilinniartitaanermut aningaasartuutit allat aqutigalugit matussuserneqanngippata, atuutilissapput.

Imm. 2-mut

Aalajangersakkami isumannaallisaanermik suliaqarnerup aqqissuussaanerani ilaasortanut sulisitsisup aningaasartuutaannut Naalakkersuisut tapiissuteqarsinnaanerit periarfissinneqarpoq.

Imm. 3-mut

Isumannaallisaanermik suliaqarnerup aqqissuussaanerani ilaasortat, tunngavissaqanngitsumik soraarsinneqarnissamut, § 10, imm. 3-imi illersugaapput.

Imm. 4-mut

Isumaqtigiinngissuteqarnerit imm. 4 malillugu aallaaviatigut suliaqarfinnut inatsisit aallaavigalugit suliarineqassapput.

### *§ 11-mut*

Suliffissuaqarnermi ineriartorneq aamma akuutissanik nutaanik aamma sulinermi periaatsinik atuilernerq tunngavigalugu, isumannaallisaanermut peqqinnissamullu pisariaqartunik piginnaasaqartut suliffeqarfimmi najuutissasut aalajangernissaanut paragraffimi Naalakkersuisunut periarfissiissutigineqarpoq. Sulisitsisup kiffaanngissuseqarluni atorfinitsitsisinnaatitaanerani akuliunnissaq maleruagassami siunertaanngilaq. Sulisitsisup maleruagassat malillugit pisussaaffini assigiinngitsunik iliuuseqarluni naammassisinnaavai, tassami taamatut ikiortissanik piviusumik pissaqarnissaq aalajangiisuussaaq. Taamaalilluni suliffeqarfimmi sulisunut allanut ilanngullugit isumannaallisaanermut sulisussanik atorfinitsitsiniarnerluni, imaluunniit assersuutigalugu immaqa suliffeqarfimmi

siunnersuisartumi siunnersortinik ikiorteqartarniarnerluni, sulisitsisup nammineq aalajangertussaavaa.

### *§ 12-imut*

Pisussaaffiit itisilerneqarnerat pingaartumik kap. 4-7-imi pivoq, kisianni assersuutit taakkua allassimasut tamakkiisuunngillat. Aamma qasuersaarfeqartitsinissaq aamma ulloq unnuarlu sulinngiffeqarneq pillugit kap. 8-imi, inuusuttut 18-it inorlugit ukiullit pillugit kap. 9-imi aamma nakorsamit misissortittarneq pillugu kap. 10-imi aalajangersakkat, sulisitsisunit pinerluttulerinermut inatsimmi akisussaaffeqarfiusumik malinneqartussaapput.

### *§ 13-imut*

#### **Imm. 1-imut**

Sullivimmi sulisitsisoq pissutsini tamaginni sulinermut tunngassuteqartuni sulisut isumannaatsuunissaasa peqqissuunissaasalu qulakkeernissaanut nalinginnaasumik pisussaaffeqarput. Sulinerup pilersaarusiorneqarnerani aaqqissuunneqarneranilu, sulinerup ingerlanneqarneranut atatillugu suliffimmi sullivimmi avatangiisinut tunngasut ataatsimoortillugit nalilersorneqartarnissat (sullivimmi nalilersuineq) piunasaqaataavoq.

Pingaartumik sullivimmi nalilersuinerup (APV), sulisitsisup isumannaallisaanermik suliaqarnermut aaqqissuussaananermik imaluunniit sulisunik akuutitsilluni ingerlannissaanut pisussaaffigisaata, erseqqinnerusumik pilersaarusiorneqarneranut, aaqqissuunneqarneranut ingerlanneqarneranullu atatillugu allaganngorlugi suliarineqartarnissaata qulakkeernissaa, aalajangersakkami siunertaavoq.

Allaganngorlugi suliarinneriaaseq aamma nalilersuinerup inernerata ersaritsinnissaanut, taamaalillunilu suliffeqarfimmi aqutsisunut taamatullu sulisunut pissarsiarineqarsinnaatinnissaanut pisariaqarpoq kiisalu ilaatigut Sullivinnik Nakkutilliisoqarfiup nakkutilliinermik suliaqarneranut atatillugu uppernarsarneqarsinnaalluni, takuuk Inatsisartut inatsisaanni § 76.

Kiisalu allaganngorlugi suliarinneriaaseq, sullivimmi nalilersuinerup ingerlanneqarnerata tulleriissaartumik periaaseqarluni naleqquttumillu ingerlanneqarsinnaaneranut iluaqutaassaaq aammalu sulisitsisoq iliuusissanik (iliuusissanut pilersaarutit), sulisut sulinerup nalaani isumannaatsuunissaasa peqqissuunissaasalu qulakkeernissaanut pisariaqartunik, sunnuteqarluartumik aalajangiisinnaalersissallugu aallartitsisinnaalersissallugulu.

Sullivimmi nalilersuineq minnerpaamik ukiut pingasukkaarlugit nalilersoqqinneqartassaaq aammalu sulinermi allanngortoqarnerani, aammalu allannguutit taakkua isumannaallisaanermut peqqinnissamullu pingaaruteqarpata, ingerlaavartumik nutarterneqartassalluni, ilanngullugit sulinermi periaatsit aamma sulinerup ingerlasarneri il.il. Silitilluni ajutoorneq, sullivimmi nalilersuineq nalilersorneqartussanngorlugu qaqinneqartariaqartoq, takussutissaasinnaavoq.

Nalilersuinerup annertussusaanut aamma imarisaannut, sulinerup suussusaa aamma suliffeqarfiup angissusaa kiisalu teknikkikkut atortorissaarutit, akuutissat atortussallu, sulinermi periaatsit aamma sulinerup ingerlasarnerat il.il., suliffeqarfimmi atorneqartut apequtaassapput, ilanngullugit pingaartumik sulisut isumannaatsuunissaannut peqqissusaannullu navianartorsiortitsinersut aarlerinartorsiortitsinersullu.

Suliffeqarfik nammineerluni sullivimmi nalilersuinermik suliaqarnissamut pisariaqartunik ilisimasaqanngippat, suliffeqarfik nammineq akilikkamini immikkut suliamut ilisimasalimmik ikiortissarsiorsinnaavoq. Suliffeqarfik avataaniit ikiortissarsiorsimappat, taamaattoq sullivimmi nalilersuinermik suliaqartoqarnera, aammalu sullivimmi nalilersuinerup tamakkiisuunera, suli suliffeqarfiup (sulisitsisup) akisussaaffigaa.

Aalajangersagaq pillaanermik pineqaatissiivigineqartussaataavoq, takukkit § 83 aamma § 84.

#### Imm. 2-mut

Aalajangersakkami piumasaqaatit minnerpaaffissaat, sullivimmi nalilersuinerup annertussusissaanut imarisassaannullu piumasaqaatigineqartut, aalajangersarneqarput, pingaartumik suliffeqarfiup sullivinni avatangiisinik suliaqarneranut tulleriissaartumik periaaseqarluni naleqquttumillu periaaseqarnissaata, taamaalillunilu suliffeqarfinni assigiissaartumik suliarinneriaaseqarnissap qulakkeerneqarnissaa siunertaralugu. Tassunga atatillugu erseqqissarneqarpoq, suliffeqarfiit sullivimmi nalilersuinermik suliaqarnerminni periaatsinik atuinermi kiffaangissuseqartut, aammalu sullivimmi nalilersuineq Sullivinnik Nakkutilliisoqarfimmut nassiuunneqartussaanngitsoq imaluunniit akuersissuteqarfigineqartussaanngitsoq.

Nalilersuineq siullermik pingaarnertullu sullivinni avatangiisini ajornartorsiutinut annertuunut isummernermik imaqassaaq, taakkua sulinermi suliassanut suliffeqarfimmiittunut attuumassuteqarajullutik. Sullivinni avatangiisini ajornartorsiutit taakkua assersuutigalugu sullivinni avatangiisinut aqutissiuussinermi Sullivinnik Nakkutilliisoqarfimmit suliarineqartumi, imaluunniit uppersaatini pissarsiarineqarsinnaasuni allani,



allassimassapput, taakkua ataatsimoortillugit suliffeqarfiit suliassaqrarfiup iluani sullivinni avatangiisini ajornartorsiutaannut matussusiisumik nassuiaassallutik.

Sulinerup isumannaatsumik ingerlanneqarsinnaanissaa qulakkeerniarlugu, aaqqiissutissat (iliuusissat) navianartorsiorfiit aamma sunniinerit paasineqartut kiisalu aarlerinartorsiorfiit oqimaatsorsiorfiillu pakkersimaarniarlugit aallartinneqartussat, suussanersut pillugu aalajangiisoqassaaq. Iliuusissat pisariaqartut (iliuusissanut pilersaarutit) sullivimmi nalilersuinermi allassimassapput.

Suliffeqarfiit periaasissaq namminneerlutik toqqarsinnaavaat, taamaalilluni taanna aaqqissuussaannermut kulturimullu suliffeqarfimmi atugaasumut naleqquttuussalluni. Taamaattoq periaatsimi toqqarneqartumi, suliffeqarfimmi sullivimmi nalilersuinermit atatillugu periaaseq sulianillu ingerlatitsinerup sisamanik tunngaviusunik ilaatinneqartunik imaqqassasoq, minnerpaamik qulakkeerneqassaaq:

1) Sullivinni avatangiisunik paasinarsisitsineq aamma suussusersiineq, sullivinni avatangiisini ajornartorsiuteqarnerisooq kiisalu ajornartorsiutit suussusaat annertussusaallu paasisimanissaannut pisariaqarpoq.

2) Aammattaaq aaqqiissutissanut siunnersuutit pitsaanerpaat naleqqunnerpaallu nassaariniaarlugit, sullivinni avatangiisini ajornartorsiutit nassuiarneqarnissaat nalilersorneqarnissaallu pisariaqarpoq.

3) Aammattaaq iliuusissanut pilersaarummik piviusorsioortumik inissiisinaanissamut, aaqqiissutissanut siunnersuutit assigiinngitsut pingaarnersiorneqarnissaat pisariaqarpoq. Pingaarnersiunermi maannakkut suut aallartinneqarsinnaanersut aammalu suut iliuusissanut pilersaarummi ilaatinneqassannginnersut, suut piffissami qanittumi aallartinneqarsinnaanersut, aammalu ungasinnerusumi suut suliarineqassanersut, nalilersuineq ilaatinneqassaaq.

Iliuusissanut pilersaarut ingerlatassanut piffissamullu pilersaarutaavoq, aammalu sullivinni avatangiisini ajornartorsiutit ataatsikkut iluarsineqarsinnaasannngimmata iluarsineqartussaannngimmatalu, taanna pisariaqarpoq. Iliuusissanut pilersaarummik pingaarnersiuiiffiusumik piffissanut killissalersukkamik suliaqarneq, aaqqiissutissanut suliniutinik aallartitsisoqarnerisooq, aammalu taakkua piffissamut killissaliussap iluani kissaatigineqartumik inerineqartitsinersut, malinnaaffigisinaanissaa, pingaaruteqarpoq.

4) Kiisalu suliffeqarfimmi iliuusissanut pilersaarut qanoq malinnaavigineqassanersooq malittarisassanik aalajangersaanissaaq pingaaruteqarpoq,

ilanngullugu tamatumunnga kina akisussaasuunersoq, ilaatigut nakkutiginninnissaq eqqarsaatigalugu, ilaatigut aaqqiissutissanut suliniutit eqqortut aallartinneqarnersut, aammalu iliuusissanut pilersaarutini il.il. iluarsiiisoqassanersoq nakkutiginiarlugu.

Angusat suliffeqarfimmi ersarissuutinnissaat pingaaruteqarpoq, taamaalilluni piomassuseqarneq attatiinnarneqassalluni annertunerulersinneqassallunilu. Aamma misilittakkat pitsaasut ilinniartifigineqarnissaat, aammalu kukkunerit uteqqinneqartannginnissaat qulakkeerniarlugu, malitseqartitsisarneq pingaaruteqarpoq.

Aalajangersagaq unioqqutinneqarpat, kapitali 15 malillugu pinerluttulerinermut inatsimmi pineqaatissiinissamik aalajangersaasoqarsinnaavoq, takukkit § 83 aamma § 84.

Imm. 3-mut

Aalajangersakkami erseqqissarneqarpoq, sullivimmi nalilersuinermik suliaqarnissamut sulisitsisoq pisussaaffeqaraluartoq, sulisut suliap ingerlanera tamaat isumannaallisaanermik suliaqarnermut aaqqissuussaq aqutigalugu akuutinneqassasut. Tamanna pillugu maleruagassanik erseqqinnerusunik Naalakkersuisut aalajangersaassapput, takuuk imm. 4.

Aalajangersagaq unioqqutinneqarpat, kapitali 15 malillugu pineqaatissiissuteqartoqarsinnaavoq, takukkit § 83 aamma § 84.

Imm. 4-mut

Aalajangersakkami sullivimmi nalilersuinerup annertussusissaa imarisassaalu pillugit maleruagassanik erseqqinnerusunik aalajangersaanissamut inatsisitigut tunngavissiisoqarpoq, ilanngullugu nalilersuinermut piomasagaatit minnerpaaffissaannik aalajangersaaneq. Kingulliullugu taaneqartumut, ilaatigut sulinerup suussusaa, suliffeqarfiup angissusaa aamma aaqqissuussaaneq ilusaa, kiisalu sulinerup periaatsit aamma sulinerup ingerlatsitsisarnerit il.il., suliffeqarfimmi atorneqartut apeqqutaassapput, ilanngullugit pingaartumik sulinerup periaatsit aamma sulinerup ingerlatitsisarnerit il.il. atorneqartut isumannaallisaanermut peqqinnissamullu immikkut navianartorsiortitsinermut aarlerinartorsiortitsinersullu.

Aalajangersagaq Kalaallit Nunaanni sullivinni avatangiisinut ilinniartitaaneq pinngitsoorani ingerlanneqartussaq pillugu nalunaarummi nr. 914, 26. juni 2013-imeersumi, kingusinnerusukkut allannguuteqartumi, atuutsinneqarpoq.

Aalajangersagaq nalunaarummi, nalunaarummut maannamut atuuttumut taartissatut, Naalakkersuisunit aalajangersarneqartumi atorneqassasoq naatsorsuutigineqarpoq.

*§ 14-imut*

Sulisitsisup nakkutilliisussaatitaanerani ilaatigut sulisut sulinermik ingerlatsinerat, ilaatigut sulinerup ingerlasarnera allatigut isumannaatsumik ingerlanersoq, pineqartunut ilaapput; ilanngullugu assersuutigalugu aamma sulinermut pilersaarutit malinneqarnerisut, aammalu taakkunani kukkunerit ingerlaavartumik iluarsineqartarnerisut.

### *§ 15-imut*

Oqaatigineqassaaq § 84 malillugu sulisitsisoq aalajangersakkap matuma, sulisitsisoq paasissutissiinissamut, aqutissiuussinissamut ilitersuinissamullu pisussaaffeqartoq aalajangersaaviusup, unioqqutinneqarneranut kinaassusersiunnigitsumik akisussaaffeqartinneqanngimmat.

#### *Imm. 1-imut*

AT-mi ilitersuutit oqaatsit sulisup paasisinnaasai atorlugit pinissaanut sulisitsisoq akisussaasuvoq.

#### *Imm. 2-mut*

Imm. 2-mi oqaatsimi “navianaateqanngitsoq” isumannaallisaaneq aamma peqqinnissaq pineqarput.

#### *Imm. 3-mut*

Aalajangersakkami suliassa qarfiit ilitersuinissamut il.il. immikkut pisariaqartitsisoqartoq paasinarsisitsisut, siunnerfigineqarput.

### *§ 16-imut*

#### *Imm. 1-imut*

Sulisut sulinermik nalaanni annertuumik ingerlaannarlu pinngitsoorneqarsinnaanngitsunik navianartorsiorinneqartut, sullivik navianartorsiorfiusoq imaluunniit sumiiffik navianartorsiorfiusoq qimassinnaagaat, aalajangersakkami qulakkeerneqarpoq. Aalajangersakkami annertumik ingerlaannarlu navianartumik pilersoqarluni pisut siunnerfigineqarput, aammalu sulisup – sunilluunniit akornuteqanngitsumik – sullivik imaluunniit sumiiffik navianartorsiorfiusoq qimannissaanut pinsinnaatitsiviulluni. Annertuumik ingerlaannarlu navianartorsiorfiusoq, navianartorsiornermut oqaatsimut § 77, imm. 1-imi aamma 2-mi atorineqartumut assinguvoq, taanna malillugu Sullivinnik Nakkutilliisoqarfiup sulisut imaluunniit allat isumannaatsuunerannut imaluunniit peqqissusaannut navianartorsiorfitsineq nalliulluinnalersoq, annertoq pitsaaliorniarlugu,

navianartuq ingerlaannaq ingalanneqassasoq peqqusissutigisinnaavaa, ilanngullugu najuuttut ingerlaannaq navianartorsiorfiusumit qimagutissasut.

Aalajangersakkami, navianartunik suliaqarneq suliassanut ilaasimappat, politiit aamma oqartussaasut allat suliassaminnik suliarinninnissaat akornuserneqanngilaq.

Imm. 2-mut

Sulisuq imm. 1 naapertorlugu annertuumik ingerlaannarlu navianartorsiorneq pissutigalugu sullivimminit imaluunniit sumiiffimmik navianartorsiorfiusumit qimaguttoq, atukkaminik ajornerulersitsivigineqaqqusaanngilaq, assersuutigalugu soraarsitaanertut, nuannaarsaatitut imaluunniit aningaasarsiassanik unitsitsinertut iluseqartumik – pineqartup sullivimminit imaluunniit sumiiffimmit navianartorsiorfiusumit qimagunera pissutigalugu. Annertuumik ingerlaannaq navianartorsiorneq, sulisup sullivimminiiginnarluni imaluunniit sumiiffimmi navianartorsiorfiusumiiginnarluni pinngitsoorsinnaasimanngisaanik pisoqarsimanngitsoq, sulisitsisup uppersaatissarsisussaavaa.

Imm. 3-mut

Imm. 3-mi siunnersuutigineqarpoq maleruagassat unioqqutinneqarneranni sulisuoq ajunngitsorsiassamik tunineqarsinnaasoq.

### *§ 17-imut*

§ 17 malillugu sulisitsisup pisussaaffeqarnerata kingunerisaanik, taanna eqeersimaartumik sulisunut isumannaallisaanermik suliaqarnermi soqutiginnilersitsiniaasussaavoq.

Isumannaallisaanermik suliaqarnermi aaqqissuussami nammineerluni peqataalluni imaluunniit sinnerluni peqataasoqartillugu, takuuk kapitali 2, sulisitsisoq taamaalilluni suleqatigiinnerup pilersinneqarsinnaanera, ineriartortinneqarsinnaanera aammalu naammaginartumik ingerlatiinnarneqarsinnaanera qulakkeerniarlugit iliuusissanik pisariaqartunik aalajangersaassaaq.

### *§ 18-imut*

Imm. 1-imut

Sulliviup sumiiffiani ataatsimi sulisitsisut arlallit, sulisinneqartut isumannaassusaannut peqqissusaannullu iluaqutaasumik, suleqatigiinnissamut pisussaaffeqartut aalajangersaanissaq aalajangersakkami siunertaavoq. Suleqatigiinnissamut pisussaaffeqarnermiippoq, ilaatigut

sulisitsisoq isumannaallisaanermut iliuusissanik aalajangersimasunik aalajangersaasusaaq, tamatumunnga atillugu sumiginnaanermut akisussaatinneqarsinnaasoq, aamma sulisinneqartut sumiiffimmi pineqartumiittut sulisitsisuni allani atorfeqaraluarpataluunniit.

Sulisinneqartut namminersortuuppata, assersuutigalugu biiliutilik imaluunniit ikkussuisartog, tamanna aamma atuutissaaq. Paarlattuanik aamma namminersortoq taanna, kikkut tamarmik sullivimmi ataatsimoorussami sulisinneqartut isumannaatsumik peqqinnartumillu sulinerminni atugaqartinneqarnissaat pillugu, suleqataanissamut pisussaaffeqarpoq. Sulineq sulisitsisoqarluni ingerlanneqanngikkaluartog, § 2, imm. 3 malillugu aalajangersagaq aamma atuutissasoq, tassani innersuunneqarpoq. Oqaaseq “sulliviup sumiiffia” suliffeqarfimmit aamma sullivimmit annertuneruvoq, aammalu “sulisinneqartut” sulisorineqartunit annertunerulluni.

Maleruagassaq illuliortiternermik sanaartornermillu suliaqarnermi kiisalu suliffeqarfimmi imaluunniit sullivimmi allami iluarsaassilluni suliaqarnermi atorneqarajussaaq.

Imm. 2-mut

Imm. 2-mi piginnaatitsissut malillugu ilaatigut pisussaaffiit arlaata pisussaaffigissanerai sulisitsisut isumaqatigiissuteqarsinnaasut pillugu maleruagassat suliarineqarsinnaapput.

### *§ 19-imut*

Imm. 1-imut

Sulisut taakkualu sinniisaat Sullivinnik Nakkutilliisoqarfiup peqqusissutaanut paasitinneqartussaataitanerat aalajangersakkami aalajangersarneqarpoq.

Imm. 2-mut

Isumannaallisaanermut sinniiseqanngikkaluartog imaluunniit sulisut sinniiseqanngikkaluartut, Sullivinnik Nakkutilliisoqarfiup peqqusissutaa sulisunut paasitineqassaaq.

### *§ 20-mut*

Sullivinnik Nakkutilliisoqarfiup, suliffeqarfimmi pissutsinut tunngatillugu ataasiakkaatigut pasitsaassaqarnermini aammalu nalinginnaanerusumik misissuineranut imaluunniit suliassaqarfimmi pissutsinik ingerlaavartumik nakkutiginninnerminut assigisaanulluunniit

ilaatillugu, misissuinissaq piumasaqaatigisinnaassavaa. Aammattaaq Sullivinnik Nakkutilliisoqarfik inatsit imaluunniit aalajangersakkat inatsimmi tunngaveqartumik aalajangersarneqartut naapertorlugit oqaaseqaateqarnernut akuersissuteqarnernullu atatillugu misissuinissanik piumasaqarsinnaassaaq.

Sullivinnik Nakkutilliisoqarfimmit misissuinissat pillugit piumasaqaateqartoqanngikkaluartoq, suliassa qarfinni isumannaallisaanermut peqqinnissamullu tunngasut tamanna pisariaqartilerpassuk, sulisitsisoq misissuisitsinissamik pisussaaffeqarpoq. Assersuutigalugu teknikkikkut atortorissaarutip atorneqalinnginnerani taamaallaat misissuisoqartassanngilaq, kisianni aamma atortorissaarutip aalajangersimasumik akuttussusilimmik allanngortinneqarnerata kingorna misissuisitsinissaq pisariaqartinneqarsinnaavoq. Misissuisussaataaneq sulinerup ingerlanerani immikkoortuni tamaginni atuuppoq, pilersarusiornermut aamma aaqqissuussinermut taamatullu ingerlatsinermut.

Assersuutigalugu sulitilluni ajutoortoqarpat, toqunartumeertittoqarpat imaluunniit inuussutissarsiornermi nappaatinik pilersoqarpat imaluunniit sulisut akornanni sulinngitsoortarnerit annertusippata, amerlanertigut misissuinerit il.il. ingerlanneqarnissaat pisariaqartinneqartussaavoq.

Pissutsinut ajutoornermik pisoqarani misissuinissamut il.il. pissutissaqalersitsisunut ataasiakkaatigut assersuutissatut taaneqarsinnaapput uppikaasoornerit, moreersissutit savittaata qaarnera, maskiinat atortuinik, ikaanik, kraninik il.il. aserortoornek kiisalu igaasarsuarnut aamma naqitsinermik imalinnut, svejsernerani seerinernut, atortussani mariaanermut imaluunniit atortorissaarutitut kukkusumik takutitsisunut tunngatillugu.

Tamanna Inatsisartut inatsisaanni ersarissumik allassimanngikkaluartoq, § 20 malillugu misissuinerni il.il. pisussaaffigineqartuni taakkunanani aningaasartuutit sulisitsisup akilertussaavai. Oqaasertalerneqarneraniippoq, sulisitsisoq, immaq isumannaallisaanermik suliaqarnermut aaqqissuussa q isumasioqatigalugu, suliassa qarfinni isumannaallisaanermut peqqinnissamullu tunngasut tamanna pisariaqartippassuk nammineq suliniuteqarnermigut misissuisitsinissamut, pisussaaffeqartoq.

#### *§ 21-mut*

Imm. 1-imut

Aalajangersakkami imm. 1-imi Naalakkersuisut nalunaaruteqartussaataaneq aamma sulisitsisunut nalunaarsuiffiit pillugit maleruagassanik aalajangersaanissamut piginnaatinneqarput.

Nalunaarsuiffinnik pilersitsineq ingerlatsinerlu, nalunaarsuisarnernut inatsimmut atuuttumut naapertuuttumik pissaaq.

Imm. 2-mut

Imm. 2-mi sulisitsisup paasissutissiisussaataitanerani ilaatigut teknikkikkut atortorissaarutit aamma akuutissat atortussallu, pineqartunut ilaapput. Imm. 2 malillugu paasissutissat pillugit piunasaqaammi suliffeqarfiit amerlanerusut pineqartunut ilaasinnaapput, assersuutigalugu suliassaqarfik ataaseq. Aalajangersakkap atorneqarnissaanut pisariaqarpoq, paasissutissat kissaatigineqartut Naatsorsueqqissaartarfimmit imaluunniit pisortani nalunaarsuiffimmi allami pissarsiariinnaarneqarsinnaanngitsut. Paasissutissat atorneqarneranni Sullivinnik Nakkutilliisoqarfiup § 79 naapertorlugu nipangiussisimasussaataitanini malissavaa, ilanngullugu tunisassiassanik sanaartornermi isertuussat pisariaqartumik mianerineqarnissaat.

Peqqissutsimut tunngasut pillugit paasissutissat, ataasiakkaat innarligassaanninnerat eqqarsaatigalugu, inunntu ataasiakkaanut tunngassuteqaqqusaanngillat.

Imm. 3-mut

Imm. 3-mi aalajangersakkami erseqqissarneqarpoq ateq aamma suliffeqarfik kisitsisitigut paasissutissat tamanut saqqummersinneqarneranni taaneqaqqusaanngitsut.

### *§ 22-mut*

Suliffeqarfimmi aqutsisut akisussaaffiat pillugu aalajangersakkami siunertaavoq, suliffeqarfimmi il.il. aqutsisut, ilanngullugit pisortat aamma siulersuisuni ilaasortat, qanoq annertutigisumik sullivinni avatangiisinut inatsimmut tunngatillugu akisussaaffeqarnerisut ersarissunngortinneqarnissaa.

Aalajangersakkap atuunnerani inatsimmi sulisitsisup pisussaaffeqarnera pillugu aalajangersakkat, suliffeqarfimmi aqutsisumut imaluunniit aqutsisunut peqataasunut taamaaqataanik atuupput.

Tamanna taamaalilluni isumaqarpoq inuit pineqartunut ilaasut, sulisitsisutut imminermut isigineqarsinnaanngitsut, inatsit malillugu inatsisitigut pisussaannut tunngatillugu sulisitsisunut sanilliunneqartut. Tamatuma atuunnerani inuit pineqartut sulisitsisunut atuuttut annertoqqataanik, inatsimmik aamma peqqussutinik tassani inatsisitigut tunngaveqartunik aalajangersagaasunik unioqqutitsinermi pinerluttulerinermut inatsimmi akisussaatinneqarsinnaassapput.

Taamaattoq tamanna immikkoortumi tunngaviusumi ataatsimi saneqqunneqarpoq. § 86-imi allassimasutut, sulisitsisup kinaassusersiunngitsumik tunngaveqartumik akileeqqusissumik pineqaatissinneqarnissaanut periarfissaqarneq, suliffeqarfimmi aqutsisunut, taakkua sulisitsisutut taaneqarsinnaasimangippata, atorneqarsinnaanngilaq. Inuit taakkua taamaalilluni pinerluttulerinermut inatsit malillugu piumasaqaatit nalinginnaasut naammassineqarsimappata, ilanngullugu tunngavissaqanngitsumik pissarsineq pillugu piumasaqaat, taamaallaat pinerluttulerinermut inatsimmi akisussaatinneqarsinnaapput.

Aalajangersagaq suliaqarnermi sallahsatut pisortanut, ilanngullugit pisortaanerit, ingerlatseqatigiiffiup siulersuisuni ilaasortat il.il. aamma inuit allat taamaaqataanik nalinginnaasumik suliffeqarfimmut tunngatillugu aqutsisutut aalajangiisinnaatitaaffeqartut, sunniuteqartussaavoq. Tassani erseqqissarneqarpoq pisortatigoortumik taaguut, inuk aalajangersakkami pineqartunut ilaasutut isigineqarsinnaanersoq, soorunami aalajangiisuunngitsoq. Aalajangiisuusoq tassaavoq inuk pineqartoq atorfeqarnini atorlugu suliffeqarfimmi nalinginnaasumik, aqutsisunut qulliunerusunut peqataasimanersoq imaluunniit peqataanersoq. Siulersuisuni ilaasortat pisut malillugit aalajangersakkami pineqartunut ilaassapput. Taamaattoq tassunga atatillugu erseqqissarneqassaaq, unioqqutitsineq pineqartup piaaraluni imaluunniit mianersuaalliorluni pisimaneratut isigineqarsinnaassasoq, pinerluttulerinermut inatsit malillugu pineqaatissiisinnaanissamut piumasaqaataammat.

Aalajangersagaq sulianut aqutsisut akisussaaffinik imaluunniit oqaatsip »sulianut aqutsisoq«, takuuk tamanna pillugu Inatsisartut inatsisaanni §§ 23-25, erseqqinnerusumik paasineqarneranut, sunniinngilaq.

Sulianut aqutsisunut tunngatillugu suliffeqarfimi aqutsisut erseqqinnerusumik killissalersorneqarnerat pisuni immikkut ittuni nalornilersitsisinnaavoq.

Killissalersuinermi taamaattumi ilitersuissutitut pingaarnertut isiginninnissaq ilaatigut tassaassaaq inuk pineqartoq Inatsisartut inatsisaanni § 23-mi sulianut aqutsisumut nassuiaassummut naapertuuttumik, annertunerpaatigut suliffeqarfimmi aqutsinissamik imaluunniit nakkutilliinissamik imaluunniit taassuma ilaanik, siunertaqarnersoq, imaluunniit inuup pineqartup suliassai akisussaaffiilu suliffeqarfimmi taamatut qulliunerusumik aqutsisuunermut attuumassuteqarnersoq. Tamatuminnga erseqqinnerusumik nalilersuinermi suliffeqarfiup ataasiakkaap suliffiup iluani aaqqissuussaana ilusilerneqarnerani aallaavineqassapput.

Aalajangersagaq allatigut sullivinni avatangiisinut inatsisip atuuffissaannut nalinginnaasunut naapertuuttumik aamma Namminersorlutik Oqartussanut aamma kommunini atuuppoq,



takuuk tamanna pillugu Inatsisartut inatsisaanni § 87. Taamaalilluni aalajangersagaq naalakkersuisoqarfinni, aqutsisoqarfinni, pisortaqaqarfinni il.il. allaffissornikkut aqutsisunut qullersaasunut, siulianiittunut isummersornernut allassimasunut naapertuuttumik, pingaartumik pingaaruteqarsinnaassaaq.

#### *§ 23-mut*

§ 23-mi sulianik aqutsisunut oqaatsimi inuit kikkut pineqarnersut, pisut ataasiakkaat apequtaassapput. Assersuutigalugu tassaasinnaapput ingeniørit, ingerlatsinermut aqutsisut, suliffissuarni aqutsisut aamma siulittaasut. Kisiannili mestersvendit, akkordertartut, sjakbajsit assigisaallu nalinginnaasumik sulianut aqutsisutut isigineqarsinnaanngillat. Tamanna aamma atugassiisartunut, laboratoriamiittunut assigisaannillu atorfilinnut aqutsisutut atuuffeqaratik tatigineqarlutik sulisunut aamma atuuppoq.

Silami sulineq aalajangersakkami kingullertut allassimasup ataaniippoq.

#### *§ 24-mut*

##### **Imm. 1-imut**

Aalajangersakkap atuunnerani, imarisaat sulianut aqutsisunut atuussimappata, maleruagassat najoqqutassiisut malinneqarnissaat akisussaaffigineqarpoq: § 38, imm. 1, § 40, imm. 1, § 42, imm. 1, § 44, imm. 1, kiisalu kap. 8 aamma 9, kiisalu inatsit naapertorlugu peqqussutit. §§ 83 aamma 85 malillugit unioqqutitsineq pineqaatissiissutigineqassaaq. Oqaatigineqassaaq sulianut aqutsisut pisut malillugit aamma pisussaaffiit sulisut tamarmik pisussaaffigisaat naammassisussaagaat, assersuutigalugu niaqqumut illersuuteqarnissamik pisussaaffeqarnerusinnaasoq.

Kingulliullugu allanneqartoq § 26, imm. 1 malillugu sulisut pisussaaffeqarnerannut illuatungiliussaavoq.

##### **Imm. 2-mut**

Oqaaseqatigiinni “navianartunik pitsaaliuinissap isumagineqarnera” erseqqissarneqarpoq sulianut aqutsisoq iliuusissanik pisariaqartunik aalajangiinissamut pisinnaatitaasoq pisussaaffeqartorlu.

Aalajangersagaq pisussaaffinnut sulianut aqutsisup sulisutut pisussaaffigisannut sunniuteqanngilaq, takukkit §§ 26 aamma 28.

#### *§ 25-mut*

Isumannaallisaaneq peqqinnissarlu pillugit suleqatigiittoqarnissaata isumaginissaanut sulisitsisup pisussaaffeqarnera pillugu §§ 17-imut aamma 18-imut nassuiaatit takukkit. Taamaalilluni isumannaallisaaneq peqqinnissarlu pillugit suleqatigiinnermi peqataanissamut pisussaaffeqarneq sulinermi aqutsisunut atuuppoq.

#### *§ 26-mut*

##### *Imm. 1-imut*

Illersuinissamut iliuuserisat aalajangersarneqarneri malillugit atorsinnaanissannut, sulisut peqataanissaat pisariaqartoq aallaavigalugu, sulisut iliuusissat ajoqusiisumik sunniuteqannginnissaat imaluunniit ajutoortoqannginnissaa qulakkeerniarlugu aalajangiinneqartut, aalajangerneqarnerat malillugu atorsinnaanissaannut peqataanissamut imm. 1-imi pisussaaffilerneqarput, taamatullu aalajangerneqarluni qanoq pisoqaraluarpalluunniit sullivinni mianersornissaq peqqissaarnissarlu isiginiarneqartassasut.

Aalajangersakkami sulisut isumannaallisaanerup peqqinnissallu siuarsarneqarneranut eqeersimaartumik peqataanissaat piumasaqaatigineqarpoq. Aalajangersakkap atuunnerani, najoqqutassatigut maleruagassat, imarisaat sulisunut atuutsinneqarsinnaappata, malinneqarnissaannut akisussaaffeqartitsisoqarpoq: § 38, imm. 1, § 40, imm. 1, § 42, imm. 1, § 44, imm. 1, kiisalu kap. 8. Taakkua unioqqutinneqarnerat § 83 malillugu pineqaatissiiiffineqassaaq. Aalajangersakkami aamma peqqussutit inatsit naapertorlugu aalajangersarneqartut malinneqarnissaat siunnerfigineqarpoq, takuuk § 85-imi pineqaatissiiinissamut aalajangersagaq.

##### *Imm. 2-mut*

Sulianut aqutsisut kikkulluunniit isumannaallisaanermut suleqatigiinni ilaasortaasariaqanngillat.

##### *Imm. 3-mut*

Aalajangersakkami erseqqissarneqarpoq, isumannaallisaanermut iliuusissaq sulianik ingerlatitsinermut atatillugu peerneqarallarsimappat, isumannaallisaanermi iliuusissap iluarseqqinneqarnissaa eqqaamaneqassasoq imaluunniit allamik illersuinissamut iliuusissamik pilersitsisoqassasoq.

#### *§ 27-mut*

Aalajangersakkami suleqatigiinneq suliffeqarfimmi namminerimi aallartissasoq, inatsisissatut siunnersuummi pingaartinneqartoq erseqqissarneqarpoq, tassunga tunngasoq § 17-imut nassuiaat takuuk.

#### *§ 28-mut*

Imm. 1-imi illuliortiternermik sanaartornermillu suliaqarneq nalinginnaasumik aammalu imm. 2-mi ikkussuinerit, iluarsaassinerit assigisaallu siunnerfigineqarput.

#### *§ 29-mut*

Imm. 1-imut

Aalajangersakkami tunniussinerit sulluunniit pineqartunut ilaapput, ilanngullugit inuussutissarsiutigiginagu tuniniaaneq, teknikkikkut atortorissaarutinik atornikunik tuniniaaneq aamma tunissutit, ilanngullugit atugassanngorlugit tunniussineq.

Teknikkikkut atortorissaarutinut ilanngullugu atuinissamut aserfallatsaaliuinissamullu ilitsersuutit pisariaqartut aammalu atortorissaarutip assartorneqarneranut ikkussorneqarneranullu ilitsersuutit pisariaqartut tunniunneqarnissaat pisussaaffigineqarpoq.

Imm. 2-mut

Aalajangersakkamut tunngavilersuutaavoq, teknikkikkut atortorissaarutit atoriaannaat tunniussinerup ingerlanerani killiffinni tamaginni, aalajangersakkami isumannaallisaanermut piunasaqaatit naammassineqassasut.

Imm. 3. -mut

Sullivinnik Nakkutilliisoqarfiup tamanna piunasarippagu imaluunniit pissutsit tamatumunnga pissutissaqalersitsippata, eqqussisut nioqqutissiortullu il.il. misissuinerit, misileraanerit il.il. atorlugit teknikkikkut atortorissaarutit isumannaassusaat paasinianeqartassasoq, aalajangersakkami inatsisitigut tunngavissinneqarpoq.

Naatsorsuutigineqarpoq aningaasartuutit eqqussisunit imaluunniit nioqqutissiortunit il.il. pineqartunit akilerneqartassasut.

Imm. 3-p atornerarnerani naatsorsuutigineqarpoq, misissuinerit, misileraanermut imaluunniit takusaanermut pilersuisuusup aningaasartuutai isumannaallisaanermut peqqissutsimullu siunertaasunut, malersorneqartunut, sanilliullugu naleqquttuussasut, Sullivinnik Nakkutilliisoqarfiup eqqarsaatigissagaa. Aalajangersakkamut tunngaviusoq,

pilersuisuusoq sulianut ilisimasaqartutut tamatigut isumannaallisaanermut qulakkeerisuusassasoq.

Imm. 4-mut

Teknikkikkut atortorissaarutip inuiaqatigiinnut pingaaruteqarneranik nalilersuinissaq eqqarsaatigalugu, pilersuisuusup tunisat amerlassusaat pillugu paasisutissiinissamut pisussaaffeqarnera pillugu aalajangersakkamik ilanngussinissaq naleqqutsinneqarpoq.

### *§ 30-mut*

Suliaqarnermi ilaatigut inissaqartitsinermik pissuteqartumik, nioqqtissiortup imaluunniit eqqussisup aqqanik najugaanillu ikkussinissaq pillugu aalajangersagaq naammassiuminaatsoq paasinarsisimammat, nalunaaqutsiineq alla aamma, tunisassiortup eqqussisullu kinnaassusaannik ajornanngitsumik paasititsiviusinnaasoq, atorneqarsinnaavoq.

### *§ 31-mut*

Imm. 1-imut

Teknikkikkut atortorissaarutit ikkussorneqartut, isumannaallisaanikkut peqqinnissakkulli tamakkiisumik isumannaatsumik atorsinnaappata, aatsaat ikkussorneqarnissaasa qulakkeernissaa, aalajangersakkami siunertaavoq.

Imm. 2-mut

Najukkami annikitsunik iluarsaassinermi, iluarsaassisoq najukkami iluarsaassivigineqartup avataani isumannaallisaanikkut unittoornermut akisussaatinneqarnissaa naleqqutinngissorineqarpoq. Aappaatigut iluarsaassisup piginnittoq imaluunniit atuisoq kukkunernik amigaataasunillu iluarsaassinermik suliaqarnermini paasisaminik taamaattunik pasitinnissaanut pisussaaffilerneqarnissaa naleqquttutut isigineqarpoq.

### *§ 32-mut*

Aalajangersakkami suliffeqarfiit pilersaarusiortut, siunnersuisartut nakkutilliisullu, suliffeqarfimminni suliniummit kalluarneqartuni, suliniutip piviusunngortinneqarnerani imaluunniit tunisassiap naammassereersup suliarineqarnerani (illuut, sanaartugaq, teknikkikkut atortorissaarut il.il.) isumannaallisaanermik peqqinnissamillu mianerinninnissamut akisussaaffeqarnissamik pisussaaffilerneqarput.

### *§ 33-mut*

Imm. 1-imut

Aalajangersakkap atuunnerani kiffartuussisummik neqerooruteqartoq neqeroortitsinissamut najoqqutassat suliarineqarnerannut atatillugu erseqqinnerusumik pilersaarusionermit aaqqissuussinermilu, isumannaatsumik peqqinnartumillu sullivinni avatangiiseqarnissaq eqqarsaatigineqartoq misissussallugu pisussaaffeqarpoq, ilanngullugit sulinermit periaatsit, sulianik ingerlatitsineq aamma suleriaatsit.

Sulinermit tunngaviusut neqeroortitsinermit allanneqartut, navianartoqarneranik kinguneqassanngitsut, sulisut sulisitsisup erseqqinnerusumik pilersaarusioneranut, aaqqissuussineranut aamma kiffartuussinermik suliaqarneranut atatillugu piffissami qanittumi imaluunniit ungasissumi, sulisut peqqissutsiminni ajoquserneqassanngitsut, neqeroortitsisup ilaatigut qulakkiissavaa.

Neqeroortitsisup tamatuminnga erseqqinnerusumik nalilersuinermini Sullivinnik Nakkutilliisoqarfiup sullivinni avatangiisinut aqutissiuussinera aallaavigisinnaavaa, tassani suliassaqarfiit assigiinngitsut iluanni sullivinni avatangiisini ajornartorsiutit annertuut nassuiarneqarput.

Neqeroortitsisup tamatuma saniatigut neqeroortitsinermit najoqqutassani sullivinni avatangiisinut tunngasut immikkuullarissut, pingaaruteqartut pillugit paasissutissat, suliassap suliarineqarneranut toqqaannartumik atasut taamaalillutillu tassunga tunngassuteqartut, attuumassuteqartut allasavai, tamatumalu ilaatigut atuunnerani neqeroortitsinermit najoqqutassani maleruagassat tunngaviusut immikkuullarissut, suliassamut tassunga, assersuutigalugu eqqaavilerineq aamma eqqiaaneq, neqeroorutigineqartumut toqqaannartumik pingaaruteqartut, innersuussutigineqassapput.

Neqerooruteqartup sullivinni avatangiisinut tunngasut immikkuullarissut, pingaaruteqartut, suliassamik suliarinnittussap suliassaqarfimmuut nalinginnaasumik ilisimanninnini aallaavigalugu ilisimassagai naatsorsuutigineqarsinnaanngitsut, kisiisa paasissutissiissutigissavai. Neqerooruteqartup aamma, neqerooruteqartup tamanna ilisimasimappagu, Sullivinnik Nakkutilliisoqarfik suliaqarnermut pineqartumut atatillugu peqqusissuteqarsimanersoq imaluunniit ilitersuisimanersoq, paasissutissiissutigissavaa.

Suliassamik suliarinnittoq, sullivinni avatangiisinut tunngasunut paasisaqassasoq pingaaruteqartorujussuuvoq, taamaalilluni tamatuma suliassap pilersaarusioneraneqarneranut ilanngunneqarnissaanut pitsaanagerusunik periarfissiisoqassalluni, ilanngullugu sulisut peqqissusaanni ajoqusiinissamik pitsaaliuineq.

Angallanermut ingerlatseqatigiiffik allalluunniit, assartuussinermut suliassamik neqerooruteqartoq, assersuutigalugu bussinik angallavik angalaarnissamut pilersaarutit aalajangersakkat siumullu aalajangerneqareersut ilaatinneqarlutik, neqeroortitsinermut najoqqutassani angalaarnissamut pilersaarutit taamaattut pillugit sullivinni avatangiisinut paasissutissat attuumassuteqartut allassavai, ilanngullugu ilaatigut angalaarnissamut pilersaarummi assartuussinermik suliaqartussa, tassa imaappoq biiliutilik (sulisitsisoq) sullivinni avatangiisinut maleruagassanik naammassinnissinnaanissamut naammattumik periarfissaqarnera angalaarnissamut pilersaarummi ilanngunneqarnissaa isumagissallugu.

Kommunip allalluunniit angerlarsimaffimmi ikiorteqartitsinermik aaqqissuussinermik neqerooruteqartup, neqeroortitsinermut najoqqutassani assersuutigalugu kisimiilluni sulinermut atatillugu immikkut nakuusertoqarsinnaanera pillugu allassimasoqarnissaa aammalu kivitsinermi ajoqusernerit pitsaaliornissaat siunertarlugu allassimasoqarnissaa, qulakkiissavaat, taamaalilluni sullissivik imaluunniit suliffeqarfik angerlarsimaffimmi ikiorteqartitsinermut aaqqissuussamik isumaginnittuusoq sulisitsisutut pilersaarusiornissaa alluni aammalu sulineq isumannaallisaanikkut peqqinnissakkullu isumannaatsumik ingerlassinnaassallugu.

Aalajangersakkap taassuma atuutsinnissaanut nalunaarummik suliaqartoqarsinnaavoq, tassani neqerooruteqartup pisussaffii aammalu neqerooruteqartup neqeroortitsinermut najoqqutassani sullivinni avatangiisit eqqarsaatigineqarnissaat qanoq iliorluni ilanngussinnaaneraa erseqqinnerusumik nassuiarneqarlutik. Nalunaarummik taamaattumik aalajangersaanissamut inatsisitigut tunngavissaq § 35-imi allassimavoq, tassani aamma § 33 pineqartunut ilaalluni.

Ilaatigut neqeroortitsinermut atatillugu sullivinni avatangiisit pillugit naammassimasassanut allattuiffiit arlallit, annertunerusunik allaffissornikkut maleruagassanik suliaqarnermi ilanngunneqartariaqarput.

Imm. 2-mut

Aalajangersakkap atuunnerani kiffartuussinermik neqeroortitsisoq pissutsini tamaginni neqeroortitsisup toqqaannartumik sunniuteqarfigisaanni, suliassap neqeroorutigineqartup isumannaallisaanikkut peqqinnissakkullu sulisitsisumit suliassamik suliakkerneqartumit tamakkiisumik isumannaatsumik suliaqarsinnaaneranut, peqataassaaq.

Taamaattumik neqerooruteqartup suliassaqarfinni neqerooruteqartup sunniuteqarfigisaanni, toqqaannartumik imaluunniit toqqaannangitsumik iliuuseqarnikkut imaluunniit iliuuseqannginnikkut, suliassap pilersaarusiornissaanut, aaqqissuunnissaanut ingerlannissaanullu sulisitsisup periarfissaqarnera akornusissanngilaa.

Suliassap neqeroortitsivigineqartup isumannaallisaanikkut peqqinnissakkullu tamakkiisumik isumannaatsumik ingerlanneqarsinnaanissaanut, sullivinni avatangiisinut inatsimmi maleruagassat isiginiarlugit, neqerooruteqartoq tatiginartumik peqataassaaq.

Suliassaq neqeroorutigineqartoq neqerooruteqartup suliassaqarfiisa iluanni ingerlanneqassappat, assersuutigalugu tassaasinnaasoq eqqiaaneq, neqerooruteqartup suliassaqarfiup iluani sumiiffiannut tunngasut, sulisitsisup eqqiaanermik suliassap pilersaarusiorneqarnerata isumannaatsumik ingerlannissaanut periarfissaqarneranut akornusiinnginnissaat neqerooruteqartup qulakkiissavaa.

Taamaaqataaniq, neqerooruteqartoq suliassaqarfimmut pineqartumut oqartussaasutut inissisimanini tunngavigalugu pissutsinut toqqaannartumik suliassap ingerlanneqarnissaanut sunniuteqartunut sunniuteqarpat, suliassaqarfinnut allanut tamanna atuutissaaq. Taamaattumik kommunip eqqaavilerinermut suliassamik neqerooruteqartup, tamanna isumannaallisaanikkut peqqinnissakkullu isumannaatsumik eqqaavinnik aallertarnissaq qulakkeersinnaaniarlugu sulisitsisup periarfissaannut pingaaruteqarsimappat, kommunip eqqaavilerinermut nammineerluni maleruagassalialai innuttaasunut atuutsittariaqarpai.

Sullivinni avatangiisinut inatsit malillugu sulisitsisoq tassaavoq toqqaannartumik pisussaaffeqartoq taamaalillunilu suliassap suliarineqarneranut pinerluttulerinermut inatsisitigut akisussaasuusooq. Neqerooruteqartut pisussaaffiat immikkut peqataanissamut akisussaaffeqarneruvoq, sulinerup isumannaatsumik ingerlassinnaanissaanut sulisitsisup periarfissaannut toqqaannartumik imaluunniit toqqaannangitsumik akornusiinnginnissamut tunngassuteqartoq, assersuutigalugu atortussanik navianartunik atuinissaq imaluunniit illersorneqarsinnaanngitsumik suliarinneriaaseqarneq aalajangerlugu imaluunniit immikkut tigussaasunik atugassaqaarnissap sillimaffigineqannginnerani.

Immikkut taamatut akisussaaqataatitsinermi anguniarneqarpoq neqerooruteqartup aamma sulisitsisut akornanni akisussaaffiup agguagaanerata ersarissuutinnissaa, taamaalilluni sulisitsisut pingaarnertut akisussaasuusooq qularutigineqassanani. Akisussaaffiup ersarissumik agguagaanerani qulakkeerneqassaaq, sulisitsisoq suliakkiissutigineqarluni eqqartuussivimmi suliamik ingerlatitsisoqassagaluarpat, unioqqutitsineq sulisitsisumut imaluunniit neqerooruteqartumut tunngasunik pissuteqarnerisooq nalornissutigineqassanngitsooq.

Taamaalilluni neqerooruteqartup akisussaaffia kiffartuussissutinik neqeroortitsinermut atatillugu neqeroortitsinermut najoqqutassanik suliaqarnermut attuumassuteqarpoq. Akisussaaffeqarnerup atuunnerani aamma neqeroortitsinermut najoqqutassani sullivinni avatangiisinut pisariaqartumik mianerinninnissap misissorneqarnissaa, aammalu neqeroortitsinermut najoqqutassani sullivinni avatangiisinut tunngasut immikkuullarissut, pingaaruteqartut, sulisitsisup suliassamik suliakkerneqartup sulinerminik isumannaatsumik

ingerlatsisinnanissaanut toqqaannartumik pingaaruteqartut pillugit paasissutissiisoqarsimanissaa, pisussaaffigineqarpoq.

### § 34-mut

Pilersuisuusut, ikkussuisartut, pilersaarusiortut, siunnersortit allallu pisusaffii aamma akuutissat atortussallu ilaatilerlugit aalajangersakkami annertusineqarput.

Kap. 7 §§ 44 aamma 45 naapertorlugit ilaatigut akuutissanik atortussanillu ataasiakkaanik sanaartorneq, taakkununga poortuusersuineq, toqqorsimatitsineq, assartuussineq il.il. pillugit maleruagassat erseqqinnerusut aalajangersarneqarsinnaapput. Maleruagassat taakkua taamaalillutik ilaatigut sanaartortunut, eqqussisunut, tuniniaasunut il.il. erseqqinnerusunik piumasaaqatinik imaqarput.

Taamaaqataanik § 29, imm. 1 aamma 2-p atuunnerisa malitsigisaanik, assersuutigalugu akuutissat toqunartullit, isumannaallisaaanermut imaluunniit peqqinnissamut navianaateqanngitsumik siunertaminnut tunniunneqarsinnaalerlugit atorneqarsinnaalerlugillu iluseqartinneqassapput pitsaassuseqartinneqassallutillu, aammalu atuinissaq, assartuussineq aamma illersuinnermut iliuusissat pisariaqartut (silaannarissaaneq, kiinnamut assiaqutit il.il.) il.il. pillugit pisariaqartunik paasiuminartunillu innersuussutunik ilaqartinneqassallutik.

Taamaaqataanik akuutissanut atortussanullu § 29, imm. 3 atorneqarnera, assersuutigalugu eqqussisut imaluunniit akuutissanik nutaanik toqunartoqarnerisa navianaateqarneranik malitseqarsinnaasunik sanaartortut, akuutissat sulisunut akuutissanik sulinnerminni atuisussanut toqunartunik navianaateqanngitsumik atorneqarsinnaanersut paasiniarlugu pisariaqartunik misissuisitsinissamut misileraatitsinissamullu pisussaaffeqarnerannik, malitseqarpoq. Innersuussinerup kingunerisaanik aamma illersuineq, teknikkikkut atortorissaarutinut tunngatillugu pisutut, suliffeqarfimmi sulisut kisimik siunnerfigineqanngillat, kisianni atuisut kikkulluunniit siunnerfigineqarlutik, takuuk § 2, imm. 3, nr. 4.

Maleruagassat toqunartumeertinnermik assigisaanillu pissuteqartumik (sulinnermut tunngasunik) napparsimalernissanik pitsaaliuinnermut ilaasutut pingaaruteqartut isigineqartariaqarput, aammalu taakkua sulisitsisup (suliffeqarfiup atuisup) § 20 malillugu taamaaqataanik pisussaaffiitut pissusissamisoortumik tapertaapput.

Oqaatigineqassaaq § 39, imm. 1, nr. 4, § 41, imm. 3 aamma § 43 naapertorlugit sulianik ingerlatsitsinernut, ininut, teknikkikkut atortunut atortorissaarutinullu tunngatillugu sioqqutsisumik akuersissuteqartarneq pillugu aalajangersakkat assigalugit, akuutissanik



atortussanillu nutaanik sioqqutsisumik akuersissuteqarnissap piumasarinissaanut inatsisitigut tunngavissaliinissaq tunngavissaqarsorineqanngimmat. Taamaattoq pilersuisuusut il.il. akuutissanut atortussanullu aamma tunngatillugu avatangiisini ajornartorsiutit pillugit § 68-imi aalajangersakkat nalinginnaasut malillugit Sullivinnik Nakkutilliisoqarfimmut ilitserneqarnissamik tamatigut qinnuteqarsinnaassapput.

#### *§ 35-mut*

Imm. 1-imut

Aalajangersagaq Sullivinnik Nakkutilliisoqarfiup Kalaalit Nunaanni teknikkikkut atortorissaarutit aaqquissuunneqarnerat pillugu nalunaarutaani nr. 655, 12. maj 2015-imeersumi aamma aamma Kalaallit Nunaanni teknikkikkut atortorissaarutit atorneqarnerat pillugu nalunaarummi nr. 656, 12. maj 2015-imeersumi atuutsinneqarpoq. Nalunaarutit nalunaarutinik nutaanik Naalakkersuisunit aalajangersarneqartunik taarserneqarnissamik tungaanut atuutiinnassapput.

Imm. 2-mut

§§ 29 – 34-mi pisussaaffiit pilersuisunut, ikkussuisartunut allanullu atuuttut Inatsisartut inatsisaanni piumasaqaatit naammassinnginnissaannik atuisunut pisinnaatitsinngillat.

#### *§ 36-mut*

§§ 29 – 34-mut immikkut akuersissuteqarnissamut periarfissiinissaq pisariaqartinneqarsorineqarpoq, tassami immikkut ittunik pisoqarsinnaavoq maleruagassat aalajangersarneqartut naleqqutinngitsutut atuullutik.

Aalajangersagaq Kalaallit Nunaanni sullivinni avatangiisit pillugit inatsimmi maannamut atuuttumi § 30-imut assinguvoq. Kalaallit Nunaanni sullivinni avatangiisit pillugit inatsimmi § 30-ip atuunna pillugu inatsisinik atuutsitsinermut periaatsinik inerisaasoqarsimanngilaq.

§§ 29 – 34 pisunut amerlasuunut tunngassuteqarmata, pisuni ataasiakkaani, maleruagassat naapertuutinngissorineqarsinnaaneranni, maannamut pisartutut immikkut akuersissuteqarnissamut periarfissaqarnissaq naleqquttutut isigineqarpoq. Sullivinnik Nakkutilliisoqarfiup pisuni ataasiakkaani immikkut akuersissuteqarnissaq pillugu aalajangiinera, ataasiakkaatigut nalilersuineq tunngavigalugu, sullivimmi avatangiisit isumannaatsuunissaat peqqinnartuunissaallu pillugu kissaateqarneq eqqarsaatigalugu, pissaaq.

#### *§ 37-mut*

Aalajangersakkami siunertaavoq, sanatitsisoq sullivinni avatangiisinut suliaasaqarfimmi suliaqartut allat assigalugit aamma illuliortiternermik sanaartornermillu suliaqarnerup isumannaallisaanikkut peqqinnissakkullu tamakkiisumik isumannaatsumik ingerlanneqarsinnaanissaanut peqataanissamut aamma pisussaaffeqartoq. Sanatitsisup ilaatigut qulakkiissavaa sullivinni avatangiisit pillugit inatsit malillugu pisussaaffini kiisalu assersuutigalugu pilersaarummut, piffissamut, isumalluutitut, ilusilersuineranut, atortussanik toqqaanermut pissutsinullu allanut sullivinni avatangiisinut pingaaruteqartut sullivinni avatangiisinut inatsimmut naapertuutissasut. Tamanna assersuutigalugu sanatitsisup illuliani qalipaannermi akuutissanik unioqqutitsisunik atuinissaq piumasarippagu, pisussaangilaq.

Aalajangersagaq sanatitsisunut tamaginnut tunngatinneqartoq, ilanngullugu aamma inissiaatilinnut namminersortunut, nammineq atugassaminnut nammineq inissaminnut sanatitsisunut, sanatitsisup sulisitsisullu akornanni akisussaaffiup agguagaanerata erseqqissarnissaanik siunertaqarpoq. Sullivinni avatangiisinut inatsit malillugu sulisitsisoq toqqaannartumik pisussaaffeqartuuvoq, taamaalillunilu suliaqarnerup ingerlanneqarneranut pinerluttulerineranut inatsisitigut akisussaasuulluni. Sanatitsisup pisussaaffeqarnerat immikkut peqataanermut akisussaaffiuvoq, sulisitsisup suliaqarnerup isumannaatsumik ingerlassinnaanissaanut periarfissaqarneranut toqqaannartumik imaluunniit toqqaannangitsumik akornusiinnginnissamut tunngassuteqarluni, assersuutigalugu atortussanik navianartunik imaluunniit illersorneqarsinnaangitsumik ingerlatseriaaseqarnermik atuinissap aalajangereratigut.

Taamatut immikkut peqataanermi akisussaaffeqartitsinermi, sanatitsisup sulisitsisullu akornanni akisussaaffiup agguagaanerata ersarissuunissaa anguniarneqarpoq, taamaalilluni sulisitsisoq pingaarnertut akisussaasuusoq qularutigineqassanani. Akisussaaffiup ersarissumik agguagaanerani qulakkeerpeqassaaq, suliarinninnermi sulisitsisoq eqqartuussivimmi suliakkiunneqassagaluarpat, unioqqutitsineq sulisitsisumut imaluunniit sanatitsisumut tunngasunik pissuteqarnersoq, nalornisoqannginnissaa.

§ 37, imm. 1 malillugu akisussaasuunermut tunngatillugu, inissiamik piginnittunut namminersortunut, nammineq atugassaminnik nammineq inissaminni minnerusumik sanaartornermi sanatitsisutut inissisimasunut tunngatillugu Sullivinnik Nakkutilliisoqarfiup aalajangersagaq aqussavaa, taamaalilluni pineqartoq suliaasaqarfimmi maleruagassanut ersarissunut unioqqutitsisumik iliuuseqarnissamik toqqaannartumik naalakkiisimappat, Sullivinnik Nakkutilliisoqarfik politiiunut tunniussisinnaassalluni.

Imm. 2-mut

Sanatitsisoq pisussaaffinnut § 37-mi allatorneqartunut tunngatillugu taamaallaat kinaassusersiunngitsumik pisussaaffeqarpoq. Taamaalilluni sanatitsisutut akisussaaffik allanut tunniunneqarsinnaanngilaq.

Sanatitsisoq sullivinni avatangiisinut inatsimmi paasineqartussaanageratut paasineqassaq tassaasoq taassuma akiligaanik illuliornermik aamma/imaluunniit sanaartornermik suliaqartoq. Taakkua tassaagajupput:

- 1) suliffeqarfiit
- 2) pisortat imaluunniit namminersortut sullissivii
- 3) kommunit
- 4) kattuffiit
- 5) soraarnerussutisialeriviit
- 6) inissiaatileqatigiiffiit
- 7) ingerlatseqatigiiffiit pilersuineramik suliaqartut.

Illuutitik sanatitsisoq sanatitsisutut isigineqassaaq. Assersuutigalugu entreprenøri nammineq akilikkaminik tunisinissaq siunertaralugu illuliorititsippat, imaluunniit illuummik atuisoq taassuma naammassineqareernerani aatsaat taanna pisarissagaa pillugu isumaqatigiissuteqartoq, pisuni marlunni taakkunani entreprenøri sanatitsisuuvoq. Tassunga atatillugu illuummik pisinissaq illuummut atorneqarfissaanut imaluunniit ilusilersugaaneranut piumasaaqateqarsimanersoq, pingaaruteqanngilaq.

Taamaaqataanik illuliornermut attartortunit aquneqartumut tamanna atuuppoq, tassa imaappoq illuliornermi siunissami attartortuusussaq illuummut taassumalu aaqqissugaaneranut tunngatillugu arlalinnik piumasaaqateqarluni. Tassani illuummik piginnittoq (attartortitsisoq), attartortup illuliornermut piumasaaqatinik oqaaseqatigiiliorsimanagera apeqqutaatinnagu, sanatitsisutut isigineqarpoq.

Aalajangersakkamut ilaatigut siunertaavoq pisussaaffiup tassungalu atatillugu akisussaaffiup, pilersaarusiornermut, killissalersuinermut ataqatigiissaarinernullu, illuliornermik sanaartornermillu suliaqarnerup sullivinni avatangiisinut isumannaatsumik isumagineqarnissaanut pisariaqartumut sullivinni avatangiisinut inatsimmi piumasaaqatit qulakkeerniarlugit piviusumik periarfissaqartumut, inissinneqarnissaa. Pisussaaffiit akisussaaffiullu kinaassusersiunngitsumik pisussaaffeqartumut inissinneqarnerani aamma, illuatungaani sanatitsisup illuatungaani sulisitsisut ataasiakkaat akornanni illuliornermut sanaartornernullu suliassaqarfimmi akisussaasuunermit tunngasut ersarissunngortinneqassapput paasiuminartunngortinneqassallutillu. Aammattaaq ataqatigiissaarinermit il.il. akisussaasuunerup qaffasissumik pingaartinneqarnerat

anguneqassaaq. Taamaalilluni akisussaasuunerup amerlanerusunut inissinnissaa imaluunniit agguarneqarnissaa periarfissiissutigineqanngippat, akisussaasuunerup inissineqannginnissaa atuutsinneqannginnissaalu annikillisinneqassaaq.

Aalajangersakkami sulisitsisup sullivinni avatangiisinut inatsimmi aalajangersakkat allat malillugit pisussaaffii akisussaaffiilu kalluarneqanngillat. Sulisitsisut ataasiakkaat sanaartorfimmi avataanilu nammineq sulisuminut tunngatillugu inatsisip malinneqarnissaanut tamakkiisumik akisussaasuupput.

Aalajangersagaq aamma sulisitsisut arlallit sullivimmi ataatsimi suliitillugit, suleqatigiinnissamut sulisitsisut pisussaaffeqarneranni allanngortitsinermik malitseqanngilaq. Sullivimmi sulisitsisut ataasiakkaat, sumiiffinni ataatsimoorussani iliuusissat, killissalersuinermut atatillugu isumaqatigiissutigineqartut, aallartinneqarnissaat allanngutsaaliornissaallu, kiisalu tamatumingga sunniuteqarluartumik nakkutilliinissaq, isumagissavaat.

Sanatitsisup pisussaaffiit aalajangersakkami allassimasut isumaginissaannut sullivinni avatangiisinut suliatigut immikkut ilisimasaqartunik pisariaqartunik amigaateqaruni, sulisitsisunut allanut atuuttut assigalugit, immikkut ilisimasalinnik ikiortissarsiortariaqarpoq. Sanatitsisoq sulianut ilisimasalimmit suliassat isumagitillugit akisussaaffeqarunnaarsinneqanngilaq.

Inissiamik piginnittut namminersortut ikittuaraannaat, nammineq atugassaminnik nammineq inissaminnik sanatitsisutut inissimasut, imm. 2-imi pisussaaffinni pineqartunut ilaassasut naliliisoqarpoq, tassami pisuni taakkunani illuliorneq annikitsuinnaassamat. § 37, imm. 2 malillugu inissiamik piginnittunut namminersortunut pinerluttulerinermut inatsit malillugu akisussaasuunermi naatsorsuutigineqarpoq, tamanna pitinnagu pisussaaffik Sullivinnik Nakkutilliisoqarfimmit peqqusissuteqarnikkut erseqqinnerusumik erseqqissarneqarsimasoq.

Aalajangersakkami pisussaaffiit sanatitsisup illuliornermik sanaartornermillu suliassanik pilersaarusiordermi suliqaarnermilu pisussaaffigisaat nalinginnaasumik allattorneqarput, tassalu sanaartorfiusup aaqqissuunneqarneranut ingerlanneqarneranullu atatillugu isumannaallisaanermut peqqinnissamullu pilersaarusiorderneq, sumiiffinni ataatsimoorussani sulisitsisut ataasiakkaat isumannaallisaanermi suliassaannik killissalersuineq aamma sanaartorfiusumi sulisunut isumannaallisaaneq peqqinnissarlu siuarsarniarlugit iliuusissanik ataqatigiissaarineq.

Aalajangersagaq malillugu siunnersuutigineqarpoq sanatitsisup pisussaaffii illuliornermik sanaartornermillu suliqaarnerup aalajangersimasumik angissuseqarnerani aatsaat

atuutsinneqalissasut, tassami aatsaat arlallit imminnut eqqarsaatigineqartussanngorneranni, pilersaarusiornissamik ataatsimoortitsinissamillu pisariaqartitsisoqalermat. Taamaattoq aalajangersagaq ataatsimut isiginninnerusumik oqaasertalerneqarpoq, tassani allanneqarluni pisussaaffik illuliornermik sanaartornermillu aalajangersimasumik angissusilimmik suliaqarnermi, aammalu sulisitsisut arlallit sullivimmi ataatsimi suliaqarnermik ingerlatsineranni atuutsinneqalissasoq, sanaartornermi sulisut amerlassusaat kisitsisitigut killilerlugu aalajangersarneqarani. Naatsorsuutigineqarpoq illuliornermik suliaqarneq aalajangersimasumik angissuseqartoq qanoq paasineqassanersoq allaffissornikkut maleruagassani aalajangersarneqassasoq.

Sullivimmi sulisut amerlassusaannut aalajangersimasumik killissaliinnginnermi, aalajangersagaq siunissamut isumannaarneqarpoq. Taamaalilluni illuliornermut sanaartornermullu suliassaqrarfiup iluani ineriartornerup sillimaffigineqarnissaa periarfissaqassaaq, killissamit inuit 11-utillugit atuuttumit allaanerusumik allaffissornermi aalajangersaasoqarsinnaalluni.

Isumannaallisaanermik suliaqarnerup ataqatigiissaarneqarneranut atatillugu ataqatigiissaarisumik piukkunnartumik toqqaasoqassaaq, sanatitsisoq sinnerlugu taassumalu akisussaaffigisaanik ulluinnarni sanaartorfiusumi isumannaallisaanermik peqqinnissamillu suliaqarnermik isumaginnittussamik. Ataqatigiissarisumik toqqaanermi taamaalilluni sanatitsisoq sullivinni avatangiisinut inatsit malillugu akisussaaffeqarunnaarsinneqanngilaq.

Imm. 3-mut

Piginnaatitsinermut aalajangersagaq ilusilersorneqarpoq, illuliornermut sanaartornermullu suliassaqrarfirmi sullivinni avatangiisinut maleruagassat malillugit pisussaaffinnut sukumiisunik inatsimmi tunngavissaqalersitsisoqarluni.

Pisussaaffiit taakkua § 37, imm. 2-mi allassimasutut sanatitsisup kisimi pisussaaffigai.

Kalaallit Nunaanni sanatitsisup pisussaaffiit pillugit nalunaarummi nr. 1344, 15. december 2015-imeersumi kingusinnerusukkut allannguuteqartumi, tamanna pillugu maleruagassat erseqqinnerusut aalajangersarneqarput.

Imm. 3, nr. 1-imut

Illuliorfinni sanaartorfinnilu aalajangersimasumik angissuseqartuni sanatitsisumut killissalersuinissamut pisussaaffiliinermi siunertaavoq, illuliorfirmi sanaartorfirmilu suliaqarnerup aallartinginnerani, sumiiffinni ataatsimoorussani isumannaallisaanermut iliuusissat suut pilersinneqassanersut aammalu kina taakkuninnga pilersitsissanersoq aserfallatsaaliuissanersorlu isummerfigineqareertarnissaasa qulakkeerneqarnissaa.

§ 37 malillugu illuliornermik sanaartormillu suliaqarnerni minnerusuni, sulisitsisut ataasiakkaat sullivimmi ataatsimi sulisunut tamanut sulinermi atukkanik isumannaatsuutitsinissamik peqqinnartuutitsinissamillu pisussaaffeqarput aammalu taakkuninnga isumaginninnissamut iliuusissaminnik ataatsimoortitsinissamut pisussaaffeqarlutik.

Imm. 3, nr. 2-mut

Sulisitsisup suliassarai, illuliorfissap anginerusup pilersinneqannginnerani, illuliorfiup aaqqissuunneqarneranut atatillugu isumannaallisaanermut peqqinnissamullu pilersaarummik suliaqarnissaq, pilersaarutip ingerlaavartumik nutartertarnissaa, aammalu pilersaarutip suliaqarfimmi isumannaallisaanermik suliaqarnermut ilaatinneqarnissaata isumagineqarnissaa.

Allaffissornikkut maleruagassani aalajangersarneqarpoq, pilersaarut allaganngorneqassasoq aammalu ingerlaavartumik nutarterneqartassasoq.

Illuliornermik sanaartormillu suliaqarnerni minnerusuni, immikkut navianartortaqtuni, navianartut taakkua pakkersimaarnissaannut, sulisitsisut ataasiakkaat isumannaallisaanermut peqqinnissamullu pilersaarummik suliaqarnissamut nutarterisarnissamillu akisussaaffeqarput.

Nr. 1-ip ataani taaneqartutut sulisitsisut arlallit, sullivimmi ataatsimi suliaqarnermik ingerlatsisut, aamma sulinermi atukkanik isumannaatsuutitsinissaq peqqinnartuutitsinissarlu pillugit aammalu tamatumunnga iliuusissat ataatsimoortinniarlugit, suleqatigiissasut.

Imm. 3, nr. 3-mut

Suliassaq tassaavoq iliuusissanik, sumiiffinni ataatsimoorfiusuni isumannaallisaanerup peqqinnissallu siuarsarnissaannut aalajangiunneqartunik, ataqatigiissarineq.

Maleruagassat aalajangersarneqarsinnaapput pillugit:

- 1) Illuliornerup ingerlanneqarnerani ataqatigiissarineq isumannaallisaaneq pillugu ataatsimiinnerni aammalu sulivimmi nammineerluni attaveqarnikkut ingerlanneqassaaq.
- 2) Minnerpaamik qaammammut ataasiarluni isumannaallisaaneq pillugu ataatsimiinnissamut aggersaasoqartassaaq peqataasoqartassallunilu kiisalu imaqarniliaq sularineqartassalluni. Tamatuma saniatigut annertuumik ajutoornernik, toqunartumeernernik imaluunniit allanik peqqissutsimut ajoqusiisunik pisoqartillugu imaluunniit tamatuminnga pisoqagajatsillugu kiisalu pisariaqartitsineq malillugu isumannaallisaaneq pillugu immikkut ittumik ataatsimiinnissamut aggersaasoqartassaaq.

- 3) Ataqtigiissaarinerup pisortatigoortuutinnissaanut pisussaaffeqarneq, illuliornermik sanaartornermilu suliaqarnermi aalajangersimasumik angissuseqartumi assersuutigalugu isumannaallisaaneq pillugu ataatsimiinnissamut aggersaanikkut pissaaq.
- 4) Illuliornermik sanaartornermilu suliaqarnermi minnerusumi assersuutigalugu nalinginnaasumik ilassusiinerni, allangortiterinerni, iluarsaassinermik aserfallatsaaliuinermillu suliaqarnermi, sulisitsisut ataasiakkaat isumannaallisaanermik peqqinnissamillu suliaqarneq pillugu ataatsimoortitsinissamullu akisussaaffeqarput, takuuk nr. 1.

Imm. 3, nr. 4-mut

Sanatitsisoq ataqtigiissaarinnermut suliassanik isumaginninnermut atatillugu ataqtigiissaarisumik pisariaqartunik piukkunnassusilimmik, sanatitsisoq sinnerlugu illuliornermik sanaartornermilu suliaqarnerup ingerlanneqarnerata nalaani isumannaallisaanermik suliaqarnerup ataqtigiissaarneranik isumaginnittussamik, toqqaassasoq, pillugu piumasagaat aalajangersakkami aalajangersarneqarpoq.

Ataqtigiissaarisutut sanatitsisoq imminut toqqarsinnaavoq, suliffeqarfimmineersumik toqqaasinnaalluni imaluunniit suliffeqarfup avataaneersumik toqqaasinnaalluni.

Ataqtigiissaarisumik toqqaanermi sulisitsisut sullivinni avatangiisinut inatsisit malillugit akisussaaffeerutsinneqanngilaq.

Sanatitsisut ataqtigiissaarinnermut suliassanik isumaginninnissamut ataqtigiissaarisumik toqqaassasoq pillugu piumasagaammik aalajangersaanissamut siunertaavoq, sanaartornerup ingerlanneqarnerata nalaani isumannaallisaanermik suliaqarnerup ataqtigiissaarneqarnerata inummit ataatsimit, illuliornermik sanaartornermilu suliassani anginerusuni isumannaallisaanermik suliaqarnerup qaffasinnerutinissaa siunertaralugu suliassamik kivitsinissamut pisariaqartunik piukkunnassuseqartumit, isumagineqarnissaata qulakkeernissaa aammalu suliassap suliassatut immikkoortutut aallunneqarnissaa.

Ilaatigut sanaartorfimmi isumannaallisaaneq pillugu ataatsimiinnerni aqutsinissaq ataqtigiissaarisup suliassarissavaa. Isumannaallisaaneq pillugu ataatsimiinnermi sulisitsisunit aallartitat aamma sanaartorfimmi suliffeqarfinni peqataasuni sulisut isumannaallisaanermut sinnisui peqataassapput. Aallartitat taakkua tamarmik sullivinni avatangiisinut ilinniartitaanermik ingerlatsisimasuussapput. Tamanna tunngavigalugu aammalu suliassap isumannaatsumik isumagineqarnissaa eqqarsaatigalugu, ataqtigiissaarisoq taamaaqataannik piukkunnassuseqarpat naleqqutissasoq isumaqartoqarpoq.

Ataqatigiissaarisutut suliasamik isumannaatsumik isumaginninnissamut, illuliornermut sanaartornermullu suliasaqarfimmi annertuumik paasisimasaqarnissaq pisariaqarpoq, ilanngullugu sanaartornerup ingerlasarnera, suliaqartuusut ataasiakkaat imminnut attuumassuteqarnerat aammalu allatigut suliasaqarfimmi ileqquusut. Tamatuma saniatigut ataqatigiissaarisutut suliaqarneq suliasanik aqutsisup suliasaannut assingusunik malitseqarpoq. Taamaattumik ataqatigiissaarisoq illuliornermut sanaartornermullu suliasaqarfimmi sulianut paasisimasaqarluni piginnaaneqassasoq aammalu illuliornermik sanaartornermilu suliaqarnermi aqutsisutut suliaqarluni misilittagaqassasoq piumasaaqatigissallugu pisariaqartoq isumaqartoqarpoq.

Ataqatigiissaarisup piukkunnassusaannut piumasaaqatit minnerpaamik malitsigissavaat, pineqartup sullivinni avatangiisinut ilinniartitaanermik naammassinnissimanissaa.

Erseqqissarneqarpoq ataqatigiissaarisup sullivimmi isumannaallisaanermut peqqinnissamullu iliuusissanik ataqatigiissaarinnermik isumaginninnissamut, isumannaallisaanermi peqqinnissamilu apeqqutini pisariaqartunik ilisimasaqarnissaa aammalu immikkut ilinniagaqarsimanissaa sanatitsisup qulakkiissagaa.

*Imm. 4-mut*

Sanatitsisup sanaartukkanik annertunerusunik Sullivinnik Nakkutilliisoqarfimmut nalunaarutiginninnissamut pisussaaffii pillugit piginnaatitsissutinut aalajangersakkap taassuma ilanngunneqarnerani, sanatitsisup pisussaaffii aalajangersakkami ataatsimi ataatsimoortinneqarput.

Nalunaarutiginninnermut siunertaavoq, nakkutilliinnermik suliaqarnerup aaqqissuunneqarneranut atugassamik, illuliorfinnik sanaartorfinnillu aalajangersimasunik angissuseqartunik pilersitsisoqarnera pillugu Sullivinnik Nakkutilliisoqarfiup paasissutissinneqarnissaa.

### *§ 38-mut*

*Imm. 1-imut*

Sulisut sullivimmi peqqissutsimut ajoquusiartunik sunnertinninnissamut imaluunniit ajutoornernik pisoqannginnissaanut illersorneqarnissaat, aammalu sulinerup isumannaatsumik toqqissisimanartumillu ingerlanneqarnissaa sulisitsisup isumagissagaa, tunngaviusumik maleruagassaq § 38-p imaraa.



Aalajangersagaq sulliviup aqqissuunneqarneranut aserfallatsaaliorneqarneranullu taamaallaat tunnganngilaq. Aalajangersakkami aamma assersuutigalugu teknikkikkut atortorissaarutit sulluunniit aammalu sulinermi periaatsit atorneqartussat pineqartunut ilaapput.

Imm. 2-mut

Aalajangersakkap unioqqutinneqarnera toqqaannartumik pinerluttulerinermi inatsimmi pineqaatissiisutiginneqartussaannngilaq, takuuk §§ 83 aamma 84, kisianni sulinermi atukkat isumannaallisaanikkut peqqinnissakkullu tamakkiisumik isumannaatsuunersut, takuuk imm. 1, nalilersuinermi, Naalakkersuisut imaluunniit Sullivinnik Nakkutilliisoqarfik erseqqinnerusunik maleruagassiisimanngippata, ileqqussat malitassallu akuerisaasut atorneqarsinnaapput. Taamaalilluni inatsit pineqaatissiiviusinnaasumik unioqqutinneqarsimanersoq nalilersuinermi, aalajangersagaq toqqaannanngitsumik pingaaruteqarsinnaavoq. Maannamut ileqqut akuerisaasut pisoqalisimanersut imaluunniit naleqqutinnginersut, malinnissaat tamakkiisumik isumannaatsuunani, pillugu aalajangiinissaq eqqartuussiviit susassa qarfigaat.

#### *§ 39-mut*

Aalajangersagaq malillugu suliassa qarfimmuut sammisunik maleruagassiisoqarsinnaavoq aamma peqqussutinit assigiinngitsumik iluseqartunik atitunerusunik imaluunniit suliassa qarfiit akimorlugit.

Imm. 1-imut

Sunniinernut ataasiakkaanut, assersuutigalugu pujoralaat, nipiliornerit, qinngornerit aamma kiannera, killissarititaasunik eqqiluisaarfiusunik aalajangersaasoqarsinnaavoq. Killissarititaasunik taamaattunik aalajangersaanermi toqqaannartumik peqqissutsimut sunniisarnerit ajoqutaasut, ilorrisimaarnermut akimmisaartitsisutut sunniisartut, taakkua sivirusumik sunniusimasarnerat imaluunniit ataqatigiissunik sunniusimasarnerat tunngavigalugu ajoqusiisartutut isigineqarsinnaanersut, eqqarsaatigineqassaaq.

Piginnaatitsissutitut aalajangersakkami qaartiterinermik suliagarneq pillugu maleruagassanut immikkut pisariaqartitsineq eqqarsaatigineqarpoq. Tamatumunnga tunngaviusoq, siusinnerusukku qaartiterinermi ajutoornerit amerlingaatsiarsimasut paasineqarsimanera.

Imm. 2-mut

Imm. 2-imi naatsorsuutigineqarpoq nalinginnaasumik ileqqut malitassallu pineqartut taakkua pissarsiariuminartut aammalu kalaallisut danskisullu pigineqartut.

#### *§ 40-mut*

Imm. 1-imut

Sulliviup aaqqissugaaneranut piunasaqaatinut aalajangiisuusooq tassaavoq, suliaqarneq qanoq iluseqartoq aammalu suliaqarnerup ingerlanera qanoq ittoq inini ingerlanneqassanersoq, aammalu teknikkikkut atortorissaarutit, akuutissat atortussallu suut atorneqassanersut. Taamaattumik kap. 5 aamma maleruagassat tamanna naapertorlugu aalajangersarneqartut, pingaartumik kap. 4-mut, 6-imut aamma 7-imut kiisalu maleruagassat kapitalit taakkua malillugit aalajangersagaasunut, ataqatigiissinneqassapput.

Imm. 2-mut

§ 38, imm. 2-mut nassuiaatit innersuussutigineqarput.

#### *§ 41-mut*

Siunnersuummi inatsisip immersugassaaneranut tunngaviusunut naapertuuttumik, sulliviup aaqqissuunneqarnera pillugu maleruagassat sukumiisut ilaatinneqanngillat. Maleruagassat allaffissornikkut aalajangersarneqassapput, sullivik isumannaallisaanikkut peqqinnissakkullu tamakkiisumik isumannaatsumik aaqqissuunneqassasoq, taamaallaat nalinginnaasumik malittarisassatut aalajangerneqarluni.

Malittarisassaq taanna § 1-imut nassuiaatini allassimasutut, annertuumik isumaqartoq paasineqassaaq. Sulliviup aaqqissuunneqarnera pineqartillugu, sullivinni avatangiisit inuiaqatigiinni teknikkikkut inooqatigiinnikkullu ineriartornermut naapertuuttuussasoq, § 1, nr. 1-imi aalajangersakkami pingaartinneqarpoq.

Maleruagassat illutatigut piunasaqaatinut tunngasuugajuttarput, kisianni aamma sullivimmuut atatillugu allatigut isumannaallisaanermut peqqinnissamullu apeqqutinut tungassuteqarsinnaalluni. Teknikkikkut atortut aamma atortorissaarutit, taamaattunik atuineq sulliviup aaqqissuunneqarneranut pingaaruteqarpat, inatsisini tunngavissami pineqartunut ilaassapput. Assersuutigalugu tassaasinnaapput atortut nipiliortut, pujoralatsitsisut imaluunniit qaarsinnaasut aamma ikuallajasut.

Maleruagassanik sukumiisunik aalajangersaanissamik periarfissaqarnermut atatillugu, aatsitassarsiorfimmik ingerlatsinermi aamma aatsitassarsiorluni ingerlataqarnerni isumannaallisaanermut tunngasunik maleruagassiinissamik pisariaqartitsineq immikkut erseqqissassallugu tunngavissaqarpoq, tamannalu Kalaallit Nunaanni aatsitassanik piiaanissaq siunertaralugu piiaanermik aatsitassarsiorlunilu misissuineramik suliaqarneq pillugu nalunaarummi nr. 302, 26. marts 2015-imeersumi maleruagassiivigineqarpoq.

Sulliviup aaqqissuunneqarnera pillugu maleruagassaqaalersitsinissamut tunngatillugu, sulinerup ingerlanneqarnera il.il. pillugit maleruagassaqaalersitsinissaq pillugu § 39-mut nassuiaatini allassimasutut, isummersornerit taamaaqatai atuupput.

Imm. 2.

§ 38, imm. 2-mut nassuiaatit innersuussutigineqarput.

Imm. 3

Oqaatigineqassaaq imm. 3, nr. 1-3-mi allattukkat tamakkiisuunngimmata, tassami assersuutit nalinginnaasut imaluunniit annertuut ilaasa allannissaat taamaallaat siunnerfiuvoq.

Taamaalilluni assersuutigalugu sulliviup eqqiluutsuutinnissaa pillugu maleruagassanik suliaqartoqarsinnaavoq.

## **Kapitali 6-imut**

### *Teknikkikkut atortorissaarutit*

Teknikkikkut atortorissaarutit pillugit maleruagassat maskiinanut, tankinut, sakkunut aamma assigisaannut aaqqissuussinernut, tunisassiamik suliarinninnermi atorneqartunut imaluunniit sulinerup inerneranik saqqummersitsiniarnermi atorneqassasut naatsorsuutigineqarpoq, ilanngullugit teknikkikkut ingerlatitsinermik il.il. suliaqareernerup kingorna assartuussineq aamma uninngasuutiginnineq. Aammattaaq maleruagassat aaqqissuussinernut taaneqartunut ilaasunut, sanaassanut ikkussuinnarissanut allanullu atortunut pilersinneqartunut, atortunut allanut peqatigitillugu immikkoortumi naammassisami ilaasussatut naatsorsuutigineqartunut, atuutissapput.

### *§ 42-mut*

Imm. 1-imut

Atuineq paasineqassaaq tassaasoq atortorissaarutinik taakkua atorlugit sulinermi ingerlatani tassunga atasuni tamaginni atuineq, assersuutigalugu sullissineq, alapernaarsuineq aamma aaqqiisarneq.

Aalajangersakkamut tassunga aallaaviuvoq Kalaallit Nunaanni teknikkikkut atortorissaarutit aaqqissuunneqartarnerat pillugu nalunaarut nr. 655, 12. maj 2015-imeersoq, kiisalu Kalaallit Nunaanni teknikkikkut atortorissaarutinik atuineq pillugu nalunaarut nr. 656, 12. maj 2015-imeersoq.

Imm. 2-mut

§ 38, imm. 2-mut nassuiaatit innersuussutigineqarput.

§ 43-mut

Aalajangersagaq Naalackersuisut maleruagassanik immersuissutaasunik aalajangersaanissamut piginnaatinneqarnerannik pisariaqartumik imaqarpoq. Aalajangersagaq Kalaallit Nunaanni teknikkikkut atortorissaarutit aaqqissuunneqartarnerat pillugu nalunaarut nr. 655, 12. maj 2015-imeersumut, kiisalu Kalaallit Nunaanni teknikkikkut atortorissaarutininik atuineq pillugu nalunaarut nr. 656, 12. maj 2015-imeersumut taartissatut nalunaarutininik aalajangersaanermut atorineqassasoq naatsorsuutigineqarpoq.

§ 44-mut

Imm. 1-imut

Aalajangersakkami silaannakkut angallassinerep, imarsiornerup aamma aalisarnerup ilai pillugit § 3 malillugu pisunit allaanerusunik killilersuisoqarani sanaartortoq taamatullu atuisoq pineqartunut ilaapput.

Akuutissat atortussallu manngersuusinnaapput, imerpalasuusinnaapput aamma silaannartut ittuusinnaallutik.

Atortussat suliarineqanngitsutut, tunisassiarineqalersutut assigisaattulluunniit pigineqarsinnaapput, assersuutigalugu suliarineqaaqqittussatut sulinermi atorineqartussaallutik.

Maleruagassat malitsigisaannik akuutissat atortussallu sanaartorneqarnerisa nalaanni taamatullu atorineqarsinnaalernissaat siunertaralugu, sulineq isumannaallisaanermut peqqinnissamullu tunngatillugu tamakkiisumik isumannaatsumik ingerlasinnaalerlugu atugassat iluseqalernissaat, pitsaassuseqalernissaat, poortuusersugaanissaat il.il. *sanaartortup* qulakkiissavaa.

Aammattaaq maleruagassap malitsigisaanik atuisoq (namminersortut, sulisitsisut, suliffeqarfimmi aqutsisut allallu, sulianut aqutsisut, sulisut aamma pilersuisut il.il., takuuk kap. 3) sulinerup ingerlanerani aamma periaatsit sulinermi atorineqartut, suliaqarnerit ajutoornissanut napparsimalernissanullu sunniuteqarluartumik isumannaarneqarnissaat, qulakkiissavaat. Taamaattumik akuutissat atortussallu atorineqartut navianartortaqaqarnersut, atuisup paasisaqarfigissavaa. Tassunga tunngatillugu Sullivinnik Nakkutilliisoqarfimmi ilitserorneqarnissamik ujartuisinnaassaaq, taanna taamaattumik suliassap taassuma isumagisinnaanissaanut annertusarneqartariaqarluni.

Imm. 2-mut

§ 38, imm. 2-mut nassuiaatit innersuussutigineqarput.

*§ 45-mut*

Aalajangersakkami Naalackersuisut ilaatigut sulinermi pisut eqqarsaatigalugit nalunaaqutsersuinissaq pillugu maleruagassanik aalajangersaanissamut piginnaatinneqarput. Naalackersuisut aamma uuttortaanerit, sioqqutsisumik akuersissuteqartarnek, nalunaaruteqarnek, atuinissamut ilitsersuutit aamma killissaritat pillugit maleruagassanik aajangersaasinnaapput, aammalu Sullivinnik Nakkutilliisoqarfik eqqiluutsuutitsinissamut killissaritanik aalajangersaasinnaavoq, kiisalu akuutissat atortussallu suut isumannaallisaanermut peqqinnissamullu navianartutut isigineqassanersut aalajangersinnaallugu.

Aalajangersagaq maannakkut nalunaarummut nr. 396, 24. juni 1986-imeersumut, akuutissat atortussallu pillugit Kalaallit Nunaannut nalunaarut, taartissatut nalunaarummi atuutsinneqassasoq naatsorsuutigineqarpoq.

Imm. 4-mut

Aalajangersakkami qinngornerit ioninngortitsisartut pineqartunut ilaanngillat, tassani tamanna qinngornerit ioninngortitsisartut pillugit aamma qinngornernut illersuuteqarnissaq pillugu Inatsisartut Inatsisaanni pineqartunut ilaammata.

Imm. 5-imut

Imm. 5-imi akuutissaq imaluunniit atortussaq sulisut isumannaatsuunerannut peqqissusaannullu navianarsinnaasoq imaluunniit allatigut ajornerulersitsisinnaasoq, akuutissamik imaluunniit atortussamik naviananngitsumik, navianannginnerusumik imaluunniit akornusiisinaannginnerusumik taarserneqarsinnaappat (taarsiussineq), atoqquusaassanngitsaq pillugu Naalackersuisut maleruagassanik aalajangersaasinaanerat, erseqqissarneqarpoq.

Imm. 6-imut

Imm. 6-imi akuutissat atortussallu sulisut isumannaatsuunerannut peqqissusaannullu navianarsinnaasut imaluunniit allatigut ajornerulersitsisinnaasut, Sullivinnik Nakkutilliisoqarfimmit oqaaseqaateqartoqariinngippat imaluunniit akuersissuteqartoqariinngippat, siunertamut aalajangersimasumut imaluunniit suliassaqarfinni immikkut ittuni atoqquusaassanngitsut pillugu Naalackersuisut aalajangersaanissamut piginnaatinneqarput. Aalajangersakkami akuutissat atortussallu navianartut Sullivinnik

Nakkutilliisoqarfimmi akuersissuteqartarnejq atorlugu nakkutiginninnissaq periarfissiissutigineqarpoq.

#### *§ 46-mut*

##### *Imm. 1-imut*

Aalajangersakkami nalunaaquttap akunnerini 11-ini qasuersaarfeqarnissaq pillugu tunngaviusut aalajangersarneqarput. Ulloq unnuarlu piffissap suliffiusup nalinginnaasup allartinneratut naatsorsuutigineqarpoq. Sullivimmut allamut aamma sullivimmit allamit aalajangersimasumik sulliviuunngitsumut angalanermut piffissaq atorneqartoq, taanna sulisup sullivimminut nalinginnaasumik angalaneranit sivisunerusimappat, qasuersaarfittut imaluunniit ulloq unnuarlu sulinngiffittut isigineqassanngilaq.

##### *Imm. 2-mut*

Nr. 2-mi aalajangersagaq, katersuiffissanngornerani ikkussuiffissanngorneranilu narsaatini sulinermi nunalerinermik suliaqarnermi imm. 1-imi maleruagassap pingaernerup naammassiuminaassinnaanerata eqqarsaatigineqarnera pissutaavoq. Aalajangersakkami aamma aallaaniarnejq piniarnerlu pineqartunut ilaapput. Nunalerinermik suliaqarnerup aamma aallaaniarnerup piniarnerullu ullunik 30-nik assigiinngissuteqarnera naammanngitsoq paasinarsissagaluarpat, siunnersuummi § 49 malillugit immikkut maleruagassat aalajangersartariaqassapput.

##### *Imm. 3-mut*

Aalajangersagaq usilersornermut usingiarnermullu aalajangersimasuunngitsumik sulisunit ingerlanneqartumut tunngasussanngorlugu killilerneqarpoq.

Kalaallit Nunaanni piffissaq qasuersaarfiusoq aamma ulloq unnuarlu sulinngiffeqarneq pillugit nalunaarummi nr. 32, 23. januar 2006-imeersumi aalajangersagaapput, § 9-mi suliaqarnermut taamaattumut qasuersaarfeqarnissaq pillugu maleruagassat immikkut ittut aalajangersarneqarput.

#### *§ 47-mut*

Piffissami ullunik 7-inik sivisussusilimmi ataasiinnarmi ulloq unnuarlu sulinngiffeqarnerup kinguartinneqarnera, piffissap ullunik 7-inik sivisussusillip tulliata aallartinnerata kinguartinneqarnissaanik malitseqassanngilaq, tassami piffissanut ullunik 7-inik sivisussuseqartunut tamaginnut immikkut ulloq unnuarlu ataaseq sulinngiffeqartitsisoqartussaavoq, takuuk imm. 1. Piffissat qasuersaarfiusussat marluk akornanni piffissaq ullut 12-it angullugit sivisussuseqartinneqassasoq, suliffeqarnermi

illuatungeriit isumaqatigiissuteqarsinnaasut pillugu nalunaarummi nutaami maleruagassanik Naalackersuisut aalajangersaassasut naatsorsuutigineqarpoq. Maleruagassat taamaattut maannakkut Kalaallit Nunaanni piffissaq qasuersaarfiusoq aamma ulloq unnuarlu sulinngiffeqartarneq pillugu nalunaarummi nr. 32, 23. januar 2006-imeersumi aalajangersagaapput.

*§ 48-mut*

Sullivinnik Nakkutilliisoqarfiup allaanerussutaasut akuersissuteqarfigissanngilai, kisianni tamatum kingorna nakkutilliinermut allattuiffik aqutugalugu taakkua misissorsinnaallugit. Taanna kingulleq aamma isumannaallisaanermut sinniisunut atuuppoq.

*§ 49-mut*

Sulianut suliassaqaqfinnullu tunngatillugu pingaartumik nunalerineq aamma naasuleriffillu kiisalu assartuussineq eqqarsaatigineqarput, suliaqarnerup ilusaanni immikkuullarissuni eqqarsaatigineqarnerullutik paaqqutarisarialinnut angerlarsimaffiit, napparsimaviit assigisaallu, politiit, annaassiniartartut aamma qatserisartut kiisalu akunnittarfinnut neriniartarfinnullu suliassaqaqfiit. Aammattaaq juullimut akikillilerinermullu atatillugu quersuarmi sulineq pineqartunut ilaavoq.

Aalajangersagaq Kalaallit Nunaanni piffissaq qasuersaarfiusoq aamma ulloq unnuarlu sulinngiffeqartarneq pillugu nalunaarummi nr. 32, 23. januar 2006-imeersumi atuutsinneqarpoq.

*§ 50-imut*

Inuit qulliunerusuni atorfeqartut paasineqassaaq inuit aqutsinermut tunngasuinnarnik imaluunniit annertunertigut taakkuninnga suliaqartut aammalu piffissaq suliffiusussaq eqqarsaatigalugu aqutassaminnik malinninnissamik imaluunniit sulinermi piffissamik sioqqutsisumik aalajangersagaasumik malinninnissamut, imaluunniit immikkut ilisimasaqarnertik assigisaannilluunniit pisoqarnera pissutigalugu immikkut nammineerlutik atorfeqarnertik pissutigalugu, pisussaaffeqartinneqanngitsut.

Inuit pisortatut atorfeqartut il.il., pisariaqartillugu aatsaat piffissaq qasuersaarfiusoq aamma ulloq unnuarlu sulinngiffeqartarneq pillugit maleruagassani ilaatinneqassanngillat.

Inuit kikkut aalajangersakkami matumani pineqartunut ilaassanersut nalilersuineq tunngavigineqassaaq, kisianni tunngavissarititaasut naliliinermi ilaatinneqartariaqartut tikkuarneqarsinnaapput. Taamaalilluni pingaartinneqartariaqarpoq pineqartoq

- 1) pisortat qullersaata toqqaannartumik ataaniilluni sulinerup ingerlanneqarneranut akisussaasuusoq,
- 2) atorfinitsitsinissamut soraarsitsinissamullu piginnaatitaasoq,
- 3) atugassiissuteqarnissamut piginnaatitaasoq, sulisitsisup avammut pisussaaffinik kinguneqartussamik, aamma
- 4) qullersaminit akuerineqaqqaarani annertuumik nammineerluni piffissaq suliffigisassani aaqquissuussinnaagaa.

Inuit tassaniittut aamma pineqartup aqutassaminik piffissaq suliffiususaaq eqqarsaatigalugu malinnaanissamut imaluunniit suliffissap sioqqutsisumik aalajangersagaasup malinnissaanut pisussaaffeqassanngitsoq, killilerneqarput. Killiliinerup taassuma malitsigisaanik piffissaq qasuersaarfiusaaq, sulianut aqutsisunut immikkoortortaqaqfimmi imaluunniit suliassaqaqfimmi sulisunik aqutsisuusoq attaveqartuusorlu, assersuutigalugu suliffimmi aqutsisut, siulittaasut assigisaallu, amerlanertigut tamakkiisumik atuutissaaq.

Aalajangersagaq piffissaq qasuersaarfiusoq aamma ulloq unnuarlu sulinngiffeqarneq pillugit nalunaarummi atuutsinneqarsinnaassaaq, taamaalilluni inuit qulliunerusumik atorfeqartut inatsimmi § 46-imi aamma 47-imi aalajangersakkani pineqartunut ilaassallutik.

#### *§ 51-imut*

Aalajangersakkami Naalackersuisut minnerpaaffissat aalajangersimasut qaangerlugit isumaqatigiissuteqarnernut atugassarititaasut erseqqinnerusut pillugit maleruagassanik aalajangersaanissamut periarfissinneqarput. Taamaalilluni isumaqatigiissutigineqarsinnaavoq ullormut piffissaq qasuersaarfiusoq killilimmik annertussuseqartumik nalunaaquttap akunnerinut 8-nut kinguartinneqassasoq imaluunniit annikillisinneqassasoq, aammalu piunasaqaatit erseqqinnerusut aalajangersimasut tunngavigalugit sapaatip akunneranut ulloq unnuarlu sulinngiffeqarneq allanngortinneqassasoq. Aammattaaq aalajangersimasunik killilersuinertaqartumik kiffartuussinissamut piareersimaneq pillugu isumaqatigiissuteqartoqarsinnaavoq.

Isumaqatigiissuteqarnissaaq nalunaaquttap akunnerinik 11-nik (8) minnerpaaffissanit nassuiarneqartunit annikinnerusunik, kissaatigineqarpat, isumaqatigiissuteqarnissaaq sioqqullugu taakkua Sullivinnik Nakkutilliisoqarfimmut akuersissuteqarfigineqartussatut saqqummiunneqassapput.

Aammattaaq isumaqatigiissuteqarnissamut periarfissaqarneq nalinginnaasumik piunasaqaatinik saneqqutsiviusoq, illersuinerup annertussusaa nalinginnaasoq



ajornerulersinneqassanngitsoq aammalu taamaaqataanik piffissamik qasuersaarfiusussamik imaluunniit (tullertut) naleqquttumik illersuineramik taarsiisoqassasoq, piumasaqaatigalugu pisinnaassasoq, pillugu maleruagassanik Naalakkersuisut aalajangersaassasut naatsorsuutigineqarpoq, takuuk § 52. Maleruagassat taamaattut maannakkut Kalaallit Nunaanni piffissaq qasuersaarfiusooq aamma ulloq unnuarlu sulinngiffeqartarneq pillugu nalunaarummi nr. 32, 23. januar 2006-imeersumi aalajangersagaapput.

Aalajangersakkami ilaatigut siunertaavoq, ulloq unnuarlu sulinngiffeqarnermut tunngatillugu ajornartorsiutinik isumaqatigiissuteqarnikkut aaqqiinissamut periarfissiinissaq, ataatsimoortunut isumaqatigiissuteqarnikkut imaluunniit sulisitsisup sulisartullu akornanni ataasiakkaanut isumaqatigiissuteqarnikkut. Aalajangersagaq pingaartumik Sullivinnik Nakkutilliisoqarfiup peqataanissaa pisariaqanngitsoq naliliisoqartillugu, pisuni taakkunani piffissamut suliffiusussamut aalajangersakkanik saneqqutsinermi atorineqartussatut eqqarsaatigineqarpoq.

Niuernermik allaffissornermillu suliaqarneq eqqarsaatigalugu maleruagassanik taamaattunik aalajangersaanermi eqqaasitsissutigineqassaaq, niuernermik allaffissornermillu suliaqarnermi sapaatip akunnerani sulinngiffeqartarneq pillugu ILO-mi nunani tamalaani isumaqatigiissut nr. 106 1957-imeersooq Kalaallit Nunaata akuersissutigisimavaa, tassani ilaatigut aalajangerneqarluni, ulloq sapaatip akunneranut unnuarlu sulinngiffeqartarneq pillugu maleruagassat isumaqatigiissuteqarnikkut qaqutigunnaq saneqqunneqarsinnaasut.

#### *§ 52-imut*

Oqaaseq naleqquttumik illersorneqarneq tassaavoq, sullivinni avatangiisinut tunngasut sukkulluunniit – piffissaq qasuersaarfiusussaaq tamarmiisoq ilaannakortorluunniit amigaataanersoq apeqqutaatinnagu – sullivinni avatangiisinut inatsimmut naapertuutissasut. Pisut malillugit naleqquttumik illersuineq tassaasinnaassaaq immikkut ittumik isumannaallisaanermi iliuseqarnerit imaluunniit sulinerup aaqqissuussaananerani/allaffissornermillu suliniuteqarnerit, ilanngullugu sulinerup piumasaqaateqarfiunnginnerusup isumagineqarnera.

Sulinerup aaqqissuunneqarnerata il.il. pilersaarusionerqarnerani, taamaaqataanik taarsiissutaasumik qasuersaarfiusaqartitsinissaq ajornarunnaassasoq, annertunerpaamik qulakkeerneqassaaq.

#### *§ 53-imut*

Aalajangersakkap atornerqarnerani sulisut eqqarsaatigineqarnissaanaat isiginiarneqarsinnaangilaq, kisianni aamma allanut isumannaallisaaneq peqqinnissarlu pineqartariaqarpoq. Piffissaq suliffiusoq killeqartoq pillugu aalajangersakkat, sulinermi immikkut unillatsiartarnerit pillugu piumasaqaatinik malitseqarsinnaapput.

Apeqqutit piffissaq suliffiusoq killeqartoq pillugu maleruagassanut atatillugu aningaasarsianut tunngalluni pilersoq, suliffeqarnermi illuatungeriit akornanni sulisartunut isumaqatigiissutigut iluarsivigineqassasoq naatsorsuutigineqarpoq.

#### *§ 54-imut*

Piffissaq biilerfiusoq aamma qasuersarfiusoq pillugu aalajangersakkanik immikkuullarissunik soqanngilaq.

Aallaaviatigut piffissaq qasuersarfissaq aamma ulloq unnuarlu sulinngiffeqarneq pillugu maleruagassat nalinginnaasut, biilini aquttunut atuupput, tamatumani §§ 49-mi aamma 53-imi siunnersuutigineqartumi tunngaveqartumik biilerluni sulinermut maleruagassanik immikkuullarissunik aalajangersaasoqanngippat. Kisiannili maleruagassat §§ 49 aamma 53 naapertorlugit aalajangersarneqartut, biilini aquttunut atorfeqartinneqartunut taamaallaat atuutissapput.

Taamaattumik aalajangersagaq pisariaqarpoq, pissutigalugu aqqusinertigut angalanerup isumannaatsuunissaa eqqarsaatigalugu, biilini aquttunut piffissamut qasuersarfissamut suliffiusussamullu immikkut maleruagassat aamma namminersortunut nammineerlutik biiliuteqartunut atuutissasut, aalajangernissaa pisariaqarsinnaavoq.

#### *§ 55-imut*

§§ 56 – 59 peqatigalugit aalajangersakkap kingunerisaanik kapitali 9-imi sulinerit § 2, imm. 2, nr. 1-imi aamma nr. 2-mi taaneqartut maleruagassani taakkunani tamakkiisumik ilanngunneqarput. Taamaattumik kapitalimi sulisitsisoqarluni sulineq sunaluunniit, aamma sulineq inuusuttup sulisitsisup angerlarsimaffiani ingerlataa, aammalu sulineq sulisitsisup ilaqutaannit, inoqutigiinni ilaasumit, taamaallaat ingerlanneqartoq, pineqartunut ilaapput.

#### *§ 56-imut*

Imm. 1-imut

Aalajangersagaq nalinginnaasumik isumannaatsuutitsinissamut aalajangersagaavoq, tassani mianerisassat immikkuullarissut, inuusuttunik sulisitsinermi isiginiarneqartussat

allassimallutik, ilanngullugit ukiut, ineriartorneq aamma peqqissuseq kiisalu inuusuttup atuarneranut imaluunniit ilinniarnernut sunniineq. Tunngaviusumik mianerisassat taakkua inuusuttut 18-it inorlugit ukiullit pillugit kapitalimi piunasaqaatitut pingaarninngortinneqarput. Aalajangersagaq inuusuttunik sulisitsinermut sumulluunniit atuuppoq. Mianerisassat pineqartut taakkua inuusuttut 18-it inorlugit ukiullit sulisinneqarneranni tamatigut nalilersorneqartassapput, aamma sulisitsineq kapitalimi aalajangersakkanut allanut tunngatillugu qasukkartitsinissamut maleruagassani ilaatinneqaraluartut.

Oqaatsit »sulinerup pilersaarusiorneqarnera, aaqqissuunneqarnera ingerlanneqarneralu« § 38-imi atorneqartut assigaat.

Imm. 2-mut

Aalajangersagaq inuusuttut sulitinneqarnerannut marloqiusamik piunasaqaateqarnermik imaqarpoq. Sulinissamut periarfissaqarnermut 15-inik ukiulinnut aammalu atuartitaasussaataanerup pisussaaffigineqartup naaneranut ukiut killilerneqarlutik piunasaqaatigineqarpoq.

Oqaaseq » atuartitaasussaataaneq ilaavoq«, siunnersuummi aalajangersakkani arlalinni uteqqinneqartartoq, Atuarfik pillugu Inatsisartut inatsisaat nr.15 3. december 2012 -imeersumi § 31, imm. 1 naapertorlugu ukiut 10-nik sivisussuseqartumik atuartitaasussaataaneq nalinginnaasooq aalajangersagaasooq innersuussutigineqarpoq. Atituumik oqaasertaliinerimi tassani siunertaavoq, maleruagassap ullutsinnut naleqquttuunissaata qulakkeernissaa, taamaalilluni taanna sukkulluunniit inatsimmi aalajangersagaasumut atuutissalluni.

Imm. 3-mut

Aalajangersakkami Naalakkersuisut sulinerup isumannaatsumik ingerlanneqarnissaa aammalu inuusuttut misilittagaqannginnerat aammalu aarlerinaataasunik paasisimanninnginnerat kiisalu sunnertianerunerat eqqarsaatigalugu, sulinernik piginnaasaqarnertik malillugu nalinginnaasumik inuusuttunut navianaateqarsinnaasunik suliaqartinneqannginnissaat qulakkeerniarlugu, sulinernut aalajangersimasunik ilusilinnut ukiut qaffasinnerusumik killissalerneqarnerinik atuutsitsilernissaq pillugit maleruagassanik erseqqinnerusunik aalajangersaanissamut piginnaatinneqarput, takuuk § 56, imm. 1.

Aalajangersagaq sukumiisunik maleruagassanik aalajangersaanissamut pisariaqartumik piginnaatitsivoq. Tamanna ilaatigut isumaqarpoq, inuusuttut uumasut nujuartat attaveqarfisinnaallugit suliassanik sulisinneqarnissaat inerteqqutigineqarsinnaasooq.

Aalajangersagaq naapertorlugu inuusuttunut ilinniarnermik ingerlataqartunut immikkut maleruagassanik atuutsitsilersoqarsinnaavoq. Pingaartumik sulinerit aalajangersimasunik navianartortaqsinnaasut, kisianni inuusuttut inuussutissarsiutinut ilinniartitaaneranni ilaanissaat pisariaqarluni ilaatinneqartut, tassani eqqarsaatigineqarnerupput.

Aalajangersagaq Kalaallit Nunaanni inuusuttut sulisarnerat pillugu nalunaarummi nr. 1347, 15. december 2005-imeersumi itisilerneqarpoq. Naalakkersuisut maannakkut nalunaarutip atuuttup taartissaatut inuusuttut sulisarnerat pillugu nalunaarummik aalajangersaanissaq naatsorsuutigaat.

#### Imm. 4-mut

Aalajangersakkami sulinernut ilaannikkuinnaq imaluunniit sivikitsumik ingerlanneqartumut, tamanna sulisitsisup nammineerluni angerlarsimaffiani pisimappat imaluunniit suliffeqarfimmi sulineq sulisitsisup ilaqutaannit inoqutigiinni ilaasunit taamaallaat ingerlanneqarpat, ilaatitsinnginnerit aalajangersarnissaannut periarfissiisoqarpoq. Ilaatitsinnginnerit aalajangersarneqartut, erseqqinnerusumik killissalersorneqassapput piumasqaateqarfigineqassallutillu. Naalakkersuisut maleruagassanik assersuutigalugu inuusuttut sulinissami sukumiisumik ilinniartinneqassasut aammalu sunniuteqarluartumik ingerlaavartumillu nakkutigineqassasut, aalajangersaanissamut piginnaatinneqarput.

Aalajangersagaq pingaartumik meeqqat ilaqutariit nunaleriffiini sulinermi peqataanerannut, aallaaniarnermi piniarnermilu aammalu kiffartuussinerni oqinnerusuni peqataatinneqarnerannut sunniuteqarsinnaassaaq. Taamaattoq sulineq annikitsuinnaasoq pineqarsinnaassaaq, tassami sulineq matuma siuliani taaneqartoq ilaannikkuinnaq imaluunniit sivikitsuinnarmik pisarmat.

Aalajangersagaq § 56, imm. 1-imi nalinginnaasumik isumannaatsuutitsinissamut aalajangersakkamit ilaatitsinnginnissamut periarfissiiviunngilaq.

Kalaallit Nunaanni inuusuttut sulisarnerat pillugu nalunaarummi nr. 1347, 15. december 2005-imeersumi itisilerneqarpoq. Maannakkut nalunaarummut atuuttumut taartissatut inuusuttut sulisarnerat pillugu nalunaarummik aalajangersaanissaq Naalakkersuisut naatsorsuutigaat.

#### Imm. 5-imut

Aalajangersakkami § 56, imm. 3 naapertorlugu ukiunut killissatut aalajangersagaasup saneqqunneqarnissaanut aalajangersaanissaq periarfissiissutigineqarpoq. Naalakkersuisut ilaatigut inuusuttoq suliassaqarfimmut immikkut misilittagaqassasoq ilisimasaqassasorlu piumasqaammik aalajangersaasinnaapput, taamaalilluni soorlu assersuutigalugu

nunalerinerup aamma aallaaniarnerup piniarnerullu iluanni pisartutut. Killilersuinernut piunasaqaatinullu tunngatillugu tamanna assersuutigalugu inuusuttut sukumiisumik ilinniartinneqarnerannut nakkutigineqartuaannarnissaannullu tunngassuteqarsinnaavoq. Aalajangersakkami § 56, imm. 1-imi isumannaatsuutitsinissamut aalajangersakkap nalinginnaasup saneqqunneqarnissaanik aalajangersaanissaq periarfissiissutigineqanngilaq.

Kalaallit Nunaanni inuusuttut sulisarnerat pillugu nalunaarummi nr. 1347, 15. december 2005-imeersumi itisilerneqarpoq. Maannakkut nalunaarummut atuuttumut taartissatut inuusuttut sulisarnerat pillugu nalunaarummik aalajangersaanissaq Naalakkersuisut naatsorsuutigaat.

Imm. 6-imut

Aalajangersakkami piginnaatitsinermut aalajangersakkat, inuusuttut sulinissamut periarfissaqarnerannut tunngassuteqartut ataatsimoortinneqarput.

Aalajangersagaq inuusuttut oqinnerusumik inuussutissarsiutigalugu sulinerat pillugu maleruagassanik aalajangersaanissamut periarfissiivoq, 15-inik ukiulinnut killissaliinermik saneqqutsiviusumik. ILO-mi nunani tamalaani isumaqatigiissutinut nr. 138-mut aamma 182-imut naapertuuttumik inuussuttut inuussutissarsiutigalugu sulitinneqarnissaannut 13-inik ukiulinnut ukiukinnerpaaffissaliisoqarpoq.

§ 56, imm. 6, nr. 1 piginnaatitsissutinut aalajangersakkatut ilusilerneqarpoq, tassami sukumiisumik maleruagassanik aalajangersaanerup allaffissornikkut pinissaa naleqqutsinneqarmat. Oqaatigineqarsinnaavoq oqinnerusumik sulinermi ilaatigut aatsisartutut sulineq oqinnerusooq, uumasunik nujuitsunik paarsineq, ilanngullugu oqinnerusumik nerukkaaneq kiisalu nunianneq pineqartunut ilaammata.

§ 56, imm. 6, nr. 2 atuunneranni 15-inik ukiulinnut killiliinerup aammalu inuusuttoq sulinissamut atuartinneqartussaataitanermi pineqartunut ilaaqusaassanngitsoq pillugu piunasaqaatip kiisalu piffissaq suliffiususaaq pillugu maleruagassat saneqqunneqarnissaat pillugu maleruagassanik suliaqarnissamut Naalakkersuisut periarfissaqarput, taamaattoq inuusuttunut ilinniartitaanermut ilaatillugu sulisunut unnuakkut sulineq pillugu maleruagassat ilaatinneqaratik. Piffissaq inuusuttup ilinniartitaanermut atatillugu atuartitsinermut atugaa, piffissamut suliffiusumut ilanngullugu naatsorsorneqassaaq. § 57, imm. 5, nr. 1-imi tamanna pillugu maleruagassanik erseqqinnerusunik aalajangersaanissamut inatsisini tunngavissaq takuneqarsinnaavoq.

Meeqqat tamanut isiginnaartitsinerni peqataasarnerannut imaluunniit allatigut eqqumiitsuliornermik ingerlataqarnermut peqataasarnerannut maleruagassanik

suliaqarnissamut Naalakkersuisut § 56, imm. 6, nr. 3-imi piginnaatinneqarput. Aalajangersakkamik atuinissamut ukiukinnerpaaffiliisoqanngilaq, kisianni inuusuttunut 13-it inorlugit ukiulinnut pisuni ataasiakkaani akuersissummik tunniussisoqartassaaq.

Isiginnaartitsineq klubimi imaluunniit peqatigiiffimmi sammisaqarnermut ilaatillugu, imaluunniit oqaluffimmi sammisaqarnermut ilaatillugu, taamaallaat pisoq, aammalu sulinertut isikkoqanngitsoq, inatsimmi kapitali 9-mi pineqartunut ilaanngilaq taamaalillunilu akuersissummik piniarnissamut pisussaaffeqartitsisoqarani. Tamanna assersuutigalugu oqaluffimmi meeqqanut erinarsoqatigiinnut, ilinniartitaanermi imaluunniit sunngiffimmi sammisaqarnerit pineqartillugit, aammalu peqataanermut akiliineq taamaallaat aningaasartuutiviusunut taarsiinissamut tunngassuteqartunut, atuuppoq.

Kalaallit Nunaanni inuusuttut sulisarnerat pillugu nalunaarummi nr. 1347, 15. december 2005-imeersumi itisilerneqarpoq. Maannakkut nalunaarummut atuuttumut taartissatut inuusuttut sulisarnerat pillugu nalunaarummik aalajangersaanissaq Naalakkersuisut naatsorsuutigaat.

Imm. 7-imut

Aalajangersakkami sulisitsisut angajoqqaatut oqartussaasumut imaluunniit nakkutiginnittumut inuusuttut sulisinneqarnerat pillugu nalunaarutiginninnissamut ataatsimut isigalugu pisussaaffeqarneq aalajangersarneqarpoq. Aalajangersagaq inuusuttunut 15-it inorlugit ukiulinnut imaluunniit inuusuttunut suli atuartitaasusaaatitaanermi pineqartunut ilaasunut, attuumassuteqarpoq.

Aalajangersagaq Kalaallit Nunaanni meeqqat pisinnaatitaaffii pillugit inatsimmi nr. 197, 16. juni 1962-imeersumi aamma namminersorsinnaanermut inatsisip Kalaallit Nunaanni atuutsinneqalernissaa pillugu kunngip peqqussutaani nr. 306, 14. juni 1993-imeersumi tunngaviusunut naapertuuppoq. Angajoqqaatut oqartussaasoq inatsisit taakkua naapertorlugit ilaatigut meeqqamut isumaginnittussaavoq aammalu meeqqap soqutigisai pisariaqartitsinalu aallaavigalugit taassuma inuttut atugai pillugit aalajangiisussaalluni, aammalu meeqqap perorsagaanera eqqarsaatigalugu imaluunniit atugarissaarnerata tamanna pisariaqartippagu, angajoqqaatut oqartussaasoq suleqatigiinnissamut isumaqatigiissummik, meeqqap nammineerluni isumaqatigiissutigisimasaanik, atorunnaarsitsisinnaavoq.

Aammattaaq aalajangersakkami pisussaaffik Inatsisartut inatsisaanni § 88 malillugu angajoqqaat inuusuttumut pisussaaffigisaa tunngavissinneqarpoq. Nalunaarutiginninnissamut

ilusiliussassanik piumasaqaatinik aalajangersaasoqanngilaq, tamannalu oqaasiinnartigut pisinnaassaaq.

### *§ 57-imut*

#### *Imm. 1-imut*

Aalajangersakkami inuusuttut 18-it inorlugit ukiulinnut piffissaq suliffiususaaq inersimasunut suliassaqarfiup taassuma iluani sulisunut piffissamit nalinginnaasumik suliffiusartumit sivisunerussanngitsoq aammalu ullormut piffissaq suliffiusoq ullormut nalunaaquttap akunnerinit 8-nit sivisunerussanngitsoq, aalajangersarneqarpoq. Aalajangersakkami sapaatip akunneranut piffissaq suliffiususaaq ataatsimut katillugu annerpaamik nalunaaquttap akunnerinik 40-nik sivisussuseqassasoq aalajangerneqarpoq.

Inuusuttut annertunerusumik illersorneqarnissaannut aammalu suliassaqarfiup iluani piffissaq suliffiusoq sapaatip akunneranut nalunaaquttap akunnerinit 40-nit sivikinnerutillugu, inersimasunut sapaatip akunneranut piffissaq nalinginnaasumik suliffiusartoq qaangeqqusaanngitsoq, illersuinerup annertussusaa atuuttoq attatiinnerneqarpoq.

#### *Imm. 2-mut*

Inuusuttunut 15-it inorlugit ukiulinnut imaluunniit atuartitaasussaatitaanermi pineqartunut ilaasunut piffissamut suliffiusussamut killilersuinerit immikkut ittut pillugit aalajangersagaq malillugu, inuusuttut taakkua sapaatip akunnerini atuarfiusuni ullormut nalunaaquttap akunneri marluk aammalu sapaatip akunneranut nalunaaquttap akunneri 12-it sulisassapput. Piffissamut suliffiusussamut maleruagassamut tungavilersuutigineqarpoq inuusunnerusut annertunerusumik mianerineqarnissaasa isiginiarneqartussaana. Inuusuttut 15-it inorlugit ukiullit, suli atuartitaasussaatitaasut, ulluinnani atuarnerminnik malinnaasinnaanissamut pissarsiaqarsinnaanissamullu pitsaanerpaanik periarfissaqassapput.

Inuusuttut 15-it inorlugit ukiullit, imaluunniit atuartitaasussaatitaanermi pineqartunut ilaasut, atuangiffinni annerpaamik ullormut nalunaaquttap akunnerini 7-ini aammalu sapaatip akunneranut nalunaaquttap akunnerini 35-ni sulisinnaapput. Tamatuma saniatigut inuusuttut 15-it inorlugit ukiullit, kisianni atuartitaasussaatitaanerminnik naammassisimasut nalunaaquttap akunnerisa suliffissaasa amerlassusaanni annertunerpaaffissaq § 57, imm. 2-mi aalajangersarneqarpoq. Aalajangersagaq tamatumunnga maleruagassat immikkut ittut malillugit oqinnerusumik sulinissamut pingaaruteqarpoq.

Inuusuttut 15-inik ukioqalereersimasut, kisianni suli atuartitaasussaatitaanermi pineqartunut ilaasut, atuangiffinni ullormut nalunaaquttap akunnerini 8-ini aammalu sapaatip akunneranut nalunaaquttap akunnerini 40-ni sulisinnaapput.

#### Imm. 3-mut

Aalajangersakkami unikkallarnissamut maleruagassat, inuusuttunut 18-it inorlugit ukiulinnut tamaginnut atuuttussat, aalajangersarneqarput. Aalajangersakkami aalajangersarneqarpoq unikkallarnej naleqquttumik inissinneqassasoq aammalu ajornangippat ataqatigiissasoq. Unikkallarnej taamaalilluni piffissap suliffiusup naaneranut imaluunniit aallartinneranut inissinneqarsinnaangilaq.

#### Imm. 4-mut

Aalajangersagaq inuusuttut unnukkut aamma unnuakkut sulinissaannik inerteqquteqarnermik imaqarpoq. Sulinissamut inerteqquteqarnej nal. 20.00 aamma nal. 06.00 akornanni inuusuttunut 18-it inorlugit ukiulinnut tamaginnut atuuppoq.

#### Imm. 5-imut

Aalajangersagaq § 57-imi aalajangersakkanut siulianiittunut tamaginnut tunngassuteqarpoq, aammalu pisuni sisamani piffissamut suliffiusussamut tunngatillugu peqqussutinik erseqqinnerusumik aalajangersaanissamut tunngavissaliilluni.

§ 57, imm. 5, nr. 1-imi piffissap suliffiusup aaqqissuunneqarnera naatsorsorneqarneralu pillugit piginnaatitsissuteqarnermi, pingaartumik maleruagassiineq § 56, imm. 6, nr. 2-p, inuusuttoq ilinniartitaanermut imaluunniit sungiusarluni ilinniartuunermut ilaatillugu sulitillugu piffissamut suliffiusumut atuartitaanermut piffissaq ilanngunneqassasoq aalajangersaaviumik, naammassinninnissamut pisariaqarsinnaasumik maleruagassiinissaq siunnerfigineqarpoq. Tamatuma kingunerisaanik inuusuttoq sulisitsisuni arlalinni sulisuuppat, ullut suliffigineqartut aamma nalunaaquttap akunneri suliffigineqartut, piffissap suliffigineqartup naatsorsorneqarnerani ataatsimut katinneqassapput. Inuusuttoq arlalinnik sulisitsisoqarluni sulitillugu, piffissamut suliffiusussamut maleruagassat malinneqarnerannut kina akisussaasuunersoq pillugu apeqqummut tunngatillugu, § 56, imm. 7 aamma § 88 innersuussutigineqarput.

§ 57, imm. 5, nr. 2-mi piginnaatitsissut inuusuttunut 15-inik ukioqalereersimasunuinnaq aammalu atuartitaasussaatitaanermi pineqartunut ilaajunnaarsimasunut tunngassuteqarpoq. Unnuakkut sulinermit, piffissamut qasuersaarfiussamut aamma ulloq unnuarlu sulinngiffeqarnermit maleruagassanik saneqqutsisunik maleruagassanik aalajangersaasoqarsinnaangilaq.

§ 57, imm. 5, nr. 3-mi piginnaatitsissummi inuusuttut atuartitaasussaatitaanermi pineqartunut ilaasut, sapinngisamik ukiumut qasuersaarfeqartassasut qulakkeerneqarnissaa siunertaavoq, aammalu tassani inuusuttut atuartinneqartussaatitaanermi pineqartunut sulii ilaasut,



aasaanerani atuanggifteqarnerup ingerlanerani sulinngiffeqartinneqartassasut pillugu maleruagassanik atuutsitsilernissamut Naalakkersuisunut periarfissiilluni.

§ 57, imm. 5, nr. 4-mi piginnaatitsissummi, suliassa qarfiit immikkuullarissut iluanni 15-17-  
iniik ukiullit, taakkua atuartitaasussaataitanerminnik naammassinissimappata, unnukkut  
aamma unnuakut sulisarnerannut Naalakkersuisut maleruagassanik § 57, imm. 4-mi  
aalajangersarneqartunit qasunganerusunik suliaqarnissamut periarfissinneqarput.  
Aalajangersagaq malillugu taamaattoq piffissamut nal. 24.00 aamma 04.00 akornanni  
qasukkartitsisoqarsinnaanngilaq.

### *§ 58-imut*

Imm. 1-imut

§ 58, imm. 1 naapertorlugu inuusuttut 15-it inorlugit ukiullit imaluunniit  
atuartitaasussaataitanermi pineqartunut ilaasut, ulloq unnuarlu minnerpaamik nalunaaquttap  
akunnerini 14-ini ataqatigiissumik qasuersaarfeqartinneqassapput. Inuusuttunut allanut § 58  
malillugu qasuersaarfissaq ataqatigiissoq ulloq unnuarlu minnerpaamik nalunaaquttat  
akunnerini 12-ini sivisussuseqassaaq.

Imm. 2-mut

Aalajangersakkami aalajangersarneqarpoq inuusuttut 18-it inorlugit ukiullit tamarmik  
sapaatip akunneranut ulloq unnuallu marluk qasuersaarfissaqartinneqassasut. Ullut unnuallu  
marluk sulinngiffeqarneq ataqatigiissinneqarsinnaasimanngippat, sapaatip akunneranut ulloq  
unnuarlu sulinngiffeqarneq ullormut qasuersaarfissamut ataqatigiissillugu inissinneqassaaq.

Sapaatip akunneranut ulloq unnuarlu sulinngiffeqarneq sapinngisamik  
sapaammiitinneqassaaq.

Imm. 3-mut

§ 58, imm. 3-mi, §§ 56-57-imi tulleriissaartumik periaaseqarneq malinneqarpoq,  
aalajangersagaq ataaseq piffissamut qasuersaarfiussamut aamma ulloq unnuarlu  
sulinngiffeqarnermut piginnaatitsissutinut aalajangersakkanik ataatsimoortitsilluni.

Oqaaseq »suliat aamma suliassa qarfiit kiisalu immikkut sulinerup iluseqartinneqarnera« § 49-  
mi oqaasertaritinneqartut assinginut tunngassuteqarpoq.

§ 58, imm. 3, nr. 1-imi aalajangersagaq Naalakkersuisut sulianut imaluunniit suliassa qarfinnut  
piffissap qasuersaarfiussup sivisussusissaa pillugu maleruagassanik aalajangersaanissaannut  
piginnaatitsissummik imaqarpoq, kisianni taanna »inuusuttunut 15-inik

ukioqalereersimasunut aammalu atuartitaasussaaitaanermi pineqartunut ilaajunnaarsimasunut« killilerneqarpoq. Tamatuma kingorna suliassaqaqfinnut, assersuutigalugu nunalerineq, aallaaniarneq piniarnerlu aamma akunnittarfinnut neriniartarfinnullu suliassaqaqfik, piffissamut qasuersaarfissamut tunngatillugu maleruagassat immikkut ittut aalajangersarneqarsinnaapput.

§ 58, imm. 3, nr. 2-imi Naalackersuisut ulloq unnuarlu sulinngiffeqarnerup kinguartinnissaa pillugu maleruagassanik aalajangersaanissamut piginnaatinneqarput, taanna malillugu suliassaqaqfinnut soorlu assersuutigalugu nunalerineq, aallaaniarneq piniarnerlu aamma akunnittarfinnut neriniartarfinnullu suliassaqaqfik, ulloq unnuarlu sulinngiffeqartarnermut tunngatillugu maleruagassat immikkut ittut aalajangersarneqarsinnaallutik.

§ 58, imm. 3, nr. 3-ip atuunnerani ingerlatanut arlalinnik sivikitsunik imaluunniit ullup ingerlanerani sivikitsumik, assersuutigalugu eqqiaanermik, suliffeqartarnermut tunngasunut qasuersaarfissaqarnerup kipitinneqarnissaa akuerineqarsinnaavoq.

Ulloq unnuarlu sulinngiffeqarnermut maleruagassat saneqqunneqarsinnaavoq, taamaattoq inuusuttoq tamatigut minnerpaamik ataqatigiissumik nalunaaquttap akunnerini 36-imi qasuersaartinneqartassalluni. Naalackersuisut § 58, imm. 3, nr. 4-imi erseqqinnerusumik maleruagassiinissamut piginnaatinneqarput.

#### § 59-imut

Aalajangersakkami § 48-imi force majeure pillugu maleruagassat inuusuttunut 18-it inorlugit ukiulinnut atuutsinneqarnerat ingerlateqqinneqarpoq. Pisuni taamaattuni piffissaq suliffiususaaq, unnuami sulineq aamma unikkallarnerit pillugu piumasaqaatit aalajangersimasut, piumasaqaatit erseqqinnerusumik aalajangersarneqartut tunngavigalugit saneqqunneqarsinnaanerannut periarfissiisoqarsinnaavoq.

#### § 60-imut

Piginnaatitsissuteqarnermut aalajangersakkami inuup ataatsip suliffeqarfutaanni taamatullu suliaqaqfinni imaluunniit suliassaqaqfinni imaluunniit suleqatigiinni allani nakorsamit misissortittarnerit pineqartunut ilaapput, assersuutigalugu utoqqaassutsimut, suaassutsimut imaluunniit sulinerup suussusaanut tunngasut.

Naatsorsuutigineqarpoq kikkut ataasiakkaatigut misissuineramik aaqqissuussinermi pineqartunut ilaatinneqassanersut, aammalu taanna maleruagassat Naalakkersuisunit aalajangersarneqartut iluanni tamanna qanoq erseqqinnerusumik ingerlanneqassanersoq, annertunerpaamik Sullivinnik Nakkutilliisoqarfimmut aalajangertinneqartassasoq. Imm. 1 malillugu piumasagaataavoq sulineq sulisut peqqissusaannut navianaateqartoq, tassa imaappoq peqqissutsimut navianartoqarnera paasineqarsimassaaq. Tamanna assersuutigalugu nakorsamit misissortinnikkut, sulinerup eqqiluitsuunerata imaluunniit sulinermi nakorsartinnikkut imm. 2 malillugu misissuinerit, § 20 malillugu misissuinerit sulisitsisup ingerlatitassaasigut imaluunniit isumannaallisaanermik suliaqarnerup aaqqissuussaananit misissuisitsinikkut, pisinnaavoq.

Oqaatsimut »sulisut peqqissusaannut navianaateqartoq« tunngatillugu tamanna § 1-imut tassungalu nassuiaatinut naapertuuttumik paasineqassaaq.

Imm. 1, nr. 1-imut

Atorfeqarunnaareernermit nakorsamit misissortinneq, suliffeqarfimmi sulisunut, siusinnerusukkut – pineqartup atorfeqarnerata nalaani – sulisut peqqissusaannut navianaateqartumik suliaqartunut, sanilliunneqassaaq. Assersuutitut taaneqarsinnaavoq aatsitassarsiornermi sulineq. Nakorsamit misissortinneq taamaattoq, pineqartoq peqqissutsimut ajorseriartitsisumik sunnertissimappat, sulisup siunissami suliffimmi sorlermi sulinissaanik nalilersuinermit pingaaruteqarsinnaavoq.

Imm. 1, nr. 2-mut

Sulinermit nakorsarneqarnikkut misissortinneq paasineqassaaq tassaasoq, sulisup sullivinni avatangiisini qisuariarnerinik nakorsamit misissortinnerit.

Suliffimmi eqqiluisaarnikkut misissuinerit paasineqassapput sullivimmi qallertigut timikkut, akuutissanit uumaatsunit aamma uummassusilinnik sunnertinnerit aalajangiunniarneri, assersuutigalugu uuttortaanerit aamma pujoralannik, nipiliornernik, gassinik assigisaannillu misissueqqissaanerit.

Misissuinerit allat assersuutigalugu sulinermit eqqarsartaatsikkut misissortinnerit, aamma eqqarsartaatsikkut sullivimmi silaannarmut, timip ilusaanut naleqquttunik atugassaqarnikkut misissuinerinik assigisaannillu siunnerfeqartut, sulisup isumannaatsuunissaanut peqqissusaanullu pingaaruteqartut.

Imm. 2-mut

Imm. 2 peqqissutsimut navianartoqartoq paasineqarluni pisoqarneranut tunngavoq.

Nakorsamit misissortinnerit pisariusinnaapput aammalu immikkut atortunik aamma immikkut ilisimasalinnik killilimmik pissaqarnissamut annertoorujussuarnik piumasaaqateqarfiusarlutik. Taamaattumik misissuinerup aallartinnissaa pillugu aalajangiisoqartinnagu, pisiaqartitsineq nalilersoqqissaarneqartariaqarpoq. Inatsimmi nalilersuinermut tassunga malittarisassanik aalajangersimasunik aalajangersaasoqarsinnaanngilaq.

Pisariaqartitsinermit missingersuinissamut tunngavissat tassaassapput, peqqissutsimut navianartoqartoq pasitsaassaarneq. Assersuutigalugu pasitsaassineq naammagittaalliuuteqarnermik pissuteqarsinnaavoq, napparsimanertik pilersocarneraneersuusinnaalluni imaluunniit suliffimi eqqiluisaarnermik uuttoortaaneraneersuusinnaalluni imaluunniit nunanit allanit misilittakkaneersuusinnaalluni.

Imm. 3-mut

Pingaarnertut malitassaavoq akiliisussaataitanermut sulisitsisoq pisussaaffeqartoq, takuuk aamma § 20.

Aamma pisoqarsinnaavoq naleqqutissappat Namminersorlutik Oqartussat aningaasartuutunik akiliillutik, assersuutigalugu misissuinerne suliffeqarfimmi ataatsimi pissutsinik pissuteqanngitsumik, kisiannili nalinginnaasumik pitsaaliuinissaq eqqarsaatigalugu tunngavilersuuteqartumik. Taamaattumik aalajangersakkat suut aningaasartuutunik matussusiinermit atorneqassanersut, nakorsamit misissortinneq pillugu maleruagassat suliarineqartut apeqqaataassapput.

Imm. 4-mut

Aalajangersakkamut misissuineq sulinerne atukkanut ilaatinneqartoq, taamaattumillu tamanna ajornarsimanngippat aammalu isertitanik annaasaqarani piffissap suliffiusup iluani pisariaqaraluartoq, isiginninneq tunngavigineqarpoq. Aalajangersakkap atuunnerani aamma atorfeqarunnaareernerup kingorna misissortinnerne, siusinnerusukkut sulisitsisuusimasoq tamakkiisumik ilaannaasumilluunniit sulisitsisumi nutaami isertitassanik annaasaqarnermut taarsiissasoq, pineqartussaasinnaavoq.

Imm. 5-imut

Unioqqutitsinernut pinerluttulerinermit inatsimmi pineqaatissiisarneq pillugu aalajangersagaq, maleruagassani nakorsamit misissortinneq pillugu aalajangersarneqartuni, aalajangersarneqartariaqarpoq, takuuk § 83, imm. 1 aamma § 85.

*§ 61-imut*

Inuusuttut 18-it inorlugit ukiullit nakorsamit misissortittarnerannut tunngatillugu maleruagassanik siusinnerusukkut aalajangersaasoqarsimangilaq, aammalu tamanna pillugu maleruagassanik aalajangersimasunik aamma isumaliutersuuteqartoqarani.

### *§ 62-imut*

Aatsitassanut ikummatissanullu inatsimmi paasinninneq malillugu pisinnaatitsissummik pigisaqartoq suunersoq, erseqqinnerusumik nassuiaanissamut, tamanna pillugu aatsitassat pillugit ingerlatallu tamatumunnga pingaarutillit pillugit inatsisartut inatsisaanni (aatsitassanut ikummatissanullu inatsit) maleruagassat innersuussutigineqarput.

### *63-imut*

#### **Imm. 1**

Aalajangersagaq aatsitassat pillugit ingerlatallu tamatumunnga pingaarutillit pillugit inatsisartut inatsisaanni (aatsitassanut ikummatissanullu inatsit) § 79-imi aalajangersakkamut maannamut atuuttumut assinguvoq. Nunani tamalaani suleriaatsinut pitsaasunut aammalu pisinnaatitsissummik tunniussisartup aamma aatsitassanut suliassaqarfimmi oqartussaasup nakkutiginnittuusup aaqqissuussaanikkut avissaartisimaneqarnissaannik kissaateqarnermut naapertuuttumik, imartani isumannaallisaanermut peqqinnissamullu aalajangersakkat sullivinni avatangiisit pillugit Inatsisartut inatsisaannut siunnersuutigineqartunut nuunneqarput.

Aalajangersakkami isumannaallisaanermut peqqinnissamullu piumasaqaatit aatsitassat pillugit ingerlatallu tamatumunnga pingaarutillit pillugit inatsisartut inatsisaanni (aatsitassanut ikummatissanullu inatsit) § 79 malillugu maannamut atuuttut assingi aalajangersarneqarput. Taamaattumik isumannaallisaanermut peqqinnissamullu tunngatillugu suleriaaseq maannamut aatsitassat pillugit ingerlatallu tamatumunnga pingaarutillit pillugit inatsisartut inatsisaanni (aatsitassanut ikummatissanullu inatsit) § 79 malillugu maannamut atuussimasup assigissagaa naatsorsuutigineqarpoq.

Aalajangersagaq malillugu aatsitassanut ikummatissanullu inatsit malillugu pisinnaatitsissummik pigisaqartoq ALARP-imi tunngaviusup imartani atortuni atuutinneqarnissaanut akisussaasusuni qullersaavoq. Oqaaseq tuluttuumit "as low as reasonably practicable" nutsigaavoq aammalu naalisarneqartarluni ALARP. Suliaqartuusut iliuseqarnermikkut isumannaallisaanikkut peqqinnissakkullu allanut aarlerinartorsiortitsisut, aamma aarlerinaataasut piujunnaarsinnissaannut imaluunniit annikillisinneqarnissaannut ALARP-imut tunngaviusumi tunngavigineqarpoq. Aarlerinaataasut "sapiingisamik naleqquttumik suliaqarnermi ajornartinnagu appasinnerpaamik" annertussuseqalersillugit

annikillisinneqassapput. ALARP-imut tunngaviusoq nunani tamalaani imartani tunngaviusutut akuerisaavoq atorneqarlunilu. Tamanna pingaartumik nunani oqartussaasunit imartani ingerlataqartunit, imartani isumannaallisaaneq peqqinnissallu qaffasissumik pingaartilluni, atorneqarpoq. Tunngaviusoq aamma, aarlerinaataasunik nalilersuineq aamma annikillisitsinissaq annertuumik ilaatillugu, allanut atatillugu atorneqarpoq. Taamaattumik Kalaallit Nunaanni nunami namminermi inatsisit, nunani tamalaani imartani suliffissuaqarnermi oqaatsip tunngaviusullu paasineqartarneranik tunngaveqartinnissaat, isumannaallisaanermut peqqinnissamullu ersarissumik pingaaruteqarpoq. Suliaqarnikkut ALARP-imi tunngaviusoq malillugu aarlerinaataasut annikillisinneqarnissaat pillugu piumasagaatip atuunnerani, siullermik pingaarnertullu piumasagaatit aalajangersimasut innersuussinerillu tamarmik kiisalu inatsisini maleruagassanilu killissarititat pinngitsoorani malinneqarnissaat pisariaqarpoq. Tulliullugu isumannaallisaanermut peqqinnissamullu aarlerinaataasut piivinneqarsinnaanersut imaluunniit annikillisitseqqissinnaanersut suliffeqarfiit nalilersussavaat. Aamma pisuni, inatsisit innersuussinernik imaluunniit killissarititanik aalajangersimasunik imaqaratik, kisianni taamaallaat piumasagaatinik atituunik atorsinnaasunillu imaqartillugit, kingulliullugu taaneqartoq atuutissaaq. ALARP-imut tunngaviusup atuunnerani, oqartussaasut ingerlaavartumik maleruagassanik aalajangersaanissamut pisussaaffigisaannik, sumiiffinni allani inatsisi suleriaatsit atorneqartut parlattuanik, suliffeqarfiit isumannaallisaanermut peqqinnissamullu aarlerinaataasut, sukkulluunniit suliaqarnikkut sapinngisamik naleqquttumik, teknikkikkut inuiaqatigiinnilu ineriartornermut naapertuuttumik, annertussusilimmik annikillisinnissaasa isumaginissaanut suliffeqarfiit pisussaaffigaat. Tunngaviusumi aatsitassanut ikummatissanullu inatsimmi § 1, imm. 2-imi maleruagassanut nalinginnaasunut naapertuuttumik, maleruagassinneqarpoq, suliaqarneq aatsitassanut ikummatissanullu inatsit malillugu akuersissummi pineqartunut ilaasoq, pissutsit taamaaqatai atuutsillugit suliassaqarfimmi nunani tamalaani suleriaatsimut pitsaasumut akuerisaasumut naapertuuttumik ingerlanneqartassasoq.

Imm. 2-mut

Imm. 2-imi aalajangersakkami aalajangersarneqarpoq pisinnaatitsissummik pigisaqartup aatsitassat pillugit ingerlatallu tamatumunnga pingaarutillit pillugit inatsisartut inatsisaanni (aatsitassanut ikummatissanullu inatsit) § 6-imi nassuiarneqartutut, imartani atortut nakkutigineqarnissaannik pisussaaffeqarnera, inatsisit naapertorlugit ingerlanneqassasoq, ilanngullugu ALARP-imut tunngaviusoq, Inatsisartut inatsisaanni matumani aalajangersarneqartoq.

Imm. 3-mut

Imm. 3-imi aalajangersakkami aalajangersarneqarpoq, pisinnaatitsissummik pigisaqartoq sinnerlugu ikummatissiasanik misissuineramik tunisassiornermillu ingerlatsisumut tunngatillugu, pisinnaatitsissummik pigisaqartup pisussaaffiisa annertoqataannik, suliffeqarfiup ingerlatsineranut akissussaasuusup isumannaallisaanikkut peqqinnissakkullu pisussaaffimminik naammassinninnissaanut, pisinnaatitsissummik pigisaqartup periarfississagaa.

Pisinnaatitsissummik pigisaqartoq aningaasaqarnikkut killissaliussat suut ingerlataqarnernut atatinneqassanersut aalajangertussaammat, pisinnaatitsissummik pigisaqartup aamma periarfissat suliffeqarfiup ingerlatsineranut akissussaasuusup pisussaaffimminik naammassinninnissamut periarfissarisai, nakkutigisussaavai.

Imm. 4-mut

Aalajangersakkami Naalakkersuisut imartani atortunut atatillugu isumannaallisaaneq peqqinnissarlu pillugit maleruagassanik erseqqinnerusunik aalajangersaanissamut piginnaatinneqarput.

Ilaatigut pisinnaatitsissummik pigisaqartup akissussaaffia pisussaaffiilu, suliffeqarfiit inuillu imartani ikummatissarsiorluni ingerlatani suliaqartut imaluunniit suliaqarnermi peqataasut akornanni akissussaaffiup agguagaanera kiisalu isumannaallisaanermut peqqinnissamullu nassuiaatinik suliaqarneq pillugit aalajangersakkanik aalajangersaasoqarsinnaavoq, ilanngullugu imm. 1-3 malillugit piumasaqaatit naammassineqarnerat uppernarsarniarlugu. Aammattaaq isumannaallisaanermik peqqinnissamillu aqutsineq pillugu, isumannaallisaanermut illersuinernullu killeqarfiit pillugit, imartani atortut sananeqarnerat piarneqarnerallu pillugu kiisalu atortut, akuersissuteqartarnerit, nakkutilliineq, upalungaarsimaneq, annaassiniarnermi iliuusissat, ilinniartitaanermut piumasaqaatit, piffissaq suliffiusoq ilaalu ilanngullugit pillugit aalajangersakkanik aalajangersaasoqarsinnaavoq.

Uppernarsaasiinissamut piumasaqarsinnaanissamut siunertaavoq ilaatigut isumannaallisaanerup peqqinnissallu qaffasissuunissaannik siuarsaanissaq, inuiaqatigiinni teknikkikkut inooqatigiinnikkullu ineriartornermi takuneqarsinnaasumik, ilaatigullu sinerissami isumannaallisaanermut peqqinnissamullu apeqqutinut, suliffeqarfiit namminneerlutik iluarsisinnaasaannut sinaakkutissiinissaq. Isumannaallisaanermut peqqinnissamullu tunngasunut akuersaarneqarsinnaasunut ileqqussat assigiiginnangillat, kisianni inuiaqatigiinni teknikkikkut inooqatigiinnikkullu ineriartorneq ilutigalugu ineriartortinneqarlutik. Kapitalimi aalajangersakkat suliffeqarfiup nammineerluni isumannaallisaanermut peqqinnissamullu apeqqutinik iluarsisinnaanissaanut sinaakkutissiisoqassaaq. Qaffasissumik isumannaallisaanerup peqqinnissallu pitsaassuseqartinnissaasa qanoq anguneqarnissaa, suliffeqarfiit namminneerlutik

aalajangersassavaat. Maleruagassat taamaalillutik tassaassapput atuuffissanut piumasaqaatit, tassa imaappoq aalajangersakkani aalajangersarneqarpoq suut anguneqassanersut aammalu qanoq tamanna anguneqassannginnersoq pineqarani.

Aalajangersakkami aamma Naalakkersuisut ilaatigut maleruagassanik erseqqinnerusunik, isumannaallisaanermut peqqinnissamullu aqutseriaatsit imarisassaas pillugit maleruagassanik erseqqinnerusunik aalajangersaanissamut piginnaatinneqarput. Maleruagassat taamaattut assersuutigalugu makku pillugit aalajangersakkanik imaqarsinnaapput:

- Anguniakkat
- Aaqqissuussaaneq
- Ilinniartitaanerup piginnaasaqarfiillu aqunneqarnerat
- Assersuutigalugu inatsisit malinneqarnissaat qulakkeerniarlugu, suliffeqarfiup nammineerluni isumannaallisaanermut peqqinnissamullu piumasaqaatinut nassuiaanernik aalajangersaaneratigut aarlerinaataasunik aqutsineq
- Isumannaallisaanermik peqqinnissamillu suliniuteqarnerup sunniutaasa uuttortarneqarnerat aallaavigalugu aarlerinaataasunik aqutsineq
- Uppernarsaasiineq, ilanngullugu nalunaarusiornermi periaasiusartut
- Kukkunersiuisarneq (audit) aamma naliliineq
- Periaatsinik nutarterineq.

ALARP-imut tunngaviusoq malillugu, takuuk imm. 1, pitsaassusissat minnerpaaffissai tamatigut pineqartussaammata, suliffeqarfiit namminneerlutik isumannaallisaanermut peqqinnissamullu malitassat pisariaqartumik annertussuseqartilerlugit, kivissavaat.

Aalajangersakkami aamma Naalakkersuisut uppersusersiiniartarnermut aaqqissuussinermut maleruagassanik erseqqinnerusunik aalajangersaanissamut piginnaatinneqarput, ilanngullugit isumannaallisaanermut tunngavissarititaasut ilai aalajangersimasut, assersuutigalugu sanaartukkat sannai nammattut, uppersusersineqassasut pillugu piumasaqaat, ilanngullugulu suleriaatsit uppersarsaatillu naammassineqartussat pillugit piumasaqaatit.

Aalajangersakkami aamma Naalakkersuisut sulisut isumannaallisaanermut peqqinnissamullu ilinniartitaanerat pillugu maleruagassanik aalajangersaanissamut piginnaatinneqarput.

Allanneqartoq »il.il.« qulequtaani ilanngunneqarpoq, tassami kapitali aamma sullivinni avatangiisinut tunngatillugu tapersiisarneq, paasissutissiisarneq ilinniartitaanerlu piullugit aalajangersakkanik imaqarmata.



## § 64-imut

### Imm. 1-imut

Sullivimmi suleqataasut suliffiup iluani isumannaallisaanermik suliaqarneq pillugu maleruagassat aqutigalugit, suliffeqarfinni ataasiakkaani sullivinni avatangiisini sunniuteqaqataanissamut isumannaariffigineqarmata, pingaarnertigut aqutsinermut pilersaarusionermullu sunniuteqarnermigut, suliaqarnerup taassuma siuarsarnissaa Sullivinni avatangiisinut siunnersuisooqatigiit suliassaraat. Siunnersuisooqatigiit tassani sullivimmi ajornartorsiutit aamma eqqarsartaaseq sulinermi ilaatissavaat, suliani ataasiakkaani aammalu inatsimmi sinaakkutissanik immersuisunik maleruagassiisarnermigut. Siunnersuisooqatigiit suliassatik tamakkiisumik naammassissappagit, suliaqarnerit aaqqissuussaaneri aqutigalugit isumannaatsunik peqqinnartunillu sulinermi atugaqalersitsinissamut suliaqarnerup sullivinni paasitinneqarnissaa pingaaruteqarpoq.

### Imm. 1 nr. 1-imut

Siunnersuisooqatigiit assersuutigalugu paasissutissiilluni videoliat, atuagaaqqat, nassuiaatit aamma tv-ikkut takutitassiat ilaalu ilanngullugit aqutigalugit, sullivinni avatangiisinut apeqqummut ilisimasaqarneq siammarsarinnavaat.

### Imm. 1 nr. 2-mut

Inatsisip atuuffissaasa iluanni apeqqutit oqallisiginissaannut aalajangiisinnaatitaanerup killilersorneqarnissaanut taarsiullugu, Sullivinni avatangiisinut siunnersuisooqatigiit sullivinni avatangiisinut pingaaruteqartunut apeqqutitut aalajangiisinnaatitaanerisa aalajangersarnissaa pissusissamisoorineqarpoq. Taamaaliornikkut sullivinni avatangiisinut apeqqutinik nutaanik isumaliutersuutigineqaleruttortunik qaqitsinissamut periarfissanik ammaasoqarpoq, assersuutigalugu inatsisip ataani taakkua ilanngunneqarnissaat siunertarinqarsinnaalluni.

### Imm. 1 nr. 3-mut

Naatsorsuutigineqarpoq suliassat ataasiakkaat Sullivinni avatangiisinut siunnersuisooqatigiinnut saqqummiunneqartut, pingaartumik tunngaviusunut tunngassuteqassasut.

### Imm. 2-mut

Nalunaarummi nr. 1345, 15. december 2005-imeersumi kingusinnerusukkut allannguuteqartumi § 7-imi, Kalaallit Nunaannut Sullivinni avatangiisinut siunnersuisooqatigiit suleriaasissaat, allassimavoq siunnersuisooqatigiit pisariaqarpat ataatsimiititaliap sulinerani peqataasussanik immikkut sulianut ilisimasalinnik aggersaasinnaasoq.

Ataatsimiititaliamut ataasiinnarmut aamma sulianut ataatsimiititaliami siulittaasoq, allamik siunnersuisooqatigiit aalajangiisimangippata, siunnersuisooqatigiit siulittaasuannit toqqarneqassaaq.

Imm. 3-mut

Siunnersuisooqatigiit sullivinni avatangiisinut suliassaqarfimmi namminneerlutik suliniuteqarsinnaanissaannut, isummernissamut tunngavissianik suliaqarnermut aamma misissuinernek suliaqarnermut sulianik paasisimasalinnik ikiorteqarnissamut periarfissaqassapput.

Siunnersuisooqatigiit namminneerlutik ilisimatusarnermut suliniutinik anginerusunik aallartitsisarnissaat eqqarsaataangilaq.

Imm. 4-mut

Siunnersuisooqatigiit suleriaasissaat nalunaarummi nr. 1345, 15. december 2005-imeersumi kingusinnerusukkut allannguuteqartumi, Kalaallit Nunaannut Sullivinni avatangiisinut siunnersuisooqatigiit suleriaasissat, allassimavoq.

#### *§ 65-imut*

Imm. 1-imut

Sullivinni avatangiisinut siunnersuisooqatigiit katitigaanerit pillugu isumaliutersuutitut aallaaviusoq tassaavoq, sulisartut aamma sulisitsisut naligiimmik sinniisoqarnissaannik kissaateqarneq.

Sullivinni avatangiisinut siunnersuisooqatigiit Siulittaasuat Inatsisartuni ilaasortaangitsut ataatsimiititaliani, aalajangiisartuni aamma aallartitaqartarnermi assigisaannilu peqataasarnerat pillugu Inatsisartuni Naalakkersuisunilu il. il. ilaasortat aningaasarsiaqartitaanerit il. il. pillugit Inatsisartut inatsisissaat nr. 22, 18. december 2003-meersumi § 18, imm. 1-imi oqaaseqatigiit siullerni pineqartunut ilaavoq.

Kalaallit Nunaanni Sullivinni avatangiisinut siunnersuisooqatigiinnut suleriaatsimi maannamut atuuttumi – Sullivinnik Nakkutilliisoqarfiup nalunaarutaa nr. 1345, 15. december 2005-imeersumi kingusinnerusukkut allannguuteqartumi § 8-mi allassimasutut, Sullivinni avatangiisinut siunnersuisooqatigiinni ukiumut pingasoriarluni nalinginnaasumik ataatsimiinneq pisarpoq aammalu allatigut siulittaasup aalajangiineratigut pisarluni.

Nr. 6-imi allassimasutut aallartitaq 1 kommuninit toqqarneqassaaq. Toqqaanissaq pillugu kommunit amerlanerussuteqarnikkut aalajangiissapput. Aallartitatut arlallit amerlaqatigiinnik taaneqarpata, toqqaaneq makitsinikkut pissaaq.

Imm. 2-mut

Sinniisissaq aallartitap peqannginnerani atuussinnaavoq.

Imm. 3-mut

Siulittaasoq, aallartitat aamma sinniisissaq Sullivinni avatangiisinut siunnersuisooqatigiinni piffissani arlalikkaani issiasinnaapput, taakkua piffissani tamaginni ataatsimiitaliami issianissamut toqqarneqarsimagunik.

Imm. 4-mut

Kalaallit Nunaanni Sullivinni avatangiisinut siunnersuisooqatigiit suleriaasissaannik, nalunaarut nr. 1345, 15. december 2005-imeersumi kingusinnerusukkut allannguuteqartumi, allassimavoq Sullivinni avatangiisinut siunnersuisooqatigiit allattoqarfiat ataatsimiinnissaq kingusinnerpaamik ullunik suliffiusunik 10-nik sioqqullugu nalinginnaasumik aggersaalluni oqaluuserisassat kiisalu najoqqutassat, siunnersuisooqatigiinni suliarinninnissamut pisariaqartutut nalilerneqartut ilanngullugit nassiussisassasooq.

Oqaluuserisassanut tapiliussaasinnaasoq ataatsimiinnissaq kingusinnerpaamik ullunik suliffiusunik tallimanik sioqqullugu nalinginnaasumik nassiunneqassaaq. Ilaasorta q arlaalluunniit tapiliussatut oqaluuserisassani suliasamik ikkussisinnaavoq, taamatullu suliasat oqaluuserisassanut tapiliussami ilanngunneqartut kinguartissinnaallugit.

Siunnersuisooqatigiit isumaqatigiillutik aalajangiisarnissaat anguniarneqassaaq.

Imm. 5-imut

Sulianut paasisimasalimmik ikiorteqarnissaq, assersuutigalugu isummernissamut tunngavissiamik suliaqarnermut aammalu annikinnerusunik misissuinernut imaluunniit qulequttanut suliasanullu siunnersuisooqatigiinni suliarineqartussani paasinarsisitsinissamut atatillugu pisariaqarsinnaavoq.

Imm. 6-imut

Sullivinni avatangiisinut siunnersuisooqatigiinnut allattoqarfeqartitsineq Sullivinnik Nakkutilliisoqarfimmit isumagineqassaaq.

*§ 66-imut*

Imm. 1-imut

Naalackersuisut sullivinni avatangiisinut apeqqutit pillugit paasissutissiinissamut aamma paasissutissanut tapersiinissamik periarfissinneqarput.

Tapersiineq namminersortuni aamma pisortani immikkoortortanit ikiortissanik pisinermut atorneqarsinnaassaaq.

Imm. 2-mut

Naalackersuisut tapersiissutit aqunneqarnerannut malittarisassanik erseqqinnerusunik aalajangersaanissamut piginnaatinneqarput.

### *§ 67-imut*

Imm. 1-imut

Aalajangersakkami erseqqissarneqarpoq Naalackersuisut Sullivinnik Nakkutilliisoqarfiup aaqqissuussaanera suliaqarneralu pillugu aammalu naammagittaalliutit imaluunniit saaffiginnissutit allat imaluunniit nammineq suliniuteqarnini pissutigalugu Sullivinnik Nakkutilliisoqarfiup suliassaminik suliarinneriaasissaa pillugu aalajangersakkanik aalajangersaasinnaasut.

Imm. 2-mut

Aalajangersakkami Sullivinnik Nakkutilliisoqarfiup aalajangiinissamut tunngatillugu Naalackersuisunut attuumassuteqannginnerat erseqqissarneqarpoq.

Imm. 3

Sullivinnik Nakkutilliisoqarfiup najukkami immikkoortortaqaarfiit amerlassusissaat aamma immikkoortortaqaarfiit akornanni suliassat agguagaanerat aalajangersassavai.

### *§ 68-imut*

Nr. 1-imut

Annertuumik annertussuseqartumik sullivinni avatangiisinut inatsit ajornartorsiutinik suliffeqarnermi aaqqissuussinernut killilerneqanngitsunik sammisaqarpoq. Taamaalilluni teknikkikkut atortorissaarutit il.il. aamma akuutissat atortussallu pillugit kapitalini tamanna atuuppoq. Taamaattumik Sullivinnik Nakkutilliisoqarfiup paasititsiniaanermik suliaqarnini tamanut atitunerusunut sammitinnissaa piareersimaffigissavaa.

Nr. 2-mut

Namminersorlutik Oqartussat nunami sullivinni avatangiisinik akisussaaffigilerlugu tiguseranarut atatillugu, nutaamik maleruagassaqaalersitsinissaq pisariaqartinneqartussaavoq. Tamatuminnga suliaqarneq taamaattumik Sullivinnik Nakkutilliisoqarfiup suliassaannut pingaaruteqartutut ilaasoq erseqqissarneqarpoq.

Nr. 3-mut

§ 69-imut nassuiaatit innersuussutigineqarput.

Nr. 4-mut

§ 1 innersuussutigineqarpoq, taanna malillugu Inatsisartut inatsisaannut siunertaasoq nalinginnaasoq, sullivinni avatangiisit sukkulluunniit teknikkikkut inooqatigiinnermilu ineriartornermut naapertuutissasoq tassani ilaalluni. Pissusissamisoortinneqarpoq Sullivinnik Nakkutilliisoqarfiup erseqqissumik suliassaq taanna suliassarissagaa.

Nr. 5-imut

Sullivinnik Nakkutilliisoqarfiup Inatsisartut inatsisaat malillugu aammalu maleruagassat Inatsisartut inatsisaanni inatsimmi tunngaveqartumik aalajangersarneqartut malillugit, akuersissuteqarnermik akuersissutinillu tunniussisarnissaq suliassaraa. Takukkit assersuutigalugu § 39, § 43 aamma § 45.

Nr. 6-imut

Inatsisartut inatsisaat aamma peqqussutit malinneqarnerannik nakkutiginninnermik suliaqarneq, assigiinngitsumik iluseqassasoq ilimagineqarpoq, assersuutigalugu

1. Piffissakkuutaartumik misissuisarneq assersuutigalugu elevatorinik misissuineq aamma igaasarsuarnik misissuineq.
2. Akuttoqqatigiinngitsumik nakkutiginnilluni takusaaneq.
3. Nalinginnaasumik paasititsiniaanerit, assersuutigalugu kuitsivinni tamaginni pujoralannik uuttortaaneq, illuutini tunisassiorfinnilu tamaginni nipiliornernik uuttortaaneq.
4. Piumaffigineqarneq malillugu misissuiartorluni takusaaneq.

Nr. 7-imut

Sullivinni avatangiisinut piumasaqaatit aamma isumannaallissaanermut peqqinnissamullu piiaanissamut akuersissutini aalajangersarneqartut malinneqarnerisut Sullivinnik Nakkutilliisoqarfiup nakkutigissavaa. Aatsitassanut suliassaqarfimmi imartani akuersissutinut, Inatsisartut inatsisaanni kapitali 11-mi maleruagassat atuupput.

Aatsitassanut suliassaqarfimmi piiaanissamut akuersissutini sullivinni avatangiisini, isumannaallisaanermi peqqinnissamilu nakkutiginninnermik Sullivinnik Nakkutilliisoqarfiup suliaqarnera, aatsitassanut suliassaqarfimmi nunani tamalaani suleriaatsinik pitsaasunik

naammassinninnissamut ilaavoq, taanna malillugu oqartussaasoq pisinnaatitsissummik tunniussisartoq, oqartussaasumut nakkutiginnittussamut aaqqissuusaanikkut attuumassuteqartussaanani.

Nr. 8-mut

Qinngorneri ioninngortitsisartut pillugit Inatsisartut inatsisaanni nr. 33, 9. december 2015-imeersumi qinngornernut ioninngortitsisartunut illersuinissaq pillugu maleruagassat aalajangersarneqarput. Sullivinnik Nakkutilliisoqarfiup Inatsisartut inatsisaata atuuffissaasa iluanni maleruagassat malinneqarnerat nakkutigissavaa. Sullivinnik Nakkutilliisoqarfik taamaalilluni sullivinni il.il. sulisunut aamma namminersortunut nakkutilliisuusaaq.

#### *§ 69-imut*

Piginnaatitsissut suliaasaqarfinnut tamaginnut, allaffissornikkut maleruagassanik aalajangersaaviusussanut, malittarisassat nalinginnaanerusut Naalakkersuisunit suliarineqarsinnaanngorlugit, atorneqassasoq eqqarsaatigineqarpoq. Tassani aalajangersarneqarpoq sumiiffinni sorlorni aammalu sinaakktissat suut iluanni Sullivinnik Nakkutilliisoqarfik sukumiinerusunik, amerlanertigut teknikkimut tunnganerusunik peqqussutinik aalajangersaasinnaassanersoq, peqqussuteqarsinnaassanersoq inerteqquteqarsinnaassanersorlu aammalu akuersissummik tunniussisinnaassanersoq.

#### *§ 70-imut*

Imm. 1-imut

Aalajangersakkami oqartussaasut allat nakkutilliillutik suliaqarnerannut atatillugu isumalluutinik sipaarnissaq ajornarunnaarsinneqarsinnaavoq.

Aalajangersakkap atuuffissaannut assersuutissaavoq, Kalaallit Nunaanni sullivimmi avatangiisinut ilinniartitaaneq pinngitsoorani pisussaq pillugu nalunaarummi aalajangersakkat, tassani illuliortiternermut sanaartornermullu suliaasaqarfimmi isumannaallisaanermik peqqinnissamillu suliaqarnermut ataqatigiissarisut sullivimmi avatangiisinut ilinniartitaanerannut neqerooruteqartussatut qaqugukkut aammalu piumasagaatit suut tunngavigalugit akuerineqarsinnaanissaq pillugu maleruagassat erseqqinnerusut aalajangersarneqarlutik.

Imm. 2-mut

Isiginnittaatsimut nalinginnaasumut naapertuuttumik, suliffeqarfiit sapinngisamik annertunerpaamik namminneerlutik sullivinni avatangiisini ajornartorsiuutinik aaqqiisartussaammata, takuuk § 1, teknikkikkut peqqussutinik naammassinninnermik

misissuisarnek, immaq pisortanit imaluunniit namminersortunit misileraanermut sullissivinnit ikiorneqarluni, suliffeqarfimmut namminermut suliaritittarnissaa naleqqussorineqarpoq. Aalajangersakkami sullivinni assigisaanniluunniit teknikkikkut atortorissaarutininik, nipiliornerup annertussusaanik, akuutissani atortussanilu imaluunniit silaannarmi teknikkimut tunngasunut atatillugu, Sullivinnik Nakkutilliisoqarfiup misileraanermik sulisut piukkunnassuseqarnerannut, misissugassanut najoqqutassanut atorineqartunut, misissueqqissaarnermi periaatsinut ilaalu ilanngullugit tunngatillugu atugassarititaasunik erseqqinnerusunik aalajangersaanissaanut inatsimmi tunngaveqarnissaq qulakkeerneqarpoq.

### Imm. 3-mut

Naalackersuisut akiliutitut aalajangersakkanik aalajangersaanissamut tunngatillugu toqqaanissamut kiffaanngissuseqarput, taamaalillutillu taamaattunik aalajangersaasoqarsimatillugu tamakkiisumik ilaannaasumilluunniit akiliutitut aalajangersakkat atorunnaarsissinnaallugit.

Nalunaarummi nr. 148, 18. april 1972-imeersumi, igaasarsuit aalaliortut nunamiittut pillugit Kalaallit Nunaannut nalunaarut § 21 akiliutitut aalajangersakkanut taamaattunut assersuutissaavoq. Igaasarsuit aalaliortut nunamiittunik piginnittoq, piginnittup iliuusissanik pisariaqartunik aalajangiussisimannginnera aammalu nakkutilliinerup toqqissisimanartumik ingerlanneqarsinnaanissaanut pisariaqartumik ikiuussimannginnera pissutigalugu, nutaamik nakkutilliinissaq pisariaqarpat, igaasarsuaqarfiup nakkutigineqarneranut akiliuteqarnissamik pisussaaffilerneqarsinnaavoq, takuuk Sulinermit ministereqarfiup nalunaarutaani nr. 148, 18. april 1972-imeersumi – igaasarsuit aalaliortut nunamiittut pillugit Kalaallit Nunaannut nalunaarummi § 21. Aalajangersakkami sullivinnik nakkutilliisoqarfiup igaasarsuit aalaliortut nunamiittut misissorneqartussanngorpata ajornanngitsumik isersinnaanissaa qulakkeerniarneqarpoq.

Assersuutissaq alla tassaavoq Sullivinnik Nakkutilliisoqarfiup gassit ataatsimut naqitsinilikkat, kusertartut imaluunniit naqitsinillit puuinik angallattakkanik misissuisarnera, takuuk Sulinermit ministereqarfiup nalunaarutaani nr. 149, 18. april 1972-imeersumi – gassit ataatsimut naqitsinilikkat, kusertartut imaluunniit naqitsinillit puui angallattakkat pillugit Kalaallit Nunaannut nalunaarummi § 8.

Assersuutissat pingajuat tassaavoq Sulinermit ministereqarfiup nalunaarutaani nr. 155, 18. april 1972-imeersumi – nunami naqitsinillit puui il.il. pillugit Kalaallit Nunaannut nalunaarummi § 22. Igaasarsuit aalaliortut nunamiittunut pisutut, piginnittup nakkutilliinerup isumannaatsumik piginnaanissaata qulakkeernissaa sumiginnarsimanngippagu, piginnittoq aallaaviatigut nakkutilliinermit aningaasartuutininik akiliissanngilaq.

## *§ 71-imut*

### Imm. 1-imut

Akiliutit Sullivinnik Nakkutilliisoqarfiup sullivinni avatangiisinut ilinniartitaanerup ingerlanneqarneranut aningaasartuutai, aningaasanut inatsimmi matussuserneqanngitsut, ilai matussusissavaat.

Nalunaarummi nr. 914, 26. juni 2013 kingusinnerusukkut allannguuteqartumi, Kalaallit Nunaanni sullivinni avatangiisinut ilinniartitaaneq pinngitsoorani ingerlanneqartussaq pillugu nalunaarut, maannakkut akiliut pillugu aalajangersakkat erseqqinnerusut aalajangersagaapput, ilaatigut akiliisitsisarneq aamma akiliutip annertussusaanut tunngasut.

### Imm. 2-mut

Imm. 2-imi qulakkeerneqassaaq, aningaasartuutit ineriartornerat ilaatillugu akiliutip naleqqussarneqartarnissaa, taamaalilluni akiliuteqarneq piffissap ingerlanerani attatiinneqassalluni.

## *§ 72-imut*

### Imm. 1-imut

Aalajangersakkami pisinnaatitsissummik pigisaqartut allallu aatsitassat pillugit ingerlatallu tamatumunnga pingaarutillit pillugit inatsisartut inatsisaanni (aatsitassanut ikummatissanullu inatsit) imaluunniit erngup nukingata innaallagissiornermut atorneqartarnera pillugu Inatsisartut inatsisaat (erngup nukinganut inatsit) malillugit akuersissummik peqartut akiliummik, Sullivinnik Nakkutilliisoqarfiup nakkutilliinermi aamma aatsitassarsiorluni aamma erngup nukinganik ingerlataqarnermut atatillugu oqartussaasutut suliarinninnermi aningaasartuutaannut matussutissatut akiliummik akiliuteqassasut pillugu maleruagassanik aalajangersaanissamut Naalakkersuisut piginnaatinneqarput.

Taamaattoq siunnersuutigineqarpoq misissueqqaarnerit, ilisimatuussutsikkut misissuinerit aamma aatsitassarsiorluni misissuinerit ingerlataqarnerit piffissaq Naalakkersuisunit piiaanissamut pilersaarummik akuerisaasumik peqalerfiusoq tikillugu, akiliinissamik piunasaqaammi pineqartunut ilaatinneqassanngitsut.

Oqaatigineqassaaq piiaanissamut pilersaarut sanaartornermut immikkoortup ilaani annertunersaammat, ilanngullugu tunisassiornerup aaqqissuunneqarnera kiisalu tassunga



sanaartukkat, ingerlatsinerup immikkoortua kiisalu suliffeqarfiup atorunnaarnissaanut pilersaarut.

Aatsitassat pillugit ingerlatallu tamatumunnga pingaarutillit pillugit inatsisartut inatsisaanni (aatsitassanut ikummatissanullu inatsit) § 2, imm. 2 malillugu, ingerlatat makkua inatsimmi pineqartunut ilaapput aammalu akuersissut naapertorlugu taamaallaat ingerlanneqaqqusaallutik:

- 1) Misissueqqaarneq, aatsitassarsiorluni misissuineq aamma aatsitassanik piiaaneq kiisalu aatsitassanik annissuineq.
- 2) Nunap iluata toqqorsivittut imaluunniit siunertanut aatsitassarsiorluni ingerlatanut tunngasunut atorneqarnera.
- 3) Imermit, anorimit imaluunniit nunap iluaneersunik ingerlatanut inatsimmi pineqartunut ilaasunut nukissamik atuineq.
- 4) Inatsimmi pineqartunut ilaasunut ingerlatanut atugassanik ruujorinik aqquersuutinik ikkussuineq aamma ingerlatsineq.

Erngup nukingata innaallagissiornermut atorneqartarnera pillugu Inatsisartut inatsisaat, erngup nukinganut inatsit, malillugu erngup nukinganut innaallagissiornermut atorneqartussamik misissueqqarnissamut atuinissamullu akuersissumik peqarnissaq piumasqaataavoq.

Aalajangersagaq malillugu Sullivinnik Nakkutilliisoqarfiup pisinnaatitsissummik pigisaqartumit, aatsitassanut ikummatissanullu inatsit imaluunniit erngup nukinganut inatsit malillugu akuersissummik peqartunit nakkutilliinermut akiliinissaq piumasarisinnaassavaa:

1. Aatsitassanik piiaanissaq kiisalu aatsitassanik annissuinissaq.
2. Nunap iluanik toqqorsivittut imaluunniit siunertanut aatsitassarsiorluni ingerlatanut tunngasunut.
3. Imermit, anorimit imaluunniit nunap iluanit ingerlatanut inatsimmi pineqartunut ilaasunut nukissamik atuineq.
4. Inatsimmi pineqartunut ilaasunut ingerlatanut atugassanik ruujorinik aqquersuutinik ikkussuineq aamma ingerlatsineq.
5. Imermit, anorimit imaluunniit nunap iluaneersumik ingerlatanut inatsimmi pineqartunut ilaasunut atuineq.
6. Erngup nukinganik innaallagissiornermut atuineq.

Suliassaqarfinni aatsitassanut ikummatissanullu inatsit imaluunniit erngup nukinganut inatsit malillugit akuersissummi pineqartunut ilaasuni suliaqarnermi taamaallaat Sullivinnik Nakkutilliisoqarfiup nakkutilliinermut aningaasartuutai kisimik pisinnaatitsissummik pigisaqartunit akilerneqassasut piumasqaatigineqarsinnaassaaq. Sulineq sumiiffiup

akuersissuteqarfiusup avataani ingerlanneqartoq, assersuutigalugu aqqusinermi imaluunniit umiarsuarmi, taamaalilluni inatsisissatut siunnersuummi pineqartunut ilaassanngilaq.

Aatsitassanut ikummatissanullu inatsit malillugu Aatsitassanut Ikummatissanullu Aqutsisoqarfik ingerlatanik aalajangersimasunik piiaanissamut akuersissut pillugu piumasaqaatinit ilaatitsinngissinnaavoq, assersuutigalugu ujaraaqqanik, ujaqqanik assigisaannillu katersineq aamma piiaaneq, aqqusinniormut sanaartormullu atortussanut atorneqartussa. Sullivinnik Nakkutilliisoqarfik siunnersuut malillugu pisuni taakkunani nakkutilliinermut akiliinissamik piumasaqarsinnaassanngilaq, tassami akiliisitsiniarnermut aamma akiliuteqartitsinermut aatsitassanut ikummatissanullu inatsit malillugu akuersissummik peqartussaammat.

Erngup nukinganit innaallagissiorfiit 2009-mi erngup nukinganut inatsisip atuutilernissaa sioqqullugu akuersissummik tunineqartut, suli maleruagassanit, piffissami akuersissutip tunniunneqarfiani atuuttunit, maleruagassaqaartinneqarput. Erngup nukinganit innaallagissiorfiit nukissamik pilersuineq pillugu Inatsisartut peqqussutaat nr. 15, 6. november 1997-imeersoq naapertorlugu akuersissummik tunineqarlutik sananeqarput, taamaattumillu aatsitassanut ikummatissanullu inatsimmi imaluunniit erngup nukinganut inatsimmi pineqartunut ilaanatik:

1. Tasiilami erngup nukinganit innaallagissiorfik, 1,2 MW, 2005-imi atorneqalersoq.
2. Qorlortorsuarmi erngup nukinganit innaallagissiorfik, Narsamut aamma Qaqortumut pilersuisoq, 7,2 MW, 2009-mi atorneqalersoq.
3. Sisimiuni erngup nukinganit innaallagissiorfik, 16, 8 MW, 2010-mi atorneqalersoq.
4. Paakitsumi erngup nukinganit innaallagissiorfik, Ilulissanut pilersuisoq, 22 MW, 2013-imi atorneqalersoq.
5. Erngup nukinganit innaallagissiorfiit, erngup nukinganut inatsit imaluunniit aatsitassanut ikummatissanullu inatsit malillugit akuersissummik peqartut kisimik, § 72-imi pineqartunut ilaapput. Kangerluarsunnguarmi erngup nukinganit innaallagissiorfimmu, Nuummut pilersuisumut tunngatillugu, akuersissut aatsitassanut ikummatissanullu inatsit naapertorlugu tunniunneqarpoq. Taamaattumik innaallagissiorfik § 72-imi pineqartunut ilaavoq.

Erngup nukinganit innaallagissiorfiit tamarmik Nukissiorfinit, Namminersorlutik Oqartussanut ilaasumit, pigineqarput.

Piiaanissamut suliassani il.il. suliassat tamarmik sullivinni avatangiisinut maleruagassat atuuttut malillugit ingerlanneqartussaapput.

Siunnersuut malillugu pisinnaatitsissummik pigisaqartup Sullivinnik Nakkutilliisoqarfiup nakkutilliinermut, oqartussaasutut suliarinninneranut, Sullivinnik Nakkutilliisoqarfiup

allaffianut tassangaaniillu assartuussinermut aningaasartuutit, tuluttuumit aamma kalaallisuumit allaanerusunut taakkunangaaniillu nutserinerit oqalutseqarnerillu pisariaqartut kiisalu ineqarneq nerisaqarnerlu, akilertussaavai.

Akiliut Sullivinnik Nakkutilliisoqarfiup nakkutilliinermut aamma oqartussaasutut suliarinninneranut aningaasartuutit aallaavigalugit naatsorsorneqassaaq. Nalunaaquttap akunneranut akigititaq, piffissamut assartuussinermut aamma nakkutilliisut takusaanerannut atorpeqartumut, akilerneqassaaq. Nalunaaquttap akunneranut akigititami nakkutilliisunut allanullu nakkutilliinermi akuusussanut, ilanngullugit inatsisilerituut, allaffissornikkut ikiuuttut aamma pisortat, aningaasarsianut aningaasartuutit, allaffissornermut aningaasartuutinut agguaqatigiissillugu aningaasartuutit nalingat ilanngullugu, pineqartunut ilaapput. Nalunaaquttap akunneranut akigititami aamma nakkutilliinerup pilersaarusionerqarnera ingerlanerqarneralu, nakkutilliinerup malitseqartinneqarnera aamma sulisitsisunut sanatitsisunullu allanullu ataasiakkaanut peqqusissuteqarnermi il.il. suliassanik suliarinninneq, pineqartunut ilaapput.

Imm. 1 malillugu nakkutilliinermut akiliut ingerlaavartumik naleqqussarneqartassaaq, taamaalilluni aningaasartuutit Sullivinnik Nakkutilliisoqarfiup nakkutilliineranut aamma oqartussaasutut suliarinninneranut tunngassuteqartut, tamakkiisumik matussusertinneqassallutik, taamaalilluni piffissap ukiunik 4-nik sivisussuseqartup ingerlanerani oqimaaqatigiissitsinissaq anguniarneqassalluni.

Imm. 2-mut

Sullivinnik Nakkutilliisoqarfiup Sullivinnik Nakkutilliisoqarfiup allaffiunut taakkuninngaaniillu assartuussinermut, tuluttuumit aamma kalaallisuumit allaanerusunut taakkunungalu nutserititsinermut oqalutseqarnernullu pisariaqartunut kiisalu nerisaqarnermut ineqarnermullu aningaasartuutit piviusumik akilerneqartut, akilerneqassasut piunasaqaatigisinnaavaa. Assartuussineq, nerisaqarneq ineqarnerlu, pinsinnaatitsissummik pigisaqartup imaluunniit allat Sullivinnik Nakkutilliisoqarfimmi sulisunut atugassiissutigisai, Sullivinnik Nakkutilliisoqarfiup atorsimappagit, akiliinissaq piunasaqaatigineqarsinnaanngilaq.

Assartuussinermut aningaasartuutinut tunngatillugu, aatsitassanut ikummatissanullu inatsit imaluunniit erngup nukinganut inatsit malillugit akuersissut sumiiffimmi avingarusimasumiittoq, assartuussinikkut tikikkuminaatsoq amerlanertigut pineqassaaq. Taamaattumik assartuussinermut aningaasartuutit nakkutilliinermi aningaasartuutini annertoorujussuusinnaapput. Taamaattoq naatsorsuutigineqarpoq Sullivinnik Nakkutilliisoqarfiup assersuutigalugu pinsinnaatitsissummik pigisaqartoq peqatigalugu ataatsimoorussamik assartuussinermik atuisinnaassasoq.

Taamaattoq pisoqarsinnaavoq Sullivinnik Nakkutilliisoqarfimmi sulisut assartuussissutinik atugassiissutigineqartuni atuinissaat naleqqunnani. Assersuutigalugu tamatumunnga pissutaasinnaavoq ajutoortoqarsimanera Sullivinnik Nakkutilliisoqarfik naliliilluni ingerlaannaq misissorneqassasoq aammalu ataatsimoorussamik assartuussineq utaqqisinnaanagu.

Sullivinnik Nakkutilliisoqarfiup assartuussinnermut aningaasartuutai Sullivinnik Nakkutilliisoqarfiup qullersaqarfiata najugaqarnera aallaavigalugu, imaluunniit – Sullivinnik Nakkutilliisoqarfik peqatigisaanik nakkutilliiffiusup sumiiffianut qaninnerusumi nakkutilliinermik suliaqarpat – sumiiffimmit tassangaaniit, naatsorsorneqassapput.

Nakkutilliineq akuttunngitsumik ullut arlallit sivisussuseqarsinnaasarpog, taamaattumillu nerisaqarnermut ineqarnermullu aningaasartuuteqartoqarsimasinnaasarpog, Sullivinnik Nakkutilliisoqarfiup matussuseritassaannik. Nerisaqarnermut ineqarnermullu aningaasartuutit tamatumunnga akigititat atuuttut malillugit aalajangersarneqassapput. Taamaattoq Sullivinnik Nakkutilliisoqarfik nerisaqarnermut ineqarnermullu atugassinneqarajussaaq, taamaalilluni Sullivinnik Nakkutilliisoqarfik tamatumunnga aningaasartuuteqarani.

Imm. 3-mut

Imm. 3 malillugu misissueqqaarnissanut, ilisimatusarnikkut misissuinissanut kiisalu aatsitassarsiorluni misissuinissamut akuersissutip malitsigisaanik ingerlatanut nakkutilliinermut, Naalakkersuisut piiaanissamut pilersaarummik akuersissuteqarnissaasa tungaanut, akiliisoqartussaangilaq.

Aatsitassat pillugit ingerlatallu tamatumunnga pingaarutillit pillugit inatsisartut inatsisaanni § 19-imi allassimavoq, piiaanissaq pitinnagu aammalu iliuusissat tassunga siunertaqartut aallartinneqannginneranni, Naalakkersuisut suliffeqarfinnut piiaanissamut pilersaarut akuerissagaat, ilanngullugu tunisassiornerup aqqissuunneqarnera kiisalu tassunga tunisassiorfiit. Pissutsit allannguuteqartut tamanna pisariaqartippassuk, pisinnaatitsissummik pigisaqartoq sapinngisamik piaartumik pilersaarummik allanngortitamik Naalakkersuisunut akuerineqartussanngorlugu nassiussissaaq.

Imm. 4-mut

Imm. 4-imi nakkutilliinermut aamma oqartussaasutut suliarinninnermut akiliummik akileeqquisarneq aamma assartuussinnermut, oqalutsinut, nutserinermut, nerisaqarnermut ineqarnermullu aningaasartuutigineqartut Sullivinnik Nakkutilliisoqarfimmut utertillugit akilerneqartarnissaat pillugu maleruagassanik aalajangersaanissaq periarfissiissutigineqarpoq.

Sullivinnik Nakkutilliisoqarfiup aatsitassarsiormik aamma erngup nukinganik ingerlataqarnernut nakkutilliineranut aningaasartuutunik akiliineq tamarmiusoq pisinnaatitsissummik pigisaqartumut imaluunniit allanut aatsitassanut ikummatissanullu inatsit imaluunniit erngup nukinganut inatsit malillugit akuersissummik peqartunut, akilersinneqassapput.

### *§ 73-imut*

#### *Imm. 1-imut*

Aalajangersagaq aatsitassat pillugit ingerlatallu tamatumunnga pingaarutillit pillugit inatsisartut inatsisaanni, § 86, imm. 5-imut assinguvoq, aammalu aalajangersakkami aatsitassanut suliassaqaqarfiup iluani imartani suliassanik suliarinninnermut allatigullu oqartussaasut suliarinninnerannut atatillugu aningaartuutit matussuserneqarnissaannut akiliummik akiliisitsisoqartarluni suleriaatsip maannamut atuutereersup ingerlatiinnarnissaa ajornarunnaarsinneqarpoq.

Aningaasartutit sulluunniit, akiliutissaq sullissinnermut Sullivinnik Nakkutilliisoqarfimmit suliarineqartumut naapertuussimappat, akiliutitut imaluunniit aningaasartuutunik utertillugit akiliisitsinikkut akilersinneqarsinnaapput. Taamaalilluni oqartussaasut akilersimasaasa imaluunniit suliassamik pineqartumik suliassatut oqartussaasutulluunniit suliarinninnermut atorineqartussatut naatsorsuutigineqartut saniatigut, aalajangersakkami tassani inatsimmi tunngaveqartumik akiliutunik imaluunniit aningaasartuutit utertillugit akiliinissamik akiliisitsiniarnissaq siunertarineqanngilaq. Oqartussaasut suliarinninnerannut akiliineq, nakkutilliinerup ingerlanneqarnerani piffissamut atorineqartumut nalunaaquttap akunneranut akigititaq tunngavigalugu pissaaq.

#### *Imm. 2-mut*

Aalajangersagaq Sullivinnik Nakkutilliisoqarfimmi aningaasartuutitut akilerneqartunut matussutissatut akiliummik akiliisitsinissamut periarfissaqarnermut ataqatigiissillugu isigineqassaaq.

Aalajangersakkami akiliutip annertussusaanut aningaasartuutiviusunit Sullivinnik Nakkutilliisoqarfimmi akilerneqartunit imaluunniit akilerneqartussatut naatsorsuutigineqartunit annikinnerusumik aningaasartaqalersillugit, aalajangersaanissamut Naalakkersuisut periarfissinneqarput. Aalajangersakkamut tunngaviusoq ilaatigut tassaavoq Kalaallit Nunaanni aatsitassarsiormi misissuinermi aamma aatsitassanik piiiaanermi aatsitassarsiormi fiutileqatigiiffiit uuliasiorfiutileqatigiiffiillu aningaasaliinissaat pilerinaateqalersillugu Naalakkersuisut akiliummik aalajangersaanissaat periarfissaqassasoq.

### *§ 74-imut*

Sulitilluni ajutoornerit, toqunartumeertinnerit, inuussutissarsiornermi nappaatit, pissutsit allat sullivinni avatangiisinut pingaaruteqartut nalunaarutigineqarnissaannut pisussaaffeqarneq pillugu Naalakkersuisut § 74 naapertorlugu maleruagassanik aalajangersaasinnaapput. Piginnaatitsissut sulitilluni ajoqusernerit nalunaarutigineqartarnerat pillugu Kalaallit Nunaannut nalunaarummi nr. 401, 24. juni 1986-imeersumi atuutsinneqarpoq, taanna malillugu sulisitsisoq sulitilluni ajutoornerup aamma toqunartumeertinnerup, kiisalu nappaatit sulinermit pissuteqartut toqukkut qimagunnermik malitseqartut imaluunniit annertuumik ajoqusernerit Sullivinnik Nakkutilliisoqarfimmut nalunaarutigineqarnissaannut pisussaaffeqarluni.

#### *Imm. 2-mut*

Pisortani kiffartuussinermik imaluunniit inuussutissarsiornermi suliaqarnermi pissutsinik, Inatsisartut inatsisaannut unioqqutitsisunik paasisaqaraanni, tamanna Sullivinnik Nakkutilliisoqarfimmut nalunaarutigineqassaaq.

#### *Imm. 3-mut*

Nakorsat aamma kigutilerisut nalunaarut malillugu nappaatit sulinermik pissuteqartut aamma allat ajoqusiisumik sunniuteqartut, paasisatik imaluunniit pasitsaassatik nalunaarutigineqarnissaannut pisussaaffeqarput. Naatsorsuutigineqarpoq sulitilluni ajoqusernerit nalunaarutigineqartarnerat pillugu Kalaallit Nunaannut nalunaarummut, nr. 401, 24. juni 1986-imeersumut taartissatut nutaamik nalunaarummik suliaqassasut.

### *§ 75-imut*

Aalajangersakkami siunertaavoq Sullivinnik Nakkutilliisoqarfiup ingerlaavartumik nakkutilliinerminik siunnerfeqartitsisinnaanissaata aammalu tamatuminnga suliaqarnermi paasisutissanik attuumassuteqartunik tamaginnik atuisarnissaata qulakkeerneqarnissaa, ilanngullugu sulitilluni ajoqusernerit pillugit paasisutissat. Taamaalilluni aalajangersakkami paasisutissat suliffeqarfinni sullivinni avatangiisini ajornartorsiuteqarneranik takussutissarsinissamut aammalu suliffeqarfinni sullivinni avatangiisit misissornissaannut atorpeqartussat katersorneqarnissaat ataatsimoortinneqarnissaallu, ajornarunnaarsinneqarpoq.

Sullivinnik Nakkutilliisoqarfiup nalunaarutiginneriaatsimit aamma Arbejdsmarkedets Erhvervssikring-ip sulitilluni ajutoornerit aamma inuussutissarsiornermi nappaatit pillugit paasisutissanut tunngavigisaannik katersinissamut ataatsimoortitsinissamullu inatsimmi tunngavissaliisoqarpoq.

Sullivinnik Nakkutilliisoqarfiup suliassaqaarfiup akisussaaffigilerlugu tigunissaa sioqqullugu pisartutut, Sullivinnik Nakkutilliisoqarfiup nakkutilliinermik pilersaarusioneramik suliaqarnermi, ilanngullugu Sullivinnik Nakkutilliisoqarfiup misissuineramik nakkutilliineranillu siunnerfeqartitsinissaq, sulitilluni ajoqusernerit il.il. paasissutissat atortassavai. Sullivinnik Nakkutilliisoqarfiup tamatuma saniatigut paasissutissat sullivinni avatangiisinut suliassaqaarfimmi pitsaaliuinermik suliniuteqaarnermut, misissueqqissaarnermut aamma kisitsisitigut naatsorsueqqissaarnermik siunertaqartunut, atussavai.

Nalunaarutiginneriaaseq paasissutissanik arlalinnik imaqarpoq, ilaatigut sulitilluni ajutoornerit aamma inuussutissarsiornermi nappaatit nalunaarutigineqaarneranneersunik, sullivinni avatangiisinut inatsit aamma sulitilluni ajoqusernissamut sillimmasiisarnermut inatsit malillugit nalunaarutiginnissaannik pisussaaffigineqartunik, aammalu sulitilluni ajutoornerit aamma inuussutissarsionermi nappaatit nalunaarsorneqartut tamaasa pillugit paasissutissanik imaqarluni.

Nalunaarutiginneriaaseq aamma paasissutissanut tunngaviusut ilaatigut sulitilluni ajutoornerit pillugit ataasiakkaani paasissutissanik imaqarput, ilanngullugit ajoqusernut aamma ajoquserneq, nalunaarutiginnittoq aamma suliffeqarfik kiisalu sullivik aamma ajutoorneq pillugit paasissutissaq. Tamatuma saniatigut nalunaarutiginneriaaseq aamma paasissutissat tunngaviusut inuussutissarsiornermi nappaatit pillugit paasissutissanik imaqarput, ilanngullugit ajoqusernut, nappaatinik suussusersiinerit aamma nalunaarutiginnittoq pillugit paasissutissat.

#### *§ 76-imut*

##### *Imm. 1-imut*

Aalajangersagaq ersarissumik aalajangersagaavoq, taanna malillugu inatsit malillugu pisussaaffilerneqartoq kinaluunniit Sullivinnik Nakkutilliisoqarfimmit piuaaffigineqarnini malillugu paasissutissanik tamaginnik nakkutilliinerup suliaqarnerata ingerlanissaanut pisariaqartunik tunniussisussaalluni.

Taamaalionermi pissutsit tamaasa nakkutilliinermi pineqartunut ilaasut pillugit paasissutissat piumasarineqarsinnaapput, ilanngullugit nalunaarusiat, misissuinerit, takusaanerit, innersuussutit il.il. pillugit.

Imm. 1 malillugu paasissutissiisussaataanerup unioqqutinneqarnera § 83, imm. 1, nr. 1 malillugu pineqaatissiisutigineqarsinnaavoq.

##### *Imm. 2. -mut*

Imm. 2-imi aalajangersarneqarpoq Sullivinnik Nakkutilliisoqarfimmi sulisut sukkulluunniit tamanna pisariaqartoq naliliisoqarpat, peqqissaartumik kinaassutsimut uppenarsaammik takutitsillutik aammalu pisariaqarpat politiit ikiortigalugit, pisortani aamma namminersortuni sullivinnut isersinnaasut.

Sullivinnik Nakkutilliisoqarfik taamaalilluni inatsisip naammassineqarnerata nakkutiginnisaanut pisussaaffeqarpoq, aammalu sullivik nammineq inigineqarnersoq tunngaviatigut pingaaruteqanngilaq.

Naalackersuisut aalajangersakkami uniffik kingulleq malillugu, assersuutigalugu Sullivinnik Nakkutilliisoqarfiup imaluunniit Kalaallit Nunaanni oqartussaasup allap politiit ikiuuttussaattillugit suliami iliuuseqarnissaa pillugu maleruagassanik aalajangersaasinnaapput. Politiinut pisussaaffiliisumik Naalackersuisut maleruagassanik aalajangersaassappata, inatsisinik atuutsitsinermut ministeri isumaqatiginninniaqatigalugu maleruagassat aalajangersarnissaat pisariaqarpoq.

Imm. 3-mut

Aalajangersakkap kingunerisaanik inuussutissarsiutiginaq sulinermit (nammineerluni suliaqarneq/sunngiffimmi sammisaqarneq) inuinnarnit taassuma nammineq angerlarsimaffiani imaluunniit sunngiffimini inigisamini, imaluunniit inoqutigiit biiliini (biilit, motorcykel il.il.), sunngiffimmi angallataani allaniluunniit aalaakkaasuunngitsuni inoqutigiinuit pigineqartuni, ingerlanneqartunut, misissuisoqassanngilaq.

Siunnersuutip atuunnerani Sullivinnik Nakkutilliisoqarfik sulitilluni ajoqusernarnik imaluunniit nappaatinik sulinermit pissuteqartunik, inummit taassuma nammineerluni inisaanni ingerlanneqartumik inuussutissarsiutiginaq sulinermit atatillugu pilersunik, misissuinissaq siunertaralugu eqqartuussivimmit aalajangiinertaqanngitsumik inuinnaat inigisaannut isersinnaanngilaq.

Sullivinni avatangiisinut inatsimmi maleruagassat ataasiakkaatigut malinneqanngitsut Sullivinnik Nakkutilliisoqarfik pasitsaassaqaqaruni, Sullivinnik Nakkutilliisoqarfik pisariaqarpat politiinut nalunaarutiginnissaq.

Politiit ajutoornermik misissuinermit atatillugu Sullivinnik Nakkutilliisoqarfik aggersarsinnaassavaat.

Aalajangersagaq inuussutissarsiutigalugu sulinermit misissuinermit, najugaqartumit namminermi imaluunniit inuinnaat inigisaanni inuussutissarsiortunit allanit ingerlanneqartoq, Sullivinnik Nakkutilliisoqarfimmut pingaaruteqanngilaq.



Sullivinnik Nakkutilliisoqarfiup sulisitsisoq sullillugu (ilanngullugit avataaneersut) inuinnaat inigisaanni, inuussutissarsiutigalugu sulinermik inuussutissarsiortunit namminersortunit ingerlanneqartumik (najugaqartoq nammineq imaluunniit avataaneersut) nakkutiginninnera kiisalu elevatorinik allanillu kivitsinermut atortunik kiisalu naqitsinernut puuiaasaasanik inatsimmi pisussaaffiusutut misissuina, inatsimmi killilerneqanngilaq. Elevatorinik allanillu kivitsinermut atortunik kiisalu naqitsinernut puuiaasaasanik inatsimmi pisussaaffiusutut misissuineq, eqqartuussivimmi aalajangiinertaqanngitsumik sulii ingerlanneqarsinnaasoq Sullivinnik Nakkutilliisoqarfik aalajangersaasinnaavoq.

#### Imm. 4-mut

Naatsorsuutigineqarpoq imm. 4 malillugu piginnaatitaanerit, ilanngullugit assiliinissamut assigisaannulluunniit periarfissaqarneq, tamanna nakkutilliinermik suliaqarnissamut pisariaqarpat aatsaat atorineqartassasut. Suliffeqarfik tamanna pillugu ilisimatinneqassaaq.

### § 77-imut

#### Imm. 1-imut

Inerteqquteqarsinnaatitaaneq peqqusissuteqarsinnaatitaanerlu, Inatsisartut inatsisaata malinneqarneranut nakkutilliinermut tunngaviumik pingaaruteqarpoq.

Aalajangersagaq § 81-imi naammagittaalliortarnermut maleruagassanut aamma § 83, imm. 1, nr. 3-imi aamma imm. 4, nr. 3-imi pinerluttulerinermut inatsimmi pineqaatissiisarneq pillugu aalajangersakkanut, ataqatigiissillugu isigineqassaaq.

Oqaatigineqassaaq peqqusissuteqarneq annertumik pingaaruteqartumi atorineqassammat. Pisut malillugit tamanna inerteqquteqarnerup assigisinnaavaa, tassami pinngitsuuinissaq peqqusissutigineqarsinnaammat.

Sullivinnik Nakkutilliisoqarfiup peqqusissuteqarnermut ilaatillugu piunasaqaatigisinnaavaa, peqqusissuteqarneq naammassineqarnerneq pillugu suliffeqarfik Sullivinnik Nakkutilliisoqarfimmut nalunaaruteqassasoq.

#### Imm. 2-mut

Aamma peqqusissuteqarfigineqanngitsumik sulisitsisoq navianartunik pitsaaliuinissamut pisussaaffeqarpoq, takuuk § 12. Sulianut aqutsisoq tamatumunnga pisussaaffeqarpoq, takuuk § 24, imm. 2. Isumannaallisaanermut suleqatigiit navianartunik pitsaaliuiniarlutik sulinermik imaluunniit sulianik ingerlatitsinermik unitsitsisussaataaeranat, Kalaallit Nunaanni

suliffeqarfinni isumannaallisaanermik peqqinnissamillu suliaqarneq pillugu nalunaarummi nr. 1346, 15. december 2005-imeersumi § 32, imm. 2-imi, allassimavoq.

Imm. 3-mut

Aalajangersakkami siunertaavoq inatsisinik atuutsitsinissamut periarnissamut inatsisitigut tunngavissaqalersitsinissaq, teknikkikkut atortorissaarutitut, inuit illersuutissaannut, akuutissamut imaluunniit atortussamut, isumannaallisaanermut peqqinnissamullu navianartorsiortitsisinnaasumut, Sullivinnik Nakkutilliisoqarfiup atorsinnaasaa.

Aalajangersakkap atuunnerani, teknikkikkut atortorissaarutit imaluunniit inuit illersuutissaat isumannaallisaanermut peqqinnissamullu navianartorsiortitsippata, maleruagassat taakkua malinneqarnerat apeqqutaatinnagu, iliuusissat pisariaqartut aammalu pisariaqarpat pilersuinerup, nittarsaassinerup unitsinnissaat aamma niuerfimmit utertitsinissaq pillugit peqqusissuteqarnissamut Sullivinnik Nakkutilliisoqarfik aalajangiisinnaatitaaffeqalerpoq.

Annikinnerusumik akuliuttumik iliuuseqarnertut, pilersuineq kimut pisimanersoq aammalu iluarsineq aamma/imaluunniit assersuutigalugu isumannaallisaanermut atortunik atuinermullu ilitsersuutitik tapertaasussanik pilersueqqinneq, pillugit paasissutissat peqqusissutigineqarnerat eqqarsaatigineqarsinnaavoq.

Aalajangiisinnaatitaaneq, aalajangersakkap akiliuttumik imaqarnera eqqarsaatigalugu aammalu nuna tamakkerlugu ataqatigiissaarinissaq pisariaqartoq eqqarsaatigalugit, Sullivinnik Nakkutilliisoqarfimmi pisortamiitinneqarpoq.

Pilersuisunut allanullu aalajangersagaq allatigut §§ 29-36-mi, pingaartumik § 29-mi allassimavoq.

§ 29 naapertorlugu atortut atorneqartussanngorlugit imaluunniit takussutissiarineqartussanngorlugit tunniunneqarneranni, pisariaqartunik illersuinermut atortoqartinneqarnissaat aammalu isumannaallisaanermut peqqinnissamullu navianaateqaratik siunertaat malillugu atorneqarsinnaanissaat, maskiinanik imaluunniit allanik teknikkikkut atortorissaarutitik pilersuisuusut isumagissavaat. § 36 malillugu tamanna pillugu maleruagassanik Naalakkersuisut aalajangersaasinnaapput.

*§ 78-imut*

Imm. 1-imut

Aalajangersakkami Sullivinnik Nakkutilliisoqarfiup takusaaneranut il.il. uppersaatinik uninnngasuuteqartarneq pillugu maleruagassanik erseqqinnerusunik aalajangersaanissamut piginnaatinneqarput.

Imm. 2-mut

Aalajangersakkami sulisitsisoq piffissamut killiliussatut aalajangersarneqartup iluani allaganngorlugu peqqusissummut il.il. akissuteqassasoq pillugu Sullivinnik Nakkutilliisoqarfik piunasaqaateqarnissamut periarfissinneqarpoq.

Suliffeqarfiit isumannaallisaanermik suliaqarnerup aaqqissuussaananeranni peqqusissutit inerteqqutillu nalunaarutigineqartut pillugit ilisimatinneqartarnissaasa qulakkeerneqarneranut aalajangersagaq iluaqutaassaaq, taamatullu Sullivinnik Nakkutilliisoqarfik peqqusissutit il.il. naammassinissanut sullivinni ataasiakkaani qanoq iliortoqarsimanersoq paasisstissanik pissarsisinnaassaaq.

#### *§ 79-imut*

Imm. 1-imut

Aalajangersagaq nipangiussisimasussaataaneq pillugu sulineranut peqqussutinik ersarinnerusunik tapertaqartinneqarsinnaavoq.

Imm. 2-mut

Aalajangersakkami Sullivinnik Nakkutilliisoqarfimmi sulisut tamarmik, ilanngullugit pisortat, pineqartunut ilaapput.

Inuit inuttut kinguneqartitsivigineqarnissamik soorallutik Sullivinnik Nakkutilliisoqarfimmut sullivinni avatangiisinut inatsisip unioqqutinneqarneranik oqariartuuteqannginnissaat, aalajangersakkami pitsaaliorneqarpoq.

Aalajangersagaq imm. 1-imi maleruagassanik annertusititsissutaavoq. Aalajangersagaq taamaalilluni, takuuk imm. 1, Kalaallit Nunaanni pinerluttulerinermut inatsimmi § 50 atorlugu pineqaatissiivigineqarsinnaavoq.

#### *§ 80-imut*

Imm. 1-imut

Suleqatigiinnermut maleruagassat aamma atugassarititaasut, oqartussaasunut allanut nakkutilliinermut ikiuunnissamut pisussaaffeqarnermik aamma nakkutilliisunut oqartussaasunut allanut taakkua maleruagassiaasa atuutsinnerannut ikiuunnissamut

pisussaaffeqarnermik, imaqarsinnaapput. Suleqatigiinneq pillugu atugassarititaasut, ilanngullugit annertussusaat killissalersorneqarnerilu, kaajallaasitani imaluunniit oqartussaasut akornanni suleqatigiinnissamut isumaqatigiissutini aalajangersarneqarajuttassapput.

Imm. 2-mut

Aalajangersakkami Sullivinnik Nakkutilliisoqarfik, inatsimmi § 68, nr. 8-mi aalajangersakkat saniatigut, qinngornernut inatsimmi maleruagassanik nakkutilliissasoq pillugu isumaqatigiissuteqarnissamut Sullivinnik Nakkutilliisoqarfik aamma peqqissutsimut oqartussaasut periarfissinneqarput.

Isumaqatigiissummut taamaattumut assersuutinut ilaasinnaavoq napparsimavinni nakkutilliinermut atatillugu. Sullivinnik Nakkutilliisoqarfiup § 68, nr. 8 naapertorlugu sulisartunut tunngatillugu qinngornernut inatsisunik nakkutilliisuusaaq. Nakkutilliinermi tassani ilaatigut nakorsat aamma peqqissaasut, qinnguartaasarfinni sulisut, pineqartunut ilaapput. Pisumi tassani Sullivinnik Nakkutilliisoqarfiup innuttaasunut allanut tunngatillugu qinngornernut inatsisip malinneqarneranik nakkutilliisuunera iluaqutaasinnaavoq, assersuutigalugu qinngornernut inatsit napparsimasunut tunngatillugu qinnguartaasarfinni malinneqarnerasoq. Aalajangersakkami Sullivinnik Nakkutilliisoqarfiup aamma tamanna nakkutigissagaa pillugu peqqissutsimut oqartussaasut aamma Sullivinnik Nakkutilliisoqarfiup isumaqatigiissuteqarsinnaanerit periarfissinneqarpoq.

### *§ 81-imut*

Imm. 1-imut

Suliakkiisarfiit marluk atuutissapput, taamaalilluni Sullivinni avatangiisit pillugit naammagittaalliortarfik Sullivinnik Nakkutilliisoqarfiup aalajangiinerinut naammagittaalliortarfiulluni. Sullivinnik Nakkutilliisoqarfiup aalajangiineri Naalackersuisunut imaluunniit allaffissornermi oqartussaasumut allamut naammagittaalliuutigineqarsinnaanngillat. Sullivinnik Nakkutilliisoqarfiup aalajangiineri taamaalilluni taamaallaat Sullivinni avatangiisit pillugit naammagittaalliortarfimmud naammagittaalliuutigineqarsinnaapput.

Aalajangiineq pineqartumut nalunaarutigineqarneranit sapaatit akunnerini 6-ini naammagittaalliornissaq killeqartinneqassaaq.

Sullivinnik Nakkutilliisoqarfiup naammagittaalliummik sularinninnermini suliassanik sularinninnermut suleriaatsinullu piumasagaatit naammassisimanerai, Sullivinni avatangiisit

pillugit naammagittaalliortarfiup isummerfigissavaa. Ilanngullugu nalilersorneqassaaq aalajangersakkanut aalajangiinermut pineqartumut nakkutilliisunut periarfissiisunut innersuussisoqarsimanersoq, aammalu piffissamut killiliussat il.il. malinneqarnersut misissorneqassaaq.

Sullivinnik Nakkutilliisoqarfiup aalajangeereernerata kingorna suliaq pillugu paasissutissanik nutaanik, nutaamik suliarinninnissamut tunngavilersuutaasinnaasunik, saqqummersorneqarsimanersoq, Sullivinni avatangiisit pillugit naammagittaalliortarfik naliliissaaq. Paasissutissat nutaat nutaamik suliarinninnissamut tunngavilersuutaasinnaassappata, paasissutissat suliap inerneranut pingaaruteqarsinnaasimassaaq. Suliami paasissutissanik nutaanik saqqummertoqarpat, suliami aalajangiinermut pingaaruteqarsinnaanngitsunik, paasissutissat nutaamik suliarinninnissamut tunngavilersuutaasinnaanngillat.

Kiisalu suliap sulinermi avatangiisit iluaniittut Sullivinnik Nakkutilliisoqarfiup nalilersortassavai.

#### Imm. 2-mut

Naammagittaalliuutit Sullivinnik Nakkutilliisoqarfimmut nassiunneqassapput. Nassuiaatini nalinginnaasuni allassimasutut, Sullivinnik Nakkutilliisoqarfiup aalajangiinini aalajangiuisimaannarpagu, naammagittaalliuut Sullivinni avatangiisit pillugit naammagittaalliortarfimmut ingerlateqqinneqassaaq.

#### Imm. 3-mut

Aalajangersakkami suliap, Sullivinni avatangiisit pillugit naammagittaalliortarfiup suliarisaata inernerisinnaasai marluk aalajangersarneqarput. Naammagittaalliuuteqartarfik isumaqarpat kukkusoqarsimasoq imaluunniit suliami paasissutissanik nutaanik saqqummertoqarpat, suliaq Sullivinnik Nakkutilliisoqarfimmi nutaamik suliarineqartussanngorlugu utertinneqarsinnaavoq.

Sullivinni avatangiisit pillugit naammagittaalliortarfik isumaqarpat kukkusoqarsimanngitsoq ilaalu ilanngullugit, Sullivinnik Nakkutilliisoqarfiup aalajangiinera attatiinnarneqassaaq.

#### Imm. 4-mut

Ingerlaannaq iluarseeqqusissuteqarnerup naammagittaalliuutigineqarnera kinguartitsinermik sunniuteqassanngilaq. Siunertaavoq suliffeqarfiit naammagittaalliornissamut periarfissamik aammalu naammagittaalliornissamut killissaliussanik annertunerpaamik atorluaallutik, piffissami sivisunerusumi Sullivinnik Nakkutilliisoqarfiup peqqusissutaannik kinguartitsisinnaassanngitsut.

Imm. 6-imut

Naammagittaalliornissamut piffissaliussaq pillugu aalajangersakkap naapertuutinngitsunik sunniuteqarsinnaanera, aalajangersakkami pitsaaliorneqarpoq.

Imm. 7-imut

Aalajangersakkami suliffeqarnermi illuatungeriit, Sullivinni avatangiisinut siunnersuisooqatigiinni ilaasortaataqartut, akuutinneqarnissaat periarfissinneqarpoq.

Imm. 8-imut

Aalajangersakkammi Sullivinni avatangiisit pillugit naammagittaalliortarfiup immikkut ilisimasalinnit, soorlu assersuutigalugu maleruagassat atuuttut nassuiarneqarnissaat pillugu, oqaaseqaateqartitsinissaat periarfissinneqarpoq.

### *§ 82-imut*

Imm. 1-imut

Sullivinni avatangiisinut siunnersuisooqatigiit katillugit 3-nik ilaasortaqarput. Atuisartoqarnermut Unammilleqatigiinnermullu Aqutsisoqarfimmi Aqutsisoqarfimmut pisortaq imaluunniit sinniisussaq taassuma toqqagaa, siulittaasuvoq, tamatumani naammagittaalliortarfimmi suliassanut ilisimanninneq qulakkeerneqarpoq, taamatullu tamatuma Atuisartoqarnermut Unammilleqatigiinnermullu Aqutsisoqarfimmi inissisimanissaa qulakkeerneqarluni.

Aalajangersakkami aalajangersarneqarpoq ilaasortat marluk Sullivinni avatangiisinut siunnersuisooqatigiinnit toqqarneqassasut. Suliap naammagittaalliuutigineqartup aalajangiiffigineqarneranut taamaaliornikkullu inatsisip allaffissornikkut naammassineqarnissaanut siunnersuisooqatigiit immersueqataanissamut periarfissaqarnerat, aalajangersakkami qulakkeerneqassaaq.

Imm. 2-mut

Ilaasortaq piffissap ingerlanerani tunuarnissamik kissaateqarpat, aaqqissuussaaneq attuumassuteqartoq ilaasortamik nutaamik toqqaasussaassaaq. Ilaasortannagortup piffissamut ilaasortaaffissaanut, ilaasortat sinnerisa ilaasortaaffissaat malinneqassaaq, taamaalilluni piffissat ilaasortaaffissat ataatsikkut naasussaassallutik.

#### Imm. 3-mut

Aalajangersakkami Sullivinni avatangiisit pillugit naammagittaalliortarfimmi aalajangiinerit qanoq ingerlasarnissaat aalajangersarneqarpoq. Siulittaasoq naliliippat ataatsimiinnissaq naleqqutissasoq imaluunniit suliassat naammappata naammagittaalliuuteqartarfiup naapillutik ataatsimiinnissaannut tunngavilersuutaasinnaalluni, aalajangersakkami Sullivinni avatangiisit pillugit naammagittaalliortarfiup ataatsimiissinnaanera periarfissiissutigineqarpoq. Sullivinni avatangiisit pillugit naammagittaalliortarfimmut siulittaasup tamatuma saniatigut suliap allakkatigut taasinikkut aalajangiiffigisassanngorlugu ilaasortanut saqqummiunniarlugu nassiunnissaanut periarfissaqarpoq, tamatuma kingorna ilaasortat saqqummiussinermut oqaaseqaateqarsinnaallutik. Taasineq allakkatigut imaluunniit e-mailikkut saqqummiussinerup nassiunneratigut pisinnaavoq. Saqqummiussineq naammassippat, ilaasortat oqaaseqaatigisimasinnaasaat aalajangiinermi allanneqassapput, tamatuma kingorna taanna suliami attuumassuteqartunut nassiunneqassalluni. Suliassat ataasiakkaat sukkasuumik sularineqartarnissaat qulakkeerniarlugu allakkatigut taasinissamut periarfissaqartitsisoqarpoq, taamaalillutik suliassat tullianik ataatsimiinnissamut utaqqisussaassanatik.

#### Imm. 4-mut

Aalajangersakkami aalajangersarneqarpoq Sullivinni avatangiisit pillugit naammagittaalliortarfik ukiumut minnerpaamik ataasiarluni naapeqatigiilluni ataatsimiittassasoq, tassani ilaasortaq ineriartornermut nutaanerpaamut malinnaatinneqarnissamik periarfissaqassallutik, kiisalu suliassat aalajangiiffigineqartut qanoq ineriartorsimanersut pillugu ilisimatinneqartassallutik. Naapeqatigiilluni ataatsimiittarnissaq pillugu piumasqaat video atorlugu ataatsimiinnikkut naammassineqarsinnaavoq.

#### Imm. 5-imut

Aalajangersakkami aalajangersarneqarpoq Sullivinni avatangiisit pillugit naammagittaalliortarfiup suleriaasissaa Naalakkersuisunit aalajangersarneqassasoq.

#### Imm. 6-imut

Aalajangersakkami aalajangersarneqarpoq Sullivinni avatangiisit pillugit naammagittaalliortarfiup allattoqarfeqarnera Atuisartoqarnermut Unammilleqatigiinnermullu Aqutsisoqarfimmit isumagineqassasoq.

#### § 83-imut

Pinerluttulerinermut inatsimmi pineqaatissiissutissat ilaatigut inatsisip malinneqarnissaata pingaaruteqarnerata erseqqissarnissaata kissaatigineqarnera aallaavigalugu, aalajangersarneqarput. Akileeqqusissuteqarnermut killissaliussat ilaatigut suliaasaqarfimmi inatsisip malinnissaanut kajumissuseqarnermik malitseqartumik, akileeqqusissutit suliffeqarfinit malugineqarnissaata kissaatigineqarnera aallaavigalugu aalajangersarneqarput.

#### Imm. 1-imut

Pinerluttulerinermut inatsit pillaanissamut killissaliussanik imaqaangimmat, sullivinni avatangiisinut inatsisip unioqqutinneqarnerani pinerluttulerinermut inatsit naapertorlugu pineqaatissiisoqarsinnaanera, taamaallaat innersuussutigineqarpoq. Tamatumani siunertaavoq, sullivinni avatangiisinut inatsisip unioqqutinneqarnera inuiaqatigiinnit ilungersunartutut isigineqartut oqariartutigineqarnissaa, aammalu suliffeqarfinnik maleruagassanik atuuttunik naammassinninnissamut kajumissuseqalersitsisinnaasumik, akileeqqusissuteqarnerit malugineqarsinnaasumik annertussuseqarnissaasa pingaaruteqarnerata erseqqissarneqarnissaa.

Pinerluttulerinermut inatsimmi § 121 malillugu pineqaatissiissutissap annertussusilerniarnerani unioqqutitsinerup suussusaa eqqarsaatigineqassaaq. § 83, imm. 3-imi aamma 4-imi aalajangersakkat, suut pisutut immikkut sukannernerulersitsisussatut isigineqassanersut, erseqqinnerusumik nassuiaanermut takussutissaapput.

#### Imm. 2-mut

Imm. 2 malillugu unioqqutitsinerit § 83, imm. 1-imi taaneqartut arlaat ilungersunartumik inunnik ajoqusertoqarluni imaluunniit toqumik kinguneqartumik ajutoornermik malitseqarsimappat, pinerluttulerinermut inatsimmi pineqaatissiissutissamik annertussusiliinermit, annertuumik sukannernerusumik pisutut isigineqassaaq.

Pinerluttulerinermut inatsimmi pineqaatissiissutissaaq akileeqqusissutitut aalajangersarneqarpat, § 83, imm. 1 malillugu akileeqqusissutip marloriaatinngornissaa siunnerfigineqarpoq. § 83, imm. 2-mi pinerluttulerinermut inatsimmi pineqaatissiissutissamik aalajangersaanissaaq, suliami ataasiakkaami pisut tamaasa aallaavigalugit ataasiakkaat unioqqutitsinerannik eqqartuussivimmi ataasiakkaatigut nalilersuineq apeqqutaassaaq. Annertussusiliineq, suliami pineqartumi pisut immikkut ittut tamanna pisussaatiPASSUK, annertunerusumut annikinnerusumullu nikerarsinnaavoq.

Oqaaseq »ilungersunartumik inuit ajoqusernerat« assersuutigalugu tassaasinnaavoq avammik kipisineq, saarninik aserortoqarnera, ammarterluni ajoqusernerit imaluunniit timip ilarujussuani neriorneqarneq aamma toqunartumeertinneq. Ajoqusernerit soorlu uluttoorneq kiisalu inussani isikkallu inuaanni napinerit, nalinginnaasumik ilungersunartumik inuit



ajouseratut isigineqassanngillat. ”ilungersunartumik inuit ajoqusernerat” atuunnersoq ataasiakkaatigut nalilersuinermi eqqartuussiviit aalajangiisussaapput.

Unioqutitsinerit annikinnerusumik inunnik ajoquseratoqarluni sulitilluni ajutoornernik kinguneqartut, § 83, imm. 4, nr. 2-mi pineqartunut ilaapput. Pinerluttulerinermut inatsimmi pineqaatissiissutissat § 83, imm. 4, nr. 2-mi pisut sukannernerulersitsisut innersuussutigalugit, sukannernerulersinneqarsinnaapput.

Imm. 3-mut

Sulisut sullivinni avatangiisinut inatsimmi § 26 malillugu sulisitsisup sullivinni avatangiisinut inatsimmik naammassinnissinnaanissaanut, peqataanissamut pisussaaffeqarput. Tamatuma kingunerisaanik suliassaqarfimmik iluanni sulinermi pissutsit isumannaallisaanikkut peqqinnissakkullu tamakkiisumik isumannaatsuunissaannut sulisut peqataasussaapput, ilanngullugu iliuusissat isumannaallisaanerup peqqinnissallu siuarsarnissaannut aalajangiunneqartut siunertaasut malillugit atorsinnaanerat.

Sulisitsisup kapitali 3 malillugu pisussaaffini naammassisimappagit, sulisup suliassaqarfiit § 83, imm. 3-mi allassimasut iluanni sullivinni avatangiisinut inatsit piaaraluni imaluunniit mianersuaalliorujussuarluni unioqqu Tippagu, § 83, imm. 3-p kingunerisaanik, § 83, imm. 1, nr. 1 malillugu pinerluttulerinermi inatsimmi pineqaatissiissutissamik annertussusiliiniarnermi, tamanna pisutut sukannernerulersitsisutut isigineqassaaq. § 83, imm. 3-p atuuffissai, unioqutitsinernut aalajangersakkami allassimasunut, pingaartumik sullivinni avatangiisinut inatsimmi § 38-p suliaqarnerup ingerlanneqarneranut tunngasup, § 42-p teknikkikkut atortunik atuinermut tunngasup aamma § 44-p akuutissanik atortussanillu navianartunik atuinermut tunngasup, unioqutinneqarnerannut tunngassuteqartumut ataqatigiissillugu, sullivinni avatangiisinut inatsimmi § 26-p unioqutinneqarneranut tunngassuteqarpoq.

Sulisitsisup sullivinni avatangiisinut inatsimmi kapitali 3-mi pisussaaffini tamaasa naammassisimagai, ilanngullugit sulisitsisup sulinermi pissutsit isumannaallisaanikkut peqqinnissakkullu tamakkiisumik isumannaatsuunissaat isumagisimagaa, sulisitsisup sulisuni tamakkiisumik ilitsersorsimagai, kiisalu sulineq isumannaallisaanikkut peqqinnissakkullu tamakkiisumik isumannaatsumik ingerlanneqartoq sulisitsisoq sunniuteqarluartumik nakkutilliisimasoq, sulisumut pinerluttulerinermut inatsimmi akisussaatsinerup sukannernerulersinneqarneranik atuinissamut piumasaqaataavoq.

Imm. 3, nr. 1-imut

§ 83, imm. 3, nr. 1-imi sulisup niaqqumut illersuummik, skuunik isumannaallisakkanik, isarusanik isumannaallisakkanik, isumannaallisaammik allunaasamik imaluunniit aaqatinik

il.il. atuisimanani, tamannalu sullivinni avatangiisinut inatsimmi pisussaaffigineqarluni, pisut pineqartunut ilaapput.

Aalajangersakkamik atuinissamut tunngavissarititaavoq, illersuutissat sulisunut atugassiissutigineqarsimasut, atortut sulisunut ataasiakkaanut naleqqussagaasut imaluunniit naleqqussarneqarsinnaasut, atortut aserorsimangitsut, aammalu atortut sullivimmiittut il.il.

Imm. 3, nr. 2-mut

Nr. 2-mi sulianik ingerlatitsinermut silaannarissarfiliussanik (immikkoortuni milluaasoq) atuinnginneq, imaluunniit milluaasoq unitsinneqarsimappat, pineqartunut ilaapput.

Aalajangersakkamik atuinissamut tunngavissarititaasoq, milluaasoqarfiit il.il. ikkussorneqarsimasut aammalu atornissaat tamakkiisumik isumannaatsuusoq.

Imm. 3, nr. 3-mut

Nr. 3-mi pisut illersuissutitut atortut atorunnaarsinneqarlutik, piiarneqarlutik imaluunniit allatut atorineqaratik, pineqartunut ilaavoq, ilanngullugit isumannaallisaanermut iliuusissat unitsinneqartut, allanngortinneqartut imaluunniit nuunneqartut imaluunniit inissaminnut inissinneqanngitsut.

Aalajangersakkamik atuinissamut tunngavissarititaavoq, illersuissutitut atortut imaluunniit isumannaallisaanermi iliuutsit atorineqarsinnaasut, eqqortumik ikkunneqarsimasut, atorluarsinnaasut il.il.

Imm. 3, nr. 4-mut

Nr. 4-mi pineqarput ersarissumik illersorneqarsinnaanngitsumik suleriaaseqarnerit, sulinermi periaatsinik, pingaartumik sulinerup ingerlanneqartarnera pillugu, teknikkikkut atortunik atuinissaq pillugu maleruagassat malillugit sulinermi periaatsinik isumannaatsunik atuinissaq pillugu piunasaqaatit sulisunit malinneqaratik, ilanngullugu teknikkikkut atortut siunertaasoq malillugu atorineqassasut aammalu akuutissanik atortussanillu atuneq pillugu, sulinerup pineqartup sullivinni avatangiisitigut isumannaatsumik ingerlanneqarsinnaanissaata qulakkeernissaa siunertaralugu aalajangersagaasut.

Unioqqutitsinerit makkununga tunngassuteqarsinnaapput:

- Teknikkikkut atortunik peqarfiusuni oqimaatsunik atortorissaaruteqarani passussineq.
- Illersorneqarsinnaanngitsumik qaleriiaarineq /usilersorneq, taamaalilluni uppissinnaanerit aarlerinaateqalerluni.

- Nakkaanaveeqqutinik kukkusumik atuineq, assersuutigalugu kalunnernut taarsiullugu allunaasamik atuineq.
- Elevatorip atupilunneqarnera.
- Teknikkimut atortunik sulinermit naleqqutinngitsunik atuineq.
- Nunami sulinermi qerattarsaasiinnginnerup, sulliveqarfeqannginnerup il.il. malitsigisaanik nakkaasinnaanerata aarlerinaateqarnera.
- Inerteqquteqarnermik unioqqutitsineq, assersuutigalugu inunnik assartuinermit sanaartornermi kivitsissutinik atuinissamik inerteqquteqarneq.
- Ikittaatini matoqqasuni (ikittaataasivinni), imerpalasunik ikissinnaasunik sinnikunik imaqartuni, svejserineq.
- Innaallagiasq qiminnagu sulineq.
- Akuutissanik atortussanillu, assersuutigalugu annertuumik tassangaannartumik toqunartoqartunik, illersorneqarsinnaanngitsumik sulineq.

Aalajangersakkamik atuinissamut tunngavissarititaavoq, sulisut sulinermi periaatsinut isumannaatsunut eqqortunut ilitserorneqarsimasut, aammalu tamanna sulisitsisup nakkutigisimagaa.

#### Imm. 4-mut

Sulisut unioqqutitsineranni pisunik sukannernerusunik naliliineq § 83, imm. 3, nr. 1-4 malillugu pissaaq, taannalu tamakkiisuvoq.

Bestemmelsen i § 83, imm. 4, nr. 2-mi aalajangersagaq, inunnik ajoqusertoqarneranik malitseqartumik, ajoquserneq § 83, imm. 2-mi pineqartunut ilaasariaqarani ilungersunartuunani, sulitilluni ajutoortoqarsimatillugu pisuni atorneqassaaq. § 83, imm. 2 malillugu akileeqqusissutit, § 83, imm. 4, nr. 2-mi pisut sukannernerusut innersuussutigalugit, qaffatsinneqarsinnaanngillat.

#### Imm. 5-imut

Sullivinni avatangiisinut inatsimmi kapitali 9-mi maleruagassanik immikkut ittunik arlalinnik, inuusuttunik 18-it inorlugit ukiulinnik illersuisussanik, aalajangersaasoqarpoq. Inuusuttut taamaallutik sullivinni avatangiisinut inatsit malillugu immikkut illersorneqarput. Meeqqat inuusuttullu sulisartutut inersimasutut misilittagaqartuusannginnerannut aammalu taamatut ilinniagaqarsimasarnerisa qaqutigoorneranut, tamanna attuumassuteqarpoq. Taamaattumik taakkua immikkut sunnertiasuupput aammalu immikkut annertuumik aarlerinartorsiortarlutik.

Aalajangersakkami oqariartuutigineqarpoq inuusuttut 18-it inorlugit ukiullit immikkut illersorneqarnissamik pisinnaatitaasut. Inuusuttut 18-it inorlugit ukiullit sullivinni avatangiisinut inatsisip unioqqutinneqarneranut atatillugu sulitinneqarsimappata, aammalu

inuunermut imaluunniit peqqissutsimut ajoqusiisoqarsimappat imaluunniit tamatumunnga navianartorsiortitsisoqarsimappat, tamanna immikkut ilungersunartumik unioqqutitsinertut isigineqartariaqarpoq, tamannalu pineqaatissiissutissap annertussusilerneqarnerani takuneqarsinnaassaaq.

Imm. 6

Aalajangersakkami siunertaasoq tassaavoq, aningaasaqarnikkut pineqaatissiineq, immikkuullarissunik pitsaaliuinissamik aammalu nalinginnaasunik pitsaaliuinissamik eqqarsaateqarnerup, inatsimmi isumannaallisaanermut peqqinnissamullu piunasaqaatit pilliutigalugit sipaaruteqarniarluni, inatsimmik unioqqutitsinissamik sumilluunniit kajumissaarutitaqartitsinnginnissaa, aallaavigalugu aalajangersarneqassaaq.

Tassunga atatillugu erseqqissarneqartariaqarpoq, suliffeqarfiit inatsimmik malinnittut, inatsimmik malinninnermini, suliffeqarfinnut inatsimmi piunasaqaatinik qasukkartitsisunut sanilliullugu, aningaasaqarnikkut taamaalillunilu unammilleqatigiinnikkut ajornerusumik inissisimatinneqanngimmata.

Taamaattoqarpat iluanaarutit arsaarinnissutigineqarsinnaasut tassaapput aningaasaqarnikkut iluaqutissartaasut inatsimmik unioqqutitsisup pissarsiarisimasai. Iluanaarutit inatsimmik unioqqutitsinermut qanimut ataqatigiissinneqassapput, takuuk pinerluttulerinermut inatsimmi § 166-imi »pinerluttuliornermi iluanaarutit« oqaaseqatigiiliornerat. Taamaattoq pissarsiarineqartut inatsimmik unioqqutitsinerup toqqaannangitsumik malitsigisaanik pisimagaluartut, ataqatigiissitsineq pisariaqartoq atuuppoq.

Inatsimmik unioqqutitsinerup kingorna missiliuilluni iluanaarutininik arsaarinnissuteqarsinnaanermut tunngavilersuutaasoq, pinerluttulerinermut inatsimmi pineqaatissiissutinut tunngavilersuutaasup assigaa. Taamaattumik iluanaarutininik arsaarinninneq pillaanertut ittunik isiginninneq aallaavigalugu atorneqarsinnaavoq, taamaalilluni aningaasat qanoq annertutigisut arsaarinnissutigineqassanersut eqqarsaatigisassat tamarmik pingaaruteqarsinnaallutik. Ilaatigut inatsisunik unioqqutitsisumik pissarsiarineqartunik arsaarinnissuteqarneq aamma akileeqqusissut, pissarsiassanik siunertaarneq imaluunniit pissarsisimaneq eqqarsaatigalugu aalajangersarneqartoq, assigiinngissuteqassapput.

§ 83, imm. 6 malillugu aamma arsaarinninneq pisimanngippat, aningaasaqarnikkut iluaqutissarsinerup pissarsiarineqartup imaluunniit siunertarineqartup annertussusaa eqqarsaatigineqassaaq.

Imm. 7

Imm. 7-imi Kalaallit Nunaanni pinerluttulerinermut inatsimmi § 13, peqataasut akisussaatinneqarnerannut tunngasoq, innersuussutigineqarpoq.

Suliaqarnermi inunnut sullivinni avatangiisinut inatsisip unioqqutinneqarneranut peqataasunut pinerluttulerinermi inatsimmi pineqaatissiisoqarsinnaassanersoq, tamannalu qanoq annertutigisumik pissanersoq, siusinnerusukkut nalornissutigineqartarpoq. Tamanna tunngavigalugu aalajangersakkami erseqqissarneqarpoq, pinerluttulerinermut inatsimmi inatsisini immikkut ittuni allani pisartut assigalugit, peqataaneq pillugu aalajangersakkat nalinginnaasut, sullivinni avatangiisinut inatsimmi taamaaqataanik atuutissasut.

Aalajangersagaq aamma inatsimmi kapitali 3-mi akisussaatinneqartussat allattorneqarnerisa tamakkiisuunnginneranut ataqatigiissillugu isigineqassaaq.

Peqataanermut akisussaasuuneq aallaqqaammut inunnut immikkut – aningaasaqarnikkut imaluunniit allatigut – suliffeqarfimmut atassuteqartunut imaluunniit soqutigisaqartunut, assersuutigalugu aktiaatillit assigisaallu, atorneqartussatut eqqarsaatigineqarsinnaassaaq.

Tunngaviatigut peqataanermut akisussaasuuneq aamma kapitali 3-mi inuit immikkut allattorneqartut (sulisisoq, sulisunut aqutsisoq, suliffeqarfimmi aqutsisoq) pisussaaffinnik inuit taamatuttaaq kapitali 3-imi pineqartunut ilaasut pisussaaffigisaannik unioqqutitsinermut peqataasunut atorneqarsinnaassaaq. Suliaqarnermi akisussaasuuneq taamaattoq pisuni immikkuullarissuni taamaallaat atorneqarsinnaassaaq, assersuutigalugu pineqartut nalinginnaasumik suliarisartakkaminut sanilliullugu nalinginnaasuunngitsumik pissusilersorpat.

Imm. 8-mut

Aalajangersagaq pinerluttulerinermut inatsit malillugu akisussaasuunerup uparuarnissaanut uparuaanissamut piffissaliussanut tunngassuteqarpoq.

Aalajangersakkami pilersuisuusut, innaallagissamik ikkussuisartut, iluarsaassisartut aamma pilersaarusiortartut allallu pillugit suliani ukiunik 5-inik pisoqalisoornissamut killissaliussamik aalajangersaasoqarpoq.

Teknikkikkut atortunik pilersuinermi aamma ikkussuinermi, assersuutigalugu maskiinanik, imaluunniit akuutissanik atortussanillu pilersuinermi, pilersuutigineqartoq isumannaallisaanikkut amigaateqartoq taamaalillunilu isumannaatsumik sananeqarsimanissaa, aaqqissugaanera, pitsaassusaa, assartorneqarnera il.il. pillugit avatangiisinut inatsimmi isumannaatsuutitsinissamut aalajangersakkat malinneqarsimangitsut, paasineqarnissaanut piffissaq siviisoq ingerlasinnaavoq.

Sullivinnik Nakkutilliisoqarfik aamma unnerluussinermut oqartussaasoq, akuutissamik imaluunniit atortussamik imaluunniit teknikkikkut atortumik, maskiinaasartumik, isumannaallisaanikkut amigaateqartumik pissuteqartumik inunnik ajutoortoqarneranut ataatillugu unioqutitsinernut taamaattunut aatsaat paasisaqalertarput.

Assersuutigalugu illuliornernik sanaartornermillu suliaqarnermut imaluunniit tunisassiorfimmu ataatillugu sanaartugassamik pilersaarusiornermi imaluunniit siunnersuinermit, amerlanertigut sanaartornissamik pilersaarusiornermi/siunnersuinermit, suliassap piviusunngortinneqarneranut, piffissaq sivisujaartoq ingerlaqqaartarpoq. Oqartussaasut suliaqarnermi aatsaat suliassap piviusunngortinneqarnerani imaluunniit suliassap naammassisup ingerlanneqalernerani, inunnik ajoqusertoqarluni sulitilluni ajutoortoqarpat imaluunniit Sullivinnik Nakkutilliisoqarfiup nalinginnaasumik nakkutiginnilluni takusaaneranut ataatillugu, sanaartugassamik pilersaarusiornermi imaluunniit siunnersuinermit sullivinni avatangiisinut tunngasut eqqarsaatigineqarsimangitsut, eqqumaffigilertussaavaa.

Pilersuisut, iluarsaassisartut, pilersaarusiortartut allallu akisussaasuunerat pillugu suliani paasissutissiineq aamma amerlanertigut annertuumik piffissamik atuiffiusarpoq. Tamanna pissutsinik arlalinnik pissuteqarpoq:

Siullernik kina pilersuisuunersaq, pilersaarusiortuunersaq il.il. aammalu taanna sumi angerlarsimaffeqarnersaq erseqqinnerusumik misissorneqartussaavoq. Aappaattut suliaq taamaattoq erseqqinnerusumik amerlanertigullu piffissamik atuiffiusumik misissorneqartariaqartussaavoq, ilanngullugu amigaataasoq paasineqartoq pilersuisunut allanullu akisussaaffiliiffiussanersaq misissorneqarnera. Pilersuisut, pilersaarusiortut allallu akisussaaffeqassappata, kinaassusersiunngitsumik akisussaasoqartoq uppersarneqarsinnaassasoq tunngavissarititaavoq. Kiisalu pingajuattut teknikkikkut malitassanik Sullivinnik Nakkutilliisoqarfiup politiinut nalunaarutiginninnissaq pillugu aalajangiinnginnerani erseqqinnerusumik misissorneqartussanik arlalinnik peqarsinnaavoq.

#### *§ 84-imut*

Aalajangersagaq malillugu sulisitsisumut akisussaasuutitsinissamut, unioqutitsisoqarsimasoq, aammalu suliffeqarfimmi inuk ataaseq imaluunniit arlallit imaluunniit suliffeqarfik piaarluni imaluunniit mianersuaalliorujussuarluni pissarsisimasoq, tunngavissaritinneqassaaq.

Sulisitsisup pinerluttulerinermut inatsit malillugu akisussaasuutinneqarnissaanut, sullivinni avatangiisinut inatsimmik unioqqutitsinissamut nammineerluni iliuuseqarsimassasoq piunasaqaataanngilaq.

Imm. 2-mut

Imm. 2-mi, inunnik annertuumik ajoqusertoqarluni imaluunniit toqumik kinguneqartumik ajutoornermik malitseqartumik unioqqutitsisoqarpat, sulisitsisoq akileeqqusissummik qaffasinnerusumik pineqaatissinneqarsinnaasoq, ersarissumik inatsisini tunngavissaqarnera qulakkeerneqarpoq.

Imm. 3-mut

§ 84, imm. 3-p atuunnerani, sullivinni avatangiisinut inatsimmi § 84, imm. 1 malillugu sulisitsisup pinerluttulerinermut inatsit malillugu akisussaatinneqarnissaa, suliffeqarfimmi sulisut unioqqutitsisuullutik sullivinni avatangiisinut inatsisip unioqqutinneqarnerinut immikkut taagorneqartunut, atuutsinneqassanngilaq. Sulisitsisup sullivinni avatangiisinut inatsimmi kapitali 3 naapertorlugu pisussaaffini tamaasa naammassisimassagai, aammalu taamaakkaluartoq sulisup sullivinni avatangiisinut inatsimmut unioqqutitsisumik suliaqarneq ingerlassimagaa, piunasaqaataavoq.

Aalajangersakkami naatsorsuutigineqarpoq, piffissami unioqqutitsiviusumi suliaqarneq, sullivinni avatangiisinut maleruagassanut naapertuuttunik, inatsisit malillugit suliarineqarsimasinnaagaluartoq aammalu isumannaallisaanikkut peqqinnissakkullu tamakkiisumik isumannaatsumik pisimasinnaagaluartoq.

Tamatuma saniatigut sulisitsisup sulisut tamakkiisumik ilitsersorsimassavai, ilanngullugu isumannaallisaanermi iliuusissaasinnaasut atorneqarnissaat pillugu. Aammattaaq sulisitsisoq suliaqarnermut sunniuteqarluartumik nakkutilliisimassaaq.

Kiisalu aalajangersakkami naatsorsuutigineqarpoq, suliffeqarfik isumannaallisaanermut atortunik imaluunniit inuit illersuutissaannik il.il. pineqartunik suliffeqarfimmi sulisunut atugassiisimassasoq. Tamatuma atuunnerani atortut sulisunut ataasiakkaanut naleqqutissapput imaluunniit naleqqussarneqarsinnaallutik, atortut aserorsimassanngillat, atortut sullivimmiissapput il.il., illersuineranut atortut imaluunniit isumannaallisaanermut iliuusissat pissarsiarineqarsinnaallutik, eqqortumik ikkussorneqarsimallutik, atorsinnaallutik il.il., aammalu milluaasarfiit pisariaqartut il.il. ikkunneqarsimassapput aammalu atornissaat tamakkiisumik isumannaatsuussalluni.

Sulisup suliaqarnerup ingerlanneqarnerani sulisitsisup ilitersuutai malissimassanngilai, assersuutigalugu isumannaallisaanermut atortunik il.il., atugassiissutigineqartunik aammalu sullivimmiittunik atuinani.

Sulisitsisup pinerluttulerinermut inatsit malillugu akisussaasuuneranik piumasaqarnissaq pillugu aalajangersakkat atuuffissaat, unioqutitsinernut immikkut allatorneqartunut aamma § 83, imm. 3, nr. 1-4-mi taaneqartunut killeqarput.

Sulisitsisup pinerluttulerinermut inatsit malillugu akisussaaffeqarnerata killeqarnera pillugu aalajangersakkap atorneqarnissaanut, sulisoq piaaraluni imaluunniit mianersuaalliorujussuarluni iliuuseqarsimassasoq, piumasaqaataavoq. Sulisup mianersuaalliorluni iliuuseqarsimanera naammappoq.

#### *§ 85-imut*

Unioqutitsineq Kalaallit Nunaannut pinerluttulerinermut inatsit malillugu pineqaatissiinermik malitseqarsinnaappat, Naalakkersuisut imaluunniit Sullivinnik Nakkutilliisoqarfiup peqqussutinik aalajangersaasinnaanera aalajangersakkami periarfissiissutigineqarpoq. Aalajangersakkami allaffissornermut aalajangersakkat sunniuteqarluartumik atuutsinneqarnissaat ajornarunnaarsinneqarpoq.

#### *§ 86-imut*

Aalajangersakkami erseqqissarneqarpoq suliffeqarfinni aqutsisut allallu, sulisitsisunut pisut paarlattuanik, §§ 84, imm. 1, uniffik siulleq aamma 85, uniffiup aappaa malillugit kinaassusersiunngitsumik akileeqqusissummut akisussaatinneqarsinnaanngitsut, takuuk § 22.

Kikkut aalajangersakkami pineqartunut ilaanersut erseqqinnerusumik misissornissaanut § 22-mut nassuiaatit innersuussutigineqarput.

#### *§ 87-imut*

§ 87-ip atuunnerani ingerlatseqatigiiffiit il.il. (pisussaatitaallutillu pisinnaatitaasut) sullivinni avatangiisinut inatsit malillugu pinerluttulerinermut inatsit malillugu akisussaatinneqarsinnaapput. Pisussaatitaallutillu pisinnaatitaasut pinerluttulerinermut inatsit malillugu akisussaatinneqarsinnaanerat, § 84 malillugu sulisitsisut akisussaatinneqarsinnaanerattuulli, suliffeqarfiup iluani inuk ataaseq arlallilluunniit mianersuaalliorluni imaluunniit piaaraluni sullivinni avatangiisinut inatsimmik unioqutitsisimassasut, imaluunniit unioqutitsineq suliffeqarfimmit piliarineqarsimassasoq,



piumasaqaataavoq. Inuk aalajangersimasoq unioqqutitsinermut pineqartumut akisussaatinneqarsinnaassasoq piumasaqaataaangilaq. Pinerluttulerinermut inatsit malillugu akisussaatsineq taamaalilluni unioqqutitsinernut kinaassutsimik taasiviunngitsutut taaneqartartunut aammalu arlalinngortunut, tunngassuteqarpoq.

Suliffeqarfiit inummit pigineqartut anginerusut aamma pisortani sulisitsisut aammattaq sullivinni avatangiisinut inatsimmi § 87-imi pisussaataitaallutillu pisinnaatitaasunut taaguummi pineqartunut ilaapput.

Uniffiup aappaata malitsigisaanik, § 84, imm. 3 naapertorlugu sulisitsisup pinerluttulerinermut inatsit malillugu akisussaaffiata killeqarnera pillugu aalajangersagaq, taamaaqataanik ingerlatseqatigiiffinnut il.il. atuutissaaq (pisussaataitaallutillu pisinnaatitaasut).

#### *§ 88-imut*

Aalajangersakkami, inuusuttut 18-it inorlugit ukiullit Inatsisartut inatsisaanni maleruagassanut unioqqutitsisumik sulisinneqarpata, angajoqqaatut oqartussaasuusup akisussaaffeqarnera aalajangersarneqarpoq.

Akisussaaffeqarnermi tunngavissaritinneqarpoq angajoqqaatut oqartussaasuusup inatsisinut unioqqutitsisumik sulineq ilisimasimagaa.

Taamaalilluni aalajangersakkami inuusuttoq Inatsisartut inatsisaanni maleruagassanut unioqqutitsisumik sulinnginnissaa qulakkeerniarlugu, angajoqqaatut oqartussaasuusup sukannernerusumik akisussaasuutinneqarpoq. Tamanna assersuutigalugu tassaasinnaavoq piffissamut suliffiusumut maleruagassanut akerliusumik sulineq.

Aalajangersakkani inuusuttut immikkut oqimaatsunik sulinissamut illersorneqarnissaat pingaaruteqartoq erseqqissarneqarpoq.

#### *§ 89-imut*

Imm. 1-imut

Aalajangersakkami erseqqissarneqarpoq, Inatsisartut inatsisaat naapertorlugu akileeqqusissutit nunap karsianut tutsinneqassasut.

Imm. 2-imut

Aalajangersakkami, Inatsisartut inatsisaata malinneqarnera qulakkeerniarlugu, akileeqqusissuteqarnerit tulleriissaartut atornissaannut periarfissiisoqarpoq.

### *§ 90-imut*

Inatsisartut inatsisaata unioqquatinneqarnera pillugu suliassat Kalaallit Nunaanni Eqqartuussivimmi siullertut suliarinnittussami suliarineqartarnissaat naleqquttuusorineqarpoq. Tamanna aamma siusinnerusukkut sullivinni avatangiisit pillugit maleruagassat unioqquatinneqarnerat pillugu suliani pisarsimavoq.

### *§ 91-imut*

#### *Imm. 1-imut*

Inatsisartut inatsisaat aatsaat ulloq 1. juli 2018 atuutilissaaq, tamannalu suliassaqarfiup akisussaaffigilerlugu tiguneqarnissaanut naammattumik piffissaqartitsinissaq qulakkeerniarlugu pisariaqartutut isigineqarpoq.

#### *Imm. 2-mut*

Imartani sullivinni avatangiisit kapitali 11-mi aalajangersakkani maleruagassiivigineqarnerisa kingunerisaanik, aalajangersakkat taakkua aatsitassanut ikummatissanullu inatsimmi, siusinnerusukkut imartani isumannaallisaanermut peqqinnissamullu maleruagassiiviusimasut, atorunnaarsinneqarput.

#### *Imm. 3-mut*

Qinngornerit ioninngortitsisartut pillugit aamma qinngornernut illersuuteqarnissaq pillugu Inatsisartut inatsisaanni § 1, imm. 4-p atorunnaarsinneqarnerani, sulisartunut qinngornerit ioninngortitsisartut, qinngornerit ioninngortitsisartut pillugit aamma qinngornernut illersuuteqarneq pillugu Inatsisartut inatsisaanni maleruagassaqartinneqarpoq. Sullivinnik Nakkutilliisoqarfik sullivinni avatangiisinut suliassaqarfiup iluani qinngornerit aamma qinngornernut illersuuteqarneq pillugu Inatsisartut inatsisaanni piumasaqaatinut nakkutilliissaaq, takuuk § 68, imm. 1, nr. 8.

Sullivinnik Nakkutilliisoqarfik § 68, imm. 1, nr. 8-imi, takuuk § 81, imm. 1, nakkutilliisussaataanerup saniatigut qinngornerit ioninngortitsisartut qinngornernullu illersuineq pillugu Inatsisartut inatsisaannik piumasaqaanik nakkutilliinermi ikiuunnissamut Naalakkersuisunit peqquneqarsinnaavoq.

Peqqissutsimut oqartussat aamma Sullivinnik Nakkutilliisoqarfik aammattaq qinngornerit ioninngortitsisartut qinngornernullu illersuineq pillugu Inatsisartut inatsisaanni malittarisassat atorlugit annertusisamik nakkutilliineq pillugu suleqatigiinnissamik isumaqatigiissusiorsinnaapput, tak. § 80, imm. 2.

Imm. 4-mut

Aalajangersakkami nunami sullivinni avatangiisinut suliassaqarfiup maannamut maleruagassiivigineqarnera nalunaarummi aalajangersarneqartoq, nalunaarutinik nutaanik taarserneqarnissaasa tungaannut, atuutiinnarnissaa qulakkeerneqarpoq.

Aalajangersakkami siunertaavoq suliassaqarfimmi danskit maleruagassiineranit kalaallit maleruagassiinerannut ajornartorsiutitaqanngitsumik ikaarsaarnerup ingerlanissaanut iluaqusiinissaq.